

國家文物局

清代傳記叢書



明文書局印行

清代傳記叢刊·綜錄類③  
周駿富輯

碑

傳

集

(一)

卷一  
至四

(清)

錢儀吉纂錄



明文書局印行





序



於戲盛哉自天命以  
來王侯將相卿尹百  
執事碩儒才彥之名  
跡炳著於  
國史矣而金鑱石室

420  
之藏外人弗得見曩  
承乏會典之後幸獲  
展觀亦不敢私有寫  
錄今乃采集諸先正  
碑版狀記之文苟及  
地志雜傳得若干篇

畧依杜氏大珪焦氏  
竝之例以其時以其  
爵以其事比而厭之  
為若干卷其於二百  
年文獻之林不啻嶽  
之一塵海之一勺耳

果能口誦而心識焉  
可以考德行可以習  
掌故不徒飛文染翰  
為耳目之玩已也或  
一人之事雜見他書  
者同時之跡及其子

孫言行有可稱者間  
為增錄殿於本篇或  
論一事而臧否不同  
述一事而甲乙又不  
同或推挹過當或沿  
習忘反者亦往往有

之自知言者觀之固  
可考信而不惑也而  
要其大體主乎樂道  
人善以為賢士大夫  
畜德之助爰取湘東  
王之事以名之後有

得者當為續次云  
道光六年季春月嘉  
興錢儀吉定廬甫識





錢塘諸可寶景璽

後序

嘉慶二十一年江西漕項奏銷冊達戶部列其目有里民津貼銀米者按部例無有謂外吏之私徵也嚴詰之三以何年始以何年徵皆不能知惟雜舉乾隆以來漕督奏中嘗言之上溯雍正元年

諭旨亦嘗及之者以對部議以他省治漕皆無是願行之已久可無罷宜如舊徵而以其歲入解部備他用既定彙矣會予再莅雲南司檢舊牘見乾隆季年報部冊固有之縣歷數十年未嘗駁詰疑必有故今於其事之創始雖不可得詳既謂之津貼則必以濟運可知也若破除爲他用則運費不足而丁病州縣因以多取於下而民亦病且今將自乾隆以來盡追索之邪抑自今年始也進退皆無所據不若仍舊便尙書索綽羅公用子言更其彙而解部之議寢時道光三年也後數年讀李穆堂侍郎所爲即溫勤公墓誌其事乃大明白江右多山谿道險漕糧以小艇木筏盤運於是布里民津貼夫船費載於賦役全書康熙三十

八年得

旨江右所屬州縣多處山陬百姓自願貼費運米水次者聽著爲令當是時部臣亦嘗議停減總督范公與郎公先後疏爭之漕運賴以濟侍

耶之言如是竊幸前者持議不刺謬又以見舊章之當博攷而文字之益爲無窮也久之讀入旗通志范承勳耶廷極傳言之益詳時方輯諸家碑傳蒐蒐羅舊聞謂其有裨於實用也日奮不能以已遂書之以爲後序嘉興錢儀吉

碑傳集

類目 校刊記 沈吉上書行

總目 一卷

作者紀畧

引用書目 合一卷以上為首卷上下

宗室 二卷

功臣 分藩陽一國初二康熙朝二凡五卷

宰輔 分開國一明臣一康熙朝三雍正朝一乾隆朝三嘉慶朝一凡一

部院大臣 分國初二明臣一康熙朝六雍正朝三乾隆朝九嘉慶朝一

內閣九卿 三卷

翰詹 九卷

科道 六卷

曹司 三卷

督撫 分國初二康熙朝六雍正朝一乾隆朝四嘉慶朝一凡一十四卷

河臣 二卷

監司 分國初二康熙朝三雍正朝一乾隆朝四嘉慶朝一凡一十一卷

守令

分國初三

廉熙朝九

雍正朝二

乾隆朝六

嘉慶朝二

凡二十三

卷

校官

二卷

佐貳

雜職

一卷

武臣

三卷

忠節

六卷

逸民

四卷

理學

三卷

經學

六卷

文學

六卷

孝友

四卷

義行

一卷

方術

一卷

藩臣

一卷

列女

分賢明一

孝淑一

節操二

烈義四

貞潔二

台傳二

凡二十一

卷

附存文

一卷

以下為

末卷上下

集外文

一卷

碑傳類目

校刊記曰此一部爲類二十有五始天命紀元訖嘉慶朝止二百年中  
王公大夫士庶統一千六百八十餘人列女又三百三十餘人采文五  
百六十餘家都一百六十有四卷嘉興給事錢先生所纂錄也原編大  
指具詳序言名凡屢更定從今號萬意原委語在桐鄉沈吉士善登書  
中昔湘鄉太傅文正公序平江李氏著

國朝先正事略首及此書謂曾屬先生從子今侍郎應溥寫其目錄自  
別京師久從征役而此目錄冊者不可復覩序末又於尋訪錢氏遺書  
三致意焉庚寅孟春權按察使平湖朱觀察之榛言於布政使費筑黃  
公彭年勦議校刊費筑公因先生從孫青浦尹志澄來謁屬致全稿閏  
月書至發篋觀之則積稿草至六十有九冊續編五冊目錄一巨冊案  
題徵文乃知當時寫官眾多分鈔連綴其間敘次不侔有待釐定者開  
卷皆是貴筑公於是立編訂之例原編惟康熙朝大臣卷因  
世宗有本朝大臣以功則李之芳以德則湯斌爲首之諭故用李文襄  
冠功臣之首湯文正領大臣之前而以陸清獻張清恪繼之遵  
聖訓重從祀也自茲以外或依科目或稽卒年或夷攷其事其時排比  
先後無相奪倫其有重出者汰之錯見者移併之續得者散入而附合

之注刪而未乙去者刊落之有一人而互見兩類者百僅二三則於大  
題下明註之有文從節錄而非全載者亦於大題下明註之眉閒側裏  
朱墨標識審爲原筆分列注中者取資印證也錢氏先世碑傳數篇於  
禮無改名併者臨文不諱也又原編附存奏議雜文甚夥凡已見  
皇朝經世文編者今皆不錄而仍著其名於篇終示有專書可檢也至  
於傳寫譌攷理所不免難涉疑似一仍舊貫無逞臆妄改之失羣分類  
聚井如秩如矣四月幾望貴筑公舉全稿付局責可寶獨任理董之役  
鳩工開彫纔過四之一而貴筑公移官去未三月而計至觀察則遭  
太夫人憂歸里矣可寶兢兢守貴筑公例意黽勉卒業洎今寒暑四易  
而后全書告成功而觀察起復亦適來嗟夫何其難且幸哉去年秋可  
寶被薦至京師侍郎殷勤致詢謂先生此稿保全燹後流轉吳蜀不圖  
其梓行之迺在蘇局也夫文正公頻訪之而不必得其全貴筑公力傳  
之而不必見其成信乎物之顯晦有時事之無定而有定者固有天  
焉以爲之宰邪抑亦文正公所云借名人之碑傳存名人之事蹟地下  
達人傑士其靈爽不可終闕陰有相之者歟近今湘陰李氏有  
國朝耆獻類徵初編四百十六卷之刻搜羅別集止三百餘家而史館

列傳居大半視先生書之體裁闕正取舍謹嚴相去又不待論已敢記  
因由用諗世之善讀書者光緒十九年歲次昭陽大荒落日長至  
特旨發回江蘇五品銜儘先卽補知縣提調書局事宜錢塘諸可寶識

附沈吉士書

遲菊仁兄同年閣下昨得手復益佩納善之誠委作碑傳集跋語因病  
遷延至今纔一構思卽心下悸頭汗涔涔然手亦愈震不能握管想能  
諒之本書初編未爲定本及最後更名昭德文編之意見公所賜我伯  
舅子萬先生手札中登於咸豐乙卯丙辰閒從外兄元之茂才借觀始  
知其詳同治初元避地同寓滬上并借全稿讀之首冊恭錄  
列聖聖德神功碑別編爲卷益知所以重編改名之故今將刊播藝林  
誠不可不一宣說以諗學者嘗以語子壽前輩竹石觀管兩公皆命作  
跋顧手札兵後已失距借讀時垂四十年僅記大畧不能舉其辭是時  
後母舅子密先生遠宦京邸不知會見此札否今伯舅諸舅及元之昆  
仲皆已下世此說既無佐證而尤不意此書自蜀中寄回多所點竄與  
登曩時所見不盡同也是以跋語措辭益不易病廢旣久又不慣作世  
故周旋語姑竭所知爲執事拉雜陳之外祖給諫公在天之靈當亦鑒



其苦衷也公此編書名凡三易始發筆於道光三四年癸未甲申聞名  
 曰百家徵獻錄今原稿中尙存舊名若干通可證也九年己丑先府君  
 述婚京邸先母爲言方事之殷四出借書不得則命駕廠肆捆載滿收  
 至無容膝地則跨轅而歸衆手分鈔伯舅助繙檢尅日還之易所未見  
 以爲常而先母所寫最速且多公賜詩有兼旬爲寫百篇書之句卽此  
 事也辛卯冬先母南歸家書往還猶稱徵錄次年冬公亦南還遂至  
 粵東主講學海棠續有所得願自以獻不足退居選文之列改名五百  
 家銀管集或稱湘管集原稿中亦存此名若干通可證也其後移主汴  
 中大梁書院講席而伯舅亦分講葬山門下士若蘇菊村先生輩相共  
 編纂所得益多乃定今名則在十六七年丙申丁酉閒矣編中所采列  
 女中州產者居少半亦其一證而公手書序文題道光六年者蓋追溯  
 最初定本從其朔耳稿本文字有難字云丙戌除夕月蒲田郭向先稿本  
 成正道六年公性嚴冷門無雜賓是時杭州朱聽秋學博會得舊鈔本  
 尤明證也先生友治此書卽遣使攜歸其未嘗益而也豪富喜交遊號收  
 藏家尤多先正文集公以未嘗識面重與言及府君至都知與朱氏有  
 連則命以己意馳書往假之府君隨宦滬上時又常常命假郁氏宜稼

堂書其搜羅之勤如此然當時隨得隨鈔連綴成冊誠有如尊跋所云  
序次不侔有待釐定者至廿五年乙巳丙午間乃重定體例於首冊  
目錄眉端下方墨筆詮敘上下及卷第先後又按名撮舉事略注以明  
官貳臣字或不入貳臣字或鄭氏將等字改書名為昭德文編寄書伯  
舅先後兩三通彌自欣愜時伯舅以公倦游欲歸先攜眷口返里門營  
菟裘也乃是秋卽下世公盡傷於心不欲更言歸重定彙亦遂不卒業  
目錄標識又不全彌可痛也其手札略謂

聖德神功碑天筆孝思照耀萬古海內臣民咸得瞻仰與國史館列傳  
之藏在祕府別有私家撰述可采者情事不同今取臧哀伯語改定書  
名謹當恭錄卷首臨照在上原編一人文或數篇異同並存卷帙繁重  
既恐終難刊行且一二名卿鉅儒計必有碑傳等文而至今訪求不得  
者亦終自欲然與題不相稱今改以一篇爲主眾篇異同條舉件繫於  
後以國志表注之心爲紫陽言行錄面目而推原

皇極本身作則以見樂育之宏興起之大其全篇割愛者如諸王卷內  
武功郡王禮烈親王下直接豫通親王元之云親王卷內竟足豫通親  
謂得之庭如國初功臣宰輔卷內曾入貳臣傳諸人然亦非魏眉端手  
批云康熙二十三年

論漢軍官員勅力如益喬芳張存仁國家亦得其  
如翰詹卷內胡此  
庵陳省齋文貞書等編心術可畏或以篇中  
所載文多事少均無可推  
斷要之原編所刪實多重在昭令德以示子孫  
故有諸人皆去之讀者  
類推自可得編纂大意又謂吾原編序意取易  
大畜象辭今此命名似  
同晁氏實取小畜象辭程傳意與吾身世亦自  
親切云云元之又謂公  
嘗言學者一自命為文人便不足觀既垂老無  
所遇寫定此編常恐讀  
者於諸先正之行事如此其博深切明而厭煩  
束高閣故甯出於簡而  
自處以蘊畜之小蓋謙謹又如此噫近今士大夫  
矜言著述實於古人  
心得甘苦處曾未夢見一二而並世相輕者尤  
比比皆是不足怪責策  
公博學多識所定編訂體例詳略適中其刪去  
所采經世文編諸文則  
以未知後來重定體例之故亦不足怪執事善承  
其說仍註明原采某  
篇今見文編云云又別出附存文集外文兩卷而  
校刊記復一一聲明  
編次之例雖公手自為之亦不過如此甚善甚善  
佩慰無似悠泛之口  
何足與辯獨是壬戌癸亥閒全彙留登處年餘先  
府君盡讀上半部有  
簽校數處可證登亦盡讀下半部又嘗與元之相  
約分編列朝大事記  
至雍正朝部院大臣卷倉皇避地舍去故於上半  
部亦嘗緝檢十許冊

公所用墨筆燕支筆圈點或刪節一二處如卷一百二十八李二曲先  
 生墓表跪接矢溺等此篇燕支筆圈點字畫並非盡出公手前在滬寓  
日通篇祇刪此兩句可見給諫公讀書心細如髮然我以爲子事母病  
復何所嫌云云其篇中空格亦不與寫容字字今乃處處填滿細玩周端  
批語惟首行抱膝盧文集五字確爲公手筆餘皆可疑而整滿細玩周端  
其點畫似誤及尼父違違以下按正各語尤顯然可見此語用韓文即疑  
得矣如所批云云公何至出此便卷一百二十九顧恆惺先生傳年二十  
 讀呂晚村書等不過三十分之一今顧傳後墨筆添寫通志兩節不知  
 何人續貂執事不識爲公手筆誤作爲公按語全編類此者恐不少然  
 尙無關輕重於本書體例無傷也惟卷九王文貞公行狀銀朱筆大改  
 特改與堯峯集原本全不符合卷四十二陳勉夫通政墓志亦銀朱筆  
 大改特改且刪去大半案頭無強恕齋文鈔檢對恐亦決非原文編中  
 類此者似頗不少細察字畫銀朱筆多非出公手其墨筆批抹且有極  
 可笑者幸率爲執事句去若此兩篇者恐終以不識手跡概作公所刪  
 定則與全書體例既不盡合卽易原撰人爲公撰恐公亦不受也如何  
 如何當黃朱二公議刊此書時登頗怛怛心動願從執事暨諸君子後  
 聊供鈔胥顧又自念善病不耐勞且流寓於此五六年來當軸或時見  
 顧不過一刺投謁會不敢輒請賜閒卽竹石觀察仍世嫺好相見亦稀

畢專顧手記卷第

五

至今官中新舊更替直有不知其姓名者疏懶若此亦庶幾借以藏拙矣論者不察猶有招搖過市之誚謂之何哉故甯忍置不過問苟以自全辱執事不諒其鄙僣屢屢下問不直則道不見又不敢不罄懷相告也如所言尙有可采卽請刪潤之以當跋尾但勿刪此未後數語卽拜大貶矣連日所患增劇昨投控涎丹今日腹痛彌甚口授友人代寫不成文理不但無義法媿負媿負艸此布達諸惟亮管不宣甲午三月望日願學年小弟沈善登頓首

謹案吉士來書追思論述舉非細故可謂詳且盡矣顧猶有說者當日貴筑公會謂書名碑傳所重在事旁及雜文則言行錄體也惟已見 皇朝經世文編者原彙中卽取諸篇刻本連綴入之今賀氏書風行海內家置一編省文存目實職此故外此則文無宏纖概未嘗輕去一字誠不欲貽失真之誚耳公又謂先生原彙似未卒業削存之迹具可尋省今觀自四十五卷以前功臣則有額宜都則四費英東則六楊古利則五安費揚古則四李之芳則十宰輔則有范文程則十三李蔚則六王熙則一張鵬翮則九大臣則有許三禮則一趙申喬則十二沈近思則十一楊名時則十三馮景夏則四雷鉉則三翰詹則有施閏

章二十曹本榮賦張貞生賦凡十有八人均於碑傳全篇外節取  
 他說考異刊同各為附錄頗見用心然未遍及諸類遂止乎此則  
 其故可思也至如卷三之區爾漢何和里額爾德尼三傳皆本盛  
 京通志卷九之王崇簡行狀本汪琬文卷十一之馮溥事實本各  
 家文卷四十二之陳履平誌銘本張庚文卷四十三之唐夢賚生  
 壙誌本高珩文卷五十四之任宏嘉家傳本任啟運文劉國黻誌  
 銘本潘耒文卷六十一之朱延慶六十二之趙廷臣六十三之朱  
 昌祚三傳皆本八旗通志卷六十四之吳興祚傳本魯曾煜文卷  
 六十六之馬如龍誌銘本張玉書文卷六十七之張泰交誌銘本  
 陳廷敬文卷六十八之劉蔭樞誌銘本陸奎勳文卷七十六之吳  
 嗣爵誌銘本錢大昕文卷七十七之郭一鵬誌銘本辭所蘊文邢  
 以忠表本田蘭芳文王輔運誌銘本王紫綬文王原撫誌銘本梁  
 清遠文李士焜誌銘本王崇簡文卷七十八之朱廷燝誌銘本李  
 因篤文卷七十九之王廷璧傳本魯曾煜文卷八十一之胡在恪誌銘  
 本毛奇齡文秦欽誌銘本汪琬文卷八十一之胡在恪誌銘本趙  
 申喬文章履成誌銘本儲大文文卷八十四之劉燾傳本檀萃文

卷八十五之周於智誌銘本高鳳翥文卷八十六之梁羣英行實  
本梁德重文卷八十八之唐巍然表本田蘭芳文韓國璽志實本  
王曰高文卷八十九之吳道樞傳本丁澎文卷九十之袁賦誠誌  
銘本田蘭芳文焦賈亨誌銘本耿介文卷九十三之李夢蘭表本  
陳兆崙文卷九十五之沈光榮傳本八旗通志卷一百三之鄭方  
城傳本劉紹攷文卷一百四之盛支焯行狀本馮浩文卷一百七  
之梅士仁行述本溫汝适文皆從節錄而非全載既爲注明題下  
不沒作者姓名茲復表而出之計通部文數僅得百分之一二此  
類有刪節而無點竄謂非盡出先生手定則可謂先生必無一手  
定之文則附錄如干則明明有節取一例在又將謂之何哉善夫  
先生序云自知言者觀之固可考信而不惑然則別白紬繹觸類  
旁通不能無望於知音者已諸可寶又識

碑傳集卷首上

總目

卷一

宗室上

武功郡王

睿忠親王

鄭獻親王

怡賢親王

禮烈親王

豫通親王

肅武親王

卷二

宗室下

襄康親王傑書

貝子彰泰

襲禮親王永恩

貝子福一作傅喇塔

襲簡親王德沛

卷三

瀋陽功臣

額宜一作亦都

費英東



卷四

開國宰輔

范文程

哈什屯

甯完我

李蔚

卷五

國初功臣上

索尼

佟圖賴

李率泰

張存仁

楊古利

扈爾漢

圖爾格

達海額爾德尼附

安費揚古一作

何一作和里一作理

宜一作爾登一作理

圖賴一作

希福

辰泰

圖海

呂宮

邊必隆

鄂穆圖

孟喬芳

卷六

國初功臣下

孔有德

尙可喜

耿仲明 昭忠附

卷七

明臣宰輔

宋權

成克鞏

王永吉

衛周祚

孫廷銓

杜立德

卷八

國初部院大臣上

朱之弼

冀如錫

折庫納

朱裴

焦毓瑞

胡兆龍

董篤行

魏象樞

卷九

國初部院大臣下

王崇簡

高辛傳

傅維麟

卷十

明臣部院大臣

白允謙

呂崇烈

王宏祚

郝傑

任溶

孫承澤

張鼎延

徐起元

周亮工

卷十一

康熙朝宰輔上

魏裔介

熊賜履

馮海

卷十二

康熙朝宰輔中

王熙

吳正治

朱德宜

徐元文

卷十三

康熙朝宰輔下

李天馥

李光地

王揆

卷十四

康熙朝功臣上

李之芳

趙良棟

楊捷

張勇

胡世英

麟吉圖

高必盛

許貞

卷十五

康熙朝功臣下

姚啟聖

施琅

吳英

藍理

陳昂

卷十六

康熙朝部院大臣上之上

湯斌

陸隴其

卷十七

康熙朝部院大臣上之中

張伯行互見

卷十八

康熙朝部院大臣上之下

田大善

郝惟訥

劉健

杜臻

項景襄

沈荃

郭棻

徐元琪

嚴沆

王士禎

王遵訓

趙之符

顧八代

許三禮

李元振

卷十九

康熙朝部院大臣下之上

趙士麟

楊雍建

張鵬

田雯

席爾達

郭世隆

范承勳

范時崇

趙申喬

卷二十

康熙朝部院大臣下之中

勞之辨

金世鑑

徐乾學

王原祁

陳誥

卷二十一

康熙朝部院大臣下之下

韓菼

王鴻緒

翁叔元

李壽

布泰

汪晉徵

張廷樞

王度昭

卷二十二

雍正朝宰輔

徐元夢

張鵬翮  
字聖

朱軾

田從典

張廷玉

鄂爾泰

福敏

卷二十三

雍正朝部院大臣上

沈近思

魏方秦  
字

王承烈

蔡世遠

郝林

喬世臣

王沛愷  
木業附

卷二十四

雍正朝部院大臣中

楊名時

李紱

卷二十五

雍正朝部院大臣下

甘汝來

王蘭生

馮景夏

王紘

任蘭枝

方苞

卷二十六

乾隆朝宰輔上

陳世倌

史貽直

劉于義

阿克敦

陳大受

張允隨

孫嘉淦

卷二十七

乾隆朝宰輔中

劉統勳

梁詩正



尹繼善

陳宏謀 16

舒赫德

汪由敦  
莊有恭 22

卷二十八

乾隆朝宰輔下

阿桂

梁國治

王燕

卷二十九

乾隆朝部院大臣上之上

楊汝毅

劉吳龍

張楷

俞兆岳

尹會一

王安國

卷三十

乾隆朝部院大臣上之中

雷鉉

卷三十一

乾隆朝部院大臣上之下

金德瑛

蔡長懷

張廷瑑

蔣炳

卷三十二

乾隆朝部院大臣中之上

沈德潛

范璨

齊召南

程巖

何逢禱

卷三十三

乾隆朝部院大臣中之中

傅為訖

鄒一桂

錢維城

裘日修

卷三十四

乾隆朝部院大臣中之下

錢陳羣

彭樹葵

閻循琦

吳紹詩

卷三十五

乾隆朝部院大臣下之上

周元理

彭啟豐

杜玉林

金銓

阿彌達

陸錫熊

卷三十六

乾隆朝部院大臣下之中

錢載

劉峩

寶光鼐

譚尚忠

卷三十七

乾隆朝部院大臣下之下

王昶 袁廷禧附

卷三十八

嘉慶朝宰輔

未珪

董誥

紀昀

卷三十九

嘉慶朝部院大臣

錢樾

吳烜

張麟

祖之望  
辛從益

卷四十

內閣九卿上

李昌祚

龔佳育

孫在豐

崔維雅

牛鈕

陸柔

卷四十一

內閣九卿中

黃性震

陳汝咸

嚴虞惇

耿惇

卷四十二

內閣九卿下

沈涵

陸紹琦

倪承寬

王鳴盛

范毓蘊

卷四十三

翰詹上之上

劉子壯

曹本榮

張潛

吳偉業

高珩

卷四十四

翰詹上之中

邱象升

張貞生

王符

陳履平

嚴長明

伊朝棟

施閏章

唐夢賚

耿介

胡統虞

崔蔚林

沈珩

蔡啟傳

陳夢雷

顏光猷

以下歸曲阜  
三類公傳

光敏

光敷

彭定求

陳錫嘏

高不鸞

卷四十五

翰詹上之下

趙執信

喬萊

潘耒

互見  
經學

汪琬

朱彝尊

倪燦

李因篤

互見  
文學

陳維崧

尤侗

黃虞稷

卷四十六

翰詹中之上

吳苑

陸肯堂

寶克勤

冉觀祖

惠周惕

士奇  
陳爾

卷四十七

翰詹中之中

姜宸英

張大受

王式丹

何焯

陳儀

卷四十八

翰詹中之下

王懋竑

夏力恕

王步青

邵齊壽

盧文弨

卷四十九

翰詹下之上

周起渭

汪士鋐

查慎行

杜詔

楊椿

鄭江

陸奎勳

孫景烈

佟圖翰布

梁同書

朱筠  
蔣士銓

錢大昕 大昭 塘 坊附

卷五十

翰詹下之中

邵晉涵

程晉芳

周永年

金榜

戴震

卷五十一

翰詹下之下

洪亮吉

張惠言 互見 經學

陳壽祺

卷五十二

科道上之上

梁維本

甯承勳

李綱

黏本盛

王命岳

鄒之璜



成性  
孫蕙

阿什坦  
呂兆琳

完顏和附

卷五十三

科道上之中

王曰温

任珩

趙班璽

蔣伊

徐越

孫必振

王楨

余縉

卷五十四

科道上之下

高層雲

朱克簡

任宏嘉

姜希轍

楊籟

劉國敵

沈愷曾

阮應商

郭金城

卷五十五

科道下之上

王原

龔翔麟

劉子章

汪繼燦

黎致遠

陳學海

顧楷仁

高遐昌

高玠

孫紹曾

李元直

卷五十六

科道下之中

曹一士

陶正靖

胡定

王荃

葛德潤

馬宏琦

吳湘

任大椿

曹錫寶

錢澧

卷五十七

科道下之下

管世銘

儲麟趾

孫志祖

鄭士超

沈琨

謝振定

梁上國

谷際岐

卷五十八

曹司上

劉光斗

李允楨

顧子成

侯抒慄

廖玉

李溥

蕭家芝

孫枝蔚

互見文學

孫宗彝

卷五十九

曹司中

葉封

汪懋麟

王澧

李振藻

郟煥元

馮廷樾

梁欽構

周綸

裴裘

唐孫華

王復衡

汪森

卷六十

曹司下

顧陳序

馬樸臣

周吉士

閻循觀

鍾晚

李堅

褚寅亮

樂廷軫

顧鎮

陳鶴

許宗彥

馮敏昌

汪德鉞

卷六十一

國初督撫上

朱延慶

蔡士英

李棲鳳

劉武元

張璠

白如梅

卷六十二

國初督撫下

李國英

張自德

張朝璘

趙廷臣

郎廷佐

賈漢復

卷六十三

康熙朝督撫上之上

朱昌祚

周有德

佟鳳彩

慕天顏

金世德

曹申吉

伊闢

卷六十四

康熙朝督撫上之下

麻勒吉

吳興祚

郝浴

卷六十五

康熙朝督撫中之上

于成龍

與襄物公同姓  
名別見河臣卷

姚締虞

郎永清  
楊素蘊

卷六十六

康熙朝督撫中之下

李士楨

閻興邦

徐國相

蔡毓榮

朱宏祚

衛既齊

馬如龍

卷六十七

康熙朝督撫下之上

彭鵬

李輝祖

王繼文

張泰交

李國亮

劉兆麟

高承爵

朱犖

15

卷六十八

康熙朝督撫下之下

郭琇

潘宗洛

黃秉中

宜思恭

趙宏燮

滿保

卷六十九

雍正朝督撫

楊宗仁

唐執玉

裴稔度

宋筠

郎廷極

陳瓚

張連登

蔣陳錫

劉蔭樞

甘國璧

楊文乾

李衛

黃叔琳

楊秘

卷七十

乾隆朝督撫上之上

馮光裕

碩色

顧琮

王恕

徐士林

崔紀

王師

潘思

白準泰

唐綏

黃廷桂

衛哲治

卷七十一

乾隆朝督撫上之下

胡寶琮

吳士功

盧焯

李清時

卷七十二

乾隆朝督撫下之上

方觀承

楊錫紱

李瀚

黃登賢

楊景素

顏希深

鄭大進



卷七十三

乾隆朝督撫下之下

袁守侗

陸燿

孫永清

李世傑

李封

畢沅

卷七十四

嘉慶朝督撫

管幹貞

孫日秉

荆道乾

裘行簡

錢楷

董教增

卷七十五

河臣上

靳輔 陳漢附

于成龍 與清濟公同姓  
見前督撫卷

陳鵬年

卷七十六

河臣下

徐湛恩

司馬駒

何裕城

朱之錫

葉方恆

于成龍

張伯行

齊蘇勒

徐湛恩

李宏

李清時

卷七十七

國初監司上

蔣鳴玉

劉達

馮如京

張師載

吳嗣爵

楊方興

靳輔

王新命

張鵬

陳鵬年

嵇曾筠

白鍾山

張師載

以下為治河名臣小傳

互見

互見

互見

互見

互見

互見

郭一鵬

楊思聖

彭而述

邢以忠

姚廷著

翟鳳翥

李士焜

卷七十八

國初監司下

賈壯

宋琬

朱廷燦

汪繼昌

陸振芬

卷七十九

康熙朝監司上

崔爾仰

王廷璧

張為仁

子朋舉

王輔運

王原廡

林嗣環

徐必遠

王天鑑

邱俊孫

劉源溶

方國棟

陸求可

李光座

王紫綬

卷八十

康熙朝監司中

王孫蔚

洪琮

張九徵

金鎮

秦弑

韓庭芭

邵延齡

崔華

畢忠吉

涂應泰

趙作舟

戴聖聰

蔣興芭

任風厚

卷八十一

康熙朝監司下

胡在恪

姚澆燾

黎士宏

鄧秉恆

靳讓

郎廷棟

丁煒

高蔭爵

江皋

王繻

章履成

卷八十二

雍正朝監司

方觀

孫詔

何師儉

馬維翰

黃世發

蔣林

卷八十三

乾隆朝監司上之上

劉而位

李如蘭

田震

劉榮

田呈瑞

張孟球

白洵

唐繼祖

刁承祖

閻堯熙

陳德榮

朱一蜚

李學裕

宋壽圖

李渭

葉士寬  
范廷楷

謝濟世  
莊柱

卷八十四

乾隆朝監司上之下

沈起元

薛融

曹繩柱

宮爾勸

劉士銘

介錫周

劉槩

何達善

李治運

沈廷芳

錢受敷

卷八十五

乾隆朝監司下之上

吳士端

于從濂

芮復傳

金溶

張冲之

周於智

查禮

孔傳炯

周克開

陳夢說

葉佩蓀

卷八十六

乾隆朝監司下之下

王太岳

顧光旭

梁羣英

唐侍陸

沈業富

趙翼

卷八十七

嘉慶朝監司

方昂

楊揆

朱爾漢

李翹

傅鼎

方積

史積容

李廣芸

孫星衍

陳昌齊

卷八十八

國初守令上

邊大綬

唐巍然

耿應張

韓國璽

汪觀

卷八十九

國初守令中

吳汝為

張俊哲

隋林

蘇宏祖

黃甲雲

方于光

米璉

沈達

卷九十

孫振先

田緒宗

孟明台

楊行健

田起龍

李儼

崔宗泰

彭舜齡

董襄

吳道煌

張沐

姚士升



國初守令下

杜俊彥

劉惠恆

竇可權

袁賦誠

陸世楷

彭瓏

卷九十一

康熙朝守令上之上

劉某

馬驥

張士駟

許宏勳

譚吉璉

孫某

吳國用

臺瞻斗

駱鍾麟

吳穎

白登明

焦賁亨

劉昌言

賈光烈

楊應魁

劉崑

李遙

宋必達

韓蓋光

卷九十二

康熙朝守令上之中

侯元棐

張瑾

王復宗

劉濟寬

儲方慶

任辰旦

卷九十三

康熙朝守令上之下

繆以貞

井睦

朱振

伊嶽

李淑靖

卷九十四

周宗

楊朝正

任楓

仇士俊

于作霖

李夢蘭

劉偉

張燾

黃貞麟

鄒允颺

康熙朝守令中之上

陶元淳

盧道悅

衛立鼎

朱軫裔

衛台揆

王鉞

祝復奇

卷九十五

康熙朝守令中之中

沈光榮

成康保

葉燮

王斗機

朱霖

劉繼聖

馮壘

王郊

杜登春

王隆熙

趙吉士

毛際可

卷九十六

康熙朝守令中之下

鄭善述

趙之鶴

遲惟坤

張召華

劉以貴

陶涪

顧嗣協

呂文櫻

段熾生

施德涵

盧詢

卷九十七

康熙朝守令下之上

曹泰曾

趙俞

賈國楹

夏熙澤

尹誥以下為尹氏三傳

思任

縮

高岐鳳以下為高氏三傳

上達

崇徽

卷九十八

康熙朝守令下之中

杜思賢

王立憲

張其仁

陳士鑛

在傳首

許澗

張克嶷

沈慶會

梁澤

卷九十九

康熙朝守令下之下

蔡秉公

王汝楫

馮協一

楊飛熊

原承猷

仁傑

卷一百

雍正朝守令上

趙希濂

周中鑑

王夢麟

梁纘素

方鴻

胡隆互見

楊高士

黃師瓊

沈元滄

杜士標以下為杜氏三世家傳

于藩甲附

劉朝佑

朱宏仁

張錫

楊稷

藍鼎元

陳夢林附

王紹文

鄭鼎勳

于霈

鳴于熊

汪廷英

周夢錦

路縣圃

卷一百一

雍正朝守令中

魏鎰

童華

楊國聲

許恆

魯淑

李發枝

吳象寬

戚澂言

秦休

邱天民

王時翔

鮑志周

蔡時豫

周琪

馬日炳

董懿

卷一百二

雍正朝守令下

陳慶門

紀達宜

王承曾

寶容遂

徐繩甲

吳廷華

寶容恂

何經文

朱亨衍

武紹周

王琛

胡學成

王大呂

徐時作

卷一百三

乾隆朝守令上之上

汪上堉

邱玖華

王化南

郭廷翥

延翼附

蘇宏遇

鄭燮

鄭方城

黃建中

楊理範

黃永年

王夢弼

錢之青

呂轍

牛運震

李大本

卷一百四

乾隆朝守令上之下

盛支焯

劉作垣

張宗文

王兆鼇

姜某

張元林

顧濤

葉新

卷一百五

乾隆朝守令中之上

任應烈

林明倫  
袁德達

秦倬

李炯

朱懋德

劉大紳

王德屏

李集

鄭大綸

魯成龍

王紹曾



朱坤

邵大業

曹學詩

楊愚

朱煥

張本

錢汝恭

李師敬

鄭基

單煥

李本梁

邱仰文

曾受一

卷一百六

乾隆朝守令中之下

莊鈞

楊鸞

閻循霖

王光燮

陸廣霖

張甄陶

陶金諧

邵陸

王世勳

黃任

周大本

凌西峯

靳榮藩

王榮緒

張遠覽

卷一百七

乾隆朝守令下之上

王元啟

張洲

莊繩祖

牟貞相

呂爾禧

張玉樹

周際清

梅士仁

彭禮

陳聖儂

王若常

黃堂

彭某

周士孝

戰效曾

湯大寶

袁枚

王復

沈可培

卷一百八

乾隆朝守令下之下

武億

袁知

顧光

倪為賢

王琨

汪輝祖

楊芳燦

卷一百九

嘉慶朝守令上

沈麟

葉文麟

程卓樑

莫馨

許紹錦

劉台斗

莊達吉

卷一百十

嘉慶朝守令下

莊映

喬履信

路學宏

鄧夢琴

莊述祖

沈振鵬

陳登龍

桂馥

楊于果

何其英

陳萬里

周有聲  
朱向龍一作

莊炳  
邵鳳依

完顏廷璐

吳堦

趙懷玉

胡世琦

陳新

卷一百一十一

校官上

錢參

沈雍

蔡下奇

伊秉綬  
宋準

師範

胡鐘

方聯聚

呂清

武肅

黃璵

金錫鬯

李兆元

吳之騾

張金友

傅上襄

鵬舉

和可順以下為程氏

李國碩

陳鶴齡

章前謨

謝晉

李法

卷一百十二

校官下

劉大櫟

楊芳

王士芳

潘惟相

陪德

張大烈

康紹衣

吳槐炳

王國瑞

以下為潘氏  
四學博合傳

俞廷棟

陳熊

呂灑會

蔡瓏

朱仕琇

李岐生

李觀瀛

林

中吉

余昭

張德巽

謝金鑾

鄭兼才

卷一百十三

佐貳雜職

顧昌祚

賈攀鱗

蔣堅

彭焯

陶兆麋

卷一百十四

武臣上

李思忠

張自強

吳六奇

柯爾崑

盧達

王宋臣

許廷佐

啟爵 漢附

張芝玉

汪楷

王廷詔

葉均

寶玉璠

陳伯通

梁化鳳

傅哈禪

趙得勝

巴海

洪起元

王萬祥

德傳自七

三

卷一百十五

武臣中

殷化行

薩布素

潘育龍

費俊

藍廷珍

李壽演

卷一百十六

武臣下

岳鍾琪

楊凱

海爾察

三德

何安邦

何守林

趙永吉

阮蔡文

鍾寶

林亮

張仕敬

羅某

宋元俊

阮玉堂

藍元枚

富廉

黃標

唐光茂

豐紳

博羅里

卷一百十七

忠節上之上

佟養正

甘某

饒謨

曾益

陶世顯

簡成書

龍飛

徐鏞

周齡六

顧人龍

尹思民

德楞泰  
楊光時

敦達禮

陳新第 以下五十二人為定番州殉難紀事

張耀

陳瑞徵

龍在田

龍起潛

尹大任

安紹祖

陳玉環

顧大元

黎維垣



胡允中  
顧從龍  
李一龍  
李二龍  
尹湯傳  
熊化  
唐璉  
張新建  
王基昌  
韋帝臣  
許華守  
艾蒼中  
尹湯賓  
杜凡六  
黎應陽  
潘達

王道中  
黃文秀  
夏朝卿  
毛一練  
尹湯卿  
楊東明  
賈翰  
王仰  
程民悅  
韋之福  
毛琛  
周卜年  
熊鍾隨  
謝賜璠  
江山秀  
黎應辰

卷一

忠節上之中

蒙九錫

楊公振

陶宏才

李向禹

許鴻儒

徐勇

徐尚介

甘文焜

劉嘉猷

陳丹赤

劉超鳳

葉有挺

李其昌

張善繼

高咸臨

佟替甲

黃廷柏

周文奕

尹明廷

鄭之文

胡其儼

劉愈奇

廖有功

陳啟泰

諸士英

黃新德

李成功

白虎

風仕 卷昇附

王之儀 喻三畏 廖有功附

陳棟附

以下為李震 何列傳

何亮 于國璋附

郭萬國

陳福

魯仁圻  
黃芳度

卷一百十九

忠節上之下

高天爵

章 侯全 潘天仁附

范承謨 十龍光 林可棟 沈上  
馬雄鎮 重德 鳴璫附

卷一百二十

忠節下之上

路什

王之鼎

葉映榴

馮國綱 選 蒼莪 方年附

李茂吉

劉鎮寶

倪國珍

戴璣

朱天貴

宣德仁 蔡章倚附

游崇功

查弼納

劉琨

卷一百二十一

忠節下之中

拉布敦

班第

董天弼

趙文哲

以下送許濟為慰忠祠碑陰記

吳一嵩

鍾邦任

吳璜

常紀

汪時

程蔭桂

許椿

張世永

楊夢槎

倪鵬

傅清

祥琮

馬全

王日杏

王汝玉

特音布

彭元璋

徐諭

吳景

徐瓚

孫維龍

章世珍

倪霖

吳鉞

郭良相

周國衡

田舒祿

顧佐

岳廷杖

許濟

周煒

鄭文

許國

長炳

王鳴鏞附

陳枚

史謙

李喬基

端柏附

滕家瓚

卷一百二十二

忠節下之下

花連布

白廷英

梁崇

葉槐

朱射斗

霍永清

羅載堂

許濟

朱南仲

楊紹沂

熊應飛

沈齊義

湯太奎

周大綸

琦

陳德

葉友伯附

壽同春

六達色

王翼孫

楊堂

以下為三  
與史傳

李培秀

韓嘉業

李長庚

呂秉鈞

劉斌  
卷一百二十三

逸民上之上

徐柏齡

王毓著  
潘集附

吳天泰

陸彥龍

盧象晉

張翹

張暉吉

魏兆鳳

談遷

秦驥生

高踰駢

顧夢游

楊彝  
以下為楊順  
兩先生傳

吳其沆

祝淵

張應泰

劉某

張昉  
以下五人  
為隱逸傳

高嗽

常安

王受命

許肇篋

彭之燦

理安和

朱士稚

顧夢麟

梁以樟

侯泓

卷一百二十四

逸民上之下

沈遼奇

顧柔謙

汪灝以下為西冷五君子傳

陳廷會

柴紹炳互見理學

沈昉互見理學

孫治

朱統奎

王正中

惠思誠

李廷立

雲霞逸人

卞煥文

吳光

黃子錫鄭嬰文垣附

李天植以下為橋李兩孝廉傳

巢鳴盛

武之烈

徐波

邵泰清

李灌

郭金臺

徐桂臣

李魁春

卷一百二十五

逸民下之上

閻脩齡

張壯行

申自然

彭毓宗

吳鑄

杜越

丁鑛

王餘佑

鄭充

傅山

李世熊

郭士標

孫駿聲

顧有孝

徐善

魏菁

卷一百二十六

逸民下之下

冒襄

姜寓節

徐枋

李明性

金癡

韓畱

八大山人

揮格互見

楊湛露

儲稠若



賴應

張聞達

徐仁彝

文點

俞昱

林侗

周靖

汪元履

鄭與僑

詹明章

孫鎮

賈漢英

曰昭

沈執中

卷一百二十七

理學上

陳其憲

趙忠濟

沈國模

管宗聖

史孝威

王朝式

陸孔常

邵曾可附

華允誼

刁包

柴紹炳

互見

陸世儀

張履祥

以下徐振為揚

張嘉玲

姚夏

以下徐振為揚

蔣元

互見

錢馥

陳梓

李汝龍

徐根

張果中

陳瑚

陳確

沈的互見  
逸民

謝文游

卷一百二十八

理學中

應搗謙

凌嘉印馮天佐附

沈士則

李經世

李可從以下歸於屈  
李氏家傳

邵廷采

吳慎汪遂  
蕭瑛  
張夏附

陳樟

孫奇逢

陳彤

李士瓚

恽日初格附

馬負圖

邨成

姚宏任

朱用純

劉原淶

容互見  
文學

勞史

徐世沐

張鵬翼

卷一百二十九

理學下

高愈

顧鼇

湯之第

金版附

顧培

崔渭源

向潛

朱澤灃

王心敬

互見文學

强嶽立

童能靈

張朝晉

滕綱

汪紱

鄧元昌

姜國霖

任瑗

涂瑞

余元選

吳元音

秉鈞附

任思謙

蔣元

互見卷

卷一百三十

經學上之上

顧炎武

朱朝瑛

張爾岐

萬斯大

劉獻廷

卷一百三十一

經學上之中

黃宗羲

閻若璩

胡渭

華學泉

卷一百三十二

經學上之下

梅文鼎

中道

朱

王錫闡

卷一百三十三

王夫之  
陸元輔

萬斯同

臧琳

馮景

文鑑 文纂 穆尼閣 薛鳳祚 王錫闡 楊啟 方

孔興泰 袁士龍 杜知耕 毛乾乾 沈超遠 潘

李鍾倫 李鼎徵 蔡誦 馮濩 魏文慰 附

見前

楊光先

經學下之上

鄭慶元

陳景雲

沈彤

江永

余蕭客

汪肇龍

卷一百三十四

經學下之中

孔廣森

汪中

錢塘互見

章宗源

卷一百三十五

經學下之下

張惠言互見

沈炳震

炳震

炳震附

萬光泰

光泰附

惠棟

互見

程廷祚

汪梧鳳

法坤宏

翟灝

李惇

江聲

劉台拱

凌廷堪

汪萊

謝震

李銳

焦循

卷一百三十六

文學上之上

盧世淮

侯方域

王猷定

蔡覺春以下為秦徐兩先生傳

徐鄰唐

薛鎔

封濬

申涵光

俞汝言

邱維屏

李騰蛟

卷一百三十七

文學上之中

魏祥世傑所

魏禧

李文允

黃澂之

彭士望

王士祿孝友見

孫學稼

訪 沈進

李麟友

朱彝堅

補標

周莖附

周簞

上翊

范略

朱一是

王

吳兆騫

卷一百三十八

文學上之下

性德

毛駢本名先翁

李良年

范明徵

彭通

吳雯

卷一百三十九

文學下之上

田蘭芳

李之鉉

朱昆田

劉翼明

黃晉良

邵長蘅

許友

汪燧互見理學

劉丁

張森

吳農祥

李寅

王源

方舟

王萃

李容

互見理學以下  
為關中人文傳

李柏

李因

篤互見  
翰詹

孫枝蔚

互見  
曹司

王又旦

李念慈

張恂

王宏撰

李楷

康乃心

呂賜

王心敬

互見  
理學

劉涵

王仲復

以下為關中  
人文後傳

曹玉珂

宋子真

雷伯顛

屈復

張郊  
劉紹放附

卷一百四十

文學下之中

王兆符

劉青霞

李塏

茅星來

許遂

以下為七  
先生傳

車騰芳



韓海

鍾獅

蘇珥

張庚

陳道

吳直

卷一百四十一  
文學下之下

沈大成

厲鶚

黃景仁

楊安辨

張聰咸

張海珊

卷一百四十二  
孝友上之上

孝友上之上

曹嶺

勞孝與

沈昌宇

方天游  
方明

陳黃中

周振采

羅有高

吳穎芳

洪騰蛟

王元文

姚鼎

黃向堅 孝以下為三

劉龍光

揭暄 互見經學

李復新

周廖

張三愛

徐爾正

朱重暉

黃璽 以下為孝友傳

冷昇

侯涵

陳光章

吳翁

顧國縉

卷一百四十三  
孝友上之下

顧廷琦

陸承祺

顏發祥

費大受

唐紹光

王德貞

毛周允

崔長生

王鴻業

侯汾

王士祿 互見文學

華呢燭

雷振 以下為孝友傳

何兢

黃朝美

葉恩宜

黃洪元

姚舜情 以下為姚氏兩  
孝子守經堂記

王廣文

趙清

身耘

李應麒

晨

昇

王潔

顧棟生

吳伯宗

程慕菱

卷一百四十四  
孝友下之上

汪龍

華瓏

詹夢符

開芳

朱壽命

謝德健 以下為謝氏  
兩孝子傳

朱奉

汪灝 以下為汪氏  
四孝友傳

昂

劉宏甲

任大任

卯觀成

朱履正

陳昇

薛文毅子

州二

盧必陞

沈澈

何兆祥

胡恩廣

胡隆  
守規

尹汝規

金傳龍

張士仁

孫鼎鍾

運標

郭裕德

郭培鏞

莊覺

汪允昌

卷一百四十五

化禮

王恩榮

林賜魁

劉宗洙

以下為劉氏

劉宗泗

王勳

王鋒

王世名

葉小娜

翁運槐

以下為翁氏

任遇亨

以下為任氏

桑天顯

王克勳

周尙文

孝友下之下

王瓚

沈敦愨

棲鳳

祿五

李氏 張氏附

陶必鑲

張大觀

以下為龔師  
三季子合傳

楊璞

較第

沈卹孺

潘瑁

蔣經元

任天篤

董盛祖

魏興

席慕孔

黃宮球

楊書有

以下為莊平揚  
氏孝義家傳

重五

袁良謨

李敬躋

范杰 吳阿玉附

蔡應泰

鄧觀瀨

姜瑤

陶士奇

錢聚萬

以下為二  
孝子錄

閔貞

徐大中

臧禮堂

宋之珩

張長松

卷一百四十六

義行

李應卜

傅昇

顏鼎受

王溥敬

董世源

趙永漲

苑亮

郭氏義僕

王隸

卷一百四十七

方術

盧之頤

徐國麟

徐大業

王睿

雷世

潘志道

孔繼禹

劉首昂

王聯

諸兆元

烏蒙義役

沈士逸

葉桂

李芬

朱爛鼻

李炳

卷一百四十八

蕃臣

噶岱默特

額敏和卓

霍集斯

卷一百四十九 列女一

賢明

傅山母陳氏

李光地母吳太夫人

田雯母張太夫人

覺羅滿保母汪太夫人

嵇曾筠母楊太夫人

錢陳羣母陳太夫人書

洪亮吉諱名母蔣太宜人

楊韶母聶太宜人

陶思永妻施氏

崔龍兒妻錢蒸人孟鈿

完顏麟慶母樞太夫人珠

卷一百五十 列女二

孝淑

郭鍾琇妻王氏

王孜女

沈人驥女

李麒生生女三姐合傳

徐心震女

徐關竇女元貞

呂從高妻郭氏

許秉恆女福弟

石門閔某女素

平陸呂某女

曾尚增女衍綸

陳文世妻劉氏

曹錫寶女

無錫唐某女素

王法夔女淑春

武仁女端姑

卷一百五十一 列女三

節操上

裴汝清妻藥氏

員偉鈗妻孟氏

方某妻魏氏

李鴻普妻郭孺人

項準妻王氏秀文

傅光箕妻吳氏

路世榮妻党氏

張棠妻金氏

沈文然妻温氏

史可端妻蔣氏

梅運昌妻李氏

秦甲祐妻劉氏

曹用章妻唐氏

吳珍妻黃氏



卷一

節操下

柴乙妻陳氏女奴景

王治民妾某氏

孫錫祚妻程氏

羅音代妻佟氏

解心翼妻張安人

一百五十二列女四

龐某妻魏氏

林其默妻陳氏

黃賢宗妻歐陽氏

包學山妻顧氏

姚景甘妻凌氏

施如鈺妻朱氏

錢界妻尚恭人

陶遐妻何氏

程允元妻劉氏秀石

燕大成妻周氏

孫疇九妻吳氏

林國奎妻鄭氏

可仁言妻岳氏

弓桴驥妻毛氏

劉海妻趙氏

錢釘妻丁氏

沈文溥妻許氏

党積德妻侯氏

馬有齡妻馬氏

趙倓妻吳氏

趙天眷妻白氏

邢文貴妻殷氏

夏璜妻葉孺人

卷一百五十三 列女五

烈義上之上

蔣天庚妻范氏

趙國元妻黃孺人

王烈妻吳氏

施曾錫妻金氏鏡淑

萬某妻蕭氏

胡嗣英妻吳氏

劉芳第妻曾氏

程家蔚妻鮑氏瑤枝

王本晉妻陳氏淑貞

湯翰元妻趙氏

湯祖契妻趙恭人

裴希度母范太恭人

黃晞繼妻周氏

鄒延玠妻吳氏

郭某妻李氏三孃

陳有量妻海氏

周天輝妻徐氏

何衷宸聘妻周氏

唐希俊妻王氏

曹雲蒸妻趙氏

羅仁美繼妻李氏

唐天錫妻周氏

楊文龍聘妻孫氏秀姑

楊定遠妻何氏

許某妻張氏 范雲騎女附

黃居中妻吳孺人

唐之坦妻曹氏

吳錫妻戴氏賢

卷一

一百五十四列女六

烈義上之下

王舍人某妾傅氏

王國珍妻趙氏

方引禰妻毛氏

張京聘妻康氏

耿玘聘妻薛氏坤

胡欽聘妻張氏秀

魏克儉妻王氏

陳某妾李氏

李有恆聘妻楊氏二姐

馮翊妻李氏

黃是聘妻吳氏淑姬

李岸妻焦氏

坊者某妻陳氏

黃士振聘妻陳氏寶孃

李長華妾吳氏

吳鶴聘妻林氏恭孃

劉坐妻李氏

薛燕妻洪氏豔孃

張習妻賴氏媧孃

孫大成妻裔氏烈娥

章坤元女原姑附

李載華妻徐氏

吳宣來妻朱氏

梁至良妻鄭氏

章揆蒼妻馬氏

龔良翰妻陳氏

烏蒙烈女子某氏

陳國材妻周氏

附

黃允卿妻陳氏貞孀  
元輔妻許氏

鐵峻聘妻馬氏元姐

楊景雄妻李氏桂姐

周琦聘妻賈氏

卷一百五十五  
列女七

烈義下之上

周某妻梅氏蘭如

黃繼姚聘妻李氏

張義妻李氏

郭兆曦妻李氏

張廷桂妻章孺人孔榮

唐麟杰妻王氏清志

陳鴻業聘妻倪氏

賣酒者王某妻某氏

王某聘妻伍氏五姑

張於森妻南氏

何先佑妻孫氏

胡世棠妻鄭氏

劉顯祿養女惠

牛某妻某氏

覺羅隆德妻東鄂氏

汪榮光聘妻王氏

何自榮聘妻楊氏

丁三郎妻某氏

懷遠秀才某妻沈氏

江慶璜妻黃氏歸妹

萬某妻曾氏

山右某妻邢氏

趙海玉妻任氏環

烈義下之下

徐宸煥妻吳氏

官德華妻朱氏

查世裘聘妻曹氏

王僑聘妻朱氏

氏附

袁興旺妻邢氏福姐

陳廣美妻李氏

顧大妻林氏

劉戊兒聘妻王氏孝姐

伍先馨妻施氏

錢廷蘭妻史氏

卷一百五十七 列女九

貞潔上

劉亨基女滿姑

李承宗聘妻何氏

徐某聘妻陳氏

沈守坤聘妻史氏 史齊棟聘妻王

氏附

傅瑛妻周氏 某氏二婦附

段某聘妻楊氏媵

李得春妻武氏

鍾某妻蔡氏

成登雲妻劉氏德華

國名震孫某聘妻潘氏

周士英聘妻張氏明貞

計準聘妻宋氏景昭

赫連勳聘妻徐氏

楊國炎聘妻楊氏

維上女子某氏

高昂聘妻蔣氏淑

卷一百五十八 列女十

貞潔下

萬某聘妻袁氏

金景山聘妻張氏

林世芳聘妻洪氏汝敬

黃某女姓夫失

吳宏禮聘妻高氏

蔣斗燦聘妻呂氏

田殿混聘妻秦氏

王雲卿子某聘妻劉氏

趙某聘妻高氏

金某聘妻周氏蘊香

方禮祕聘妻范氏二妹

李家駒聘妻朱氏

潘瑁聘妻王氏

虞孔聘妻王氏

朱燦聘妻支氏

熊學鵬子某聘妻吳氏

張某聘妻黃氏

林觀平聘妻孫氏

楊嘉聘妻芮氏

楊某聘妻劉氏

卷一百五十九 列女十一

賈汝愈聘妻盧氏

合傳上

張來鳳母李氏 以下為張氏五烈傳

妻劉氏

弟起鳳妻霍氏

附鳳妻章氏

從弟嘉猷妻王氏 韓秋涓附

呂維祺祖母牛氏 以下為呂氏五節婦傳

妾楊氏

弟維禧妻楚氏

孫繼曾妻杜氏

循曾妻蕭氏

張三錫妻許氏 以下為張氏雙節傳

妾高氏

鄒先魯妻敖氏 以下為鄒氏三節婦傳

妾楊氏

李氏

林應雒妻莫氏 以下為新會四李烈傳

某妻李氏

梁學謙女

吳師讓妻黃氏

沈忠節公佚妻方氏 以下為三烈婦傳

妾汪氏

鮑氏 俞氏附見

李兆婢應高妻袁氏 以下為西充三妻婦傳

李映庚乳母某妻李氏 范士龍附見

龐愨乳母楊汝學妻任氏

汪二蛟母徐氏以下為開常烈婦合傳

妻戴氏

徐生某妾某氏俊姑

劉光漢子某妻某氏

馬雄鎮祖母趙太夫人以下為馬氏世忠烈

傳

繼妻李夫人

妾顧氏

劉氏

女二姐

五姐

子世濟妻董淑人

妾苗氏

羅維祺妻葉氏以下為羅門雙烈婦傳

世榮妻許氏

司抓住祖母王氏以下為司氏兩世節婦傳

母趙氏

林翹子茂妻崔氏以下為雙烈傳

翹女方啟席聘妻啟席母李氏

附

高唐朱氏婢張某女有

趙香女觀以下為書兩節女事李麒生女三姐互見孝淑以下為三烈傳

段某妻盧氏

許登高妻董氏

何某妻韓氏以下為三節婦傳

張榮妻吳氏

張萬寶妻王氏

季捷元妻李氏以下為季氏雙節傳

子大亨妻劉氏



卷一百六十 列女十二

合傳下

劉大器女以下為關西貞女傳

楊某聘妻李氏

孫錫光妻劉氏

子懋英妻孔氏

張元尹妻李氏

張抃妻陳氏

曲廷順文登姐

雷百里母程氏

賀某女

許某妻于氏

許梓妻公氏

子朝君妻石氏

張忻妾鄭氏以下為六烈女傳

于世榮妾胡氏

黃元炳子某聘妻王氏

王仁寰子某妻張氏以下為張烈女傳

顏紹允妻張氏兩節婦傳

程福亮母康太夫人以下為永甯入烈傳

張檢妻顏氏

郭進昌妻李氏

郝小車妻單氏

汪某女以下為汪賀烈女傳

王立山妻畢氏以下為四節婦傳

門某妻王氏

賴岳瑞妻梁氏以下為賴氏貞婦記

姪朝德妻陸氏

段維垣妻于氏

裴璐妾馬氏

李某女

汪輝祖繼母王太宜人

以下為蕭山汪氏兩節婦傳

齊廷彬妾朱氏

生母徐太宜人

某妻湯氏以下為三烈婦記

袁榮妻李氏

長安李氏婢李某女蘭香

程樹聘妻宋氏景衛陳氏淑睿

宋氏婢衛喜陳壽附

貞女傳

錢某聘妻王岱東女

張某聘妻姜氏桂  
王志曾聘妻施氏

李龍圖妻謝氏以下為李氏二節婦傳

子希程繼妻吳氏

蕭篋聘妻胡志熊女以下為三貞節記

雷承恭聘妻孫仝敞女

曹秀先子某聘妻彭元瑞女

朱國祥妻王氏以下為三烈婦傳

王中發聘妻吳氏晚香

錢璞堂聘妻李鉉女

李其聘妻樊晉肱女婉

何李氏以下為任素卿二十列女合傳

張王氏

劉王氏

馮劉氏

傅李氏

任趙氏

任周氏

任宋氏

碑傳集卷首上

任邱氏

任趙氏

李張氏

崔邢氏

馮氏女

熊氏女

吳榕妻沈氏

烈女傳以下為三

賀邦達妻陸氏

吉龍大妻馮氏

任張氏

趙葉氏

張趙氏

何氏女

傅氏女

崔氏女

張召棠妻徐氏

沈盤德聘妻張蕙南女

烈女傳以下為二

碑傳集卷首下

作者紀畧以錄文先

李斌 見本集卷二十四

鄭虎文 字炳也秀水人乾隆壬戌進士官至左贊善有吞松閣集

馮培 字玉圃號寔庵無錫人乾隆戊戌進士官戶科給事中有鶴半

巢文鈔

彭紹升 字允初號尺木長洲人乾隆丁丑進士有二林居文集

何石雲 杭州人官台州訓導

王恕 見本集卷七十

袁枚 見本集卷一百七

姚鼐 見本集卷一百四十一

愛必達一作阿姓阿拉克奇特氏蒙古正白旗人官副都統

張玉書 字素存丹徒人順治辛丑進士官至文華殿大學士諡文貞

有張文貞集

李果 字碩夫號客山長洲人布衣有詠歸亭文鈔

李壽 見本集卷四

卑事首下

王熙

見本集卷十二

呂星垣

字叔訥武進人官贊皇縣知縣有白雲草堂集

王士禎

見本集卷十八

朱彝尊

見本集卷四十五

徐乾學

見本集卷二十

邵長蘅

見本集卷一百三十八

徐作肅

字恭士商邱人順治辛卯舉人有偈更堂集

顧棟高

字復初號震滄無錫人康熙辛丑進士乾隆中舉經學授國

子監司

業加祭酒銜有震滄文稿萬卷樓集

吳偉業

見本集卷四十三

王永吉

見本集卷七

徐元文

見本集卷十二

惠周惕

見本集卷四十六

趙士麟

見本集卷十九

唐夢賚

見本集卷四十三

計東

字甫草號改亭吳江人順治丁酉舉人有改亭文集

呂兆琳 見本集卷五十二

陳廷敬 字子端號說巖澤州人順治戊戌進士官至文淵閣大學士

諡文貞有尊聞堂集午亭文編

汪琬 見本集卷四十五

毛際可 見本集卷九十五

魏象樞 見本集卷八

施閏章 見本集卷四十三

張英 字敦復桐城人康熙丁未進士官至文華殿大學士諡文端有

存誠堂篤素堂等集

繆彤 字歌起吳縣人康熙丁未進士授修撰官至翰林院侍講有雙

泉堂集

馮溥 見本集卷十一

孫廷銓 見本集卷七

王崇簡 見本集卷九

金之俊 字豈凡吳江人明進士官至內秘書院大學士諡文通

林佶 字吉人號鹿泉閩縣人康熙壬辰進士官內閣中書有樸學齋

集

魯曾煜

字啟人號秋塍會稽人康熙辛丑進士官翰林院庶吉士有

秋塍文鈔

鄭方坤

字則厚又號荔鄉建安人雍正癸卯進士官兗州府知府有

鄭荔鄉稿

姜宸英

見本集卷四十七

陳維崧

見本集卷四十五

任啟運

字嘉聖號釣臺荆溪人雍正癸丑進士官至宗人府府丞有

清芬樓稿

孔繼涵

字莊谷曲阜人乾隆辛巳進士官戶部郎中

韓葵

見本集卷二十一

彭定求

見本集卷四十四

楊名時

見本集卷二十四

方苞

見本集卷三十五

錢大昕

見本集卷四十九

王昶

見本集卷三十七

杜璘 見本集卷十八

沈德潛 見本集卷三十二

嚴虞惇 見本集卷四十一

蔡新 字次明號葛山漳浦人乾隆丙辰進士官至文華殿大學士諡

文恭有輯齋文集

錢維城 見本集卷三十三

汪士鉉 見本集卷四十七

查義 未詳

潘耒 見本集卷四十五

王源 見本集卷一百三十九

全祖望 字紹衣號謝山鄞縣人乾隆丙辰進士官翰林院庶吉上有

鮎埼亭文集外集

陶元藻 字鳧亭號篁村會稽人諸生有泊鷗山房集

施德馨 字聞于未詳籍貫

李光地 見本集卷十三

藍鼎元 見本集卷一百



耿介 見本集卷四十七

馮景 見本集卷一百三十一

楊椿 見本集卷四十七

柯崇樸 字寓匏嘉善人副貢生薦康熙己未博學鴻詞科未試官內

閣中書有振雅堂集

汪師韓 字抒懷錢塘人雍正癸丑進士官編修有上湖分類文稿

朱軾 見本集卷二十二

張廷玉 見本集卷二十二

沈近思 見本集卷二十三

費元衡 未詳

賀代伯 字賢湘甯化人

杭世駿 字大宗號荃浦仁和人舉乾隆丙辰博學鴻詞授編修有道

古堂集

華希閔 字豫原號劒光又號芋園無錫人康熙庚子舉人涇縣教諭

有延綠閣集

沈彤 見本集卷一百三十三

任蘭枝 見本集卷二十五

伊湯安 字小尹滿洲正白旗人乾隆辛卯舉人官貴州督糧道

潘應賓 未詳

錢儀吉 字定廬號衍石嘉興人嘉慶戊辰進士官給事中有衍石齋

記事稿

阮元 字伯元號芸臺儀徵人乾隆己酉進士官至東閣大學士諡文

達有壑經室集

宋攀 見本集卷六十七

孫星衍 見本集卷八十七

李天馥 見本集卷十三

徐文駒 字子文鄞縣人康熙己丑進士

許迪澍 三禮子安陽人

湯右曾 字西厓仁和人康熙戊辰進士官至吏部侍郎有懷清堂集

周彝 未詳

楊瑄 字玉符婁縣人康熙丙辰進士官至內閣學士

裘璉 字殿玉慈谿人有橫山集

張伯行 見本集卷十七

陸奎勳 見本集卷四十八

嚴沆 見本集卷十八

陳兆崙 字星齋號句山錢塘人舉乾隆丙辰博學鴻詞授檢討官至

太僕寺卿有紫竹山房文集

彭端淑 字樂齋丹棱人雍正癸丑進士官廣東肇羅道有白鶴堂稿

汪由敦 見本集卷二十七

雷鉉 見本集卷三十

彭啟豐 見本集卷三十五

蔡世遠 見本集卷二十三

沈廷芳 見本集卷八十四

曹一士 見本集卷五十六

徐用錫 字畫堂號壇長宿遷人康熙己丑進士官翰林院侍講有圭

美堂集

盧文昭 見本集卷四十八

李塏 見本集卷一百四十一

趙國麟

字仁圃泰安人康熙丙戌進士官至文華殿大學士兼禮部

尙書

劉紹攸

見本集卷一百三十九附錄

馮浩

字蒼吾號孟亭桐鄉人乾隆戊辰進士官御史有孟亭文集

法坤宏

見本集卷一百三十三

任兆麟

字文田震澤人嘉慶丙辰舉孝廉方正有竹居集

史貽直

見本集卷二十六

胡天游

見本集卷一百四十亦作方天游

朱珪

見本集卷三十八

陳宏謀

見本集卷二十七

陳世倌

見本集卷二十六

洪亮吉

見本集卷五十一

錢陳羣

見本集卷三十四

張洲

見本集卷一百七

章學誠

號實齋會稽人乾隆戊戌進士官國子監典籍有婦學及實齋文集

王元啟 見本集卷一百七

李文藻 字素伯號南礪益都人乾隆辛巳進士官至知州有恩平潮

陽桂林 諸集

朱仕琇 見本集卷一百十二

陰承方 字靜夫號克齋甯化人歲貢生有陰靜夫遺文

魯仕驥 字九皋號絜非江西新城人乾隆辛卯進士官夏縣知縣有

山木居士集

姚範 字南青號薑塢桐城人乾隆壬戌進士官臺灣道有援鶉堂文

集

劉大樹 見本集卷一百十二

陸燿 見本集卷七十三

秦瀛 字凌滄號小峴無錫人乾隆甲午舉人官至刑部侍郎有小峴

山人集

裴曰修 見本集卷三十三

孟超然 字朝舉號瓶庵閩縣人乾隆庚辰進士官至吏部郎中有孟

氏八錄瓶庵居士文鈔

于敏中 字重棠金壇人乾隆丁巳進士授修撰官至文華殿大學士  
諡文襄

戴震 見本集卷五十

趙佑 字啟人號鹿泉仁和人乾隆壬申進士官至左都御史有清獻  
堂集

陸錫熊 見本集卷三十五

王巨孫 字念豐號鐵甫長洲人乾隆戊申 召試舉人官國子監典

簿有淵雅堂集

徐書受 字尚之武進人四庫館議敘官南召縣知縣有教經堂集

朱休度 字介裴號梓廬秀水人乾隆癸酉舉人官廣靈縣知縣有梓

廬舊稿

吳文溥 字博如號澹川嘉興人諸生有南野堂集

紀昀 見本集卷三十八

江藩 字鄭堂江蘇甘泉人諸生有漢學師承記宋學師承記

焦循 見本集卷一百三十五

陳壽祺 見本集卷五十六

劉逢祿 綸孫字申受武進人嘉慶甲戌進士官禮部主事有劉禮部集

張井 號芥航府施人嘉慶辛酉進士官至東河總督有二竹齋文鈔

李兆洛 字中耆武進人嘉慶乙丑進士官安徽鳳臺縣知縣有鳳臺縣志卷一齋文集

潘詒 字少白錢塘人有少白山人集

熊賜履 見本集卷十一

毛奇齡 字大可號初晴蕭山人舉康熙己未博學鴻詞授檢討有西河文集

揚繩武 字文叔吳縣人康熙癸巳進士官編修有古柏軒集

呂謙恆 字天益河南新安人

沈炳震 見本集卷一百三十三

張庚 見本集卷一百四十

邵晉涵 見本集卷五十

金德嘉 字會公號蔚齋廣濟人康熙壬戌進士官檢討有居業齋文鈔

高珩 見本集卷四十三

寶克勤 見本集卷四十六

尹會一 見本集卷二十九

顧淵 字伊人太倉人處士有水鄉集

宋琬 見本集卷七十八

李澄中 字渭清號漁邨諸城人舉康熙己未博學鴻詞官翰林院侍

讀有漁邨集臥象山房集滇程日記

胡具慶 字改峯容城人

徐倬 字方虎號蘋邨德清人康熙癸丑進士官翰林院侍講有寶邨

李克敬 未詳

羅有高 見本集卷一百四十一

黃宗義 見本集卷一百三十一

沈大成 見本集卷一百四十一

喬萊 見本集卷四十五

蔣永修 號紀友宜興人順治丁亥進士官應山縣知縣歷刑科給事



中湖廣提學副使

蔣景祁 永修子字京少宜興人諸生薦康熙己未博學鴻詞官同知

有東舍集

楊超曾 字駿驥武陵人康熙乙未進士官至吏部尚書署理江南江

西總督諡文敏

方榮如 字文翰號樸山淳安人康熙丙戌進士官豐潤縣知縣有集

虛齋古文

符曾 字幼魯錢塘人乾隆丙辰薦博學鴻詞後官至戶部郎中有春

鳧小稿

齊召南 見本集卷三十二

王箴聽 懋竑子寶應人

程大中 字拳時應城人乾隆丁丑進士官教授有在山堂集

陳祖范 字亦韓號見復常熟人雍正癸卯進士舉經學授國子監司

業有見復文集

許宗彥 見本集卷六十

李威 字畏吾龍溪人

汪中 見本集卷一百三十四

翁方綱 字正三號覃谿大興人乾隆壬申進士授編修官至內閣學

士有復初齋文集

桂馥 見本集卷一百九

吳定 字殿麟歙縣人有紫石泉山房集

洪榜 字汝登號初堂歙縣人乾隆戊子舉人

趙懷玉 見本集卷一百十

謝階樹 字子玉號向亭宜黃人嘉慶戊辰進士官至侍講學士有約

書及守約堂集

惲敬 字子居陽湖人乾隆癸卯舉人官瑞金縣知縣有大雲山房集

高澍然 字雨農光澤人乾隆戊申舉人官內閣中書

陳善 字扶雅號壽客錢塘人嘉慶辛酉舉人官嘉善縣教諭有損齋

文集

周凱 字仲禮號芸皋富陽人嘉慶辛未進士授編修官至臺灣道有

內自訟齋文集

張貞 字起元號杞園安邱人薦康熙己未博學鴻詞未試官翰林院

孔目有杞園文集

劉青藜 字太乙號嘯月襄城人康熙丙戌進士官翰林院庶吉士有

高陽山人集

湯斌 見本集卷十六

王廷璧 見本集卷七十九

姜垚 字蒼厓會稽人

余縉 見本集卷五十三

胡會恩 字孟綸號茗山德清人康熙丙辰進士授編修官至刑部尙

書有清芬堂集

姚世鈺 字玉裁號慧田歸安人諸生有孱守齋遺集

劉青霞 見本集卷一百四十

謝濟世 見本集卷八十三

王峻 字次山常熟人雍正甲辰進士官御史有良齋文集

蔣家駒 丹陽人乾隆庚午舉人廣西懷遠縣知縣

李志魯 安吉人河南柘城縣知縣

顧陳埏 見本集卷六十

曾釗 字敏修又字冕士南海人道光乙酉拔貢生官欽州學正有文集

余廷燦 字存吾長沙人乾隆辛巳進士官編修有存吾文稿

施朝幹 字鐵如儀徵人乾隆癸未進士官至宗人府府丞有一勺集

正聲集

袁文揆 字時亮保山人貢生官甘肅縣丞有會蛤集

陸繼輅 字祁生陽湖人嘉慶庚申舉人官貴溪知縣有崇百藥齋集

吳應遠 字鴻來鶴山人乾隆乙卯舉人有雁山文集

吳雲 字玉松吳縣人乾隆癸丑進士

張士元 號鱸江吳江人嘉慶庚申舉人有嘉樹山房集

王萃 見本集卷一百三十九

張貞生 見本集卷四十四

謝檳 未詳

喬騰鳳 未詳

錢陸燦 字爾弢一字湘靈常熟人順治丁酉舉人有圓硯居士集調

運堂集

呂履恆 字元素號坦庵河南新安人康熙甲戌進士官至戶部侍郎

有夢月巖集

趙執信 見本集卷四十五

儲大文 字六雅號畫山宜興人康熙辛丑進士官翰林院庶吉士有

存硯樓集

韓夢周 號理堂濰縣人乾隆丁丑進士官知縣有理堂文集

武億 見本集卷一百八

王焯 未詳

吳蘭修 字石華嘉應人

潘挹奎 字石生武威人嘉慶己卯進士官吏部主事

翟鳳翥 見本集卷七十七

李繼白 未詳

陳錫嘏 見本集卷四十四

衛周祚 見本集卷七

王宏度 未詳

周亮工 見本集卷十

李元振 見本集卷十八

王伯勉 未詳

顧汧 字芝巖 長洲人 康熙癸丑進士官河南巡撫有鳳池園集

郝浴 見本集卷六十四

梁清標 字玉立 號蕉林 正定人 明進士官至保和殿大學士有蕉林文集

李呈祥 字吉津 號木齋 涇化人 官少詹事有東邨集

范鄙 字彪 西洪 洞人 康熙丁未進士有五經堂文集

陳克峻 未詳

李振裕 字維饒 號醒齋 吉水人 康熙庚戌進士官至戶部尚書有白石山房文稿

靳讓 見本集卷八十一

張雄 未詳

張澍 字時霖 號介侯 又號介白 武威人 嘉慶己未進士官永新縣知

縣有教素堂集

陳鵬年 見本集卷七十五

趙元祚 字我軒 昆明人 康熙乙酉舉人 官知縣

牛運震 見本集卷一百三

戈濤 字巨源 號遠園 獻縣人 乾隆辛未進士

王善備 字令挺 舍山人 有石壁山房稿

陳浩 字紫瀾 昌平人 雍正甲辰進士 授編修 官至少詹事 有生香書

屋稿

董邦達 字字存 號東山 富陽人 雍正癸丑進士 官至禮部尚書 諡文

恪

楊錫紱 見本集卷七十二

寶光鼐 見本集卷三十六

沈埴為 字叔埴 秀水人

管世銘 見本集卷五十七

湯藩 字价人 南豐人 乾隆丁未進士

薛所蘊 字子展 號行屋 孟縣人 有杼庵集

劉漪 未詳

朱之錫 見本集卷七十六

田蘭芳 見本集卷一百三十九

姚文田 字秋農歸安人嘉慶己未進士授修撰官至禮部尚書謚文

儋有遂 雅堂文集

王紫綬 見本集卷七十九

梁清遠 字邇之正定人順治丙戌進士官吏部侍郎有祓園集

李來章 字禮山襄城人康熙乙卯舉人官兵部主事有禮山園文集

劉宗泗 見本集卷一百四十四

李因篤 見本集卷四十五

顧景星 字黃公蘄州人明諸生康熙戊午就徵給檢討俸乞歸有白

茅堂集

朱驊 號汗朱滑縣人

陸隴其 見本集卷十六

劉易 未詳

趙申喬 見本集卷十九

冉覲祖 見本集卷四十六

趙炯 字鶴齋鹽山人



藍千秋 字長清宜黃人薦授國子監學正官至盛京戶部員外郎有

藍戶部集

諸世器 字景筠又字敬甫崑山人貢生

桑調元 字伊佐號弢甫錢塘人雍正癸丑進士官工部主事有弢甫

初續集

陳黃中 見本集卷一百四十

沈起元 見本集卷八十四

謝廷瑜 濟世從弟

朱筠 見本集卷四十九

檀萃 號默齋望江人乾隆辛巳進士官祿勸縣知縣有法書十卷

林有席 字儒珍分宜人有續古文雅正

高鳳翥 昆明人乾隆癸酉舉人

梁德重 鹿邑人

魏源 字默深邵陽人道光壬午舉人官內閣中書截取江蘇同知有

清夜齋文集古微堂內外集

范正脈 修武人順治己丑進士官檢討兩浙江南鹽運使

王曰高 字北山 莊平人 順治戊戌進士官工科給事中

孫奇逢 見本集卷一百二十七

張爾岐 見本集卷一百三十

李煥章 字象先 江西樂安人 有織齋集

趙光貴 未詳

丁澎 字飛濤 號菊園 仁和人 順治乙未進士官禮部郎中 有扶荔堂

集

梁份 字質人 南豐人 有懷葛堂文集

杜宗甫 雲南順甯人 歲貢生

儲方慶 見本集卷九十二

程正揆 字端伯 號青溪 孝感人 有青溪遺稿

李容 見本集卷一百二十八

蕭家芝 見本集卷五十八

李樞 未詳

靳標嵩 未詳

洪若皋 字虞鄰 臨海人 順治乙未進士官福建參議 有南沙文集

劉榛 字山蔚 商邱人有 虛直堂集

苗于京 未詳

夏駟 字春茵 號宛來 烏程人 薦康熙己未博學鴻詞 未試 有爛溪集

交山 平寇本末等書

全軌 字車同 鄰縣人 康熙乙酉舉人

王思訓 字疇五 號永齊 昆明人 康熙丙戌進士官至翰林院侍讀 有

滇乘及文集

陳儀 見本集卷四十七

彭鵬 見本集卷六十七

陳瓊 見本集卷六十八

劉蔭樞 見本集卷六十八

閻循觀 見本集卷六十

陳士驥 楚雄人 順治庚子舉人

張雲章 字漢瞻 嘉定人 諸生 有樸村文集

陳道 見本集卷一百四十

倪蛻 字振九 號蛻翁 青浦人 議敘知縣

蔣衡 字湘帆金壇人手書十三經進呈 賜國子監學正

吳襄 號七雲青陽人康熙癸巳進士官至吏部尚書諡文簡

楊汝毅 見本集卷二十九

耿興宗 襄城人

盛大謨 字于埜號字雲武甯人貢生

蔣恭棐 字維御長洲人康熙辛丑進士官編修

楊鸞 見本集卷一百六

孫用正 未詳

劉青芝 宗泗次子字芳草襄城人有江村山人藁閨餘藁

劉統勳 見本集卷二十七

諸錦 字襄七號艸廬秀水人舉乾隆丙辰博學鴻詞授檢討官至左

贊善有絳跼閣集

周天度 字心維號讓谷仁和人乾隆壬申進士官至許州知州有十

誦齋集

厲鶚 見本集卷一百四十一

錢戴 見本集卷三十六

章有大 字容谷歸安人雍正庚戌進士

馮榮祚 字力本號石蓮江都人雍正壬子舉人官闕鄉縣知縣

趙青藜 字然乙涇縣人乾隆丙辰進士官御史有漱芳居文鈔

王紱 延津人乾隆庚午舉人

朱稻孫 字稼翁秀水人貢生薦乾隆丙辰博學鴻詞有六峯閣彙

潘思渠 見本集卷七十

王鳴盛 見本集卷四十二

郭善鄰 未詳

李宗傳 未詳

李建 朝邑人

劉鴻翱 字次白濰縣人嘉慶己巳進士官太湖同知有綠野齋文集

曹錫寶 見本集卷五十六

丁子復 字見堂號小鶴嘉興人廩貢生有見堂文鈔

崔述 字武承號東壁大名人乾隆壬午舉人官上杭縣知縣有無聞

牛步奎 未詳

鄂山 姓氏未詳滿洲人乾隆丙辰進士官河南按察使

李仰賢 新鄉人

張惠言 見本集卷五十一

王夢祖 未詳

張遠覽 見本集卷一百六

吳德旋 字仲倫宜興人諸生有初月樓文集

辭宁廷 字退思雜南人乾隆丁丑進士官翰林

王仕 未詳

王杰 見本集卷二十八

温汝适 字質坡順德人乾隆甲辰進士官至兵部侍郎有攜雪齋詩

文集

錢澧 見本集卷五十六

法式善 原名運昌姓蒙古烏吉氏字開文號時帆一號梧門蒙古正黃

旗人乾隆庚子進士官至國子監祭酒有存素堂集

梁同書 見本集卷四十八

沈寶麟 字孔微號絳齋嘉興人嘉慶戊午舉人官湯溪縣教諭有雙

琴齋集

雷亨 高陵人

董詔 字馭臣 安康人 乾隆甲午舉人

朱翔鳳 字于庭 長洲人 嘉慶庚申舉人 官新甯縣知縣 有浮溪精舍

文錄

蔣祥墀 字盈階 天門人 乾隆庚戌進士

陳昌齊 見本集卷八十七

陳預 直隸人 乾隆丙戌進士 官至吏部左侍郎

劉台斗 見本集卷一百九

劉開 字東明 號孟塗 桐城人 有孟塗文集

張宗奉 字魯巖 魯山人 舉人 官脩武縣教諭

郭尚先 字蘭石 莆田人 嘉慶己巳進士 官禮部侍郎

胡承瑛 字墨莊 涇縣人 嘉慶乙丑進士

蔣湘南 字子瀟 固始人 道光乙酉拔貢 生有春暉閣文鈔

錢澄之 字飲光 桐城人 明諸生 有田閒集

吳隆元 歸安人

劉自潔 字恆叔武強人康熙癸巳進士官編修有定性齋文集

王安國 見本集卷二十九

劉綸 字存涵號繩庵武進人舉乾隆丙辰博學鴻詞第一官至文淵閣大學士諡文定有繩庵集

邵齊燾 見本集卷四十八

崇士錦 天長人

康濬 未詳

文幹 未詳

馬名駒 字昂千未詳籍貫有悔堂學古文

孫景烈 見本集卷四十八

劉台拱 見本集卷一百三十五

彭而述 見本集卷七十七

何其偉 其僕弟字石民號我堂石屏人康熙己卯舉人官遂昌縣知

縣有我堂詩古文集

張望 字梭壇號閩榻武甯人有閩榻先生集

李翮 見本集卷八十七



楊嗣 益都人

范泰恆 字無崖洛陽人乾隆辛酉舉人聯捷進士

周正 字公端號方山萊陽人康熙辛未進士官浦城縣知縣有取此

居文彙

熊寶泰 字藕頤潛山人

楊于果 見本集卷一百九

王睿 見本集卷一百四十六

鄭梁 字半人號禹梅慈谿人康熙戊辰進士官至高州府知府有寒

邨雜錄五丁集

韓程愈 未詳

陶自新 未詳

嵇曾筠 見本集卷七十六

張九鉞 字度西號紫峴湘潭人乾隆丙戌進士官知縣有陶園文集

戚學標 字翰芳號鶴皋太平人乾隆辛丑進士官涉縣知縣有鶴皋

文鈔

張能麟 字玉甲又字西山宛平人順治丁亥進士官至川南副使有

儒家理要

梁賓 未詳

鄭開極 字肇修侯官人順治辛丑進士授編修

閻禱 未詳

梁熙 許州人

黃百家 宗義子字主一餘姚人

郭葵 見本集卷十八

嵇永仁 見本集卷一百十九

王龍光 見本集卷一百十九

賈兆鳳 字九儀號檀村高郵人康熙丙戌進士官翰林院庶吉士

吳陳炎 字寶厓號芋町錢塘人

秦松齡 字留仙號對巖無錫人順治乙未進士舉康熙己未博學鴻

詞官諭德

蔣士銓 見本集卷四十九

黎士宏 見本集卷八十一

王一甯 未詳

佟世思 字未詳滿洲鑲黃旗人

梁玉繩 字曜北號諫庵錢塘人貢生有蛻稟

趙元春 萊陽人

程晉芳 見本集卷五十

周煌 字海山涪州人乾隆丁巳進士官至兵部尚書謚文恭有海山

存稟

姚令儀 字一如婁縣人乾隆丁酉拔貢生官四川布政使

史兆蘭 宛平人

岳震川 字一山洋縣人嘉慶辛酉進士官內閣中書有賜葛堂集

張錫穀 未詳

張遇春 未詳

顧炎武 見本集卷一百三十

柴紹炳 見本集卷一百二十四

李良年 見本集卷一百三十八

盧世淮 見本集卷一百三十六

劉青蓮 宗泗長子襄城人

鄧廉 字介夫自號柳下野人商邱人諸生有柳下堂集

彭士望 見本集卷一百三十七

劉佑 鄂陵人

魏禧 見本集卷一百三十七

朱溶若 未詳

李元鼎 字梅公吉水人明進士官至兵部侍郎有石園集

康乃心 見本集卷一百三十九

高兆 字雲客號固齋侯官人

王宏撰 見本集卷一百三十九

朱辰應 字載坤號清谷子秀水人諸生

李興祖 未詳

魏禮 字和公一字季子甯都人有季子文集

湯修業 字賓鷺陽湖人有賴古齋文集

徐鈞 字電發吳江人舉康熙己未博學鴻詞授檢討有南州草堂集

張大受 見本集卷四十七

鍾淵映 字廣漢嘉興人

蔣中和 字眉三 靖江人

賈開宗 未詳

王崇炳 字虎文 東陽人 貢生 有學耨齋文集

周清原 字雅楫 號蜨園 武進人 舉康熙己未博學鴻詞 授檢討 官至

工部侍郎 有蓉湖文集

陳信 字藹公 清苑人 有燕山堂集

郝林 見本集卷二十三

王瑩 字亮生 吳縣人 貢生 有壑舟園初稟文集

曹鵬翊 未詳

孫自務 字樹本 號立庵 安邱人 諸生 有花石山房集

龔百藥 字介眉 武進人 順治丙戌舉人 有介眉詩選 湘筌閒草 吹萬

閣草

王箴傳 懋竑子 寶應人

張秉直 澄城人 貢生

錢泰吉 字輔宜 號警石 嘉興人 官海甯州訓導 有甘泉鄉人集

盛百二 號柚堂 秀水人 乾隆丙子舉人 官淄川縣知縣 有柚堂文存

錢寶甫 原名昌齡以字行更字子壽號恬齋秀水人嘉慶己未進士

官山西布政使有恬齋遺藁

楊方達 字符蒼武進人雍正癸卯舉人

梅庚 字耦長一字子長宣城人康熙辛酉舉人有天逸閣集

梅文鼎 見本集卷一百三十二

吳斯帛 字未詳歸安人晚號五亭山人

惠棟 見本集卷四十六

朱彬 字郁甫寶應人

田雯 見本集卷十九

蔡覺春 見本集卷一百三十六

陳庚煥 字道獻號惕園福建長樂人歲貢生有惕園初藁

陸麟書 字徽庭號子愉鎮洋人道光壬辰舉人有胥瓶山館文存

陳玉璣 字廣明號椒峯武進人康熙丁未進士官內閣中書

湯準 賦子睢州人

方鴻 見本集卷九十八

王心敬 見本集卷一百二十九

涂登 字南池未詳籍貫

汪大經 字書年號秋白嘉興人貢生有借秋山居文鈔

王友亮 號葑亭婺源人乾隆辛丑進士官通政司副使有雙佩齋集

姚瑩 字石甫桐城人嘉慶戊辰進士官至廣西按察使有石甫文集

張生洲 字淵甫震澤人有觀妙齋文集

陸世廉 未詳

費密 字此度成都人流寓泰州有燕峯集

陳三島 號鶴如吳縣人

祝期 未詳  
王鳴雷 字震生番禺人有空雪樓集

鄭敷教 未詳

王潔 見本集卷一百四十三

杜溶 字于皇號茶邨黃岡人明副貢生有變雅堂集

成親王 有詒晉齋集

盧錫晉 字子弓單縣人康熙戊辰進士官正定府知府有尙志館集

孫鵬 字圖南昆明人康熙戊子舉人官泗水縣知縣有圖南文集

李堅 見本集卷六十

周棐 未詳

李祺 貴州人

鞠遜行 廉子山東海陽人乾隆己未進士

胡定 見本集卷五十六

吳周聚 未詳

陳至言 字山堂號青厓蕭山人康熙丁丑進士官編修有苑青集

徐晟 未詳

袁徵 未詳

周師文 未詳

傅為訖 見本集卷三十三

陶必銓 見本集卷末上

周於禮 字綏遠號立崖嶧峨人乾隆辛未進士官至大理寺少卿有

聽雨樓集

劉鳳誥 字金門萍鄉人乾隆己酉進士授編修官至兵部侍郎有存

悔齋集



馬於智

見本集卷八十五

邵志純

字懷粹仁和人舉嘉慶丙辰孝廉方正有右庵文集

錢青選

字瑾巖號漱石陽湖人流寓雲南

柳中星

未詳

牟願相

字直夫棲霞人

錢廷文

河南人

韓則愈

鄆陵人

吳江

未詳

李之芳

見本集卷十四

常安

字履坦未詳籍貫有受宜堂文集

蔡之定

字生甫德清人乾隆癸丑進士

潘世恩

字芝軒吳縣人乾隆癸丑進士授修撰官至武英殿大學士

諡文恭

英和

姓索綽絡氏字樹琴號煦齋滿洲正白旗人乾隆癸丑進士官

至東閣大學士

見本集卷一百三十八又作

毛先舒

張永銓 字賓門華亭人康熙癸酉舉人官徐州學正有閑存堂集

呂宣曾 洛陽人

李集 見本集卷一百四

尤侗 見本集卷四十五

衛既齊 見本集卷六十六

甘汝來 見本集卷二十五

楊履寬 字裕如號粟亭雲南太和人乾隆甲午舉人

賽璵 建水人雍正己酉舉人官知縣年百歲重宴鹿鳴

查禮 見本集卷八十五

金姓 見本集卷三十五

吳賢湘 字清夫未詳籍貫

張玉樹 見本集卷一百七

朱世繡 未詳

盧紘 字元度號澹巖新州人順治己丑進士官蘇松督儲參議有四

照堂集 桐城人

方孝標 桐城人

徐旭旦 字浴咸號西冷錢塘人副貢生官至連平州知州有世經堂集

黃中堅 字震生吳縣人有著齋初集二集

郭琇 見本集卷六十八

鞠濂 字溪園號蓮隱山東海陽人貢生官平原訓導有悅軒集

王時翔 見本集卷一百一

陶正靖 見本集卷五十六

楊應珺 漢軍正白旗人官至大學士雲貴總督

黃士傑 長泰人官雲貴糧道

吳成佐 字贊皇未詳籍貫有懶庵偶存彙

李瑛 未詳

程襄龍 字夔侶一字古雪歙縣人有澂潭山房集古雪集

李汝章 未詳

吳紹曾 字虔位號魯也秀水人諸生

郭益靖 鄭州人舉人

楊紹文 字子揆山陰人有雲在文彙

魯績 號星村懷甯人

賈湘 號約園未詳籍貫

王崧 未詳

李元澗 檜陽人

黃汝成 字潛夫嘉定人廩貢生官泗州訓導有袖海樓文錄

王大經 字修水東臺人

趙節 建水人康熙辛酉舉人官知縣

錢世錫 字嗣伯一字慈伯號百泉秀水人乾隆戊戌進士官檢討有

鹿山老屋文集

錢楷 見本集卷七十四

尙鏞 未詳

程可則 字周量一字湮漆又字彥揆號石厓南海人順治壬辰進士

官至桂林府知府有遙集樓海日堂等集

彭孫貽 字仲謀一字羿仁海鹽人拔貢生有茗齋集

錢邦芭 江蘇華亭人官至副都御史

李柏 見本集卷一百三十九

何毅夫 順德人乾隆乙丑進士官知縣

陶澍 字子霖號雲汀安化人嘉慶壬戌進士官至兩江總督諡文毅

有印心石屋文集

謝振定 見本集卷五十七

梅曾亮 字伯言上元人道光壬午進士官戶部郎中有柏硯山房集

引用書目 亦以錄文先後為次

盛京通志

八旗通志

大名府志

靈壽縣志

陝西通志

諸城縣志

宛平縣志


山西通志

四川通志

廣東通志

汾陽縣志  
宣化府志  
回疆通志

回疆通志



106-152

碑傳集卷一 目錄

宗室上

武功郡王禮敦傳 李欽

和碩禮烈親王代善傳 鄭虎文

和碩睿忠親王多爾袞傳 鄭虎文

和碩豫通親王多鐸傳 馮鼎

和碩鄭獻親王濟爾哈朗傳 鄭虎文


和碩肅武親王豪格傳 鄭虎文

和碩怡賢親王允祥傳 彭紹升

和碩怡賢親王允祥傳

碑傳集卷一 目錄





106-154

宗室上

武功郡王禮敦傳 李俄

武功郡王禮敦巴圖魯者

景祖翼皇帝長子也創業之初由虎欄哈達之黑圖阿喇城展拓疆土

四征不庭禮敦所向克敵因加巴圖魯號巴圖魯漢言勇也初

景祖時有名碩色納者生子九人俱强悍又有名加虎者生子七人俱

輕捷多力嘗身披鎧甲連躍九牛二族恃其強侵陵諸路

景祖以禮敦英勇率同甯古塔諸貝勒往征之破碩色納子九人滅加

虎子七人盡收五嶺迤東蘇克蘇濟河迤西二百里內諸部歲癸未

景祖翼皇帝暨

顯祖宣皇帝龍馭上賓並建

山陵於黑圖阿喇城未幾禮敦巴圖魯亦卒因附葬

陵側黑圖阿喇城即今興京也天命九年東京既建

太祖高皇帝命宗弟鐸弼王善博伊和齊往黑圖阿喇城謁

祖陵爰奉

祖考梓宮昇以黃輿及禮敦巴圖魯櫬昇以朱輿悉遷葬於東京崇德元年夏四月創建

太廟

太宗文皇帝追念前勳做歷朝配享之禮

特追冊禮敦巴圖魯為武功郡王於

太廟後殿右末立神位東向配享其祝文云嗣位孫敢昭告於族祖神位前曰惟我族祖竭力為國厥功匪細茲謹倣古制不沒祖功追封為武功郡王配享廟庭永彰祖譽是時同姓功臣配享

太廟者惟禮敦巴圖魯一人至順治十一年始益以慧哲郡王額爾袞等三人並列位中殿東廡四時配享王妃等亦設位從享焉

和碩禮烈親王代善傳鄭虎文

代善

太祖高皇帝第二子也性忠果英勇過人從征哈達輝發葉赫等國論功授貝勒瓦爾喀蜚攸城人苦烏喇國布占泰之虐乞附於我丁未歲太祖命與貝勒舒爾哈齊褚英等率兵往徙之乘夜行夜晦光見大霧

上取視無有復樹之光如初舒爾哈齊疑之欲回兵代善不可遂進兵  
盡收環城屯寨五百戶令侍衛扈爾漢護之先行布占泰邀諸路不得  
進次日大軍至代善及褚英各率兵五百分路夾擊代善從馬上攫貝  
勒博克多胃而斬之並斬其子生擒貝勒胡里布及常往父子時天大  
雪寒冽敵兵棄甲走僑仆相屬斬獲無算

太祖嘉其功賜名古英巴圖魯癸丑年

太祖征布占泰代善從時烏喇三萬人越伏爾哈城而眾軍皆願戰

太祖欲緩之將遣使申諭代善進曰我士飽馬騰利在速戰所慮者布

占泰不出耳今彼兵既出平原曠野可一鼓擒也

太祖從之時布占泰令步軍列陣以待兩軍距百步許代善隨

太祖親突陣大敗之遂克其城布占泰遁走代善復統精兵截戰又敗

之布占泰僅以身免天命元年

太祖正大號授大貝勒四人以代善爲首三年

太祖伐明大軍兩路進會天雨

太祖欲還軍代善曰我與明和好久矣因其不道是以興師今既臨其

境若遽旋師將與明復修和好乎抑相仇怨乎軍行遠地誰能諱之天

皇朝一

雖陰雨禦雨有具何慮焉且天降此雨以懈明邊將之心使吾出其不意是雨利於我不利於彼也

太祖善其言遂進兵下撫順東州馬根單三城及堡寨共五百餘處大軍已出關明廣甯總兵張承廕等來追時

太宗爲四貝勒與代善率兵迎擊之盡殲其眾四年正月往守札喀關二月明大發兵四路來侵

太祖率師親征代善先行遂過札喀關集兵以待

太宗以祀事後至謂急宜往護界藩山築城夫役遂赴界藩山斬敵百人敗明總兵杜松等於薩爾濟山時明總兵馬林營尙間崖總兵潘宗顏營斐芬山互爲犄角

太祖命步兵接戰方傳諭敵兵自西突至代善呼曰兵已進矣卽怒馬迎戰直入其陣諸貝勒繼之敵遂敗斬獲過半明總兵劉綎由寬甸路來犯據山岡以拒我師

太宗督兵上擊代善率左翼兵自西夾攻之敵大潰殺劉綎於陣八月太祖以葉赫貝勒金台石布揚古助明來侵往討其罪執金台石於東城殺之布揚古及布爾杭古居西城聞之懼代善諭降之葉赫悉平六

年三月大軍取瀋陽敗明來援瀋陽總兵李秉誠兵逐北四十里七月鎮江城守將叛投明將毛文龍同莽古爾泰率兵遷金州民於復州十一年八月

太祖上賓代善於諸子最長而功德隆茂眾望尤屬

太宗代善子貝勒岳託薩哈璘共議告代善曰

四貝勒才德冠世深契

先帝聖心眾皆悅服當速繼大位代善曰此吾素志也遂作議書言紹

承大統必得聖君始能戡亂致治以成一統自顧德薄願共推戴

四貝勒嗣位入朝遍示諸貝勒大臣眾皆喜以告

太宗辭讓再三代善言益切眾議亦堅

太宗乃從之十一月率兵征蒙古喀爾喀札魯特布執貝勒巴克與其

二子及喇什希布代青桑噶爾等寨十四貝勒殺鄂爾寨圖盡俘其眾

而還天聰元年與貝勒阿敏及子貝子碩託率兵攻明錦州圍其城三

年十一月從

太宗伐明逼北京敗明大同總兵滿桂宣府總兵侯世祿援兵于德勝

門追殺至隘口幾盡敵十二月隨

太宗攻薊州會山海關兵來援距城二里許與我師遇遂立營環車楯鎗礮以自固代善麾左翼四旗護軍攻其東面破之四年明兵部尙書劉之綸率兵至遵化營於山環山圍之招之綸降不從遂縱兵擊破其營無得脫者五年明臺軍殺我遊牧兵掠駝馬去同貝勒濟爾哈朗以礮攻克其營留兵守之時我師圍明大凌河城明遣兵援距城十五里而軍右翼兵衝入敗之生擒明監軍道張春等春見

太宗不跪

太宗怒欲誅之代善進曰我前此所獲無不收養且此人旣以死忠爲貴奈何殺之以遂其志乎

太宗悅遂赦春六年征察哈爾遂伐明奉

命同莽古爾泰統軍繼進受和而還八年復從

太宗伐明出榆林口與子貝勒薩哈璘碩託等率兵自喀喇俄保入邊攻克得勝堡城守參將李全自縊遂駐兵朔州十年四月改元崇德大封功臣晉代善爲和碩兄禮親王十二月從

太宗征朝鮮受其降以歸三年

太宗征喀爾喀同鄭親王濟爾哈朗等留守並監築遼陽都爾鼻城八

年八月

太宗上賓

世祖章皇帝嗣位郡王阿達禮及貝子碩託謀立睿親王多爾袞代善發其謀俱伏誅碩託為代善第二子阿達禮則其孫也順治元年朝元

世祖命上殿毋拜以優異之五年薨子滿達海襲是年新定例凡諸王

葬給銀五千兩

世祖以代善功德茂著倍

賜之立碑紀功康熙十年追諡烈復立碑以表於墓

和碩睿忠親王多爾袞傳鄭虎文

睿親王多爾袞

太祖高皇帝第十四子也生而聰慧多智謀畧絕人天聰二年三月與

弟多鐸從

太宗征察哈爾大捷振旅還瀋陽於途中大宴羣臣以多爾袞初出征

即有功喜甚

特賜號墨爾根岱青貝勒三年九月從伐明逼燕京擊敗明袁崇煥祖



大壽援兵二萬五年八月隨

太宗攻克大凌河是年初設六部

命掌吏部事六年五月畧明歸化城黃河一帶降其民七年六月多爾  
袞陳伐明之策曰宜乘春時整士卒待我耕種既畢彼穀將熟入邊直  
過燕京截其援兵殘燬屯堡因糧於敵爲久駐計可坐而待其斃也八  
年五月從

太宗伐明分道入邊畧朔州至五臺山而還九年六月獻伐所獲山西  
俘並所收察哈爾全部崇德元年四月以功封和碩睿親王八月伐明  
率右翼兵由錦州入十二月從征朝鮮別從容甸路取昌州敗敵眾克  
江華島三年二月監築遼陽都爾弼城七月更定各衙門官制十月授  
奉命大將軍與岳託分道伐明分兵入邊長驅北京迤西千里將卒皆  
潰畧地至山西界復東趨臨清破濟南克城四十餘十七戰皆捷  
賜馬五匹銀二萬兩六年六月代濟爾哈則圍錦州敗其援兵八月明  
經畧洪承疇以兵十三萬來援軍容甚盛

太宗聞之親統大軍渡遼河疾馳六日至七家堡多爾袞請進軍駐松  
杏之間

太宗從之明松山諸將見黃幄羽葆軍逼山而營大懼謀夜遁多爾袞率兵趨塔山大路橫擊之潰兵沿山至海死者相枕藉明總兵吳三桂等單騎奔入杏山乃率兵還七年三月復與濟爾哈朗圍錦州明總兵祖大壽力竭以城降四月又破塔山杏山關門以東盡入版圖八年八月

世祖御篤恭殿

賜多爾袞大將軍勅印加殊禮錫以御用纛蓋時流寇李自成已破燕京明山海關總兵吳三桂遣其將郭雲龍等致書請兵多爾袞以書報之曰我國向欲與明修好屢為致書明之君臣不計國家喪亂軍民塗炭曾無一言相答是以整師三入蓋示意於明欲其君臣勢屈而通好也若今日則不復出此惟有底定中原與民休息而已今聞崇禎帝滅於流賊不勝髮指用率仁義之師沈舟破釜誓不返旌期必滅賊出民水火伯遣使致書深為喜悅夫伯思

報主恩與流賊不共戴天誠忠臣之義也伯雖向守遼東與我為敵今  
勿因前故尙復懷疑昔管仲射桓公中鈞桓公用為仲父以成霸業伯  
若率眾來歸必封以故土晉為藩王國讐可報身家可保世世子孫長  
享富貴當如河山之永也師次連山三桂復請速進兵多爾袞得書率  
兵夜馳踰甯遠次沙河距山海關十里三桂報賊已出邊立寨柵多爾  
袞隨命諸王等率精兵迎擊之敗賊將唐通於一片石師至山海關三  
桂開關親出迎多爾袞謂三桂曰爾歸營令爾兵繫白布為識恐與賊  
混致誤殺也使之先驅遂入關時李自成所率賊二十餘萬皆久歷戰  
陣殊剽悍恃其眾陣於關內自北山互海我兵少對賊布陣不能橫及  
海岸多爾袞集諸王貝勒大臣謂曰流賊橫行久獷且眾不可輕擊也  
吾觀其陣大相去遠首尾不能顧可鱗次集我兵對賊陣尾伺其氣衰  
突擊之必勝努力破此則大業成矣勿越伍躁進違節制陣既列令三  
桂居右翼之末先悉其眾搏戰賊力鬪圍復合戰良久我兵從三桂  
陣右突出衝賊中堅萬馬騰躍飛矢雨墮天大風沙石飛走擊賊如雷  
自成方登高岡觀戰知為我兵膽俱落急策馬下岡走我兵無不一當  
百追奔四十里賊眾大潰自相踐踏僵尸徧野溝水盡赤自成奔還京

師乃以馬步兵一萬隸三桂追賊向北京多爾袞與諸將誓曰此行志在滅賊救民以安天下勿殺無辜掠財物焚廬舍不如約者罪五月整兵入燕京以帝禮葬崇禎帝發喪三日遣武英郡王阿濟格等分道追自成連破之自成走西安燕京附近各城俱納款畿輔肅清山東山西以次悉定乃定議迎

世祖都燕京時明南京諸臣擁立福王朱由崧稱帝號其大學士史可法督師揚州多爾袞欲招之使降令南來副將韓拱薇等齎書致可法曰予向在瀋陽卽知燕京物望咸推司馬後入關破賊得與都人士相接識介弟於清班曾託其手勒平安拳致衷緒未審以何時得達比聞道路紛紛多聞金陵有自立者夫君父之讐不共戴天春秋之義有賊未討則故君不得書葬新君不得書卽位所以防亂臣賊子法至嚴也闖賊李自成稱兵犯闕手毒君親中國臣民不聞加遺一矢平西王吳三桂介在東陲獨效包胥之哭

朝廷感其忠義念累世之夙好棄近日之小嫌爰整貔貅驅除狗鼠入京之日首崇懷宗帝后諡號卜葬山陵悉如典禮親郡王將軍以下一仍故封不加改削勳戚文武諸臣咸在朝列恩禮有加耕市不驚秋毫

無擾方擬秋高氣爽遣將西征傳檄江南連兵河朔陳師鞠旅戮力同心報乃君國之仇彰我

朝廷之德豈意南州諸君子苟安旦夕弗審事機聊慕虛名頓忘實害予甚惑之國家之撫定燕都乃得之於闖賊非取之於明朝也賊毀明朝之廟主辱及先人我國家不憚征繕之勞悉索敝賦代爲雪耻孝子仁人當如何感恩圖報茲乃乘逆寇稽誅王師暫息遂欲雄據江南坐享漁人之利揆諸情理豈可謂平將以爲天塹不能飛渡投鞭不足斷流耶夫闖賊但爲明朝崇耳未嘗得罪於我國家也徒以薄海同仇特伸大義今若擁號稱尊便是天有二日儼爲勅敵予將簡西行之銳轉旆東征且擬釋彼重誅命爲前導夫以中華全力受制潢池而欲以江左一隅兼支大國勝負之數無待著龜矣予聞君子之愛人也以德細人則以姑息諸君子果識時知命篤念故主厚愛賢王宜勸令削號歸藩永綏福祿

朝廷當待以虞賓統承禮物帶礪山河位在諸侯王上庶不負

朝廷仲義討賊興滅繼絕之初心至南州羣彥翩然來儀則爾公爾侯列爵分土有平西之典例在惟執事實圖利之輓近士大夫好高樹名

義而不顧國家之急每有大事輒同策舍昔宋人議論未定兵已渡河  
可爲殷鑒先生領袖名流主持至計必能深惟終始甯忍隨俗浮沈取  
舍從違應早審定兵行在即可西可東南國安危在此一舉願諸君子  
同以討賊爲心毋貪一身瞬息之榮而重故國無窮之禍爲亂臣賊子  
所笑子實有厚望焉記有之惟善人能受盡言敬布腹心佇聞明教江  
天在望延企爲勞書不宣意可法遣人報書曰南中向接好音法隨遣  
使問訊吳大將軍未敢遽通左右非委隆誼於草莽也誠以大夫無私  
交春秋之義今倥偬之際忽捧琬琰之章真不啻從天而降也循讀再  
三殷殷致意若以逆賊尙稽天討煩貴國憂法且感且泣敬爲貴國一  
詳陳之我大行皇帝敬天法祖勤政愛民真堯舜之主也以庸臣誤國  
致有三月十九日之事法待罪南樞救援無及師次淮上凶聞遂來地  
拆天崩山枯海泣嗟乎人孰無君雖肆法於市朝以爲泄泄者之戒亦  
奚足謝先皇帝于地下哉爾時南中臣民哀慟如喪考妣無不撫膺切  
齒欲悉東南之甲立翦兇仇而二三老臣謂國破君亡宗社爲重相與  
迎立今上以繫中外之心今上非他神宗之孫光宗之猶子而大行皇  
帝之兄也名正言順天與人歸五月朔日駕臨南都萬姓夾道歡呼聲

聞數里羣臣勸進今上悲不自勝讓再讓三僅允監國迨民臣伏闕屢  
請始以十五日正位南都從前鳳集河清瑞應非一卽告廟之日紫雲  
如蓋祝文升香萬目共瞻欣傳盛事大江湧出枏梓數十萬章助修宮  
殿豈非天意也哉越數日遂命法視師江北刻日西征忽傳我大將吳  
三桂借兵貴國破走逆成爲我先皇帝后發喪成禮掃清宮闕撫羣  
黎且罷薙髮之令示不忘本朝此等舉動振古鑠今凡爲大明臣子無  
不長跼北向頂禮加額豈但如明諭所云感恩圖報已乎謹於八月薄  
治筐篋遣使犒師兼欲請命鴻裁連兵西討是以王師旣發復次江淮  
乃辱明誨引春秋大義來相詰責善哉乎推言之然此文爲列國君薨  
世子應立有賊未討不忍死其君者立說耳若夫天下共主身殉社稷  
青宮皇子慘變非常而猶拘牽不卽位之文坐昧大一統之義中原鼎  
沸倉卒出師將何以維繫人心號召忠義紫陽綱目踵事春秋其間特  
書如莽移漢鼎光武中興不廢山陽昭烈踐祚懷愍亡國晉元嗣基徽  
欽蒙塵宋高纘統是皆于國誓未剪之日亟正位號綱目未嘗斥爲自  
立率以正統與之甚至如元宗幸蜀太子卽位靈武議者嘗之亦未嘗  
不許以行權幸其光復舊物也本朝傳世十六正統相承自治冠帶之

族纒絕存亡仁恩遐被貴國昔在先朝夙膺封號載在盟府甯不聞乎  
今痛心本朝之難驅除亂逆可謂大義復著于春秋矣昔契丹和宋止  
歲輸以金緡回紇助唐原不利其土地況貴國篤念世好兵以義動萬  
代瞻仰在此一舉若乃乘我蒙難棄好崇讐規此幅員爲德不卒是以  
義始而以利終爲賊人所竊笑也貴國豈其然往先帝軫念潢池不忍  
盡戮勦撫並用貽誤至今今上天縱英明刻刻以復仇爲念廟堂之上  
和衷體國介冑之士飲泣枕戈忠義民兵願爲國死竊以爲天亡逆闖  
當不越于斯時矣語曰樹德務滋除惡務盡今逆賊未服天誅諜知捲  
土西秦方圖報復此不獨本朝不共戴天之憾抑亦貴國除惡未盡之  
憂伏乞堅同仇之誼全始終之德合師進討問罪秦中共梟逆賊之頭  
以洩敷天之憤則貴國義問昭耀千秋本朝圖報惟力是視從此兩國  
世通盟好傳之無窮不亦休乎至於牛耳之盟則本朝使臣久已在道  
不日抵燕奉盤盂從事矣法北望陵廟無涕可揮身陷大戮罪應萬死  
所以不卽從先帝于地下者實爲社稷之故傳曰竭股肱之力繼之以  
忠貞法處今日鞠躬致命克盡臣節所以報也惟殿下實昭鑒之多爾  
表接書知可法不能屈遂定議下江南九月



世祖車駕至京師加封多爾袞爲叔父攝政王是年冬遣豫親王多鐸南征江南英親王阿濟格西征逆闖十二月河南平二年陝西湖廣及江南平又遣貝勒博洛平浙江福建肅親王豪格平四川於是天下羣盜皆盡五年十二月大同總兵姜瓖叛六年二月多爾袞征之會有言喀爾喀將犯邊者乃遣別將討瓖自出張家口擊喀爾喀七年十二月師還至喀喇城薨

世祖率王貝勒大臣等迎其喪於東直門外八年二月蘇克薩哈等首告多爾袞薨時其侍女烏爾庫尼將殉呼近侍羅什博爾惠等告以多爾袞曾製八團龍補黃袍等衣屬令潛置棺內羅什等如言以殮又多爾袞欲於永平圈房率眾移駐與和洛會等密議已定特以出獵稽遲未行事聞經王大臣等定議追削王爵並黜宗室乾隆四十三年正月上諭廷臣曰睿親王首先統眾入關定國開基厥功最懋願以誣告謀逆經諸王定罪除封其時我

世祖章皇帝尙在沖齡未嘗親政也朕每覽

實錄見王之立心行事實能篤忠盡感

厚恩深明君臣大義爲史冊所罕覩乃令王之身後久抱不白之冤於

泉壤心甚憫焉假令當時王之逆跡稍有左驗削除之罪果出我

世祖聖裁朕亦甯敢復翻成案乃實由宵小奸謀構成冤獄而王之政

績載在

實錄皆有大功而無叛跡又豈可不為昭雪著加恩復還睿親王封號

追諡曰忠補入

玉牒補繼襲封昭親王園寢制度修其塋墓仍令太常寺春秋致祭並

配享

太廟和碩豫通親王多鐸傳

豫親王多鐸

太祖高皇帝第十五子也初授貝勒天聰二年三月與多爾袞從

太宗往征察哈爾多羅特部大捷

太宗喜語諸貝勒曰兩幼弟初領偏師輒有功宜賜美名於是號多鐸

為額爾克楚瑚爾五年九月

太宗親率軍擊明錦州多鐸從以二百人敗錦州兵七千於城下又敗

明兵於大凌河七年六月

詔問羣臣伐明與朝鮮察哈爾宜何先多鐸言宜伐明直入長城圖久  
長之計先其大者則其餘自滅且隨我所求而自至矣八年七月  
太宗親伐明多鐸從同貝勒阿濟格等率兵入龍門會大軍於宣府遂  
入邊擊敗明兵畧保安州克之戮其守將往會  
太宗於應州城獻俘八月同多爾袞等畧朔州隨攻大同敗明兵於城

南

太宗以明國必調甯遠錦州兵往山西救援

命多鐸爲帥率精兵入明廣甯以遲其救援先遣石廷柱阿山等趨錦  
州會錦州總兵祖大壽遣副將劉應選等率兵來拒遇大凌河西阿山  
等以兵寡馳告多鐸疾馳敗劉應選所部兵俘獲無算凱旋獻俘

太宗迎勞五里外以多鐸初專閩外能出奇取勝嘉獎之

賜良馬五甲五崇德元年四月晉封和碩豫親王兼理禮部事十二月  
從

太宗征朝鮮累戰皆有功遂降朝鮮四年八月兼理兵部事十一月同

貝勒豪格畧錦州甯遠斬總兵金國鳳等五年三月奉  
命爲左翼總統與濟爾哈朗往修義州城駐防屯田六年三月代多爾

表圍錦州松山繞錦州城立營浚濠爲久駐計城中惶恐守門蒙古諾木齊武巴什繩書約降祖大壽知有異志欲以計擒之諾木齊等卽執兵拒外城蒙古亦執兵助既接戰聲聞關外多鐸與濟爾哈朗至城下援之關內蒙古繩援兵入與明兵戰於城上明兵敗大軍遂入關徙其民義州捷奏至

太宗大悅四月復敗明杏山松山按兵八月明經畧洪承疇以八總兵十三萬眾來援錦州

太宗親統大軍往征之疾馳六日環松山而營明兵宵遁遣貝子博洛等追擊之並簡精兵付多鐸令設伏遂夾擊吳三桂等兵敗之尋又奉命圍松山城內夜出兵來犯擊敗之斬首千餘級十二月承疇自松山率兵夜出來犯多鐸令沿濠射之悉敗去城中益困七年二月松山副將夏承德密遣約降爲內應以其子舒出質夜半諸將上舉梯登城遂克生擒承疇及巡撫邱民仰等七月敘功加封多羅豫郡王八年四月疏言當今之勢宜暫息兵以農務爲急衣食豐足舉國慶豫再有舉行未晚也順治元年四月從多爾袞入關破流賊定燕京十月晉和碩德豫親王時明福王朱由崧自立於南京稱大號遣兵扼淮徐爲割據

計而李自成尙據陝右多鐸奉

命爲定國大將軍率師南征二月由河南進兵克陝西趨潼關凡三敗李自成之眾斬獲無算賊守將皆望風降附復戰於潼關大軍奮勇衝擊呼聲動天地縱橫掩殺漫山彌野自成精銳畧盡遁至西安不復能成軍拒守多鐸師渡潼關濠口斬僞將馬世堯師至西安自成奔商州南走湖廣追之不及二月捷聞

世祖以流寇旣竄西安平定關中撫綏事宜付英親王阿濟格等

命多鐸率大軍由河南趨淮揚討江南之稱號自立者四月渡淮趨揚州招諭守揚閣部史可法等降不從攻克其城獲可法等斬之五月師至南京文武官數百員馬步兵二十三萬有奇皆迎降南京平追擒福王於蕪湖捷聞

世祖嘉悅遣侍臣赴軍中慰勞焉多鐸復遣兵敗馬士英之眾降潞王朱常滂江浙悉定七月

詔以貝勒勒克德渾爲平南大將軍代多鐸還十月凱旋

世祖御殿以多鐸統軍以來功最大晉封和碩德豫親王

賜黑狐帽貂朝衣及玲瓏鞍馬金五千兩銀五萬兩三年五月蘇尼特

部騰吉思等叛奔喀爾喀

詔以多鐸爲揚威大將軍往征七月多鐸等至營囑爾察克山開騰吉思在表囑魯台星夜疾進三日追及於額克特山搜其妻子及牲畜喀爾喀土謝圖汗以兵二萬邀大軍於札濟布喇克之地多鐸擊敗之追逐三十餘里次日碩雷汗復率兵三萬至又擊敗之追逐二十餘里十月凱旋

世祖出安定門迎勞四年七月

御太和殿冊封爲輔政叔德豫親王

賜金千兩銀萬兩鞍馬二冊文稱定鼎中原以來所建功勳卓越等倫

云六年三月薨七年三月

命立碑紀功九年三月鄭親王濟爾哈朗等會議多鐸係多爾袞同母

弟應削王爵

世祖念其勳勞止追降郡王康熙十年五月追諡曰通乾隆四十三年

上諭廷臣曰豫親王從睿親王入關肅清京輦卽率師西平流寇南定

江浙實爲開國諸王戰功之最乃以睿親王誣獄株連降其親王之爵

後又改封信郡王以王之勳績超邁倫等自應世昨原封以章殊眷著

仍追復親王還號為豫一體配享

太廟多鐸子多尼征故明桂王朱由榔於雲南敗李定國白文選之眾

所向克捷襲封郡王順治十八年薨諡宣和

和碩鄭獻親王濟爾哈朗傳鄭虎文

濟爾哈朗追封和碩親王舒爾哈齊第六子也舒爾哈齊

顯祖宣皇帝第三子

太祖高皇帝同母弟初授貝勒蜚悠城長策穆特黑者本東海瓦爾喀

部人苦烏喇之虐乞攜家歸附

太祖命舒爾哈齊同貝勒褚英大貝勒代善率兵三千往徙之兵至蜚

悠城烏喇以眾來戰敗之盡收其環城屯寨五百戶而歸

賜號達爾漢巴圖魯辛亥薨順治十年追封和碩親王諡莊濟爾哈朗

幼育於

太祖宮中號和碩貝勒天命十一年四月從代善征蒙古五部有功天

聰元年正月同貝勒岳託阿濟格從大貝勒阿敏征朝鮮及明島帥毛

文龍大軍薄義州克之遂進拔安州定州搗毛文龍所居鐵山直逼朝

鮮平壤城朝鮮遣使來請和議未決阿敏有異志欲屯種以居因令直

趨朝鮮王京時岳託察其情不可勸止邀濟爾哈朗議濟爾哈朗曰兵  
不可深入聞去此三十里有平山城者可駐兵以待和議之成遂引軍  
駐平山朝鮮王李倬遣使至議歲貢許之遂定盟振旅歸五月從  
太宗伐明出甯遠舊邊同大貝勒莽古爾泰等率偏師往衛塔山糧運  
遇明兵擊敗之從攻甯遠城與明總兵滿桂兵遇力戰被創氣彌奮大  
敗其眾二年同貝勒豪格討顧特塔布囊初顧特塔布囊自察哈爾竄  
居蒙古地遇來歸我國者輒行截殺至是伏誅收其部以歸三年九月  
同德格類岳託阿濟格率兵往畧明錦州甯遠焚其聚積而還十月  
太宗親統大軍伐明濟爾哈朗同岳託攻大安口毀其木門乘夜進兵  
明馬蘭營參將率兵來援我前鋒軍擊走之比明見明援兵立二營於  
山上濟爾哈朗先縱兵往敗其眾追至馬蘭營旣而岳託復敗遵化援  
兵是日自辰迄巳五戰皆捷馬蘭營馬蘭口大安口三營旣下遂引軍  
趨石門復殲明援兵於道城中兵皆懾服不敢出十一月會大軍於遵  
化城十二月同貝勒阿巴泰等率兵往焚明通州船遂攻張家灣克之  
四年正月叛將劉興祚逃歸山海關與袁崇煥同赴永平聞我軍將至  
永平遂趨太平寨道殺蒙古之以所俘來獻者濟爾哈朗與阿巴泰往



捕之追及於山海關斬興祚擒其弟興賢以獻時大軍既克永平進趨北京與貝勒薩哈璘統兵一萬駐守永平察倉庫閱士卒置官吏擢明道員白養粹廢員孟喬芳楊文魁等併以書招永平所屬州縣於是灤州州同張文秀遷安縣知縣朱雲台副將王維城參將馬光遠守備李繼全千戶錢奇志皆相繼降三月阿敏來代即同阿敏等往畧遼西一帶降榛子鎮是月師還五年七月初設六部遂理刑部事八月從太宗伐明圍大凌河城時芬古率本旗兵圍南面之西濟爾哈明軍爲後應旋與代善等攻克明臺留兵守之十一月與多鐸往截塔山以東邊海隘口俘百有餘人六年

太宗征察哈爾還復議伐明大軍次木魯哈喇克沁地方與岳託等率右翼兵畧歸化城黃河一帶部民俘獲以千計七年三月築岫巖城以兵駐守五月與阿濟格杜度往迎明降將孔有德耿仲明於江上明兵及朝鮮兵來追者遙望我軍皆驚遁遂獲降人以歸八年

太宗征察哈爾留守盛京十年四月改元崇德晉封和碩鄭親王十二

月  
太宗征朝鮮復留守三年大軍伐明奉

命率本旗兵自前屯衛會大兵於中後所攻克模龍關及五里堡屯臺  
四年往畧明錦州松山與明兵遇九戰九敗之俘獲二千三百餘人時  
有蘇班代阿巴爾代者蒙古多羅特部眾也先降明居杏山西五里臺  
五年五月遣使來請以三十戶降附同豫親王多鐸郡王阿達禮貝勒  
羅洛渾博洛等率師千五百人往迎之瀕行  
太宗戒曰敵見我兵寡必來拒戰可分兵爲前後中三隊前隊拒戰二  
隊應援遂奉

命行夜過錦州城南至杏山令來使潛入臺告蘇班代阿巴爾代攜其  
家資牲畜以行比明杏山總兵劉周智率馬步兵沿城布列阻我師錦  
州松山守將偵我兵寡亦各以兵助分翼列陣進逼我師我師佯退敵  
兵呼噪而來縱兵反擊之身先陷陣與諸王貝勒親自搏戰大敗之追  
奔至城下乃還斬明副將楊倫周參將李得位復與羅洛渾分軍破兩  
營兵於城南乃整師歸  
賜御廢良馬一九月同阿濟格等率兵代睿親王多爾袞圍錦州松山  
師至錦州敵伏兵皆驚遁又遣輔國將軍滿達海擒斬明運糧兵於杏  
山塔山之間六年三月復同阿濟格多鐸等圍錦州繞城立八營浚濠

築塹爲久困計於是城中蒙古諾木齊吳巴什等絕書刻期獻東關以  
降許之至期爲明總兵祖大壽所覺欲執諾木齊等諾木齊等亦率兵  
拒戰聲聞關外濟爾哈朗與諸王貝勒率大軍至城下應之關內蒙古  
兵絕繩以登我師我師畢登與蒙古共擊明兵明兵敗入內城遂據其  
關遷關內諸蒙古於義州是役也降明都司以下等官八十六人男婦  
六千餘口捷聞

太宗大悅令八門擊鼓召眾於

篤恭殿宣捷四月明兵自杏山趨松山來援與阿達禮羅洛渾率右翼  
兵伏錦州南山西岡阿濟格多鐸率左翼兵伏松山北嶺令前鋒軍往  
致師敵至伏起前後夾擊大敗之五月又敗明經畧洪承疇兵六萬於  
松山北岡斬首二千級六月多爾袞豪格率師來更代將受代聞明關  
內援兵自松山趨海口復與多爾袞等合兵擊敗之追至松山城濠而  
還八月洪承疇等率兵十三萬來援錦州

太宗親統大軍征之

命留守九月復從圍錦州十二月承疇以兵六千夜犯正紅正黃兩旗  
營濟爾哈朗令軍各依汛地沿濠射之敵敗去會松山城門閉不得入

盡降其眾初我師之圍錦州也自六年三月至七年三月錦州糧盡援絕祖大壽坐困至是閻承疇被擒松山已失乃率眾出城請降納之遂議進取甯遠之策四月同多爾袞等率兵攻塔山克之進攻杏山城中懼開門降乃籍俘獲之數以

聞七年

賜鞍馬一蟒緞百八年

世祖章皇帝嗣位以濟爾哈朗與多爾袞輔理國政九月同阿濟格率兵攻甯遠拔其城斬遊擊吳良弼進克前屯衛斬總兵李斌明袁尙仁中前所總兵黃色棄城遁取之遂班師順治元年晉封信義輔政叔王賜金千兩銀萬兩緞千疋五年三月貝子屯濟等訐告兩旗大臣謀立豪格濟爾哈朗知而不舉議罪降多羅郡王閏四月復爵九月爲定遠大將軍討湖廣流賊李錦等十月道出山東時曹縣爲土寇所據移師往勦生得賊首李名讓張學允曹縣平六年八月抵長沙時僞總督何騰蛟及馬進忠等據湘潭一隻虎據辰州杜永熙據永興王進才等據寶慶大軍自安陸府渡江令順承郡王勒克德渾固山額真阿積格尼堪統八旗前鋒護軍爲前哨自率大軍繼進抵湘潭賊出三門迎戰我

師分擊之生擒何騰蛟奪門入拔其城率兵由永興趨辰州一隻虎遁去尚書阿哈尼堪敗王進才等兵於寶慶克其城又連破南山坡大水紅江等處賊兵凡二十八營寶慶平進攻靖州衡州斬偽總兵陶養用追敗偽伯胡一清兵於廣西遂入全州於是道州黎平府及烏撒城等處皆以次克獲凡收復府州縣六十餘城擒斬偽王以下文武官以百計湖南貴州悉平七年正月振旅還

賜金二百兩銀二萬兩嗣以與多爾袞不合罷輔政九年晉封叔和碩鄭親王十二年二月上疏言

太祖高皇帝開創之初日與四大貝勒王大臣及眾台吉等討論政務得失咨訪兵民疾苦使上下交孚鮮有壅蔽故能上合天心下洽民志掃盡羣雄肇興大業

太宗文皇帝纘承大統紹述前猷亦時與諸王貝勒大臣講論不輟且崇獎忠直鼓勵英傑錄微功棄小過凡下詔布令必先講求其可以順民心垂久遠者然後施行又慮武備廢弛不忘騎射時

駕出射獵諸王貝勒置酒讌會以優人演戲爲樂  
太宗皇帝還自獵所克勒郡王以聞

太宗皇帝勃然怒曰我國肇興治弓矢繕甲兵視將士若赤子故人爭  
効死每戰必克以成大業朕嘗恐後世子孫棄我國淳厚之風沿習漢  
俗卽於滔淫今汝等爲此荒樂欲國家興隆其可得乎遣伯索尼再三  
宣

諭今

皇上詔大小臣工盡言無隱誠欲立綱陳紀綿國祚於無疆也臣以爲  
平治天下莫要於信

詔令順民心前降諭軫恤滿洲官兵疾苦聞者無不歡忭嗣又派令修  
造乾清宮

詔令不信何以使軍民服從伏祈效法

太祖

太宗不時與內外大臣詳究政務得失凡事必預爲商榷然後頒之

詔令庶幾見諸施行法令信可以紹

二聖之休烈矣抑臣更有請者垂休典謨廣昭令德莫要於設立史官  
聖主統一中原事以堯舜爲法但

起居注官尙未設臣竊惑焉古之聖帝明王進君子遠小人順天心合

民志措天下於太平垂鴻名於萬世良於史臣有賴今宜倣古制特設  
記注官置之左右凡嘉言懿行一一記載於以垂憲萬世傳之無窮亦  
治道之一助也

世祖嘉其言五月病劇

車駕臨問問王叔有遺言乎泣對曰臣受

三朝深恩未能仰答不勝感痛惟願以取雲貴滅吳三桂統一四海爲

念且滿洲甚少而能破流寇取京都者應加撫恤

世祖垂涕曰天何故不令朕叔長年耶言已大慟

詔圖其像留宮中及薨輟朝七日

賜祭葬所給銀兩視定例倍之置守園十戶以子濟度襲十四年立碑

紀功稱忠冠當時功昭後世云康熙十年追諡獻

和碩肅武親王豪格傳

鄭虎文

豪格

太宗文皇帝第一子也生而英毅多智畧初嘗從征蒙古董夔察哈爾  
鄂爾多斯諸部功最授貝勒天命十一年隨大貝勒代善征蒙古五部  
有功天聰元年

太宗伐明至廣甯舊邊豪格同諸貝勒往衛塔山糧運前軍猝與明兵  
遇時明兵二萬我軍以八十人擊敗之二年五月同貝勒濟爾哈朗討  
顧特塔布囊誅之盡收其部以歸三年十月從

太宗伐明十一月大兵進逼北京大貝勒莽古爾泰率諸貝勒迎擊明  
甯遠巡撫袁崇煥錦州總兵祖大壽援兵於廣渠門外敵以重兵設伏  
於右莽古爾泰令諸貝勒擊其右違者罪與避敵同豪格如命衝敵右  
敗其伏餘貝勒由中路乘之敵遂潰又同貝勒岳託薩哈璘率兵圍永  
平府別攻香河縣克之四年正月與岳託還守瀋陽五年七月

太宗西征

命與貝勒杜度薩哈璘居守六年五月

太宗征察哈爾遂伐明豪格從濟爾哈朗畧歸化城等處有功六月晉  
封和碩貝勒七年六月

詔問羣臣用兵明與朝鮮察哈爾宜何先豪格奏云錦州甯遠攻之無  
益何也我國攻城之法彼盡知之況我兵曾攻之而未得若復令攻之  
必有畏難之意雖得錦州此外七城尙煩攻取若徒得一城其餘皆堅  
壁不下彌旬曠日恐老我師今宜盡率我眾及邊外新舊蒙古從舊道



而入爲書頒示各屯寨告以我願和而彼不肯和之意仍傳諭各城則  
彼處人民雖被創痍將自怨其主無尤於我如此則我兵勇氣自倍而  
邊外蒙古愈加勉勵矣若馬匹疲斃卽以所獲之資買馬其餘並以製  
衣則嗣後進兵人人奮勇靡有退志再用更番之法俟秣馬肥壯益以  
漢兵攜巨礮分兵兩路一從甯遠入一從舊路入夾攻山海關得之則  
已不得卽屯兵彼地遣人往招流賊諭以來歸撫輯其眾不然進攻通  
州得與不得姑久駐其地往偵流賊情形彼方分師捍禦我伺其懈怠  
乘夜襲之可圖也總宜乘時急進若坐失此機必將後悔至於朝鮮  
且暫行撫慰俟我與敵國勝負既定再爲區處察哈爾近則相機而行  
若離興安嶺二三日程雖追無及謹抒鄙見上陳八月與阿巴泰等畧  
明山海關有功八年七月伐明分兵四路入  
太宗親統大軍由宣府趨朔州豪格率揚古利毀邊牆大兵遂由上方  
堡分道進旋同貝勒多爾袞畧朔州及五臺山而還復從攻大同擊明  
援兵走之九年與多爾袞岳託薩哈麟爲元帥統兵一萬往收察哈爾  
林丹汗子額爾克孔果爾額哲師至西喇朱爾格遇察哈爾汗妃及台  
吉瑣諾木等以千五百戶降遂抵託里圖託里圖者額哲所駐地也會

天大霧乘其無備遣額哲母蘇泰太后之弟南楮等先往見額哲母諭以奉命招撫意額哲母令額哲率眾宰桑迎諸貝勒入遂定盟次日率所部降時鄂爾多斯濟農來招額哲已盟且行矣追還濟農令毀盟且還額哲所遺物濟農聽命是役也額哲以古玉璽獻文曰制命之寶元順帝奔應昌時所失林丹汗得之於元後裔博什克圖汗者也師還抵歸化城岳託以疾留豪格同諸貝勒畧明山西邊郡連敗明兵遂由平魯衛直抵長城毀甯武關入畧代州忻州忻州兵出拒敗之又敗明兵於忻口追至崞縣乃整師出復敗明兵於平魯衛遂會岳託於歸化城班師崇德元年四月晉封和碩肅親王兼攝戶部尋坐黨岳託且漏

上言有怨

上心降貝勒解部任九月隨多爾袞攻明錦州旋仍攝戶部十二月太宗親征朝鮮與多爾袞分統滿洲蒙古及外藩蒙古各左翼兵別從寬甸入二年正月入長山口昌平民皆奔山立寨自固攻克之敗安州黃州兵於甯邊城下甯邊帥率兵往援其王遇麾下別將擊敗擒之師次宣屯村村民言安州帥聞其王被圍往援行三日矣卽疾馳一晝夜及之於陶山破之九月以固山額真俄莫克圖欲脅取外藩蒙古台吉

博洛女媚事豪格奪爵罷都任三年同多爾袞畧明邊毀邊牆入敗明兵於豐潤縣降高唐州遂畧地至曹州明兵阻水毀橋以拒我師因列陣誘敵潛師渡河遠敵後敗之遂下東光縣又敗郭太監兵於滹沱河被獻縣所至克捷俘獲無算四年四月師還

賜馬二匹銀萬兩仍攝戶部尋復原封十一月同貝勒多鐸伐明甯遠兵出北山岡拒戰敗之陣斬總兵金國鳳及其二子五年六月同多爾袞杜度阿巴泰築城屯田於義州七月刈錦州未敗其兵克臺十有一自是屢有斬獲至九月代還六年三月同多爾袞圍錦州以多爾袞輕

違諭旨豪格亦坐罪降郡王旋同多爾袞代濟爾哈朗督師圍錦州五月擊斬松山援兵二百餘級六月復敗山海關援兵獲馬五百餘匹時明經畧洪承疇率各路總兵統馬步卒十三萬援錦州兵勢甚盛我軍初遇敗其三營八月承疇兵犯我右翼復擊敗之

太宗開承疇兵來親統大軍自

盛京疾馳六日將抵松山遣大學士剛林諭二王先駐高橋俟大軍至合圍松杏二王馳奏奉

旨屯高橋倘賊兵爲我所迫錦州松山兵內外夾攻協力死戰而欲自高橋來援勢難速至不如請大軍暫駐松杏之間

太宗可其奏尋同多爾袞還守

盛京十月復

命從圍松山七年二月松山副將夏承德密遣人請降

太宗許之用爲內應時豪格同王貝勒率兩翼兵梯城南先登遂克松山擒承疇及巡撫邱民仰總兵王廷臣曹變蛟祖大樂等四月同濟爾哈朗攻塔山克之七月敘功復原封順治元年以語侵多爾袞爲固山額真何洛會所訐告坐言詞悖妄奪爵十月

世祖既定鼎燕京大封諸王念豪格從定中原有功仍復原封是冬山東土寇竊發奉

命往征遂定濟甯撫輯降將許定國官兵萬餘人破滿家洞賊巢十餘處復用土石堙塞二百五十一洞土寇畧平二年

命阿巴泰代豪格還三年正月爲靖遠大將軍率衛膳郡王羅洛渾貝勒尼堪等西征時陝西流賊邠州則有宋大傑賀洪器齊勳張國棟慶陽則有石二延安則有劉文炳康千總郭天星張破臉漢中則有賀珍

興安則有二隻虎孫守發徽州階州則有武大定高如勵蔣登雷石國  
璽王可成周克德等所在蠡起豪格至則斬石二康千總降齊勳張國  
棟石國璽蔣登雷王可成周克德餘悉潰散盡復所陷州縣陝西平十  
一月整兵入蜀至南部偵知賊首張獻忠據西充縣令護軍統領鼐拜  
領兵先發隨統大兵繼進抵西充獻忠悉兵來拒麾兵奮擊斬獻忠於  
陣復分兵搜剿餘賊凡擒偽王以下文武官二千三百有奇四年勒定  
遵義薊茂榮昌隆昌富順內江資陽諸州縣破賊營一百三十餘處蜀  
寇悉平五年凱旋

世祖御太和殿宴勞之尋爲多爾袞所構陷下獄卒七年

世祖親政念其枉復封和碩肅親王立碑表之子富綬襲十三年追諡  
武十四年再立碑以紀其功

和碩怡賢親王允祥傳

彭紹升

和碩怡賢親王諱允祥

聖祖仁皇帝第二十二子康熙六十一年十一月

世宗卽位封王爲怡親王領戶部兼理三庫事

聖祖朝屢議減東南浮賦爲部臣所格至雍正三年王具疏以請

世宗稱善卽

命減蘇松賦四十五萬兩嘉興湖州南昌共減十七萬兩其年冬總理水利營田事濬畿甸河渠闢荒地數千里募民耕種期年而有收時部帑虧額

命王按數稽核王以歷年久典守代更請概予豁免

上意未允王乃以平餘飯食銀代償十至八九嘗奏言當今用法稍嚴宜以寬濟之其後

上以憫旱憶王言盡免雍正三年以前內外官應追積逋並開復絀誤時兩立沛王履承

詔決大獄多所寬釋因奏言聽訟之道求之辭色以察情僞設誠以待之據理以折之未有不得其實者若概用刑訊三木之下何求不得此冤抑之所以難伸也

世宗詔以其言示直省有司刻木榜于堂四年七月

御書忠誠敬直勤慎廉明八字以賜條析王善行宣布中外前後屢頒詔獎王不下數千萬言王每承恩禮益加謙畏故

上眷遇日篤八年五月以疾薨

詔奉天直隸江南浙江各爲王立祠

碑傳集卷一

貴筑黃彭年編訂

碑傳集卷二目錄

宗室下

康良親王傑書傳 鄭虎文

惠獻貝子福喇塔傳 何石雲


又甯海將軍惠獻貝子功德碑 王恕

固山貝子彰泰傳 鄭虎文

簡儀親王德沛碑 袁枚

禮恭親王永恩家傳 姚鼐





106-194

宗室下

康長親王傑書傳 嘉慶文

傑書順治六年封多羅郡王八年

賜號康十六年既襲爵仍號康康熙十三年三月逆藩耿精忠據福建

反浙江江西震動

聖祖命為奉命大將軍率師進剿十月賊將徐尙朝犯金華遣副都統

馬哈達擊破之十二月又敗賊於紫瑯山焦圍等處先後斬賊數萬徐

尙朝復犯金華副都統巴雅爾戰於積道山敗之遂復永康縉雲二縣

十四年二月我師運礮至上虞賊將方懋功邀諸路擊破之偽帥馮公

輔自義烏遁統領希佛敗之於苦竹復武義義烏二縣偽總兵沙有祥

距桃花嶺梗處州路馬哈達等進剿入處州賊退仙居副都統穆和林

又敗之於白水洋直抵城下賊將會養性益兵助守我師三面梯攻賊

夜窺伏兵起盡殲之遂復仙居三月平南將軍賴塔連敗偽將軍馬九

王於衢州時馮公輔復據宣平我師進敗之大旗口公輔殊死鬪我師

奮擊奪隘入徐尙朝連犯我軍先後敗之於十八都石塘石佛嶺大王嶺東隴隘口上套寨下五塘等處斬獲無算遂復松陽縣八月我兵自土木嶺進勦曾養性拒守黃巖遣甯海將軍貝子傅喇塔圍之賊潰圍出黃巖降又敗賊於上塘嶺復太平樂清青田等縣九月又敗賊於衢州北原口山賊據夏州河西屢犯我軍皆敗之十一月傅喇塔進攻温州連敗賊於南江石塘十五年三月圍温州敗養性兵四萬立營江岸扼賊入青田路賊勢大挫又擊賊於八帶橋張村大破之五月馮公輔陷宣平旋復之六月傅喇塔率師過三角嶺破會養性於古溪路遂抵溫溪渡口復敗賊將馬成龍等八月大兵抵仙霞關僞參將金應虎迎降進攻浦城建揚二縣建甯延平望風歸順耿精忠震懾無措遣子顯祚來迎我師傑書遣使齎勅諭示之耿精忠降遂入福州是時渠賊雖平餘黨及海賊猶未盡滅遣使招撫耿繼善繼善逃僞黨乘勢據邵武穆和林擊敗之復其城海賊鄭錦以兵寇省城將軍喇哈達敗之於烏龍江復泰甯建甯甯化諸縣及汀州府十六年正月穆和林復上杭武平永定及江西瑞金等縣贛州路通大兵進攻興化破海賊三十六營復其城三月克泉州賊棄漳州遁海澄等十縣皆降十月參領都克納

等敗賊於龍溪班山等處十二月賊犯泉州都統楊鳳翔擊走之十七年三月破海寇於漳州七月泉州惠安復陷賊副都統禪布討復之七月賴塔敗賊於柯鑑山萬松關副都統紀爾他布等敗賊劉國軒於江東橋又敗諸潮溝之間副都統胡圖敗賊吳淑於石衛十八年正月巡撫吳興祚等又敗國軒於郭塘賊自是不能成軍矣五月國軒復犯江東橋我兵又敗之十月連破賊於東石鼇頭山等處十九年三月鄭錦聚黨海中窺廈門遣都統鄂申進取賊遁去復大定小定地方大兵進取玉洲擊劉國軒於石馬海澄皆下之克銅山降偽將軍江機等三千餘員全閩底定凱旋

聖祖率諸王大臣郊勞之旋

命議政二十九年以厄魯特噶爾丹叛

命率兵往會撫遠大將軍裕親王福全旋

命駐防歸化城三十六年薨諡良立碑紀功

惠獻貝子福喇塔傳

何石雲

甯海將軍固山貝子諡惠獻諱福喇塔我朝宗室也父多羅定貝勒斐揚武佐

世祖章皇帝龍飛定鼎元勳懿親屢受征討之寄貝子幼卽侍父帷幄  
參謀議具文武才畧嘗從征闖孽于湖廣滅之其後福建漳泉等郡爲  
海寇鄭成功所踞鴟張猖獗

命貝子將兵誅勦智深勇奮寇披靡遁散海疆以平

今上十二年冬平西王吳三桂以雲南貴州叛平南王尙之孝以廣東  
叛明年吳逆之兵出於東南者自湖廣廣西以至江西尙逆之兵亦將  
自嶺出三月靖南王耿精忠叛於福建與二逆應起兵由建甯出仙霞  
陷衢州常山等縣別遣僞都督曾養性僞水軍都督朱飛熊等由福甯  
經平陽下之六月陷温州山賊乘機破仙居未幾復七月逆兵下樂清  
八月下黃巖太平亦受逆制九月會養性率兵由黃巖西行温州總兵  
祖宏勳黃巖總兵阿爾泰先戰敗降賊至是由黃巖北行率寇會於台  
州府城外水陸十萬十月都統伯穆赫林吉爾塔布等與戰長天洋敗  
績時都統周雲龍在仙居被攻于僞總兵朱福棄城走台州郡東南已  
爲寇踞我師分守西北朱福兵自仙居出屯天封寺屢敗我師斷糧道  
賊亟圖攻城周雲龍見勢危急慮台州人與賊通遂欲屠台州回守新  
昌台道楊應魁力爭而止時温州郡縣皆陷賊又別攻處州紹興亦煽

動台州數經困敗岌岌不可保賊因以建甯之兵綴我師于衢州而福甯之兵由處台溫溯浙江而下將與嶺南江西爲犄角實有建瓴之勢杭州以西皆震恐仙居失賊故得斷天台之道台州失則甯紹之門戶奪浙江以東悉爲賊有賊且抄衢州之後以內外夾攻我而三逆居然相連接台州豈可棄哉先是耿逆叛聞

上以貝子嘗征海寇于聞聲威素著

特命爲甯海將軍偕和碩康親王督師討其罪是年八月至杭州貝子謂扼賊之要實在溫台當使之困蹙不前仙霞不難破天下不難平也於是與康親王分兵由紹興進發而嵯縣土賊爲逆分割結黨剽掠所在皆是貝子授文武方畧留兵一千先擊於縣城再分擊于北鄉再會擊於沿江復以計襲擊于西鄉擒斬招撫兩月而靖十一月貝子師至台州撫慰災黎賞勞軍士以平寇之策必鎮定持重形悉而謀素尤以得民心作士氣爲要前此安營掘壕露齒三十里卽下令禁毀塋砍樹陣亡之官卒給資舁骸骨歸歲值大歉捐金勸賑煮粥天甯寺民賴之沃山營戍卒苦寒倍月餉給之按地設鄉兵置練總無事則守望有事則嚮導人給銀米俾歸度歲咸感恩弗去造江舟演水師增白塔戍守

堅壁固壘戒勿輕動凡統軍十萬米草乏貴運道艱梗諸將亟請戰勿  
許防範惟嚴十四年二月忽遣知縣鄭錄勳前導滿漢兵繼進仙居一  
舉克復三月令提督常進功率水師攻賊於小兩山誘賊帥朱飛熊入  
我舟烏鎗中其額而斃賊水軍大敗陸軍亦漸引遁貝子遂散鄉兵諭  
速歸播種春夏雨濤完治甲械移營高塏地被脅割辦之民聽至都賀  
易物貨有資洋梵大芬泗林等處居民有誣爲賊者有爲賊迫制者數  
萬人桀釋之民情益愜軍勢旣振糧復足諸將又請進兵貝子以炎夏  
不許九月命楊應魁託名巡兵偕鄭錄勳相度至黃巖別徑形勢果利  
遂先遣穆郁統等密領兵由仙居至茅坪嶺抵黃巖界經涼篷甯溪烏  
巖尾於賊後賊聞大恐夜拔營水陸奔逃温州自相蹂殺者無算貝子  
復提大兵追至黃巖又追至樂清邑民先避寇空城無人寇船滿海上  
我兵無由至郡遂緣柵溪山行由青田渡江貝子知賊必于上塘禦我  
先伏兵寶勝寺內寇半至則出而截殺首尾不相顧溺與傷死者大半  
我兵遂踰和嶺至威甯灘陽令數百人鳴金下馮山若安營狀賊信之  
不來攻我師遂入溪口白栝屯溫郡之西山賊踞守郡城十五年二月  
水陸兵數萬掩至貝子使夸蘭大丹毋佈等戰敗之礮沈其七船殺賊

七百餘溺死不可勝計賊復火攻西山貝子親督兵力戰大敗奔逃追及於將軍橋賊爭渡墜溺死者甚眾殺賊二萬有奇曾養性墜馬泗水道入城五月貝子以夏暑餉運爲艱是年二月已遣兵解處州之圍遂撤師往東草人搖旗留數壞礮安長線度行數里始發又擊賊於臨福山諸處賊不敢犯八月將率師進戰有以先取松陽請者總兵陳世凱曰不如徑破石塘此入閩捷路也貝子嘉納之卽命進兵自率兵繼進夜伐雙溪張村樹爲路以上出賊不意奪其幟九寨皆破賊猶力戰貝子駐馬高嶺指揮奮殺凡六陣乘勝馳下燒其七營砍柵二十有八斬首六千有奇爲時一晝夜賊眾數萬降勦已盡於是温州克復而處州之松陽雲和龍泉慶元等縣俱以次全復三逆之聯絡也藉福建爲樞紐耿逆之應援也恃浙東爲奇道其兵出衢州特以綴我師耳貝子卽因其勢而利導之康親王浙江總督李之芳殫力捍禦牽制逆兵進退不可而自督大軍攻勦温台收定處紹先困蹙其十萬之眾使不得分顧衢州而仙霞且易於摧破一旦賊眾旣殲浙東適爲我奇道遂由慶元入松溪與康親王會建甯循延平抵福州王師自天而下耿逆自束手乞 而哭逆乃不敢渡江尙逆亦不敢踰嶺三逆孤離相繼服罪天



下蕩平皆貝子之神武也海寇鄭經乘耿逆之叛謀襲福州軍鳳山嶺者三萬貝子既至督將士擊之寇望而卻走追奔數十里多所斬獲自是遠遁閩益底定然貝子由柘溪出青田自牽所乘馬山行跌而折其手指盡瘁攻温州齒落者二又軍次往往露宿爲寒暑所侵方奏凱疾已不可爲遂薨于福州貝子統師豐賞而廉已薨之日蕭然至不能備禮百日待軍士以祭訃聞浙閩遠近無不感恩慟泣

天子輟朝震悼

賜祭賜葬易名碑墓榮哀之典於斯爲至當貝子戡定浙閩時予在總制今相國李公幕府於公牘中已知貝子忠績其後秉教在台瞻拜廟貌父老子弟爲余言貝子德善勳勞益詳今庠生王士元等久而不忘請予立傳以紀恩績予固杭人與諸生同受貝子綏靖之福者其敢以不文辭爰敬爲傳

又甬海將軍惠獻貝子功德碑 王恕

維天篤生

聖皇肇造區夏莫安神人以開億萬世無疆之祚則必誕毓忠勇材智之臣近在宗藩爲國宣力以保乂我

王家其殊尤偉蹟既彪炳天潢巍然玉牒矣而盛德在人謳思戶祝愈久而愈不能忘若閩人之戴甯海將軍惠獻貝子豈非亙古今塞穹壤與周召比烈者與康熙十三年耿逆拒命阻兵謀以閩應吳尙二逆浙東所在告警

聖祖仁皇帝知貝子神武素有戰功殲海寇鄭國姓于漳泉閩人憚其威名特拜甯海將軍偕和碩康親王督師討之秋八月大軍至杭州是時精忠所遣僞帥曾養性已由福甯渡海陷溫逼台別攻處州矣貝子與康親王計議急浙而緩閩浙東平則逆賊無藩籬之固閩不難破也遂與王分兵趨台州台之屬縣已爲賊據時出抄掠我糧食貝子至首復仙居十四年五月遂從閒道入黃巖蹙賊于樂清上亭嶺水陸夾攻賊大敗潰去九月樂清太平青田大荆磐石五城皆下初貝子之分兵也紹興之嵎縣亦陷于賊別遣將攻下之因撫定其民于是杭台數百里道路無梗故得一意討賊十五年二月貝子已解處州之圍遂引兵而東是時曾養性聚平陽瑞安石塘羣盜于溫尙十餘萬貝子親臨行陳連戰敗之進逼城濠沈其船于江賊皆溺死曾養性輟而跳遂克溫州曾養性既敗收合餘燼走保得勝山掘塹爲濠引水環之連營固守

貝子乘大霧潛師登山將士皆踰濠苦戰賊不得出復大敗遂定溫溪石塘雲和行收龍泉慶元等縣賊氣沮散降者相繼而精忠遂坐困于閩凡大小之戰百餘得府縣城寨百五十六斬其文武僞官九百六十五人其朱飛熊吳長春尤賊驍將倚爲腹心者也生降其士卒四十餘萬鹵獲軍資器械無算悉定紹台溫處四郡之地貝子已定浙東遂引兵由慶元閒道入松溪與康親王會于建甯賊望風宵遁九月進攻延平賊將耿繼美郭忠孝等猶城守不下貝子不忍閩人掬刈之慘遣使許以不死繼美等遂率僞官六百八十八人兵一萬一百二十人民十一萬二千一百三十七人開門出降先是海寇鄭經規取福州所遣僞都統徐堯有賊三萬軍鳳山嶺上貝子旣至揮將士急擊之賊望見我軍旗幟慌于漳泉之威不戰而走連拔其營十四斬獲過半窮追四十餘里于是狂醜震恐面縛乞命興泉漳汀相率反正兵不血刃而全閩底定矣貝子御軍嚴整用法無私知人善任使又能與士卒同甘苦謀定而後戰故所向有功所攻必克方貝子由桐溪出青田身先諸將手牽所乘馬以渡失足折其指軍行之次帳幕不時至露宿野外蓋自督師以來侵冒寒暑踐履險阻出入于深山窮海之間三年不休以是

積勞疾作至建甯乘舟而行鳳山之捷猶強起力疾督戰大功甫就而歌虞及焉其盡瘁定國不以死生疾病牽其志故士益感動用命當時王師之入閩也貝子疾已甚而教誡將士所下城邑民老幼婦女不驚市不易肆農不去田既俘精忠振旅入福州四郊晏然不知有金革之事嗚呼仁義之師轉溝壑爲衽席貝子掃殄之功在浙而生全之德在閩矣乾隆四年鎮國將軍德公以閩浙之節式莅茲土實維貝子之文孫爲世大儒用能克紹先德以仁義爲治文武率職邦人大和因議建貝子祠于烏石山之陽以祀春秋從民志也逾年八月之朔某奉命來權撫事而工適竣因得虔修時祀有金溶老人自言少時曾見貝子于軍中歷歷前陳其事僚吏將佐肅然動容階下之人有泣下者既藩臬之大夫礮石來請文夫以貝子之豐功盛德勒鍾鼎而垂史乘聲光爛然豈某龔鄙所能爲役惟是博徵文獻實以老人之言而知閩人之心之思之久其何可不書以慰之也系曰

上帝降鑒活此下民

真人首出電激雷震函夏耆定航索悉臣聖子神孫式敘三辰慶流屬籍角定振振曰天生德甯我兆人閩有凶慝彼昏卒狂煽脅醜類釋豎

南方與滇粵賊蟠結披猖肆其機牙而拒斧斨遂犯浙東以搖江右  
天子曰咨我撫之厚而敢同逆其胡可宥玉節金鉞貝子是授貝子拜  
命誓師于杭天兵四臨賊氣沮喪靡蓋所指我武孔揚遂落其距亦搯  
其吭藩羊穴鼠散迸犇亡浙東既靖師次于閩自建臨延盡降其軍狂  
賊失據自縊牙門闔地悉定重爲王民

天子有言布我恩信罪止其魁餘無所問既掩櫛骸既卹既賑門迎子  
女伍戢兵刃吾粲吾粥吾褚吾襦吾有家室貝子子之貝子之來爲閩  
除賊功成而甕閩人大咸年歲有極吾思曷息是作新廟道山之陽其  
筵肆肆邊劔大房何以薦之黍稷臚腳孝孫來享來拜于庭是貽是繩  
降登旁皇貝子有孫繁閩之福閩人熙熙以介以穀揭虔妥靈春秋齋  
邀刻詩于碑永耀南服

固山貝子彰泰傳 鄭虎文

彰泰順治八年封鎮國公九年襲父爵康熙十二年逆藩吳三桂反明  
年六月  
命參贊安遠靖寇大將軍貝勒尙善軍赴楚至岳州圍之浚濠築塹爲  
久困計時賊水路餉道未絕彰泰調尙善曰我軍一意圍城恐無濟願

領水師斷其糧道水陸夾攻庶岳州可下陳說再四不從遂具疏以聞得

旨遂親領水師進至南靖江奶子山遣兵大破偽將軍杜輝於陸石口又連營白米灘困其舟師斷賊餉道十八年正月賊帥吳應麒始以飢困棄城走遂克岳州尋領撫遠將軍印二月隨安親王岳樂擊賊於雙井堡燬火及身矢囊焦意氣自若戰愈力賊大敗遂復華容石首二縣三月

命率兵就岳樂軍於衡州進取寶慶諸處八月岳樂既克武岡州餘賊潰遁彰泰追及於木瓜橋殲其眾十一月

命岳樂還京以彰泰爲定遠平寇大將軍十九年四月敗賊於江西橋復沅州又復靖州降其僞官及各土司六月進征雲南時四川遵義府復陷於賊

聖祖命速取貴陽仍分兵取遵義而四川將軍吳丹等曾奉有取遵義後亦進兵貴陽之

諭彰泰疏言貴州地方褊小糧餉難得再應川兵必致匱乏遂寢前旨一時兵民聞者感之又疏言臣知蔡毓榮奉調遣漢兵之

旨但今進取貴州滿漢傳既已合兵若各自調遣恐於事機有碍得  
旨令俱關白大將軍於是事權畫一所向成功九月率兵由平遠衛進  
取貴陽時賊將張足發等於鎮遠府大路兩旁山上各立一營復營於  
中路深濠固壁爲死守計彰泰止勿攻令總督董衛國攻鎮遠衛關口  
奪取十向口大安門出賊不意足發惶懼迎降遂取鎮遠府又遣將追  
餘賊至偏橋衛降之十月克平越府破新添衛吳三桂孽孫世璠棄貴  
陽遁師至貴陽分兵取恩恩府攻奪雞公背鐵索橋諸險隘遂敗賊於  
安籠鋪降毛口賊奪鐵索橋貴州平先是  
聖祖命平定貴州卽攻遵義彰泰以雲南乃賊巢穴疏請專意雲南駐  
師候

旨時平越府復陷於賊分兵往攻之二十年正月  
聖祖以彰泰不急追躡敗賊於雲南切責之遂於是月進師時征南大  
將軍賴塔率廣西兵先抵雲南彰泰麾兵疾馳二月至江西坡賊師線  
緘宵遁追及砂子硝賊列陣以象戰我兵分三隊奮擊自午至酉賊敗  
遁又及之於臘茄坡復大敗遂復新興所斬僞總兵王某於陣復普安  
州遂與廣西兵合進至雲南距城四十里立營賊將吳國柄等以兵萬

餘驅象來戰彰泰率兵陣於左賴塔率兵陣於右自卯至午賊殊死戰  
彰泰密遣前鋒統領阿納哈率前鋒兵攻其兩旁賊陣始動大兵繼之  
逼賊至歸化寺大敗之陣斬吳國柄及僞將軍總兵等九員俘獲無算  
遂進圍其城立營於近城之南壩薩石衛走馬街雙塔寺得勝橋重關  
等處以扼其吭仍廣布檄諭直

朝廷威德招降從逆官弁於是大理姚安永昌各僞鎮俱降僞帥馬寶  
巴養元等逃至烏木山遣都統希佛等擊降之八月間將軍噶爾漢總  
督哈占等率兵來滇因上疏言逆賊馬寶等已降夏國相黨羽解散惟  
吳國柱在鶴慶麗江尙未剿滅見在都統希佛提督桑格率兵追捕兵  
力足用據報將軍噶爾漢總督哈占率兵已抵貴州威甯此兵至則雲  
南糧餉不敷臣等公議令哈占兵還四川噶爾漢兵至日以廝役補充  
缺額兵量行減汰則糧不至多糜矣

聖祖遂令哈占兵還四川餘還京師十月卽軍前授宗人府左宗正十  
一月逆孽吳世璠自經死賊將獻城降時諸將有言軍士勞苦宜許搶  
虜以爲賞賜者彰泰曰搶虜則民散民散則我軍何由得糧非計也乃  
與賴塔等議先遣將軍穆占馬緝入城撫安民人清理倉庫然後大兵



通城戮世璠屍梟示餘秋毫無犯降偽官五千六百餘員兵三萬三千六百餘名獲大小金印二十有一金冊八銀印九十有二時三桂婿夏國相賊將胡國柱皆遁遣總兵李國棟追夏國相至西板橋國相窮蹙詣軍門降遣都統希佛追胡國柱至雲龍川之西青里屋國柱自經死夏國相與偽國公馬寶等俱俘送京師於是雲南全省底定二十一年凱旋

聖祖親率王大臣等至盧溝橋南迎之二十二年議彰泰在岳州時遷延歲月應坐罪其恢復岳州雲南等城勦賊歸化寺功罪相抵得旨如議仍以功績入封冊

賜金二十兩銀千兩二十四年以濫舉屬官罷左宗正二十九年卒簡儀親王德沛碑袁枚

乾隆十四年簡親王神保住以事削爵

天子命鎮國將軍德沛襲封王名德沛字濟齋祖福臘閣封貝勒父福存封貝子王以嫡出應襲封鎮國將軍讓於從子恒魯而已托足疾入西山讀書

世宗以果親王薦

召見問所欲曰願側身孔廟分特豚之饋

世宗重之授兵部侍郎遷古北口提督巡撫甘肅

今上登極遷湖廣總督調浙閩再調江南王禎面無鬚髯頤鬚如矢道氣盎然服侍皆內監宦者每見屬吏南面坐監司以下長跪白事外于周孔仁義一不關口聞人善則信聞人過則疑以和顏接士士之曉經術能吏治者尤篤愛如子弟然甘肅歉收多不上聞王到兩月不雨報早普賑之甘肅報災自王始衛永郴道某修柁桿州于洞庭湖便文自營夫役多溺死前總督邁柱庇之某故大俠有氣力知王來必不相容走關節京師凡貴人識王者聽請書月以百數王積尺許一切不開視先劾奏某覲職擒問服罪然後聚而焚之御史朱續暉劾福建巡撫某受韶州守某贓

上疑不實命朱往會同王鞠時巡撫與太守俱未解任聞朱來欺其孤遣猾吏鉗伺之風影甚危人亦疑王與巡撫同城不先舉發而爲朱所奏必護前朱以小臣犯重怒行萬里外勢必不能自脫王竟自伏失察罪奏直朱而置巡撫太守于法天下服其公越俗尙穢有五通神爲祟王毀其像將軍隆升貪縱王劾去之民大權爲建生祠乾隆七年淮揚

大水王慮漕粟往民不及炊乃媿餅千艘蔽河而哺兩岸噉聲若流菜  
色立變謂府縣放手開倉庫賑甯役侵可重領可務使恩流于民凡留  
養資送賚糜張廠加恤各色目靡不舉是歲奏動地丁關稅鹽課銀其  
一千萬官吏震駭或色不相許王輒奮曰堯舜在上必不以活民獲罪  
縱爲活民故罷歸子心不更安耶論者謂江南是年災實非常然數百  
萬扎瘡捐瘠鮮溝壑死又不相寇災賊殺非王之勇不能肩非  
皇上之仁不能容也議河事與總河高文定公不合內補吏部侍郎兼  
國子監祭酒尋遷尙書封王一年薨王宅心遊目恆在三代上入學謁  
聖必摩挲其俎豆鐘震懷而慕思不忍訣捨居恒危坐番番雖矜莊而  
虛己已甚常詣成均講大學橋門俯聽者千餘人皆悅服獨助教王之  
銳前曰猶未盡王請益曰自天子以至於庶人一節聖經畢矣其本亂  
云云須重申之以見吾儒所以異于二氏之義王欣然下階三肅而謝  
助教者河間人所稱仲穎先生者也袁枚宰江浦時王過境廉從索俱  
頓勢甚張枚以寶版王嚴檄禁督嗣後肅然以此受知尤深王所著有  
周易解八卷實踐錄二卷薨年六十九諡曰儀無子從子恆質嗣銘曰  
形魚昌僕分姓義軒河間東平卓爾不羣惟王兼之爲

國宗親聖涯稅駕元淵澡身吁荼萬物共押天人純終領聞惜惜好學  
六崧陰陽三雍禮樂咸精其能爲民先覺洽日九披卿雲五采高掌遠  
蹠皇于四海天災已極乃見

帝力

帝座難通乃見王功羣黎報王立廟丞嘗王不能到王在孔廟温明祀  
器八綽龍牽同哀共嘆葬王幽燕遙知冢旁太極流泉定無襍草靈著  
莘莘

禮恭親王永恩家傳

姚鼐

禮恭親王諱永恩其始封禮烈親王諱代善

太祖高皇帝第二子也推戴

太宗有大功於

社稷子惠順王諱祐塞未嗣爵先卒惠順王子諱傑書嗣爵爲王是爲  
康良親王生康悼親王諱椿泰悼王生康修親王諱崇安修王之子則  
恭王也恭王生而有至性過人祖母悼太妃嘗病時修王督師於外恭  
王甫五歲而侍湯藥於前未嘗離日禱神以冀愈雍正十一年修王薨  
王以年幼始封爲貝勒讀書騎射爲學日益精厲作詩古文皆有法

高宗純皇帝聞而喜之命奉朝請王侍衛勤慎歲時扈從出巡邊塞屬  
褻韃從射獵而考論古今吟咏篇什不輟嘗曰上馬挾箭下馬持筆吾  
分內事也乾隆十七年襲封康親王時王年二十餘

上以王忠敏質實通曉政治時召與議論頗親異之矣而時相與忤會  
護衛有潛出境為不善者時相屬吏傅會以為王故知將興獄累及王  
上察其非是乃得解第奪王俸然王自是少疏每入班次趨朝會

駕出入則迎送惟謹曰此亦臣子所以效靖共也暇則以筆墨為娛其  
論文以義法為要詩以清遠澹約為宗其往來議論者謝皆人劉大櫨  
徐炎朱孝純輩也故識趣高卓越出流俗間染翰或以指作繪皆有生  
氣其生平遇人甚厚而已嘗致不給尤以持籌計得失為鄙曰吾雖貧  
而忝居王位忍言利乎初烈王始封曰禮親王及惠順王嗣爵於康熙  
初改號曰康親王自是傳四世及

高宗念烈王之元功謂宜復祖號乃復封號曰禮親王是年

賜半俸

召至樂京

賜宴較射

上曰三十年不見卿射矣精采猶如昔也王頓首謝嘉慶元年預千叟  
宴九年冬預宗室宴初乾隆十一年宴宗室於惇敘殿更五十九年重  
與宴者惟王及貝子永碩二人而已次年二月十九日薨年七十九  
上聞輟朝賜諡曰恭肅恤如典王燕居動靜嚴整好禮自護衛得過後  
稀論朝事偶言所料成敗輒中然未嘗以自喜至於人才興亡進退之  
間每有聞見其憂樂之情必深至所思長遠非恆人見所逮也所著誠  
正堂集若干卷律呂元音四卷妃吳札庫氏先喪繼妃舒穆祿氏生一  
子某嗣禮親王爵

碑傳集卷二

貴筑黃彭年編訂

碑傳集卷三日錄

濟陽功臣

開國佐運功臣弘毅公額官都家傳

愛必達

又左翼總兵官一等內大臣鈕祜祿氏弘毅公傳

鄭虎文

附錄四則

開國佐運直義公費英東傳

李斌

附錄六則

武勳王楊古利傳

李斌

附錄五則

安費揚古傳

馮培

附錄四則

達爾漢轄一等大臣扈爾漢傳

盛京通志節錄

額駙一等大臣溫順公何和里傳

盛京通志節錄

忠義公圖爾格傳

鄭虎文

二等伯忠直公宜

又作爾登墓碑張玉書

又忠直公伊爾登傳

盛京通志



贈大學士巴克什文成公達海傳 盛京通志

附錄一則

又附額爾德尼傳 盛京通志節錄

議政大臣昭勳公圖賴傳 馮培

神傳集卷三

嘉興錢儀吉纂錄

潘陽功臣

開國佐運功臣弘毅公額宜都家傳愛必達

公諱額宜都所稱巴圖魯者其

賜號也姓鈕祜祿氏先世長白山人以資雄於鄉至祖諱阿陵阿拜顏  
者移於英嶠峪家焉父諱都陵阿巴圖魯公生於壬戌歲即明季嘉靖  
四十一年也幼時父母俱為讐所害公匿鄰村家獲免稍長志趣超邁  
武勇絕世年十三遂殺其讐公少孤無伯叔兄弟惟一姑適嘉木湖寨  
長穆通阿至是往依焉姑子哈思護傑士也長於公二人相得懽甚居  
久之適

太祖高皇帝龍潛有所往過宿姑家公與

帝語意相合輒識為真人欲從之姑不可公奮然曰大丈夫生世間能  
碌碌終老乎因請於姑曰此行任所之決不貽姑憂翌日遂從

太祖行公時年十九

太祖器之日見信用自是戮力戎馬斬將搃旗每戰輒先登績冠諸臣

石事詳國史及我

太祖以丙辰年建元天命置理政大臣五人卽公蜚英東札爾固齊何和理額駙達爾漢侍衛虎爾罕嵩阿洛巴圖魯費揚古也踰四年大破明兵於界藩山亦賴公排眾議耀兵列陣力戰而勝其他征哈達輝發葉赫諸國與明兵諸大戰皆力戰有功天命六年我師下遼陽

太祖命於城東築第賜公居焉公性忠誠果敢結髮從

太祖征討身經百戰金瘡遍體其攻諸城寨時率隻身夜往佩火具旣登燃之以爲軍號或遂燔敵營柵及爲將尤善以少擊眾攻城掠地所向皆捷然尤明於大義而謹於事

上專有關於國家雖已子亦不稍存姑息公次子達啟少英異

太祖養於宮中及長材武過人

太祖愛之俾尙公主達啟怙寵漸驕遇

皇子皆無禮公患之一日假他事集諸子僮僕譏城外園中酒甫行公忽起命眾執達啟眾愕然莫知所措公大怒露刃厲聲曰天下有父殺子乎誠以此子傲慢不馴不除他日必負國恩而敗門戶不從者血此刃眾乃懼引達啟入室以衣被覆殺之公詣

太祖陳且謝罪

太祖驚惋累日深以讓公久之知公心彌加嗟歎其爲國遠慮忘已効忠類如此公爲

太祖股肱心膂功冠當時

太祖之所以寵錫公者更至優極渥其取巴爾達等城及敗薩克查兵也

太祖親迎郊勞賜爲一等大臣爵左總兵官給以百人廩食約身至孫三世食之其敗九國兵也以所得諸貝勒裘馬幄帳并御乘名馬

賜公前後賞賚弓矢衣裘人戶牲畜無算常分給將士不以自私初設佐領之制

詔以公所俘獲者益以賞給戶口爲三佐領隸公家俾無預上役爲公私屬供田廩并採人參備藥物以奉公下及諸子各有分贍蓋異數也

公際會風雲身都榮顯敬慎之操初終一致有古大臣風公以天命六年辛酉歲六月十四日甲申卒於遼陽

賜第壽六十當公之疾革也車駕臨視垂泣與訣及卒

太祖震悼墓祭時親臨慟哭者三

太宗文皇帝天聰元年贈開國佐運功臣追封弘毅公配饗

高廟復授公子遏必隆爲精奇尼哈番世襲公初葬遼陽盛京建遷葬

於城北十五里蒲湖山公卒後二十三年

世祖章皇帝撫有函夏中外一統於順治十一年特立碑以表之康熙

三十七年

聖祖仁皇帝恭謁

陵寢親奠墓次越二年復

御書碑文勒諸石今

天子龍飛御極追卹成勞於乾隆二年

賜祭家祠乾隆八年

駕幸盛京親臨致奠  
聖聖相承酬庸報功之典蓋有加無已迥逾常格云公凡五娶生十六

子名次官爵具譜牒中而最著者有忠義公忠直伯等四人別爲傳

贊曰弘毅公之起也偉矣哉復家痛於髫齡識

真人於旅夜一朝萍水氣兆風雲卒之功勒旗常盟深帶礪侑食於

在天垂休於奕葉膺  
累朝之寵錫動

列聖之興懷傲之於古庶幾十亂之宗五臣之首也歟若夫豐沛諸賢  
南陽羣哲有不可同日而語者矣公舊無傳

聖祖御極篤念勳庸既以傳志裨史官又時  
召公孫敏愨公從容論說往事且以

大內所藏天命初舊籍  
宣賜并召族人咸得瞻

列祖實錄於是公之本末煥然簡冊然當日畫鑑秘計借箸英謀尙有  
不可得而見者嗚呼烈哉

又左翼總兵官一等內大臣鈕祜祿氏弘毅公傳鄭虎文

額亦一作都姓鈕祜祿氏世居長白山後歸  
太祖隸滿洲鑲黃旗幼時仇殺其父母額亦都以鄰人匿之得免年十

三手刃其仇避走嘉木湖村依於其姑某居數歲  
太祖高皇帝過其地識爲眞主請事  
太祖白於姑姑止之不可遂從行歲癸未初從

太祖討尼堪外蘭於圖倫城先登攻色克濟城掩敵無備取之又別率兵攻舒爾格布占克其城

太祖知其能日見信任丁亥

命督兵取巴爾達城至渾河河漲不能涉以繩聯軍士浮河魚貫而渡夜薄其城率銳卒先登城中兵猝驚起拒跨堞而戰飛矢貫股著於堞揮刀斷矢戰益力被五十餘創不退卒拔其城而還

太祖迎於郊燕勞之其所俘獲悉以

賜遂賜號巴圖魯薩克查之入寇也額亦都率數人禦敵敵敗從之夜入其城進攻連克尼麻喇城章甲城索爾湖村功最師還

上迎勞如初界藩有科什者以勇聞盜九馬遁單騎追斬之盡返所盜馬嘉木湖之貝渾巴顏謀叛附哈達

命討之誅其父子五人以徇額亦都驍果絕倫挽弓十石能以少擊眾所向克捷

太祖用是益器之癸巳葉赫合九國來侵

太祖陳兵古勒山命額亦都以百騎挑戰敵悉眾來犯奮擊斬九人敵額大兵繼之殺葉赫貝勒布寨九國之師皆潰遂乘勝略諾賽寨及卓

佳村會我軍有齊法漢者戰歿額亦都直入敵陣以其尸還訥股路者九國之一也其長搜穩塞克什既敗歸復聚七寨之眾守據佛多和山命同扎爾固齊噶蓋等以兵千人圍其寨三月下之斬搜穩克塞什賜上所乘馬以旌其勞丁未從貝勒雅巴喇征東海渥集部有功庚戌命招撫渥集部之那木都魯綏分寧古塔尼馬察四路降其長康果里等十九人復乘回兵擊取雅攬路俘萬人而還辛亥年同額駙何和里等征渥集部之虎爾哈路克扎庫塔城天命二年同安費揚古攻明馬根單花豹衝三岔兒堡並克之四年明經略楊鎬率六總兵統兵二十餘萬分四路來侵大貝勒代善出禦明總兵杜松王宣趙夢麟兵於撫順過扎喀關議駐師僻地以竅

太祖

太宗文皇帝時爲四貝勒謂界藩山有築城夫役急往護之宜耀兵向敵以壯夫役士卒之膽不當駐僻地示弱眾議未決額亦都曰

貝勒之言是也遂進師界藩會

太祖大兵亦至指揮夾擊大破明兵於吉林崖及薩爾湖山明三總兵皆歿於陣還破明總兵馬林於尙間崖劉挺於阿布達思岡額亦都皆



在事有功連歲

太祖親征各部之不用命者若哈達輝發烏喇葉赫以次削平額亦都在行間輒爲前鋒用兵垂四十餘年未嘗挫衄每克敵受賜輒分給將士之有功者不以自私

太祖特優遇之當天命建元之初國人有訴於額亦都者額亦都受理其事

太祖罪之因遂定大臣聽受私訴之禁然心知其忠誠寵顧不少衰初妻以

帝族之妹後以和碩公主降焉累官至左翼總兵官一等內大臣天命六年卒於位年六十

太祖親臨哭之慟祭葬如禮

太宗文皇帝天聰元年追封弘毅公配享

太廟議功授子遏必隆一等總兵官

世祖章皇帝復建碑墓道用表勳績焉

附錄四則

額亦都性忠誠善戰能以少擊眾所向克捷歲癸未從討尼堪外蘭於

圖倫城先登又襲取塞克濟城又別將攻取舒爾格布瞻城

盛京通志

自從征尼堪外蘭以來以次平哈達輝發烏拉葉赫並爲軍鋒用兵垂四十餘年未嘗挫衄每克敵受賜輒分給有功士卒不以自私

同上

順治十一年

聖製弘毅公額亦都碑帝王得人其圖大業治定之日必昭其功於天下後世以志不忘洪惟我

祖宗創業艱難一時鷹揚之佐遘會風雲號稱濟濟成蹟具在藏於冊府額亦都者奮跡戎行戰功久著從征哈達烏拉葉赫暨攻圖倫襲塞克濟率眾先登敵無堅壁至取巴勒達城奮軀登堞矢貫其身連於堞上以刀斷之猶能入城其鷲猛有過人者少年歸命身經百戰屢被重創徧體瘡痍如收赫錫赫瑚爾哈雅蘭諸部又能以少擊眾俘獲甚多開拓疆土厥績懋焉

太祖嘉與勳庸賜以婚媾及其歿也

先皇帝復加追序高爵崇祀軫恤甚備國有若臣可謂忠勇忘身有始有卒者矣用勒貞石以示表章歲月逾遠嘉績彌彰於以褒勸有功庶幾宣力國家者聞之而有感焉

同上

公有子十六人世嗣相承者十有一人初建家廟在北城第宅之前數世子孫繁衍至數百人每當時享室堂庭庶幾不足以容乃移於安定門外里八臺與恪僖公祠址相連會公曾孫訥親蒙賜雲騎尉世職上書陳奏願讓還世職惟先臣祠堂乞賜褒榮列於典祀奉

旨額宜都巴圖魯乃開國名臣勳績懋著照訥親所請於伊族祠堂賜與祭典永卹成勞乃以乾隆三年二月始祠十六公並設兩廡春秋吉日太常致祭官祭之次日家薦歲事弘毅公衍慶錄

開國佐運直義公費英東傳李斌

費英東札爾固齊滿洲鑲黃旗人姓瓜爾佳氏父索爾果爲蘇完部長太祖高皇帝戊子年從其父率所部軍民五百戶來歸

太祖嘉之授一等大臣以

皇長子褚英台吉女妻焉兌泰巴顏者費英東札爾固齊女兒之夫也有逆志

太祖命費英東札爾固齊擒而誅之戊戌年從征瓦爾喀國取噶家路殺其部長阿邱悉收降人以歸又往征瓦爾喀安褚拉庫路同褚英台

古等取屯寨二十餘處所屬村落悉招降之復同舒爾哈齊貝勒等遷瓦爾喀蜚悠城戶口盡收其環城屯寨令扈爾漢轄護五百戶先歸值烏喇國布占泰貝勒發兵萬人邀諸路兩軍搏戰相持未決費英東札爾固齊與諸貝勒帥兵繼至大敗之費英東札爾固齊在遼丁未費英東即張悠烏拉即是年伐明取撫順明兵來援費英東札爾固齊督兵進戰所乘馬聞火礮驚逸諸軍不前費英東札爾固齊回馬大呼麾眾直入於是諸軍並進大破之

太祖見之曰此萬人敵也儀志案盛京通志以取撫順丁未年討東海渥集部同卓立克圖貝勒等取赫席黑俄漠惠蘇魯佛納赫拖克索三路俘二千人而歸辛亥年復同阿巴泰台吉等征渥集部之烏爾古宸木倫二路取之癸丑年從

太祖征烏喇與諸貝勒大臣力戰殲敵過半我師乘勝奪門遂拔其城天命四年明兵四路來侵一軍據撒爾湖山巔率本旗兵進擊破之八月大兵攻葉赫城費英東札爾固齊攻其西面守陴者投石飛火不容

相逼  
太祖命之退費英東札爾固齊不肯退曰我軍已薄城下矣復

命之退曰勢已垂克必不退也遂攻墮其城費英東自少從

太祖征討諸國三十餘年每身先士卒摧鋒陷敵戰必勝攻必克屢奏  
膚功授一等總兵官世職世襲罔替五年三月丙戌以左翼固山額真  
總兵官一等大臣卒於位年五十七費英東札爾固齊爲人忠直見國  
事稍有闕失輒毅然強諫畢智殫力克輸勇略以佐成  
帝業疾革時天色明朗日向西忽片雲頓起如鼓聲鏗鉤雷電雨雹飄  
至不移時而霽遂卒

太祖欲親臨其喪左右皆諫

太祖以爲心膂共事之臣決意往臨痛哭者久之後因祭青口巴圖魯

貝勒復臨其墓哭奠焉

太宗文皇帝卽位追封直義公配享

太廟崇德七年

太宗特諭羣臣云費英東札爾固齊見人不善必先自斥責而後劾之  
見人之善必先自獎勵而後舉之其所奏善惡被劾者亦無怨言被舉  
者亦無驕色朕未聞爾等諸臣以善惡直奏似斯人也順治十六年正  
月

世祖章皇帝諭吏部曰

太祖朝功臣贊英東參贊廟謨恢擴疆土戰績獨偉爲開創佐命第一功臣已經配享

太廟其後人止世襲精奇尼哈番未稱其功朕追念勳勞欲加陞其延世之爵爾部卽酌議來奏尋吏部議覆應將其孫倭何所襲一等精奇尼哈番特陞爲三等公

報可康熙三十七年

聖祖仁皇帝恭謁

陵寢至盛京追念舊勳

親奠墓次復遣官致祭云惟爾姿兼忠鯁才裕韜鈴輔翼開基鴻勳懋著朕六御東巡駕言蒞止追惟往績親酌几筵復遣專官用頒祭醑三十九年復

御書碑文勒石紀功云朕惟我國家創建不基開無疆之景運旣篤生神聖英武之君以剪除逆亂啟闢疆宇戡定諸邦一統之烈肇於東土其實則有一德一心之佐殫忠戮力經營四方以翊鴻猷而成大業蓋天實挺生異材鍾山嶽之靈挾風霜之氣貞誠不二毅勇無倫名高百

戰之勳位超五等之爵垂聲竹帛配食

廟廷以與我國家共承休祉子孫世衍其澤是豈偶然者哉當我

列祖之龍興也一時人材蔚起猛士如雲戰將如雨以藝勇稱以功名顯者不可勝數而功冠諸臣爲一代元勳則開國佐運直義公費英東尤爲傑出焉朕嘗恭覽

列祖實錄考直義公行事折衝行間則戰必勝攻必克平居則矢忠直贊謀畫豐功偉績至今焜耀簡編未嘗不緬懷英風興念往績昔人創建艱難枕戈擐甲櫛風沐雨之勞恆流連往復不能去於懷也歲在戊寅朕巡行舊京展祀

陵寢追維

祖宗功德隆盛并及當時佐命之臣邱隴所在皆遣官致祭而於直義公之墓特親至奠醴以示優崇仍復專官祭享蓋功在社稷古人爰有明禋之典朕篤念勛庸用伸異數并爲文勒諸貞石以昭示於無極云雍正九年加封號爲信勇公子十人索海圖賴最知名查喀尼仕至內大臣

附錄六則

直義公費英東姓瓜爾佳氏隸鑲黃旗滿洲事

太祖積功至三等子天命四年卒年五十七天聰元年追封直義公配

饗

太廟先世為蘇完部長

太祖初從其父索爾和率所部來歸授一等大臣尙主其姊婿兌沁巴

顏有逆志費英東禽而誅之

盛京通志

歲丁未費優苦烏拉侵暴請內附乃與貝勒舒爾哈齊等往遷其戶口

烏拉兵萬人扼我前軍於路費英東以後軍至大敗之是年五月歲辛

亥七月兩討東海窩集部攻克其五路歲癸丑從征烏拉拔其城

同上

天命三年伐明取撫順明總兵官張承蔭以萬騎來援據險而陣火器

競發費英東所乘馬忽驚逸諸軍為之卻費英東策馬大呼麾諸軍直

入大破之

太祖歎曰此真萬人敵也

同上

薩爾許之戰

事在天命四年二月

明經略楊鎬率四路總兵杜松馬林李如栢劉

綖分將來犯杜松駐兵薩爾許山巔費英東率所部衝破其軍杜松戰

沒已而馬林劉綖兩軍皆覆李如栢遁歸是役也明以四十萬眾來犯



五日之間殲其精銳殆盡實費英東首功云

高宗聖製賜奠功

從征葉赫城守者飛石投火

太祖命之退對曰勢垂克不可退也竟拔其城

盛京通志

性忠直遇事敢言獎善黜惡無所撓避

同上

武勳王楊古利傳

李核

楊古利額駙滿洲正黃旗人姓舒穆祿氏世居渾春地方其父耶柱為

庫爾喀部長初翊戴

太祖高皇帝時通往來

太祖厚遇之命其子楊古利入侍以女妻焉賜為額駙耶柱為部人所

害圍其家楊古利之母繫幼子那木泰於背屬韃佩刀射眾突出借其

族來歸庫爾喀部人尋亦內附楊古利聞而逆之手刃殺父者割耳鼻

啖之以復父讐時年甫十四

太祖深異焉日見信任始令守汎江上警備嚴密無敢犯者征輝發多

壁城阻於水眾難之楊古利率先逕渡大獲而還取納殷部及朱舍里

路安褚拉庫路皆著功績哈達孟格布祿貝勒恃其勇常懷反側

太祖往討之拔其城楊古利奮勇先登生擒孟格布祿丁末年遷蜚悠城戶口楊古利與達爾漢轄率兵三百人護之前行烏喇遣兵萬人邀諸路楊古利勵眾曰吾儕平居相謂與其死於疾無寧死於敵此非臨敵時乎遂持矛突入鏖戰連殺七人敵稍卻與之隔河相拒及諸貝勒兵至復併力大破之征輝發越寨柵二重先入奪其城取赫席黑路爲軍前鋒馬兒古里村人覺之走負山險因攻據其巔馳下擊之盡殲丁壯俘子女以歸進征木倫路克吳兒瑚麻村復視林中烟跡三往略之俘獲甚眾戊申年從大兵取烏喇金州城中迎射拒命楊古利冒矢攻克之癸丑大兵復征烏喇楊古利先眾進戰攻清河敵勢甚銳太祖遣使持矢召諸將退楊古利不退麾眾薄城由一隅疾攻拔之大兵擊明兵於界藩楊古利與阿巴泰貝勒等爭先馳敵破其軍是夕進擊商顏崖之兵有

旨令被傷者勿往楊古利獨不肯留裹創繫腕率十牛泉兵憑高馳擊明大營兵破之取鐵嶺遇蒙古介賽貝勒兵四百人敗之天命六年大兵取瀋陽眾頗贍顧楊古利拔刀揮本旗兵入敗之既克瀋陽大兵乘勝進取遼陽仍先登陷陣摧其步卒遂奪河橋與明兵戰於沙嶺大敗

其眾遼陽既拔

太祖嘉其勞績憫其傷痍命位次貝勒八人下統左翼兵授一等總兵官世職令勿更臨戰陣十年明文龍兵三百人夜入耀州楊古利復率兵擊敗之盡殲其眾天聰三年九月同阿山等緝逃人至雅爾古地方遇毛文龍採參者殺九十六人擒千總三員及其從者十六人以歸是月

太宗文皇帝統大兵征明楊古利率擺牙喇兵敗總兵滿桂兵於明都城之北我礮手陷敵伏中復率親軍十餘人潰其圍悉出之及大軍還同阿巴泰貝勒等略通州火其船遂取張家灣明兵來援薊州我兩紅旗擺牙喇兵少卻楊古利率內大臣轄等及正黃旗擺牙喇兵直前敗之師旋

命以兩紅旗規避各官贖罪物盡給之楊古利悉以分賞諸將士六年

太宗親征察哈爾

命同阿巴泰貝勒等留守與明兵戰於錦州明兵銳甚我六旗擺牙喇兵俱卻楊古利大怒獨率本旗擺牙喇兵直前敗之

太宗嘉焉特授三等公尋錄從前軍功進超品公復從

太宗由口外入明邊攻大同宣府與阿巴泰貝勒等拔靈邱縣殺知縣守備各一人復攻墮王家莊取之七年六月應

詔條陳言征伐之事不可間隔一年若踰年不往則敵人心寬乘機修備欲圖再舉恐悞大事我國暇則一年兩征不暇亦一年一往乃爲善策若再緩則不可矣我今當深入其境遇城必克所克之城卽令已出痘貝勒將帥率兵長駐

聖主與未出痘貝勒還都尙不得城堡則令兵縱略焚其房屋遇敵則擊拒者俘之降者編爲戶口所俘各照牛录派數上獻至於兵士所獲不計多寡聽其自取若此則人人貪得不待驅逼其男婦皆自鬻衣服以供買馬之需而兵勢大振矣所得城堡惟許貝勒更番駐劄以下兵將不得更換若不勞苦豈有能成事拓地者乎如謂有妨農事則待農事竣興師令婦子隨後收穫則農事亦無妨也今朝鮮察哈爾且置度外山海關外寧遠錦州亦且緩圖但宜深入腹裏腹裏旣得朝鮮皆我手足察爾哈自爾歸順不則遠遁矣時諸大臣所奏亦多相合

太宗乃決意征明崇德元年與多羅英郡王阿濟格等征明直入長城過保定府至安州克昌平平等十二城敗敵五十八陣生擒巢丕昌等俘

獲十餘萬二年正月

太宗親征朝鮮朝鮮全羅忠清兩道巡撫總兵來援營於南漢城楊古利奉

命同和碩豫親王多鐸擊之值天雪陰晦不見敵營遂縱兵進擊敗山下兵追至山嶺大營朝鮮有敗卒竄伏崖側竊發烏鎗傷中楊古利創重而卒時年六十有六楊古利凡在行間率先破敵克建奇勳於國家大有裨益自早歲從戎衝鋒挫銳所向披靡攻城輒克其後太宗惜之不令身臨戰陣而壯心未已遇敵忘軀行軍四十餘年大小百餘戰被創最多功業特偉而持身敬慎累事

兩朝未嘗獲譴

太宗寵遇之禮數殊絕嘗

命本牛泉護軍爲之守門賜豹尾槍二桿令親軍佩之甲卒二十人爲衛賞賚戶口及牲畜金幣無算其卒於軍也

太宗哭之慟羣臣屢勸不止親臨其喪奠酒賜御服黑貂裘套帽鞞殯之視舍殮畢始旋比櫬至

太宗郊迎之命諸王百官悉往祭葬之日

太宗復親臨奠醊命本牛象內八戶守其塚是年十一月追封武勳王  
建碑墓道其祭文云

寬溫仁聖皇帝制曰朕聞有大功之人必有非常之報念爾超品公楊  
古利輔理國政効力宣猷今又戰歿爰倣古制追封爾為武勳王用彰  
忠績萬世無替尋以子塔瞻襲超品公

世祖章皇帝追念其勳命配享

太廟康熙三十七年

聖祖仁皇帝謁

陵至盛京親奠墓次三十九年復

御製碑文勒石紀功焉

附錄五則

征輝發多壁城阻水不得進楊古利亂流而濟眾從之遂抵其城多所  
俘獲取訥殷部及珠舍哩安楚拉庫路皆有功從征哈達擒其酋蒙格  
布祿以歸盛京通志

已未明總兵杜松馬林先後來犯從擊松於界藩覆其軍以力戰被創  
進擊林於尙間崖

太祖誠被創者勿更戰楊古利堅請行裹創奮擊大破之同上

十年明總兵毛文龍遣兵犯耀州乘夜襲官屯寨擊殲之天聰三年從

征明薄燕京城敗明武經略滿桂軍於城北師還略通州火其船再敗

其兵於薊州同上

崇德元年偕武英郡王阿濟克證明入喜峯口下昌平等十二城五十

八戰皆捷俘獲以萬計同上

二年從征朝鮮抵南漢擊走其全羅忠清兩道援兵追及山嶺猝中鳥

鎗傷重卒年六十有六同上

安費揚古傳馮培

安費揚古姓覺爾察隸鑲藍旗滿洲世居瑚濟寨父完布祿以樸忠事

我

太祖安費揚古克繼父志自弱冠從征癸未年以兵取薩爾滸城殲其

眾甲申年從征兆嘉城馮爾墩寨皆親冒矢石為軍鋒丁亥年征討哲

陳部攻拔洞城尋攻杭嘉章嘉尼瑪蘭赫徹穆等城及香潭寨並在事

有功癸巳年從略哈達富勒嘉齊寨師旋

太祖躬勒兵以殿有敵騎躡我後

太祖還射之獵其前一騎後數騎乘間來犯安費揚古盡斬之復同額亦都等圍訥殷部佛多和山寨攻下之己亥年從攻哈達城先登辛亥年從征東海窩集部破其二路從征烏拉擊達拉穆台吉兵摧其陣奮勇登城樹大纛於上大軍繼至遂滅烏拉天命元年七月偕扈爾漢征薩哈連部至烏勒間河取河南北諸寨八月師次黑龍江江水常以九月始冰是時中流忽結冰若浮梁約廣六十步安費揚古曰此天佑我國也策騎先涉眾從之遂取江北十一寨三年從大軍下撫順明總兵張承蔭等赴援分營為三安費揚古擊其左營大破之遂乘勝取三岔口諸堡四年從破明經略楊鎬兵滅葉赫六年隨取瀋陽遼陽皆著績安費揚古性貞亮有勇略與額亦都等俱為開國功臣之首

太祖嘉其鷲勇擢一等大臣佐理國事

賜號碩翁科羅巴圖魯七年卒年六十有四康熙五十二年

聖祖念安費揚古為開國勳臣復

賜三等輕車都尉世職令其裔孫明岱分襲

碩翁科羅巴圖魯一等大臣敏壯公安費揚武

盛京志作安費揚古

姓覺爾察氏



隸鑲藍旗滿洲事

太祖官至固山額真天命七年卒年六十四順治十六年追諡世居瑚

濟寨父完布祿章京事

太祖有章甲尼麻喇人誘令謀叛不從又劫其孫以要之終無貳志入

廣通志

從略哈達富兒家齊寨師還敵兵來追

太祖親殿後賊兵突前掩至

太祖方迎射前一騎後三騎乘間揮刀來犯安費揚武截擊盡斬之

上事在癸巳年

天命元年七月同達爾漢轄征薩哈連部至兀爾簡河水陸並進取河

南河北諸寨凡三十有六八月兵至黑龍江南岸其江每歲九月始冰

是日見江水結冰橋一道寬二里許引兵渡之遂取薩哈連部內十一

寨及回兵時冰橋已解其西偏復結冰一道如前咸驚為天助焉又降

使大諸路長四十人始班師

同上

自癸未來歸即從征伐開國功臣惟安費揚武與額亦都二人效力最  
在先並以早歲行兵迄於白首戰輒居前還則殿後屢受重傷多樹勳

伐

太祖嘉安費揚武功賜名碩翁科洛巴圖魯猶漢言驚勇云同上

達爾漢轄一等大臣扈爾漢傳盛京通志節錄

扈爾漢姓佟佳氏隸正白旗滿洲事

太祖賜姓覺羅爵至三等子天命八年卒年四十八世居雅爾古寨

太祖時從其父扈喇虎來歸居五大臣之列丁未從貝勒巴雅喇征東

海窩集部己酉徇葉路辛亥偕何和里征瑚爾哈路癸丑從征烏拉

並有功天命元年偕安費揚古征東海薩哈連部至烏勒間河剗舟二

百水陸並進取河南北三十二寨師抵黑龍江會冰結以草藉馬蹄蹶

冰而渡遂取江北十一寨四年明兵分四路來侵從戰薩爾濟尙間崖

覆其二路兵明總兵劉綎復由寬甸口進棟鄂路扈爾漢以兵千人伏

山隘摧其前鋒與大軍夾擊綎於阿布達里岡綎倉猝不及陣殲其兵

五萬人綎戰死明年從攻瀋陽擊敗明總兵賀世賢軍

額駙一等大臣溫順公何和里傳盛京通志節錄

何和里姓棟鄂氏隸正紅旗滿洲事

太祖爵至三等子天命口年卒順治中追諡曰溫順先世為棟鄂部長

年二十六卽長其部

太祖納妃哈達身率甲士衛行遂以所部來歸從征烏拉徇瑚爾哈路圍札庫塔城皆有功再征烏拉

太祖欲諭降之何和里以其渠布占泰性狡譎雖降必且叛與費英東等力請進戰乃滅烏拉天命六年從取遼陽何和里性寬和識量宏遠

事

太祖三十餘年與費英東額亦都扈爾漢安費揚古為五大臣扞誠宣力佐命之功為多及卒費英東等俱已前死

太祖慟哭曰朕股肱諸臣何不遺一人耶

忠義公圖爾格傳鄭虎文

圖爾格宏毅公額亦都第八子也自少隨征積功累爵至輕車都尉天命十一年

太宗文皇帝卽位八旗八大臣下每旗又各設二人備屯戍決獄訟號十六大臣以圖爾格任鑲白旗尋遷都統又念其父勳晉爵子天聰三年從

太宗伐明克遵化城有功四年二月班師

命貝勒阿敏等守永平而以圖爾格同都統納穆泰率兵守灤州五月  
明合兵攻灤州與納穆泰分汛固守間簡精銳出城殺敵敵轉攻納穆  
泰所守汛圖爾格急遣阿玉石分兵往援會火及城樓有執纛者乘雲  
梯登阿玉石揮刀斬之奪其纛敵稍卻時阿敏聞灤州被圍不急救及  
遣大臣巴都禮率兵數百來援用三鼓突圍入城而城已垂破未幾明  
兵發巨礮攻城城壞樓焚圖爾格度力不能支率眾潰圍奔阿敏軍  
阿敏大驚棄永平遁諫之不聽殿後全師而還於是議棄永平罪以不  
能力諫削世職解都統任五年三月我師攻明錦州令率護軍駐錦州  
松山間夜截明兵之赴松山者斬首二十級敵敗從之我軍有星訥者  
隕馬敵還取星訥圖爾格從三十騎馳之翼之出五月聞明人將城大  
凌河

命同納穆泰往覘之俘其人畜以歸七月起爲吏部承政從

太宗攻大凌河分圍城東面之北城中突出兵犯我南礮臺圖爾格不  
及騎徒步擊走之遂略松山八年三月略錦州並有功夏

太宗伐明入大同

命同副都統勞薩率兵駐張古臺河以扼敵師九年率左翼兵從貝勒

多爾袞往招察哈爾降其長額哲還兵略明山西分兵三隊爲前鋒自平魯衛入毀寧武躡代州乘勝至忻口遇伏敗之追至崞縣殲其眾還經平魯衛衛兵邀我師於途親陷陣殺敵百人敵遁走入城不敢出去之策敵必復至設伏以待而身爲之殿明錦州總兵祖大壽合大同總兵王某率兵三千來追返兵用步戰衝其中堅伏起夾擊大敗之乃徐引兵出邊十年敘功授一等男崇德元年復任鑲白旗都統是年隨武英郡王阿濟格攻明昌平雄縣並先登克之二年閏四月以罪黜初爾格尙和碩公主公主所生女爲貝勒尼堪福晉福晉無子詐取僕女爲女至是事敗圖爾格亦坐罪論死得旨免削職八月仍令攝都統事三年隨多爾袞伐明破太監馮永盛總兵侯世祿兵復同都統拜音圖敗敵於董家口毀邊牆入奪青山關下四城五年隨多爾袞圍錦州取其禾連破錦州松山兵又同都統葉克書率兵三百伏烏忻河口伺錦州牲畜出牧驅之歸敵眾千餘來戰葉克書馬中箭斃敵兵之同爾格射敵敵瘞救之上馬併力衝殺敵敗復合凡六戰六勝身被二十餘創猶殿後力戰悉保所俘而還晉爵子尋擢爲內大臣六年經略洪承疇率兵十三萬援錦州

太宗親征既敗承疇兵

命隨阿濟格邀擊明敗兵于塔山時明總兵曹變蛟吳三桂王樸等各

引本部兵遁而變蛟兵夜衝鑲黃正黃兩旗汛地突犯

御營時守營右翼大臣及侍衛等皆未至圖爾格發矢連殪二人率眾

併力攢射變蛟兵始敗去又隨豫親王多鐸設伏敗吳三桂王樸兵於

高橋七年同饒餘貝勒率師伐明直抵山東兗州府俘明魯王朱以派

及柴陵陽信東原安邱滋陽諸王並各王府宗室官屬幾千人下三府

十八州六十七縣八年班師

賜銀千五百兩十月晉爵二等公順治二年卒年五十以子科布梭襲

九年追諡忠義配享

太廟立碑墓道雍正九年

賜號曰果毅

二等伯忠直公宜

又作爾登墓碑張玉書

國家之有重臣猶九廟之有宗器巨室之有棟梁也其用之也非一日  
之報則其蓄之也亦非一日之積宋蘇文忠銘張文定之墓謂仁宗在  
位四十餘年蒐攬天下豪傑既自以為股肱心膂而又留為三世子孫

百年之用余嘗讀其文以爲知言伏觀

祖宗朝英傑景附際會風雲長養培護傳之累葉更有度越前代萬萬者如二等伯宜公其尤著者也公諱爾登滿洲人父至勇公額一都巴圖魯以開國勳配食

太廟公生而明敏才識絕人自幼嫻習武略天命中筮仕爲裨將

太宗文皇帝素廉知公才益見任用授三等阿思哈哈番會他軍誑誤落職崇德中大師再略明都公在行間與敵軍遇敵軍逆戰者千餘人公率勁卒三千人擊之敵敗走盡獲其馬匹有謀者言明總兵祖大壽偕太監高某分兵二千潛襲我軍時我軍用步卒設伏以待敵遂巡不前公乃將四十騎紆道誘敵且戰且卻敵兵遂遇伏公與伏兵合力奮擊大敗之錦州之役公率多爾機蝦等將右翼時敵眾我寡諸將相顧貽愕然莫敢進擊公觸刃先登與敵共戰四合皆敗之公勇力冠諸軍而其潛機制敵應變如神尤爲諸老臣宿將所難故所至皆獲勝崇德六年以功授原職

世祖章皇帝旣定燕京推恩勳舊晉一等阿思哈哈番郊祀禮成覃恩在廷諸臣以公父至勇公有世勳特晉公三等精奇尼哈番嗣兩

遇

尊號禮成復由三等伯晉封二等伯世襲不替

今上御極之二年六月以疾卒于位朝廷聞之震悼遣官諭祭恩賚有加易名忠直年六十有八夫史稱召公畢公為周元老歷事文武成康四世而其壽考皆踰百齡以我公方之則始襄締造之功繼贊太平之業歸然四世之老矣而躬親矢石久歷戎行武功之茂視畢召二公猶且過之獨是康強白首雖不為無年而論者竊以未登期頤為公未盡之憾嗚呼以至勇為父以忠直為子其為不朽豈復可以年齒論哉公生子一人早卒孫鳴篤襲封二等伯為內大臣護軍統領噶公將樹石于公墓道而乞文於余余不能悉公行事特援據舊聞述其梗概聊以誌我國家人才之盛云爾銘曰

天翔景運英傑駿奔奕葉光裕厥有世臣赫赫忠直偉略絕人克紹至勇益大厥聲龍韜虎略擊風躍雲斬關薙寇佐命作京遺孽未熄提戈四征應手斷航前無堅城丹書鐵券上賞是膺白首耆艾允矣國楨人雖云亡令名永存勒茲片石百祀有徵

又忠直公伊爾登傳

盛京通志



伊爾登宏毅公額亦都第十子也幼侍宮中

太祖撫之長以侍衛屢從征討天命初築界藩及薩爾汗城有勞績賜蟒服累功晉三等男

太宗卽位列十六大臣天聰三年率兵勦獐子島有俘獲從貝勒阿巴泰分兵攻龍井關奪水門入斬明將易愛王遵臣復會大軍攻遵化明山海關總兵趙率教馳援覆其軍遂薄燕京克永平灤州遷安諸城師旋晉爵一等男擢都統五年攻大凌河城率所部圍其東南深溝堅壘以困之卒墮其城而還七年從貝勒岳託取旅順口俘獲無算八年復從阿巴泰分兵入龍門會大軍於宣府進攻靈邱保安皆有功崇德元年與都統篇古等相訛訐坐罷官并削男爵三年起護軍統領四年略地錦州以三十人敗明兵千人從攻松山杏山城以四十人挑戰大破明總兵祖大壽軍尋列議政大臣兼內大臣六年從鄭親王濟爾哈朗攻錦州明總督洪承疇統兵十三萬來援軍松山西北岡悉眾犯鑲藍旗汛圍之數重伊爾登躍馬突入圍縱橫馳擊身中數創不少卻所乘馬死易之三戰益力明兵凡四合圍悉破之

太宗嘉其勇復爵以三等男子襲八次尋設伏高橋殲明兵之敗奔塔

山者時

太宗親統軍駐松山明將曹變蛟集潰卒乘夜犯

御營伊爾登與內大臣錫翰等奮擊之變蛟遁得

恩賚順治元年累加二等伯世襲罔替十三年以老致仕

世祖念其為宣力老臣

命乘騎入朝並圖其像一一貯內庫一藏于其家康熙二年卒

賜祭葬如典禮諡曰忠直從孫鳴杜襲爵三十七年

遣官祭其墓

贈大學士巴克什文成公達海傳

盛京通志

達海姓覺爾察隸正藍旗滿洲其祖博洛來歸父文密禪任散秩大臣

達海九歲即通滿漢文義弱冠

太祖賜居內院司文翰每草詔令稱

旨遂

命正訂國書達海更為對音切字諧聲文義周密譯明會典素書三略

諸書莫不稱善天聰三年

太宗伐明不欲究武遣達海齋書與明議和明人閉關不啟復以書二

一置德勝門外一置安定門外四年克永平令達海立城上執黃纛諭降其民是年譯書成授三等輕車都尉世職

命曰巴克什五年征大凌河使招總兵祖大壽反復善諭大壽遂降十

二月定朝儀六年詳定國書字體酌加圈點六月病篤

太宗垂涕遣侍臣諭曰朕以達海偶疾耳今竟不起惜哉未寵任後當優恤其子

賜以蟒綺達海感泣而卒年三十八歲尋召其子三人

賜子甚厚追諡文成康熙八年其孫秘書院學士禪布乞立碑

附錄一則

達海姓覺爾察氏隸正藍旗滿洲亭

太祖

太宗授三等輕車都尉世職

賜號巴克什天聰六年卒年三十八達海九歲通滿漢文義初事

太祖擢置內廷文詞敏贍凡與明及蒙古朝鮮詞命皆出其手

太祖諭額爾德尼噶蓋取蒙古字製為國語額爾德尼等難之

太祖天縱聰明因心獨斷創立滿文頒行國中達海奉

太宗命復於十二字頭增添圈點得以分析又滿文與漢字對音未全者於正字外增造外字猶有不能盡叶音則以兩字切成一字切韻之巧較漢文更爲精審於是滿文大備

太宗命儒臣翻譯漢字書籍達海譯有素書三略及明會典律例諸書

又譯歷代史書俾人盡通曉古今典故賈長小傳

又附額爾德尼傳盛京通志節錄

額爾德尼姓納喇隸正黃旗滿洲性敏慧盡通蒙古漢文以文學事

太祖賜號巴克什每從征蒙古諸部傳宣

詔諭降其部眾著有勞績初奉

命偕理事大臣噶蓋創製

國書後哈達貝勒盛格布祿以謀逆伏誅噶蓋坐其黨死額爾德尼遂

獨任之既成頒行國中

國書傳布自此始額爾德尼既卒

太宗復命儒臣達海庫爾禪等述其義而增益之順治十一年與達海

庫爾禪並追諡文成

議政大臣昭勳公圖賴傳馬培

圖賴姓瓜爾佳信勇公費英東第七子也初隸鑲黃旗後改隸正黃旗  
 天聰二年從征明薄燕京以功授騎都尉世職四年大貝勒阿敏留守  
 承平明兵備參政張春合馬世龍諸鎮兵圍都統圖爾格等于灤州圖  
 賴馳救之比至圖爾格等已突圍出遂擊卻其追騎從大貝勒撤師出  
 邊以十六人殿返擊明兵之躡我後者殲之尋授三等輕車都尉略大  
 同攻拔靈邱及小石城從圍大凌河城軍兩黃旗間以衛樵採六年大  
 軍破走察哈爾移師征明次布里渡圖賴徇沙河堡降之七年從取旅  
 順口九年任護軍統領從入廣密偕都統阿山趨錦州明總兵祖大壽  
 遣將合松山兵拒戰兵甫接敵不能支輒潰走俘獲無算敘功得  
 恩賚崇德二年授議政大臣明年從貝勒岳託征明先驅踰墻子嶺攻  
 克十一臺進兵山東屢敗明兵還軍敗明閣部劉宇亮于通州晉爵三  
 等男六年從圍錦州擊敗杏山援兵戰東關援降人諾木齊以歸復破  
 松山騎兵拔塔山杏山城加一等男八年攻拔中後所及前屯衛晉三  
 等子順治元年從征流賊李自成破賊將唐通于一片石既入關破自  
 成兵追敗之望都超授三等公從豫親王多鐸帥師下河南先自孟津  
 濟撫定潁河十五堡睢州總兵許定國等皆望風降進薄潼關賊將劉

宗敏沿山列陣以拒圖賴以騎兵百四十人進戰盡殪之連敗賊將劉方亮等遂破潼關平陝西移兵下江南攻克揚州執明閣部史可法斬之追福王朱由崧于蕪湖擊敗其將黃得功兵得功中流矢死師旋進爵一等公三年任都統從貝勒博洛征浙閩進兵杭州時明魯王朱以海據紹興其總兵方國安等營錢塘江東岸江廣十餘里圖賴率將士從上流策馬渡縱擊國安軍盡潰擁魯王道走台州圖賴進拔金華衢州諸城擊敗明閣部黃鳴駿于仙霞關攻克浦城追明唐王朱聿鍵于汀州斬聿鍵盡降其眾閩海悉平回軍次金華病卒年四十七子輝塞襲圖賴勇而善謀能以寡覆眾屢立奇功未嘗挫劔

世祖親政追念其功謚昭勳配享太廟

賜文勒石雍正九年加封號曰雄勇

碑傳集卷二

貴筑黃彭年編訂

碑傳集卷四目錄

開國宰輔

大學士范文肅公文程傳 李果

又內祕書院大學士范文肅公墓誌銘 李肅

附錄十三則

宏文院大學士諡文簡赫舍里公希福傳 馮培

恪儋公哈什屯傳 馮培

寧南靖寇大將軍忠襄公辰泰傳 鄭虎文

議政大臣內宏文院大學士甯完我傳 八旗通志

太子太傅中和殿大學士文襄公圖海傳 鄭虎文

光祿大夫太子太師戶部尚書保和殿大學士諡文勤李公蔚墓誌銘

王熙

附錄六則

太保公呂宮家傳 呂星垣



和傳正目

碑傳集卷四

嘉興錢儀吉纂錄

開國宰輔

大學士范文肅公文程傳 字果

公諱文程字憲斗號輝嶽姓范氏其先自忠宣公第五子仕宋為樞密院料理官諱正國者扈元祐孟太后至江西遂家臨川三傳至迪功郎諱良儻者復徙饒州更六傳至明雲夢縣丞諱岳者坐事謫遼東瀋陽岳四傳至總正德丁丑進士累官兵部尙書忤嚴相嵩去位總生沈沈生楠公楠仲子也少沈毅讀書通大義年十八補弟子員天命三年戊午

太祖高皇帝定撫順始歸國從定遼陽度三岔攻西平下廣寧

太宗文皇帝嗣位拔置公帷幄天聰三年從蹕入薊門克遵化將偏師往諭潘家口馬蘭峪三屯營馬攔關大安口五城皆下之

太宗自將臨永平留公守遵化攻者甚盛公突圍力戰拔而歸授阿達

哈哈番四年以公為秘書院大學士 儀吉奏天聰七年八月置國山額

京才堪勝此但固山職一軍耳朕方資為心膂其別議之是時文節內  
尙未有大學士職銜而文程所領皆樞密每人一對必漏下數十刻始出

甲未及食息復奉甲制章京是年改文節為內三院召入奉以為常崇德元年特授文程秘書院大學士加世職為二等領機密

五年師圍大凌河軍以城降後降兵有陰戕部帥去者太宗怒公從容進言全活甚眾又請單騎馳諭壁山軍軍降盡以降人

賜公自是平旅順取平島征高麗服蒙古公皆在左右每議大政太宗必曰范某知否公或未與議則曰何不與范某議之公嘗以病出直諸務填委待公病已決之

世祖章皇帝即位闖寇李自成陷明燕京報至公以病詣蓋州湯泉驛召決策公力疾趨朝曰闖寇塗炭中原朕厥君后此必討之賊也雖擁眾百萬可一戰而破

國家上下同心兵甲選練誠聲罪以臨兵以義動何功不成又曰好生者天地之德兵者聖人不得已而用之

國家止欲帝關東當攻掠兼施欲統一區夏非又安百姓不可又奏記攝政睿親王累數百言略謂中原遭亂思擇令主當任賢以撫眾拯厥

無告錄厥賢能拔其德望素著者置之班行俾朝夕獻納擇其善者酌行之及大軍入關定燕京悉如公計公安撫子遺起用廢官招集諸曹

胥吏收其文籍明季賦額屢加經寇亂僅存萬畝時故冊或疑不可為

據公曰據此額猶恐病民可更益乎以功陞阿思哈尼哈番天下既定  
公首請開科取士以收人才丙戌丁亥己丑公凡三典會試得人最盛  
順治四年從征蒙古明年夏班師是冬晉一等阿思哈尼哈番七年

太祖皇帝配祀

上帝禮成加一拖沙喇哈番子世襲八年正月

世祖皇帝親政大婚禮成上

皇太后尊號晉一等精奇尼哈番儀章京四年加二等梅勒章京五年

加為一等阿思哈尼哈番與剛林俱賜名巴克什六年正月纂修

太宗文皇帝實錄充總裁官八年於剛林案內被議革職九月復原官

九年兩遇恩詔加世職至一等時軍興孔棘民多失業餽餉維艱公

精奇尼哈番十月任議政大臣率同列上疏曰臣等伏見直省地土荒蕪錢糧闕額至四百餘萬民賦

虧則兵餉必絀然民地荒則軍屯可興今湖廣江西河南山東陝西五

省寇亂日久人戶稀少窮民無力開墾請行興屯土著流戶願來耕者

官為給地量助牛種官分子粒三分之一三年之後便為永業編為保

甲使守望相助姦宄不生於興屯之中寓招撫之法遠近飢民聞風踵

至於興屯之中行救荒之術因條興屯四事曰選舉得人曰開墾守穫  
曰積貯轉運曰責成考課

命會議舉行十年二月

召公於位育宮商推政事

賜茶中和殿憫公勞勩慰諭備至公跪奏云臣蒙

聖恩推心置腹犬馬之力敢憚微勞時漏下一鼓命近侍送歸第明年

八月

詔加公少保兼太子太保先是公以疾告

世祖親和藥餌馳賜無虛日至宮保命下公具疏陳謝復固請養病

上覽奏遲回久之乃暫令公解任俟病痊召用

特加陞太傅兼太子太師十四年

恩詔加秩一級遣工就第圖其貌藏之大內公居家聞四方水旱災傷

則愀然吉月及

朝廷大慶力疾以朝

聖祖仁皇帝即位廕一子入監讀書康熙元年

特命公祭告

太宗皇帝山陵公伏地哀慟不能起以康熙五年八月薨年七十公志

在安民在軍首戒嗜殺汲引人材保全善類如恐不及秉政三十餘年

家無長物帷幄贊謀皆國是大計外廷莫聞生平奏議自焚其草故罕傳于世云子六人皆顯官仲子承謨總督浙閩遇耿精忠亂不屈死

又內祕書院大學士范文肅公墓誌銘

李蔚

國家定鼎燕京武功赫奕其以文臣著變調綏又勳爲中外瞻倚者首故太傅范公公謝政淡一紀以今康熙丙午卒於邸第都人士咸驚悼禮臣以卹典請

上念耆德碩績軫恻有加祭葬碑諡敕所司準故事頒錫靡勿備於是宗伯奉

溫綸致祭宣布朝廷崇禮舊勳公以元臣膺異數狀甚悉聞者感奮司空出其賦鏹爲營壙兆伐石樹豐碑代言之臣文焉稱制垂永久述公績則益詳祕院按諡法請爲公易名

特賜諡曰文肅國典臣忠照耀來禩蓋近代所希邁也已而長公副都統君偕諸季以公治命造壽曰先太傅葬有期矣生平行事謹編錄如左幽宮之石子宜有言其無辭壽以固陋謝不可顧念執經公門二十

年所於公德業頗窺梗概已讀其狀備而覈乃再拜受命謹按范氏系出宋參知政事文正公仲淹文正生尚書僕射忠宣公純仁忠宣之第

五子正國爲宋樞密院料理官靖康之變扈元祐孟太后至江西遂家臨川三傳而至良儻仕爲迪功郎徒饒之樂平六傳至景申公岳明洪武中仕爲雲夢縣丞坐事謫遼東瀋陽衛遂爲瀋陽人是爲公始祖四傳爲瀋溪公總正德丁丑進士累官兵部尙書以亢直忤嚴分宜去是爲公會祖瀋溪公生瀋陽衛指揮同知沈是爲公祖沈生楠曰北垣公娶於石舉丈夫子二公其仲也公生而穎敏稍長沈毅多大略讀書輒解悟善屬文年十八偕伯兄文案補博士弟子員主者閱公試牘深賞異焉天命三年戊午

太祖高皇帝龍興東國首定撫順始得公

太祖偉其貌詢知爲大司馬孫願謂員勒曰此名臣子孫也其善遇之諸王世子競加優禮六師定遼陽度三岔攻西平下廣寧皆以公從洎太宗文皇帝卽位察公才堪大任簡置帷幄天聰三年冬從蹕入薊門克遵化將偏師諭降潘家口馬蘭峪三屯營馬欄關大安口凡五城皆下之是時明寧遠總制某將重兵居前公進祕謀縱反間總制獲罪去我師之在大安口者敵兵圍之公以火器進攻敵敗圍乃解

太宗自將臨永平留公守遵化攻者甚銳我前鋒士稍困公突圍力戰

拔之而歸

上嘉其功授三等阿達哈哈番信任益篤四年初置祕書院以公爲大學士領機密公感激殊遇愈殫謨猷每入對必漏下數十刻始出或未及食息復奉

召去以爲常其語卒祕勿傳五年師圍大凌河降其城而蒙古降卒有陰戕部帥叛去者

上大怒公從容進說全活者眾時一軍壁山巔死守公請往諭之遂單騎抵其壘曉以利害守者降

上悅以降人盡賜之七年孔耿尙三王歸命未渡海敵兵躡之急上命公從親王貝勒將兵迎援公前往慰諭宣

上恩信三王遂以所部來歸嗣是而下旅順取平島征朝鮮服蒙古公皆在左右八旗置固山額眞廷議首推公

上曰范章京才誠勝此然固山職一軍耳朕方資爲心膂其別議之崇德改元以公居政府七載陞授二等阿達哈哈番大學士如故時初開科目取士公知貢舉所拔士後皆爲名臣內三院綜理政務  
上嘉公同寅協恭一心一德每議大政必曰范章京知否脫有未當必



曰何不與范章京議之眾曰范亦云爾即得

俞旨公嘗以疾暫請休沐庶務未決者

命俟公愈裁行撫諭各國敕書皆公視草初

上猶省覽後乃不復審視曰汝當無謬也常侍

上膳有殊方珍味公念北垣公未嘗遠巡不下箸

上識其意即命撤御饌馳賜邸第乃再拜謝暨

太宗文皇帝上賓公號慟幾絕

世祖章皇帝御極公益電勉矢報於佐集大勳適闖寇李自成陷燕京

報至公方以病詣蓋州之湯泉驛

召決策遂力疾趨盛京建議曰自闖寇猖狂中原塗炭近且傾覆京師

戕厥君后此必討之賊也雖擁眾百萬橫行無憚其敗道有三逼殞其

主天怒矣刑辱縉紳拷劫財貨士忿矣掠民資淫人婦火人廬舍民恨

矣備此三敗行之以驕可一戰破也我國家上下同心兵甲選練誠聲

罪以臨之卹其士夫拯厥黎庶兵以義動何功不成復言好生者天之

德也兵者聖人不得已而用之自古未有嗜殺而得天下者

國家止欲帝關東當攻掠兼施倘思統一區夏非又安百姓不可舉國

咸驥公言大軍遂發申嚴紀律妄殺者有罪公以疾未平翊日馳赴軍  
中山海一戰闖寇披靡果如公言大軍之長驅而西也民多逃匿公草  
檄宣諭言義兵之來爲爾等復君父仇非殺爾百姓今所誅者惟闖賊  
官來歸者復其官民來歸者復其業師律素嚴必不汝害民心遂安凡  
檄皆署公官階姓氏我師入燕京首爲故明莊烈愍皇帝發喪易梓宮  
備儀衛公親經紀其事時宮闕灰燼百度廢弛千里之內煙火僅屬於  
是安撫子遺舉用廢官蒐求隱逸徵考文獻更定律令廣開言路招集  
諸曹胥吏收其冊籍明季賦額屢加冊皆燬於寇惟萬厯時故籍存或  
欲於直省徵求新冊公曰卽此爲額猶恐病民其可更求訖今正供悉  
依萬厯舊額實昉諸此畿甸甫平撻伐四出文武甲兵事無巨細咸公  
綜理之案牘填委晝夜立闕下並觀兼聽剖決如流凡所措置準故典  
合時宜靡不允當甲申迄乙酉躬佐開國規模宏遠矣  
特賜褒嘉超陞三等阿思哈尼哈番中原旣定公進言曰治天下在得  
民心士爲秀民宜廣其途以蒐之乙酉丙戌通籍者皆江北士子請於  
丙戌丁亥再行鄉會試從之順治二年陞二等阿思哈尼哈番冬從征  
蒙古明年夏班師陞一等阿思哈尼哈番七年

太祖高皇帝配

天禮成加授一拖沙喇哈番世襲罔替八年

世祖章皇帝親政上

皇太后尊號章恩陞二等精奇尼哈番廕一子入監讀書

大婚禮成再上

皇太后尊號陞一等精奇尼哈番時軍興孔棘民多失業餽餉漸憂不

給公疏陳興屯四事

上俞其奏命會議舉行其略具行實中公生平獻替動關大計多侍

纂修上面決可否所有章奏悉焚其草即實錄史冊亦僅載什一九年開館

太宗文皇帝實錄專敕公領總裁事十年春

上召公入對於位育宮出

賜茶於中和殿傳諭曰朕倚卿共致太平常召卿面議大政或不時臨

幸內院卿夙夜盡瘁得無過勞或致疾病今後覺勞倦即少休靜事調

攝切勿勉強趨直致有違和卿體安吉即慰朕倚毗元臣同心致治之

意公頓首謝十一年八月

上諭吏部云朕惟旌賢勸能國有常典大學士范文程等皆在

太宗時素效忠勤今始終不渝或匡贊政機勞深啟沃或經理部務力

殫猷為成績已彰宜加恩晉秩晉公為少保兼太子太保公疏謝曰臣

一介庸流蒙

太宗文皇帝參養三十年至我

皇上親覽萬幾勵精圖治臣尸位素餐絲毫無補自去年坐湯回京屢

蒙

聖諭調理賜以藥餌奈臣年衰神耗元氣難復七月中復染痢疾下血

不止屢欲上瀆

天聰滿洲從無告病之例院務殷繁需人佐理若復隱忍撫心難安正

爾跼蹐不遑而

天恩隆重列臣於諸臣之前加臣以官保之階寵命非常驚惶失措分

宜馳叩

天顏遵旨辦事緣腹疾未痊神虛目眩不能入直懇

聖恩憐宥容臣服藥調理倘不即填溝壑報主有日也

上覽奏憫其勞瘁遲徊久之乃諭吏部云少保兼太子太保內翰林祕

書院大學士范文程自

太宗時辦事衙門二十餘年忠誠練達不避艱辛朕所倚賴乃近以積勞成疾雖暫假調理心仍夙夜在公未得專事藥餌旦夕奏效深係朕懷暫令解任謝事安心調攝特陞太傅兼太子太師昭朕眷禮大臣至意佇俟病痊以需召用初公屢以疾告

上軫念特至親御權衡和藥餌馳賜無虛日迄解任恩眷逾隆十四年恩詔加秩一級復遣畫工就第圖公像藏之內府不時觀覽公厯事累朝寵錫優異恩賜

御用服物不勝紀又以公形貌頎偉衣冠皆特製頒賜之

列聖於公皆不名但呼范章京云居恆言天下治安惟在得賢故於培養人材保護善類尤惓惓加意庶官中有才藻可大用及因公負累一嘗不掩者悉為奏請滯除拔擢後皆以稱職聞丙戌丁亥己丑三主禮闈皆稱得人既謝政闈東臬為別業稍構亭館植卉木引親故徜徉其中時以詩書騎射課子弟性廉慎好施與執政二十餘年家無長物或遇故舊困乏傾囊不惜嚴飭家範追遠睦族咸合古禮族姓有以兵燹離析者即捐金贖還器宇洪深人罔窺其喜怒雅好讀書每引儒生陳

說古今輒夜分不倦惟不喜佛老庭無其跡朝鮮諸國使至皆詢公年貌每乘安車一出兒童婦女瞻望如堵有司馬君實邵堯夫之風吉月及

朝廷大慶必力疾朝服以朝

世祖升遐公哀慟如哭臨

太宗文皇帝時

今上嗣大寶廕一子入監讀書康熙元年奉

命祭告

太宗文皇帝山陵伏地長慟幾不能起公秉賦素強齒向暮而神觀起居不衰今年七月之望猶諭諸嗣公曰我老矣恨未能以一死報列聖汝當勉力官方矢竭忠誠以成我未竟之志晦日偶感寒疾四日而卒實八月初二日巳時也距生年丁酉正月二十二日亥時享年七十公諱文程字憲斗號輝嶽以加上

四祖尊號覃恩誥授光祿大夫三代祖考贈皆如公官妣皆爲一品夫人元配陳夫人

太宗時賜婚穆奇爵樂氏夫人賈夫人金夫人並膺誥命子六人長承

太宗時賜婚穆奇爵樂氏夫人賈夫人金夫人並膺誥命子六人長承

廕副都統加一級前總督倉場戶部左侍郎次承謨順治壬辰進士內  
國史院學士加一級次承勳工部都水司員外郎次承斌襲一等精奇  
尼哈番次承烈承祚女五人孫男四人時望繩孫雲孫怡孫孫女二人  
曾孫一人聯生俱幼以次年二月初四日葬於紅螺山之陽蓋新卜吉  
壤云嗚呼公勛烈垂國史懿德載家乘遐裔荒陬無勿識其姓字卽百  
世可知也使壽敵穎鋪揚窮揆藻績譬之測溟增岱奚裨高深矧惟魯  
不文爲公夙鑒者無已則妄以一言擬之曰古之大人而已敬繫銘曰  
維古大人正己物正合才與誠誠乎一德才協造邦乃覩良民創而燮  
伐筆路偕起恢拓夤紘守而垂裕寧壹觀若奏效平成  
天眷興朝盡畀所覆賚以良弼應運惟公早契魚水獨領機密出而折  
衝入而借箸鞠躬罔逸

太祖

太宗爰暨

世祖列朝如一

今上嗣統公以元老德望彌優廉頑立懦餘風及物高蹈林邱古稱相  
業規隨謀斷詞偏匪周公實兼之才誠創守足掩前修彼蒼不弔梁木

其姜典刑遠逝禮備哀榮功勒旂常賞綿帶礪鬱鬱燕山温陽之野卜  
斯佳窳公其卽安俾熾而昌永綬億世

附錄十三則

天命三年大兵克撫順偕兄文來歸

太祖偉其貌詢知其家世顧謂諸員勒曰此名臣後也善遇之盛京通志

吉案名臣傳文獻通考補正德丁丑進士兵部尚書什殿嵩去官

太祖取遼陽度三岔攻西平下廣寧所在行營必參帷幄同上

太宗自將臨永平令文程留守遵化敵兵來攻甚銳我軍前鋒被圍文

程突圍力戰援之以出不失一人師圍大凌河城中食盡俱降獨西山

一臺據險自守文程單騎往諭守者降賢良小傳

天聰六年隨

駕至明邊歸化城索取察哈爾汗所寄人畜時

太宗欲深入明境猶豫未決與文程等謀之文程率文館諸臣甯完我

馬國柱公疏言臣等奉

命籌度目前事宜臣等雖愚敢不竭所知以聞沙河堡官員查發逃去

人民是所謂疾在首而暫救其首之意耳今卽以彼為順從有不欲加



兵之意是誠動與義合而具大有爲之志也但觀我軍情形皆有必欲  
深入之意如欲深入當預爲籌畫決計而行少有怠忽俟臨期爲之恐  
其設備各相防守我兵一入卽遇漢人則已若退守各城近邊村莊地  
瘠民窮深入則徒疲馬匹我軍毫無裨益徒手而歸是名與利兩失矣  
果欲深入當直抵北京訊其和否早爲決斷毀山海關水門而歸以壯  
軍威以示無敵于天下若計所從入惟雁門關爲便旣無阻撓又沿路  
居民富庶可資飽騰如恐無隙可乘臣等於不可之中求其可者有兩  
計焉一爲明顯之計一爲乘釁之計所謂明顯者當諭沿路人民明言  
察哈爾汗遠遁部民盡爲我有因路遙徒步難行特來與爾主講和假  
爾馬匹令我新附人民騎歸俟爾主旣和仍照數償補若我欲和爾主  
不從異日興師蒙  
天眷佑以版圖歸我凡被擾之民當酌免賦稅幾年以伸我愛養之意  
此一計也所謂乘釁者作書與近邊各官令彼轉爲講和限以日期彼  
朝臣勢必紛撓邊臣莫敢擔當必致詭計耽延彼時乘隙而入惟我所  
欲爲入則利在深入不入則利在速歸若半途而返無益也奏入  
太宗嘉納之

八旗通志

七年明參將孔有德耿仲明自山東來降爲明兵追襲不得達文程奉命應援遂挈以來歸上同

九月上疏言頃奉

聖諭薦舉人材中外臣民無不欣幸然

聖意以爲知漢人者莫如漢人故令漢人各舉所知爲國家效用乃執意營私之輩竟藉此爲黨援之門狙兪游民妄相標榜飲朋賭友謬自稱揚又有意在朋比故引一二優者於其中以飾人耳目甚或昵於親故迫於屬託明知其人非賢過情誇詡獨不思

皇上寤寐勤求之謂何而乃妄舉若此斯時卽有一二公直之臣欲有所舉因見其濫觴如此亦灰心而不肯舉卽有一二忠正之士欲應其舉因見其濫竽如是亦灰心而不肯應遂將

皇上咨訪賢才之美政徒爲宵小倖進之階梯今當考選之時須斟酌錄用若不詳慎恐於國計民生關係匪輕卽曰事敗之餘自有國法然與其刑於旣用之後何如慎於未用之先且欲精核所舉之人尤當並核舉者之人其舉者公正則所舉之人自可任用若舉者素履有虧已不可信而所舉者安得廉能耶今我國之薦舉雖不用古昔連坐之法

然亦當酌議懲罰以爲妄比匪人罔上欺君者戒至於所舉得人後有成效者亦當給與紀錄以昭獎勵

三年疏請更定六部都察院理藩院官制自承政以下凡五等皆見施行員設左右參政理事官副理事官額者庫各官爲五等

順治元年四月

命攝政睿親王征明上書於睿親王曰迺者有明流氛踞於西土水陸

諸寇環於南服兵民煽亂於北陲我師燹伐其東鄙四面受敵其君若

臣安能相保雖天數使然良由我先皇帝憂勤肇造諸王大臣祇承

先帝成業夾輔

沖主忠孝恪於蒼穹

上帝潛爲啟佑此正欲攝政諸王建功立業之會也竊惟承丕業以垂

休萬禩者此時失機會而貽悔將來者亦此時何以言之中原百姓蹇

離畏亂荼毒已極黔首無依思擇令主以圖樂業雖間有一二嬰城負

固者不過自爲身家計非爲君效死也明之受病種種已不可治河北

一帶定屬他人其土地人民不患不得患得而不爲我有耳蓋明之勁

敵我國與流寇也正如秦失其鹿楚漢逐之雖與明爭天下實與流寇  
角也爲今日計我當任賢以撫眾使近說遠來蠶茲流孽亦將進而臣  
屬於我彼明之君知我規模非復往昔言歸於好亦未可知倘不此之  
務是徒勞我國之力反爲流寇驅民也夫舉已成之局而置之後乃與  
流寇爭非長策矣曩者棄遵化屠永平兩番深入而返彼地官民必以  
我爲無大志惟金帛子女是圖縱然歸附勢不肯留因懷疑貳蓋有之  
矣今日有已服者有未服宜撫者是當申嚴紀律秋毫無犯復宣諭以  
昔日不守內地之由及今進取中原之意官仍其職民復其業錄厥賢  
能恤厥無告將見密邇者綏戢逃聽者風聲翕然向順大河以北可傳  
檄而定也河北一定可令各城官吏攜其妻子避患於我軍因爲質  
又拔其德譽素著者置之班行俾各朝夕納獻以資輔翼王於眾論中  
擇善酌行則聞見可廣而政事有時措之宜矣此行或直趨燕京或相  
機攻取要當於入邊之後山海長城以西擇一堅城頓兵而守以爲門  
戶我師往來斯爲甚便惟攝政諸王察之人旗通志  
大軍既發文程扶病隨征申嚴紀律妄殺者有罪二十二日敗流賊兵  
二十萬于山海關我兵長驅而西民多逃匿文程草檄宣諭言義兵之

來爲爾等復君父仇非殺百姓也今所誅者惟闖賊官來歸者復其官  
民來歸者復其業師律素嚴必不汝害民心遂安凡檄皆署文程官階  
姓氏師入燕京文程建議首先爲明愍帝發喪易梓宮備儀衛文程親  
紀其事上同

八年文程於剛林獲罪案內被議奉

世祖章皇帝特諭范文程曾效力

太宗朝在盛京時又不曾預碩托貝子之罪後知睿親王所行悖逆託

疾家居眾亦皆知睿王取去剛林時范文程不合其意故不取去范文

程著革職本身折贖仍留原任九月復原官上同

十年任議政大臣是時直省錢糧缺額賦餉絀文程上疏曰臣見直

省地方土地荒蕪錢糧闕額至四百餘萬民賦虧則兵餉必絀

國家大害在此然民地荒則軍屯可興

國家大利亦在此昔明太祖嘗言養兵百萬不費民間一粒亦當元季

亂後曠地甚多能行官屯故耳今湖廣江西河南山東陝西五省寇亂

日久人民稀少若待招民窮民無力何能開墾若任現在道府各官庶

務繁多勢必遷延不力臣請行興屯四事一在選舉得人凡興屯之地

應設兩與屯道以綜理之設四同知以分理之該督撫遴本屬之廉能  
敏幹者任之以保舉之當否爲督撫之功罪其官吏俸廩初年於興屯  
本內關支次年以子粒補償以後俱於屯粒中支給此官增而俸不費  
本少而利甚巨也一在開墾收穫開墾必用牛種農器若俟撫按奏請  
必致曠日悉聽屯道隨於州縣庫貯錢糧內分用支給所墾地土先於  
駐兵之地荒蕪多而水路近者以便轉運漸及其餘地之無主者卽爲  
官屯有主而拋棄者多方招徠過期不至亦爲官屯凡土著流戶願來  
耕者官爲給地量助牛種官分子粒三分之一三年之後便爲永業編  
爲保甲使守望相助奸宄不生是於興屯之中寓招撫之法也其無本  
者官給僱直遠近饑民勢將聞風踵至是於興屯之中行救荒之術也  
一在積貯轉運初屯之時根本未立物力維艱所收糧草皆聽道廳全  
留積貯任其出陳易新爲次年加墾之計其糧草有難以久存者酌撥  
就近兵馬必不可加派取盈致工本有虧反害大政也其轉運一事三  
年之後於屯糧中僱僦舟車起運永不動用屯官僉點屯民倒斃屯牛  
而屯事始得永久矣一在責成考課凡興屯之處府縣有司應聽屯道  
提調管屯同知惟聽屯道管轄如開墾日增撫按必加特薦倣邊俸之

例三年陞二級以酬其勞其不職者撫按嚴糾則罪在道廳撫按曲庇則併坐撫按是所謂信賞必罰也臣又謂今孟冬將盡若復不決明春難耕日復一日四百萬之課是永無足時矣

世祖俞其奏命諸王大臣會議舉行

十一年正月文程上保舉連坐之法乞敕部院三品以上大臣各舉所知不論滿漢新舊不拘資格大小不避親疎恩怨取正直才守之人堪任何官開列實蹟疏名保舉各具專本奏聞一官可舉數官數官可舉一官仍將所舉姓名彙置

御前不時

召對察其議論核其行事並視其舉主何如人則堪任與否早在聖鑒中矣遇有缺出公同會推開出職名並保舉官姓名請

旨簡用若用後稱職量其效之大小保舉官加以優典若不稱職亦量其罪之大小保舉官議以連坐此法實行則內外皆得真才而天下無

有不治者矣

詔從其議

康熙五十二年

御書元輔高風四字額其祠

八旗通志

馮煥

宏文院大學士諡文簡赫舍里公希福傳

馮煥

希福姓赫舍里世居都英額再遷哈達

太祖既滅哈達從其兄碩色來歸以通蒙古漢文遂專任文館

賜號巴克什後隸滿洲正黃旗天聰二年征察哈爾令往徵科爾沁兵

會寇騎充斥土謝圖台吉奧巴止無行希福曰死則死耳

君命安得辭後卒徵其兵來會敘功授騎都尉世職三年從征明薄燕

京復從攻大凌河城並有功晉三等輕車都尉崇德元年改文館爲內

三院授宏文院大學士晉世職二等三年與大學士范文程請更定官

制從之希福雖以文學居內院然常奉使察哈爾喀爾喀科爾沁諸部

頒法律平獄訟宣

上德意時或詣軍營相度形勢規畫機宜每還報

命未嘗不稱善順治元年譯遼金元三史成得

恩賚時部院大臣每旦會食於堂漸華侈希福嘗語同官范文程謂我

輩儒臣非勳臣比安可厚自奉養乃偕白睿親王王然之希福退述其

事于譚布譚布兄譚泰素與希福有隙遂訐其妄播王言詆謫大臣坐



奪官八年

世祖親政察其枉再授宏文院大學士九年修

太宗寶錄充總裁官屢晉三等子世襲尋卒年六十有四

贈太保論文簡以長子奇塔特襲康熙元年以希福事我

太宗勒勞最著更錄其次子帥顏保為內院學士

恪僖公哈什屯傳

哈什屯姓富察隸鑲黃旗滿洲先世居沙濟祖旺吉努率族屬來歸

太祖授佐領哈什屯其長孫也天聰時官侍衛擢任禮部參政崇德二

年與佐領喀愷等分道征瓦爾喀俘獲甚眾三年招降明總兵沈志祥

于石城島六年大軍圍松山城明總兵曹變蛟乘夜犯

御營哈什屯先眾捍禦腕中創力戰不少卻順治元年擢內大臣累加

世職至一等輕車都尉兼一雲騎尉尋列議政大臣會睿親王多爾袞

有疾哈什屯偕貝子錫翰等往視睿親王曰子有疾

上宜臨視又曰爾曹毋以予言上聞既

駕臨視之睿親王罪大臣等違令擅奏降哈什屯世職為騎都尉八年

世祖親政鑒哈什屯無罪復所降職兩遇

恩詔晉爵一等男初睿親王輔政大臣鞏阿岱和洛輝楞僧吉等多詔附之哈什屯獨持正不阿肅親王豪格爲睿親王所構卒于獄鞏阿岱和洛輝欲殺其幼子富綬哈什屯與內大臣巴哈力爭之議乃寢及睿親王卒楞僧吉盛稱王功績於

上前並及兩黃旗大臣謀立肅親王事

詔下法司鞠訊盡得其阿諛誣陷狀尋與鞏阿岱以朋比伏誅而和洛輝亦以黨附睿親王爲大臣蘇克薩哈所劾磔死于是肅親王之事乃白遂封富綬爲顯親王其始終執詞不撓以證此獄者哈什屯及巴哈二人也十二年以奉職恪勤加太子太保明年以年老致仕康熙二年卒年六十有六

賜祭葬諡恪愷子米思翰襲爵乾隆二年入祀賢良祠十三年冊諡孝賢皇后

推恩先世追封哈什屯一等公十四年曾孫大學士忠勇公傅恆經略四川功成凱旋

賜建宗祠春秋致祭以獎忠勳祀自哈什屯始  
寧南靖寇大將軍忠襄公辰泰傳

鄭虎文

辰泰宏毅公額亦都孫戶部承政車爾格長子也初以護軍參領從攻錦州遇盪遠援兵超伍直入斬其執纛者羣纛以麾於陣明兵遂亂大敗之天聰三年從圍燕京軍德勝門外分兵薄明督師袁崇煥營有所獲五年從攻大凌河城明監軍參政張春率眾來援設伏擒其偵卒復與大軍共擊之殲其眾崇德元年從征朝鮮與副都統薩穆什喀乘夜襲破黃州守將營三年從睿親王多爾袞征明敗明兵于豐潤尋攻明太監馮永盛總兵侯拱極營皆拔之又以護軍三十敗明總兵祖大壽軍俘其步騎百有奇五年六年從圍錦州並有功屢加世職至三等輕車都尉七年從圍松山城明兵夜出城犯蒙古正黃旗汛戰卻之從貝勒阿巴泰征明敗其將馬科于渾河築梁以濟明總督范志完以兵來拒擊走之長驅至山東攻克東阿汶上寧陽三城晉二等輕車都尉順治元年從入關破走流賊李自成明年晉一等輕車都尉四年授禮部侍郎從征湖廣敗流賊一隻虎于荊州尋奉命為靖南將軍偕副都統棟阿賴征福建連敗賊渠曹大鎬張耀星克同安平和五年大破賊渠鄭彩彩遁入海復長樂連江擒偽總兵顧世臣等十二人于興化斬之以次克復郡縣全閩底定六年授護軍統領

七年論平園功晉二等男擢刑部尚書八年二月遷吏部三月授國史院大學士七月坐誤增

恩詔赦條論罷降世職為一等輕車都尉九年起禮部尚書充會試主

考官尋授都統晉二等子十年授靈南靖寇大將軍督兵征湖廣是時

流賊張獻忠餘黨劉文秀降于明桂王朱由榔受偽封為南安王十二

年文秀遣其黨盧明臣馮雙禮以眾六萬樓船一千有奇分犯岳州武

昌而自引精銳萬餘列艦攻常德辰泰設伏隘口斷其歸路令參領呼

尼雅羅和以兵嘗賊別遣參領蘇拜希福麾舟師並進三戰三捷賊既

卻復前轉戰至隘口伏盡發縱火焚其艦賊大敗又分兵破賊德山下

逐北至龍陽賊收敗卒二千返關我兵奮擊賊潰走明臣赴水死雙禮

被創遁文秀竄貴州降偽將四十餘人兵三千有奇敘功晉一等子兼

一雲騎尉未幾以疾卒于軍明年凱旋

世祖諭從征諸臣曰大將軍辰泰南征蕩寇卒于戎行朕甚傷悼因揮

涕命酒以勞諸臣復

諭學士麻勒吉等曰若大將軍振旅還京朕當親酌酒勞之不意中道

棄捐不復相見爾等其持此一觴奠大將軍靈次以抒朕懷諸臣及左

右侍從無不感涕

賜祭葬如典禮諡忠襄以其子尼滿襲爵

議政大臣內宏文院大學士甯完我傳八旗通志

甯完我漢軍正紅旗人天命年間來歸以兼通漢文在文館辦事天聰

四年大兵取永平

太宗文皇帝命同大海巴克什等執黃旗登城遍諭官軍百姓雜髮遂

同阿巴太貝勒等鎮守永平又從征大凌河及察哈爾並以招撫有功

授牛叅章京世職五年上疏言

朝廷設立六部各有所司無曠廢之處國事已盡理矣臣意古帝王設

官分職並非無故恐國事無綱紀故立六部恐六部徇私故立六科恐

六科臣庇護當啟格君心故立館臣恐下情不能上達蒙蔽君心故立

通政使令

國家不立言官者意以為國人皆得進言耶不然為南國言官多而取

危耶臣查我

國未立六部以前臣下猶有言之者及已立六部之後未見一斥參有

罪之人今之任事者豈盡循良忠直伊等直屬下固不敢是非伊官長

傍人又誰敢輕言權貴古人云聽于眾則聰偏于聽則蔽若立言官各自檢束雖指名題參人亦無怨何也事有專責應不避仇此古帝明目達聰之良策也若以言官敗事論何不察乎水能載舟亦能覆舟之語是皆伊主分別不明之故非洪武之定制不善我

朝書館之名漢語曰書房

朝內豈可謂之書房此內官吏雜處名分並無一定若加更定惟一言而已若爲定例置官得人最難兼署亦無不可但名分一定各有所司不敢推諉臣等數人實無經緯之才惟此清廉之操忠耿之心至死不  
易去年將副將高宏中授爲甲喇額眞時臣繕疏請留今將遊擊范文程又補刑部伏思臣亦豈得久在書館敷陳以言乎眾口爍金讒言碎骨臣不惜螻蟻之命惟痛弊法相因也六年復與范文程馬國柱疏陳深入伐明之策

太宗並嘉納之尋以事罷職閑居數年

世祖章皇帝順治二年擢內宏文院大學士三年丙戌充會試正主考又以翻譯洪武寶訓告成

賜銀兩鞍馬等物四年六年並充會試正主考又充修

太宗實錄總裁官七年翻譯三國志告成復

賜銀兩鞍馬加世職為二等阿達哈哈番晉議政大臣十一年以素効

忠勤始終不渝加太子太保明年加少保兼太子太保十三年以老乞

休準原品致仕康熙元年以其贊理機務年久照范文程額色黑以一

子補用學士四年卒

賜祭立碑諡文毅

太子太傅中和殿大學士文襄公圖海傳鄭虎文

圖海姓馬佳氏父名穆哈達世居綏分滿洲正黃旗人圖海天性忠愨

具文武才初仕為筆帖式尋加員外郎銜順治二年改國史院侍讀八

年遷內祕書院學士九年

恩詔授騎都尉世職越歲晉宏文院大學士充議政大臣十二年加太

子太保

命攝刑部尚書事明年考滿加少保廢一子入監讀書十五年

命同大學士巴哈納等校訂大清律旋以承審江南鄉試作弊事遲延

削加銜明年又以侍衛阿拉那殿公額克戴清家奴於市下刑部圖海

審理失實論死有

旨免削職籍其家而已

上念其枉十八年正月

世祖龍馭上賓遺命起用

聖祖仁皇帝御極卽於是年授正黃旗滿洲都統康熙二年七月蜀流

賊郝搖旗劉體純李來亨等嘯聚湖廣鄖襄山中

命爲定西將軍副靖西將軍都統穆里瑪率禁旅會楚蜀之師討之至

則與總督李國英提督鄭蛟麟總兵俞奮起于大海署護軍統領根特

等連營困之賊以兵三千犯奮起營圖海親率兵邀擊敗之賊又連犯

諸營各分兵夾擊咸潰散未幾郝搖旗爲都統杜德擒斬於黃草坪劉

體純亦相繼破滅惟李來亨擁眾據茅麓山恃險負固圖海等率兵圍

之絕其聲援外則搜勦餘寇略盡賊勢窮蹙來亨闔門自經死僞公侯

將軍以下僞官五百八十餘員兵八千八百餘名降執斬新樂王及僞

官七人兵六十一人俘其家口三千餘眾而還六年晉宏文院大學士

加世職爲一等輕車都尉會恭修

世祖章皇帝實錄充總裁官七年

命測驗儀象八年錄刑部重囚並稱



旨九年奏乞解機務專力戎行

上慰留之十一年

命清理刑獄十二年冬吳三桂叛十三年耿精忠亦叛

聖祖以籌饗需才

命攝戶部尚書事十四年三月疏請

敕禁外省軍需不得私派夫役不得先期拘集錢糧不得額外科斂詞

訟重者速審速結小者不得濫準滋累衙蠹土豪不得魚肉善良奉

旨飭行是月察哈爾布爾尼劫其父阿布奈以叛阿布奈者安親王岳

樂之郡主額駙也時從勝長史辛柱開行赴京告變乃

命圖海爲副將軍同撫遠大將軍信郡王鄂札率師往討四月師次達

祿布爾尼設伏山谷而以兵三千人來拒我師我師進攻伏發撓亂我

土默特兵因分兵迎擊賊以四百騎繼至親禦之力戰敵兵殲焉布爾

尼悉眾出用火攻復大敗之降其都統晉津布爾尼復收潰卒連戰連

敗遂不能軍以三十騎遁去時科爾沁額駙沙津以兵會勦遇布爾尼

于札魯特境追及斬之並斬其弟羅不藏都統布達里察哈爾平於是

誅阿布奈及其餘子而迎郡主以歸五月還軍西安當是時貝勒洞鄂

攻叛將王輔臣于秦州我軍運送紅衣轍者阻賊仙逸關不得進圖海  
疏請增發滿兵二千勦滅關賊疏通道路

上從之尋班師

聖祖御南苑之大紅門迎勞之敘功晉一等男十五年二月

聖祖以貝勒洞鄂攻陝西平涼未克

命圖海爲撫遠大將軍率護軍每佐領各二名赴陝總轄全省貝勒洞

鄂以下咸聽節制

賜御用冠服團龍補服黃帶

上親乘馬二散馬二百三月至平涼明賞罰申約束軍威大振賊眾聞  
之懼諸將請乘勢攻城圖海曰仁義之師先招懷而後攻伐吾奉

天威討茲凶豎無慮不克顧念城中數十萬生靈無非朝廷赤子遭賊

劫持至此覆巢之下殺賊必多俟其向化歸誠以體

聖主好生之德不更美乎城中軍民聞者莫不感泣咸思自拔以出賊

勢由是日蹙五月奪虎墩山虎墩者在平涼城北高數十仞賊守以精

兵通西北饜道圖海曰此平涼之咽喉也得此饜道則城不攻而下矣

卽率兵仰攻賊萬餘用火器下擊以死拒戰圖海令番休迭進自巳至

午戰益奮斬偽總兵二人賊被殺及墜崖而死者無算遂奪其墩據之  
俯視城中如在掌握因發大礮擊其城中營城中洵懼輔臣乃乞降隨  
以其情上聞

詔赦輔臣罪撫慰之六月圖海劄授七品官周昌爲參議道齋

詔入城翼日輔臣遣僞布政使龔榮遇等率士民獻軍民冊又遣其子  
繼楨等繳所受吳逆僞敕印劄輔臣猶疑懼觀望復令周昌同其兄子  
前鋒侍衛保定往諭乃率眾薙髮降令副都統吳丹入城撫定秋毫無  
所犯時平涼被圍日久城中食盡加以鋒鏑之餘死亡過半因令地方  
官賑窮乏掩骼骸其老弱之轉徙不能歸者遣將士分送安插遠近帖  
然初周昌往招輔臣時昌言其母又奏蠲秦省被兵及轉饟各州縣  
賦皆從之是月遣振武將軍佛尼勒敗賊將吳之茂於牡丹園又敗之  
西和縣北山將軍穆占進攻樂門敗賊於紅崖復禮縣於是固原僞巡  
撫陳彭慶陽僞總兵周養民嘉峪關僞總兵王好問關山僞副將孔蔭  
雄共率僞官九百餘員兵四萬八千餘名相繼降關隴悉平八月奉  
上諭圖海器識老成才猷練達贊襄機務宣力  
累朝以文武之長才兼忠愛之至性勞績茂著克副倚任朕心深爲嘉

悅於軍功議敘外應從優加恩以示朕眷注勤勞酬答勳庸至意遂晉封三等公世襲罔替時漢中與安賊酋據守平涼慶源初定人心未寧奏請宜分兵防守諸隘緩攻漢興別遣一旅赴湖廣會勦吳逆

上命圖海率精銳以行圖海以陝西反側未安慮有變九月疏陳其狀聖祖因授穆占為都統佩征南將軍印率師赴楚留圖海鎮守陝西十

二月議攻漢中興安奏調綠旗兵檄提督孫思克赴秦州趙良棟赴鳳翔以將軍侯張勇將軍王進寶各引兵助之期以明年正月二十日如

所約至下張勇等會議以聞勇等謂宜視夏秋收穫豐歉再圖進取圖海以漢興山路險峻多霍潦賊守益堅請如前奏十六年正月議上

上慮克復漢興後宜設重兵轉饟不易若候夏秋則頓師糜餼亦屬非計

諭令各守諸要隘分兵赴荊州會勦吳逆議遂寢三月招撫韓城等縣偽總兵喬斌以下官百有餘員四月遣兵進逼禮縣驛門先後敗賊於

五盤山喬家山塘坊廟芭蕉園沙窩諸處復塔什堡九月賜服物並

御製詩二章十七年二月奏請分兵兩路進取漢中興安旋奉

平專四

大

密諭止之閏三月將軍佛尼勒等敗賊於牛頭山香泉四川總督周有德等敗賊於秦嶺復潼關堡五寨四月慶陽賊袁本秀作亂發慶陽宜君延安三營兵會王進寶兵討之斬本秀於衛遠溝及其副賊餘眾潰散十二月疏請輕騎赴京面奏事宜許之十八年二月還陝五月賊犯棧道益門鎮各口奏請提督趙良棟進臨武寨相機而行俟擊破賊壘分道征進時湖廣廣西平

聖祖諭亟殲寶雞之賊恢復漢興以平蜀地七月破益門鎮賊賊毀偏橋兵不得進疏其狀以聞

聖祖以其怯懦易退嚴飭之九月進取漢中興安分兵四路圖海親率將軍佛尼勒等由興安進總兵官程福亮為後援駐守舊縣關諸路將軍畢力克圖提督孫思克等由略陽進總兵官費雅達等由棧道進總兵官高孟為後援駐守寶雞提督趙良棟由徽州進剋日並發十月圖海師次鎮安縣分兵為二隊進攻偽總兵王遇隆於火神崖敗之渡乾王河奪梁河關偽將軍韓晉卿遁入四川是月王進寶復漢中趙良棟復徽州略陽畢力克圖復成縣又復階州降偽副將王光生以下官十九員兵三百二十名十一月復興安降偽將軍謝四偽總兵王永世以

下官三百八十二員兵萬四千三百餘名平紫陽石泉漢陰洵陽白河及湖廣竹山竹溪上津等縣皆下之是月畢力克圖遣參將康調元復文縣偽泚泯道王文衡降先是王進寶趙良棟捷奏先至聖祖以圖海畢力克圖等遲緩切責之至是捷聞得旨嘉獎下部議其功

命率大軍之半駐守鳳翔十九年正月

命赴漢中轉饗以濟蜀師九月陝西總督哈占由保寧江直上擊賊譚宏

命發兵爲聲援以分賊勢是月獲奸民楊起隆初起隆於康熙十二年詐稱爲朱三太子謀作亂於京師正黃旗周公直家奴陳益聚數十人於家將起應之公直首其事圖海卽率兵圖之陳益等悉就縛至是并獲起隆送京師二十年正月賊犯四川敘州諸處調副都統翁愛率所部兵往援復奏請親行

諭仍駐漢中防守秦蜀十二月以疾解兵柄還京師因具疏乞休

聖祖慰留之卒於位累官至太子太傅中和殿大學士兼正黃旗都統吏部尙書封三等公世襲諡文襄

賜祭葬如典禮明年

太宗文皇帝實錄告成以圖海曾充監修總裁官追贈少保仍兼太子太傅

御製碑文立石墓道雍正二年加贈一等忠達公配享太廟尋

命建專祠復

御製文刻石以旌之陝西士民咸念舊德並令崇祀名宦春秋致祭焉光祿大夫太子太師戶部尚書保和殿大學士諡文勤李公蔚墓誌銘

王熙

康熙二十三年六月乙巳光祿大夫太子太師戶部尚書保和殿大學士李公以疾薨於邸第年六十訃聞

天子悼惜

詔予祭二壇遣使者賻卹如著令

賜諡曰文勤公諱蔚字景霽別字坦園直隸高陽人明萬曆四十一年進士階至光祿大夫勳左柱國爵少師兼太子太師官吏部尚書中極殿大學士贈太保諡文敏今贈如公官諱國檣者公皇考也先贈如文

敏公官今贈如公官諱知先者公祖考也臨洮府經歷先贈如文敏公  
官今贈如公官諱東少者公曾祖考也成化十四年進士歷官山西布  
政司參議諱儼者於公爲四世祖其居高陽隴口村則自先世諱平福  
公始公生七月喪母七歲文敏公薨執親喪哀毀盡禮順治二年舉於  
鄉明年成進士改翰林院庶吉士除檢討改編修曆春坊中允侍講學  
士遷祕書院學士充日講官教習庶吉士尋充經筵講官順治十五年  
五月以內宏文院大學士入閣辦事公自釋褐迴翔禁苑十餘年致位  
宰輔年方三十有四同時并研胡公曲沃衛公皆以尙書入獨公由學  
士超拜蓋異數也是年更定官制改工部尙書兼東閣大學士未幾兼  
太子太保坐票擬失誤降四級調用公杜門引咎曰臣實不職鐫秩猶  
寬典也

先帝臨御久知人善任亦時以恩威示不測及知公引咎狀益以公爲  
賢居三月召復其官

今天子卽位誥授光祿大夫已又改內閣仍爲三院以公爲內宏文院  
大學士是時

上方諒陰恭默輔政大臣受顧命決機務或議事相齟齬公輒默然俟



辨論將息徐出片言定是非票擬或未當不輕論執每於談笑間旁引  
曲喻令聞者心悅然後徐奪其所是而更正之輔臣每屈意從公一時  
調和匡扶保護善類公之力居多八年夏旱奉詔清獄釋繫囚四十二  
人未減七十九人冤者得白既而復改內三院爲內閣於是公以保和  
殿大學士兼戶部尙書吳三桂倡亂據滇黔巴蜀秦楚驛騷閩粵相繼  
逆命會察哈爾部落亦叛

天子智勇神聖應變若神命將討不庭運籌決策雖萬里外若照燭然  
公受事久又

上所倚任參預機密

天子嚮口授公起草諭統兵親藩將帥方略退食或至夜分或留宿閣  
中出或問以時事默不應其慎重不泄識者謂得古大臣體二十年冬  
海內悉定

天子迺以明年正月幾望置酒乾清宮飲燕羣臣樂作公奉觴上壽

上亦手卮酒勸公賜坐殿上依漢元封柏梁臺故事

上親賦詩公及朝士相繼和

御製序文勒於石又明年克臺灣海外皆置吏於是公爲宰輔二十七

年矣高陽去京師三百里而近公始仕至人相未遲一請告歸省廬藹夙夜在公不懈於位卒佐

聖主平逆亂致太平可謂自任天下之重者也公久在相位凡朝廷大

典禮如冊立

中宮相視

山陵點

神主釋奠於

先師每以屬公出則扈從入則進講主會試者三殿試文武進士讀卷

者十四充纂修監修總裁官者十一賞賚優渥自

御書卷軸以至龍蟒貂綺金銀鞍馬上尊之屬無算然不爲私計自奉

廉儉門庭肅然無衣紵之僕餽遺者屏跡與人言音朗達戶外不爲促

膝密語迹稍涉私輒避席改容人往往逡巡引去立朝風度峻整練習

掌故持大體進退賢否賞罰一聽於公不喜立名譽務以忠誠結

主上知其遇寮友終始無間言朝野貴賤莫有指公過失者嗚呼是誠

難能也已公少力學讀書寒暑不輟喜著述雅負藻鑒能知人主試讀

卷先後得士甚盛魁儒鉅公多出其門弟子之眾近世罕儷闢奇園於

舍北自稱據梧居士吟詠其中有問業者講論不輟旁及天文地理百家之言常奉

召觀楊光先測驗日影又考驗吳明烜時憲七政二術異同又測驗火星木星躔度銖黍不爽雖專門之學莫能難也官檢討時使閩有伴星草及閩役紀行略居京師則有心遠堂詩集若干卷鏤板以行最後有心遠堂續集若干卷藏於家配朱氏陝西布政司參議國壽之女封一品夫人子男三人其疑以廕仕歷官戶部陝西清吏司郎中其恕以廕仕歷陞知肇慶府其旋尙幼女一人孫男二人孫女五人其疑等將以今年某月日葬公於某縣某鄉某原具狀來請銘某嘗與公同讀書城西之庠訶庵既而同官學士後公二十餘年亦得蒙恩拔擢備位政府方幸奉公楷模庶幾獲免學戾乃未久而公捐館舍矣悲夫以余所見公少承家學出而際遇

聖明光輔

兩朝毗贊太平之業終始恩禮無間而享其榮名福祿者時踰二紀因以益宏文敏公之緒遂令父子奕世令聞無窮將古所謂降嶽乘箕者非耶謹按狀書其大端而繫之以銘非獨昭李氏寵榮用以見

主聖臣良千載一遇令後之論世者有所考銘曰

仙李柯條布於中州南東西祖門才並優曰趙曰衛世在衮職如且有  
禽方尹有陟高陽之里司方發英文敏之後我公篤生

先皇則哲爰立作相我

后繼序資公翼亮公之入告謀猷必嘉公之秉機弼諧孔多盈庭者言  
或非其是公析以辭易志而喜有典有策掌故不齊公也博通密藉考  
稽謙尊而光道廣能峻廉而不劇若握瑜瑾師僚先後廊肆其居靡有  
蕪介一德作字惟公勤勞夙夜匪懈霖雨區中覃被徼外令德令儀不

顯其光黼黻

皇猷大業休昌時際唐虞世登仁壽景福嘉名皋夔是友公之徂謝朝  
野告哀台衡忽拆棟幹斯摧乃度鮮原乃考幽宅銘公洪伐千禩無泐

附錄六則

公熟於掌故稽核案牘不以屬吏第召吏令取某年月日某牘來檢之

隨手輒得

上由是益倚眷公 杜綜撰神道碑

公服官以來國家有大典禮必以屬公

世祖章皇帝梓宮發引公奉

詔護行及升附奉

詔恭點

神主文前後奉

詔恭點

孝康章皇后

仁孝皇后神主冊立

中宮充副使持節行禮又奉

詔詣遵化相視

仁孝皇后山陵詣沙河恭點

孝昭皇后神主奉安

坤寧宮扁額持節冊封

惠妃前後扈從巡幸者十八戊戌甲辰丙辰會試者三同上

文敏公嘗移己廕以子弟國棠公體先志亦移己廕以子弟國棠之子霖

人以爲難同上

文敏公配陳早卒繼娶趙生公子京邸文敏公乞歸辛未卒少失怙恃

依繼母張太夫人膝無嬉戲恆戚容皮實高陽被兵城不守公乃奉繼母就居京師以張爲都人也公事繼母如所生薛士麟撰傳

既貴俸入即以賜族人及貧士不置產業不近聲色不營貨利處暗室如大庭少力學讀書寒暑不輟日記史漢一指同上

官閣學時

世祖幸內院每見公多所詢問非疑難事即隱僻典文公對無不稱旨同上

太保公呂宮家傳呂星垣

同高祖叔爾禧令桐鄉致書星垣問子孫著錄祖父者復以柳子厚歐陽永叔各爲厥考侍御公崇國公作表近侯朝宗爲祖太常公司成公作傳姜西銘亦爲祖太僕公太常公作傳皆世所誦叔遂命之曰高祖太保公載

國史載碑誌尙有不及載者皆吾叔父嘗欲求有文者製傳未得以命余余觀世之文章家卒不意意終屬于子終爲之其務簡以盡潔以著星垣削稿定質之叔曰善爰錄藏之公生前明萬曆癸卯八月廿四日卒康熙甲辰四月十八日年六十有二偕配朱夫人合葬常州繆賢里

金公之俊爲誌銘李公來秦爲神道碑蔣公虎臣爲傳讚范文程爲  
誄文書公之美各舉其大者星垣謹彙四公之文合諸祖妣先考所述  
著之於篇呂氏在唐宋間皆籍河南宋南渡徙婺爲舜徒公代父成陝  
爲孝子春鷗公遷宜興明永樂間遷武進六世至公大父遂南公生公  
考翼之公妣諸太夫人世德具公自撰祖父行狀公諱宮字長音一字  
蒼忱號金門公生四歲而孤六歲就傅卽過目不忘八歲著西漢大臣  
論七首重于陳子龍夏允彝皆締交年十二器度過人受家政好施與  
不三年盡棄其田四頃遂爲經師養親補博士弟子食餼屢試冠軍從  
學甚眾庚午謝生徒遊江寧遠公庵閉關三年癸酉舉鄉公遂於易箴  
得否之泰曉然於小往大來之運遂不赴公車獨深求體用經濟之學  
居母喪毀瘠逾禮服除遊揚州公早負重名嘗晦跡謝交遊獨居僧寺  
迨

國朝定鼎公復筮易遇乾九二遂趨京師旣入試文成見匿喪入試者  
某彼此質文並佳公並熟之曳以出及順治四年入試夜有燭燼落公  
卷爲蓮花忽光消卷如故遂第進士及  
廷試大雨失銅格親王鰲拜巡視諸進士公旣儀表異人跪如立又見

公獨無格落筆精整策對甚直因示范公文程陳公名夏皆奇之進呈

蒙世祖章皇帝擢公一甲一名授內翰林祕書院修撰

本朝修撰始傅公以漸至是車書乃同實冠天下進士遂荷

殊寵朝士側目公益持謙維時

召見賞賚不可紀數公每納牘進規特以天下初太平當以用人別流

品爲急

眷注益深遂奉頒

詔江南訪遺佚按梗頑豁除百姓逋累還對稱

上意厯充壬辰乙未會試考官得士極盛晉右春坊右中允

廷試散館學充讀卷官

世祖嘗總試館員以君子懷德論建常平倉疏擢公第一又於十年二

月

召公及侍講法若真編修程芳朝黃機試以柳下惠不以三公易其介

論

上見公文曰伊周衛霍爭介不介喜曰是三公言又第一



上諭吏部曰翰林升轉舊例論資格兼論才品朕思果有才品特出者何必拘舊例右中允仍管祕書院修撰事呂宮文章簡明氣度閑雅著遇學士員缺即行推補遂授祕書院學士閏六月即授吏部右侍郎十二月大學士員缺閣臣援前明枚卜事例次第推諸尙書督臣上硃筆書公名付閣超授宏文院大學士掌樞要一時皆驚公遂陳思密勿知無不言遇

上聖神文武嘉納若流公益竭忠盡瘁嘗曰臺諫當糾閣臣閣臣當率部府不得授以指比以私遂願御史郝公浴勉爲古汲鄭先後率部臣請免簽點江浙富民運白糧請免選報民充織造充機戶事起前明闖黨貽禍東南條奏剴切

旨皆報可又欲減江浙浮糧格部議未果又逆憂西藩吳三桂跋扈偕大學士成克鞏特薦郝浴有文武才足治三桂郝即露章劾三桂不法三桂馳疏辨

上欲馴慰三桂下郝刑部公及成各鐫二級留任後三桂反卒起郝爲雲貴督臣平之公知人愛士能折節下人獨威重清嚴綜別流品又諳悉前代掌故深嫉玷闖黨賊黨之徒嘗欲手著一書恐病其子孫乃止

願嘗揚言至遺民寒峻深所敬恤當江南奏銷案起公以

賞資廉俸代償逋又寄資回江南賑荒全活甚眾十一年六月公病恐

懼曠官拜疏請免

上弗許

上遣御醫賚藥療公又

諭火災九月再疏請免弗許如是者四公前以纂修

玉牒總裁

順治大訓總裁屢進階十二年正月晉公太子太保總裁資政要覽書

成故也公病篤又拜懇疏奉

旨覽卿奏病難速痊特允所請著以太子太保新銜回籍調理病痊候

旨召用仍賜蟒服鞍馬馳驛前去昭朕優眷至意公疏謝奉

旨覽卿奏甚切朕懷須益加調攝務期痊可以慰眷注公既歸

上時念公十三年六月十六日

上賜敕存問曰朕惟國家簡輔弼之臣資其劬勤宜加恩禮即或抱病

歸里庵念才能每懷寤寐亦豈忍漠然置之太子太保原任內宏文院

大學士呂宮爾學術雅醇性資通朗既魁多士旋登禁林受朕深知早

年序

臣

參大政而能不阿不激小心劬贊一載綸扉多所裨益不意二豎偶嬰藥餌未效因准暫還用便調攝今間闊年餘彌深軫念特遣副理事王應聘御前近侍劉有恆齋敷存問賜羊酒卿其慎起居親良餌爲國愛身竚須召用欽哉故諭公拜謝

聖恩涕泗交頤疏稱捐糜莫報辛丑

世祖升遐公慟幾絕力疾奔赴

山陵哀慕極嘔血數升益殆迨卒之日日將入公知不起伏枕九叩授子草趙疏以敬天勤民無忘外患陳奏他無所命遂薨疏上

聖祖仁皇帝軫念公爲減膳輟朝

諭賜祭葬

賜塋遣官奠朝野嗟惜之范公文程爲誄曰

本朝第一人物第一知遇惟

先帝知公惟公不負

先帝一時誦傳公立朝矜尙氣節雖持大體不立異同獨辨流品於前明闡黨屏之尤嚴忌者切齒故病歸後屢被交章彈摘荷

上深知公不能動搖最後奉

上諭不必苛求議者始息公未遇時曾拒奔女知者稱之李公來秦敘其事謂此特公小節公固有大節不奔者也公著撰甚富授門人吳侗校理遂失之書法類歐陽率更晚學董元宰病歸後有日記小冊動作必書子孫或得數冊公子六人方洪蔭監生辭蔭員外郎方高歲貢生方咸恩貢生方嘉廩膳生爲星垣高祖方昭廩生方振附監生太保公屢爲考官讀卷官門人甚眾又郝公浴師事公其門下事公如師故數十年江南考官皆公門下士高祖兄弟率守太保公教不試于公之門生皆以諸生老

碑傳集卷四

貴筑黃彭年編訂

碑傳集卷五目錄

國初功臣上

內大臣諡文忠赫舍里公索尼傳 馮培

恪僖公過必隆傳 鄭虎文

勤襄公佟圖賴傳 李紱

誥授光祿大夫內秘書院學士張佳公鄂穆圖墓誌 張玉書

忠襄公李率泰傳 馮培

光祿大夫總督陝西三邊四川等處軍務少保兼太子太保兵部尚書

兼都察院右副都御史世襲阿思哈尼哈番贈太保諡忠毅孟公喬

芳神道碑銘 王士禛

兵部尚書兼都察院右副都御史總督直隸山東河南諡忠勤張公存

仁傳 李紱



國初功臣上

內大臣諡文忠赫舍里公索尼傳

馮培

索尼姓赫舍里隸正黃旗滿洲大學士希福從子也

太祖時授一等侍衛屢從征討哈達犯界藩城擊敗之從征棟奎蒙古

援兵雲集立二寨為犄角索尼攻拔其一寨餘眾悉降天聰元年從攻

錦州偵軍事于甯遠並有功二年

太宗親征察哈爾徵兵外藩科爾沁遲久不至

遣索尼飭責之乃以兵來會土謝圖台吉奧巴遂入朝妻以貝勒舒爾

哈齊孫女既而奧巴屢背約私與明通時復徵兵不至索尼齎

聖書申飭曉以大義奧巴泥首悔罪三年從征明至燕京明薊遼督師

袁崇煥赴援列營城東南肅親王豪格迎戰敵圍之數重矢石雨下索

尼躍馬突入陣左右馳擊遂援肅親王以出明年諭降榛子鎮沙河驛

人戶拔永平登城周麾黃旗以撫其眾五年擢吏部啟心郎從圍大凌

河明兵自錦州赴援索尼持短兵步戰敗之明年從征察哈爾還師入

單傳五



明邊界略大同取阜臺寨八年授騎都尉世職崇德八年考績超授三等男順治二年晉二等子以子爵尊不宜復列郎官乃解啟心郎任時英親王阿濟格獲罪王方與都統譚泰等勦賊湖廣

詔列其罪狀令譚泰宣示軍中譚泰匿不以示索尼劾之譚泰坐削公

爵銜索尼因訐其盜內庫琴及林馬庫院捕魚禁門橋下事索尼遂罷

廢明年護軍統領圖賴劾譚泰爭功怨望詞連索尼初大軍分道勦李

自成于西安譚泰所出道迂險後至無功及移師下江南譚泰慮不得

與語於圖賴頗怏怏圖賴遺書索尼屬以譚泰語達睿親王齋書者私

發之恐譚泰得罪沈之河至是圖賴復論前事逮訊齋書者詭云已達

諸大臣坐索尼黨庇罪當斬王親鞫之索尼曰吾發譚泰匿

詔旨罪顧匿圖賴書以此之乎王悟窮訊齋書者事得白尋復授二等

子五年貝子屯齊訐索尼與圖賴等嘗謀立肅親王論死從末減遣守

昭陵八年

世祖親政鑿索尼柱

召還京復其爵累晉一等伯擢內大臣兼議政大臣十八年

遣詔以索尼與大臣蘇克薩哈遏必隆鰲拜輔政蘇克薩哈與鰲拜爭

事成隙索尼惡之年已老矣且有疾康熙六年屢請  
聖祖親政乃

俞其請

特賜爵一等公與前所授一等伯並世襲是年七月卒

賜祭葬有加禮諡文忠以第五子心裕襲一等伯第六子法保襲一等  
公長子噶布拉仕至領侍衛內大臣十三年

聖祖因

孝誠仁皇后

推恩所生授為一等公

恪僖公邊必隆傳鄭虎文

邊必隆宏毅公額亦都第十六子也天聰中官侍衛崇德六年從圍松

山城明總兵曹變蛟屢突圍欲出連擊敗之夜半變蛟集敗兵突犯

御營邊必隆與大臣錫翰等力戰射殪十餘人變蛟負創遁論功得

恩賞七年從征明克薊州進兵山東攻夏津先登論功予騎都尉世職

順治二年從征李自成兄子錦於武昌拔鐵門關論功晉二等輕車都

尉五年兄子科普索訐其與白旗諸王有隙設兵護門事奪世職

世祖既親政遏必隆訟削職寃

詔復之明年科普索獲罪以所襲圖爾格之二等公令遏必隆併襲爲一等公尋任議政大臣擢領侍衛內大臣洵加少傅兼太子太保十八

年受

遺詔與索尼蘇克薩哈鰲拜爲輔政大臣康熙六年

聖祖親政加恩輔臣

特賜爵一等公而以前所襲公爵授其長子法喀明年加太師又明年

屢乞罷輔政許之先是輔政時索尼老病鰲拜專政與蘇克薩哈不相

能及鰲拜欲以正白旗莊田改隸鑲黃旗而別籍民田給正白旗

詔遣大學士蘇納海會總督朱昌祚巡撫王登聯往勘皆稱不便忤鰲

拜意遂矯

旨殺蘇納海及昌祚登聯復誣蘇克薩哈怨望蓄異志必真諸法且族

之遏必隆皆不能爭八年鰲拜獲罪遏必隆以黨惡論

聖祖念其黨鰲拜無跡宥之祇除其公爵削所加太師銜九年

聖祖以其爲顧命大臣且勳臣子前愆止因循瞻顧可貴

命復其公爵宿衛內廷十二年卒

賜祭葬諡恪僖

勤襄公修圖賴傳

李穡

從  
修圖賴一名盛年贈太師修養正季子也初襲父遊擊世職天聰五年

太宗文皇帝征大凌河擊明兵備道張春援兵首先陷陳以功加世職  
爲二等參將崇德三年授兵部右參政五年從睿王多爾袞征明圍錦  
州率四旗紅衣礮取白官兒屯臺六年從鄭親王濟爾哈朗圍錦州取  
金塔口三臺七年圍錦州有松山騎兵來奪我紅衣礮率本旗兵擊敗  
之又敗山口步兵攻克塔山杏山附近諸臺併克二城論功加授一等  
甲喇章京世職陞任本部承攻兼固山額真八年同大兵取前屯衛中  
後所二城加世職半箇前程順治元年六月同固山額真巴哈納石廷  
柱招降山東四府七州三十二縣時有故明三河令據德州自稱濟王  
鑄印起兵不納我朝新置州牧圖賴以兵禽之送至京師七月攻太原  
府方周視形勢城中步兵突出擊敗之指揮紅衣礮進攻遂下太原招  
降九府二十七州一百四十一縣二年從定國大將軍豫親王多鐸南  
征同墨爾根侍衛李國翰毀流賊柵于黃河岸上併取其後營獲船十

五隻平定河南五月至江南故明高太監舟師由揚子江順流而下圖賴同固山額真吳守進等擊之獲船三十二隻又以紅衣礮攻揚州府嘉興府等城皆克之加世職爲二等阿思哈尼哈番五年授定南將軍率左翼兵駐防寶慶時寶慶已爲賊陷冬十月進兵恢復之捷聞下所司議叙六年鄭親王濟爾哈朗爲定遠大將軍征湖廣圖賴分兵趨衡州距城三十里遇賊兵千人屯橋上擊敗之又破僞總兵陶養用於石橋門斬養用僞伯胡一清列七營于城南山率兵進擊破之又擊僞副將于望公嶺山峪口連破之一清復率眾萬人距廣西全州三十里立六營又擊破之遂下全州十二月還駐衡州賊攻常甯縣遣牛彖章京陳天謨等破之于石鼓洞斬僞總兵副將二人圖賴生長行閒熟諳兵法與士卒同甘苦故所向克敵身經百戰體遍創痕七年九年疊奉恩詔累加世職至三等精奇尼哈番世襲罔替十三年以疾乞休世祖章皇帝念其勞績素著命加太子太保解任十五年卒年五十三歲

子祭葬諡勤襄康熙元年

聖祖仁皇帝卽位

覃恩贈少保兼太子太保十六年以圖賴係

孝康皇太后之父

特封一等公世爵罔替雍正元年

誥贈太師二年七月

敕建專祠春秋祭祀

御書祠額曰功宗元祀又書聯句懸于堂柱以其子國綱國維耐食

誥授光祿大夫內秘書院學士張佳公鄂穆圖墓誌

張玉書

公姓張佳氏諱鄂穆圖字麟閣遇義其號也自始祖以下世居長白山

鄂莫和索洛之地遞傳至曾祖諱瓜喇始遷輝發祖諱代廕布祿又遷

葉赫南地名長尼和樂居焉父諱吳巴泰母覺羅氏及公貴曾祖祖考

皆贈光祿大夫妣皆贈一品夫人公體貌魁傑屹如嶽峙幼善騎射稍

長即嗜經史恭遇

太祖高皇帝肇基東遷嚮用英俊之士公輒講求文武大略以冀為國

家異日之用每構一篇窮研一日夜久之才譽蔚起

太宗文皇帝崇德改元益尚儒術歲戊寅拔公一等秀才賜布帛時召

見講譯書史辛巳初設制科公應舉居第一

年第一

賜頂帶選入內院校譯會典順治元年冬

世祖章皇帝入關定鼎公與扈從旋授秘書院侍讀奉

命編纂

兩朝實錄書成賚白金文綺又譯通鑑及詩禮二經于凡草木鳥獸之名器物象數之實考辨精核能補箋疏所未逮公博洽載籍兼通兵家言講習韜略廟堂知公才能以經術贊軍務于是大師所至皆命公偕行流寇李自成既從一片石潰奔餘黨直趨關中公從和碩豫親王追擊于潼關大破之遂平陝洛嗣江南兩浙以次削平屢用謀策制勝公之功為多

優詔褒美特加錫賚三年從征南大將軍多羅貝勒征閩說降其巨帥

鄭芝龍事聞

賜文綺八良馬二四年從和碩鄭親王征川湖所嚮底定辰沅九溪十二土司營生苗獠悉先後受撫八年師還授宏文院侍讀學士兩遇覃恩授通議大夫加拖沙喇哈番又加拜他喇布勒哈番是年秋充順天考試官取士七十人後多至顯官十年進內秘書院學士復從和碩安親王出塞征喀爾喀部落收服其眾十一年以閩海梗化復從鄭親

王世子率師進討黃梧來降修築漳泉郡縣凡十四城而濱海諸路以安十四年

覃恩累進光祿大夫加一級明年改中和殿大學士禮部侍郎仍帶加一級又從多羅信郡王進取雲南深入其阻百蠻皆就撫自此海宇一

統

朝廷盛德無所不震疊矣十八年復改內秘書院學士是年秋班師道感寒疾以十二月二日卒於天津之楊村年四十有八

上震悼遣官諭祭

賜金五百兩造葬廕二子入監讀書長卽今侍御賽圖由內閣中書歷中書科掌印中書改監察御史次賽良今官三等侍衛公當開國之初以著作謨議爲一代文臣領袖而自入關以後馳驅兵間者十有餘年歷秦楚江浙甌閩滇黔萬餘里蠻烟瘴霧之區叢篁深箐之域無所不至躍馬洩陣摧堅執銳之事無所不預戰守攻取擒縱剗撫之機宜無所不備行間飛書馳檄以及箋表露布皆磨盾立辦而又以其餘力登臨覽觀感時物紀風土錯載於篇什詠歎之內如所遺北海集其什伯之一二也而生平建樹之鴻駿亦略見于此矣



忠襄公李率泰傳

馮培

李率泰隸正藍旗漢軍父永芳初爲明撫順遊擊天命三年以城降累晉爵至三等子率泰初名延齡年十二入侍

內廷

太祖賜以今名比長以宗女妻之

太宗征察哈爾朝鮮及圍錦州率泰俱從崇德八年從征至山東有勞績洵擢副都統順治元年授刑部參政既定官制改侍郎從入關破流賊李自成招撫天津平山東滿家洞賊功最二年從豫親王多鐸破流賊於潼關移師南下克揚州薄南京分兵徇定蘇州松江諸郡邑攻克江陰三年從貝勒博洛平浙江福建敘功授世職爲二等輕車都尉考滿兼一雲騎尉五年海賊鄭彩犯福州漳州泉州諸郡詔率泰與靖南將軍辰泰往剿先後擒斬賊渠會慶顧世臣等俘其眾數萬遠復長樂連江興化彩引潰眾竄入海江西賊郭天才乘間自杉關掠福州聞率泰偵備嚴夜焚洪山橋以遁閩地寇患稍息巡按御史周世科虐刑攫賄率泰疏劾之斬世科發賊私巨萬民皆感泣六年從討大同叛鎮姜瓖下保德州擒斬賊黨牛化麟等七年遷吏部侍郎授

弘文院大學士八年坐與同官辰泰誤增

恩詔赦條罷任降世職爲騎都尉九年

特旨晉三等男十年以大學士洪承疇薦擢爲兩廣總督時兩廣方有李定國之患定國者流賊張獻忠遺黨獻忠死降于明桂王朱由榔奉由榔據安隆盡陷粵西郡縣土賊廖篤增等應之勢張甚十一年率泰至粵遣兵殄篤增于玉版巢十二年定國來犯新會諸縣率泰督兵禦之敗其將高文盛會靖南將軍珠瑪喇率禁旅至合兵夾擊大破之新會城下乘勝復高州雷州諸郡所至軫恤民賴以安十三年加太子太保調閩浙總督時彩已前死其族弟成功者僞國公芝龍子也大軍平福建時芝龍東身歸命而成功竄金門招集亡命嘯聚海濱數犯福建浙江廣東諸郡縣至是時出剽掠往來海上無常率泰旣蒞任請增設水師三千增置號哨船數百爲戰禦計請以撫佐勦翦其羽黨並言成功父芝龍不宜徙甯古塔恐其地近海或因間遁歸閩爲患滋大世祖悉是其言以前破李定國功晉一等男考滿加太保率泰以次招撫賊黨陳德容唐邦杰林紳葉祿等所降不下數萬而賊勢顧未衰十五年成功犯温州府平陽瑞安俱陷浙東告警率泰請調江甯駐防兵

助剿賊退泊舟山是年

詔分置浙江總督以都統趙國祚任之俾駐溫州而以率泰專督福建  
駐福州未幾賊踞南安嶺窺福州賊黨陳斌降復叛率千餘人據羅星  
塔爲成功援率泰馳檄會師焚其巨船千餘賊遁走斌孤窮乞降誅之  
福州城南十六年坐訊屬吏獄不竟奪爵任總督如故康熙初率泰以  
漳州爲全閩門戶復請增設水師二千尋會靖南王耿繼茂擊走定海  
小埕諸賊又會提督馬得功擊走萬安所賊楊豈是年成功竄死臺灣  
孽子錦稱僞世子拒命其黨已稍離於是率泰招降林俊奇陳輝何義  
魏明等三百餘人兵二千有奇而閩地山賊復起遂統建甯延平邵武  
三路兵進剿縛其渠王鐵佛山賊平已而錦與其黨周全斌擁眾內犯  
分遣總兵王進功參將折光秋夾擊之自率舟師偕繼茂搗廈門取浯  
嶼金門二島錦全斌大敗去遂剿滅甯化山賊降僞總兵林國樑進兵  
八尺門降僞將軍翁求多夜半渡海拔銅山縱火焚賊巢斬首三千三  
百餘級俘僞侯黃廷等以下三萬餘人錦僅以數十艘遁入臺灣論功  
加秩正一品蓋三年五月事也九月遣兵剿南山鎮海佛潭橋餘賊十  
月遣兵剿茶子畚山賊俘斬無算八閩內地悉平五年卒于官

卹贈兵部尚書

賜祭葬諡忠襄明年追贈一等男子正宗襲

光祿大夫總督陝西三邊四川等處軍務少保兼太子太保兵部尚書

兼都察院右副都御史世襲阿思哈尼哈番贈太保諡忠毅孟公喬

芳神道碑銘

王士禛

公孟氏諱喬芳別字心亭其先徐州人始祖某明洪武間從燕王就國

靖難立戰功世襲官永平衛遂為永平人九傳至國用厯甯夏總兵官

生公少倜儻任俠不屑經生章句入鄉塾輒侮其師夜取父廢馬渡河

匿杜氏遂之京師鳴弓擊劍鬪難走馬諸勳戚小侯爭邀致之歸永平

發陰符伏讀暇即出城南射獵發必洞札歲庚午

太宗文皇帝兵入關公杖策謁軍門

太宗奇之引置左右不期年擢刑部承政兼梅勒章京管牛象事屢從

太宗征伐大凌河錦州松杏甯遠皆著戰功順治元年甲申

世祖章皇帝義師入關定李自成之亂公帷幄中籌策居多自成戰敗

竄歸關中公帥師追之由燕南下河北三郡踰太行出河東所至輒食

壺漿以迎上師遂入關直抵長安九月關中平就拜兵部右侍郎兼都

督

察院右副都御史總督陝西三邊軍務駐西安亡何賊渠賀珍數萬眾圍西安公遣諸將陳德軍西門任珍軍北門往來馳突賊退追北至承壽賀珍遁去是時張獻忠尙據蜀二年冬十月遣總兵官范蘇等討之伏兵葽溪茅溝子鏖戰白水青川屢破之斬獲無算以反間計殺賊帥況益禽劉心虎遂收龍安先是武大定作亂固原戕殺甯夏巡撫餘孽未殲三年五月公至固原遣任珍討白天壽等禽斬之授計總兵官劉芳名禽甯夏賊王元焦浴遣陳德討鎮原賊姬蛟王總管降之固原西北平十一月遣任珍陳德馬甯討賀珍劉二虎於興安十二月任珍討胡向宸於蕎麥山四年正月斬向宸於板橋四月任珍斬孫守法於藥箭寨十一月禽米國珍於漫營山寨興安悉平八月遣補艾馬甯討馬德於亂麻川追至河兒平斬之九月遣張勇劉友元禽賀洪器於安家川攻李明義堡寨克之禽明義環慶賊平時秦賊據險負固者實繁有徒公授策陳德王平等招青菁寨賊折自明三十六寨賊渠王希榮輓轡寨賊高一祥皆降之斬天峯寨賊張貴五年夏四月河西猗米喇印丁國棟作亂甘涼皆爲賊有渡河而東連破蘭岷臨洮據之薄鞏昌關輔大震

朝議發禁旅援勸公密奏止之而請身任其事自統大軍駐秦州遣馬甯救鞏昌會趙光瑞軍大戰於廣武坡逐北七十里斬首三千級遂解鞏昌之圍賊據臨洮岷州內官營以數萬計公分大軍三路以進遣張勇陳萬略取臨洮馬甯劉友元取內官營趙光瑞佟透取岷洮河三州勇敗賊於馬韓山斬首七百級光瑞敗賊於梅川禽丁光射斬首二千級甯直搗內官營破之斬首八百級岷洮河三州皆復閏四月公自鞏昌至蘭州勇甯光瑞皆會師蘭州城下攻拔之別遣光瑞追丁嘉陞於舊洮州戰於野狐橋嘉陞遁去土番土目馬你完卜龔斬之復舊洮州五月張三耀斬米喇印於古城窅傳首軍前七月公至涼州八月至甘肅州賊攔城固守公夜命將士設伏自然炬坐帳中招募僚高會行炙痛飲彈琵琶醉歌不輟矢落帳前如雨左右皆錯愕公談笑自如不爲動頃之伏兵四起擊鼓震天賊已面縛獻帳下矣遂遣張勇乘夜襲之而身與提督滿兵昂邦章京傅夸蟾及馬甯齊陞趙光瑞諸將繼之賊食盡乞降已而復叛六年正月親督攻甘州勇甯光瑞賈勇先登拔之逐北至北山斬首八千級是時丁國棟奔肅州立土倫太爲王子哈密纏頭畏兀紅帽哈喇五種番人爲都督火者而自爲總兵官據城固守時

出掠武威張掖酒泉地會大同姜瓖反其黨虞印韓昭宣等眾號三十萬攻陷蒲州公旋師河上而留馬甯張勇齊陞等圍肅州十一月諸將克肅州巷戰十日斬首五千級土倫太國棟及其黨黑二哈只等皆伏誅傳首三邊河西悉平八月公自潼關渡河諸將根太趙光瑞復蒲州斬首七千級遂進兵臨晉猗氏斬賊元帥白璋禽監軍道衛登方復平陽諸郡縣虞印韓昭宣等走據運城九月諸將狄應魁趙光瑞沈應時根太杜米等攻拔之斬虞印韓昭宣平陽寇悉平七年三月世祖章皇帝嘉公勳勞進兵部尙書照舊管事八年六月遣諸將馬甯等討劉宏才於北山大戰於保安禽其軍師苗惠民再戰於合水縣禽宏才以歸延慶餘賊悉平十年九月趙光瑞討孫守金於紫陽洞山禽之公在秦十年凡撫賊脅從一十七萬六千有奇公豁達大度推赤心置人腹中有所愛駿馬諸將或徑取以去詰之對曰欲得此馬爲公殺賊耳公捧腹大笑遂賜之其他寶刀良鎧之屬諸將目屬輒以賜之有功者輒力獎拔不限資格起偏裨至大將或爵通侯者如張勇馬甯趙光瑞任珍陳德狄應魁劉友元沈應時趙良棟輩皆是也諸寇旣殄於是疏豁陝西荒糧以甦民累靖盜源又上屯田奏曰秦省自明季寇變

以來荒田最多虧正賦不貲深山大谷虎狼所窟地方多事議裁兵則不可惟有屯田之一法既可足食亦可強兵而弭盜安民亦在乎是矣上可其奏以白土麟等五人分屯延慶平固及西安鳳翔諸郡兵屯歲收糧米二萬六千有奇民屯歲收糧米一萬六千有奇省協餉無算又條奏省兵略曰秦省七鎮及督撫各標官兵計九萬八千有奇合滿洲四旗及平西王固山額眞兵每歲其需餉銀三百五十九萬餘兩而秦賦熟糧并錢息僅一百八十六萬有奇缺額者一百七十餘萬年復一年後將難繼近日逆賊叛孽以次削平各鎮之兵實有可省甘肅遠在天末興安界連三省應照舊額餘如延綏甯夏固原臨鞏四鎮標下宜各留兵三千分中左右三營領之所餘之兵固鎮撥五百人隸慶陽協守餘五千五百人可省也漢羌駐平西王固山大兵應裁去總兵官設城守副將統兵一千人隸興鎮餘兵撥防黑水峪漢陰縣各五百人餘二千五百人可省也漢兵提督四千人駐省會宜留二千協同滿兵征勦餘二千人可省也各道標兵盡易屯兵免其起科延鎮定邊神木等處無屯兵者止用守兵計所省又二千餘人約共省兵一萬二千有奇歲可省餉銀三十一萬兩有奇皆報可又疏陳蜀地戰守之計曰蜀接



壤秦楚自唐宋以來在所必取今獻賊蹂躪之餘所在焚掠人民死徙  
大兵采入恆苦轉運之艱且水泉多毒飲之則人馬皆病是以兩經捷  
伐未克底績今大兵撤至保甯殺賊殆盡斷當以保甯爲駐兵之地以  
四川右路總兵官馬甯統馬兵精銳三千駐之以爲漢中藩籬以步兵  
五千分駐保甯迤北廣元昭化之間爲屯種久遠之計令平西王駐漢  
中相爲犄角戰可制勝守可固圉兵食有賴不苦運輸流亡來歸漸可  
生聚從此規取全蜀易易也以本地之糧養本地之兵民心旣固民情  
亦安舉動罔不利矣或狃一時之見撤兵漢中則保甯咽喉之地必爲  
賊有東而紫陽西鄉西而陪州文縣中而甯羌陽平之間凡諸險要賊  
得與我其之三秦且無甯日矣臣故決以保甯爲駐兵之地不可輕移  
尺寸棄以資賊其固山額眞之兵當暫撤以紓秦民轉餉之勞皆見施  
行九年入覲京師

賜內殿御馬二

詔從馳道出以寵異之加太子太保還西安十年命總督陝西三邊四  
川等處軍務累疏乞休

慰留不允冬十二月以病乞骸骨始

允之加少保馳驛回京而公已薨於位年六十訃聞  
上震悼

命內大臣酌酒匱前

諭祭三壇

錫以碑文加贈太保

賜諡忠毅

賜甲第一區白金千兩以順治十七年葬於京西蔡公莊之東公狀貌  
偉碩腰腹十圍望見者驚爲神人諸將憚其威嚴而樂其坦易性不甚  
讀書每令人誦文書於側坦腹聽之鼾睡如雷偶誤一字輒驚寤曰誤  
矣人以爲神公生於葛麻乙未薨於順治甲午階光祿大夫官總督陝  
西三邊四川等處軍務兼理糧餉少保兼太子太保兵部尙書兼都察  
院右副都御史世襲三等阿思哈尼哈番祖考延勳考國用皆贈光祿  
大夫如其官祖妣張氏劉氏王氏妣馬氏馮氏杜氏皆贈一品夫人配  
卜氏艾氏皆贈一品夫人王氏封一品夫人子三人熊臣汀州府知府  
熊飛浙江道監察御史熊弼襲父職阿思哈尼哈番孫九人續祖康熙  
丙辰進士大理寺評事繼祖刑部筆帖式綿祖國學生繹祖襲阿思哈

尼哈番緝祖廣東連州知州綽祖綸祖國學生維祖阿思哈尼哈番紘

祖銘曰

粵定鼎初巨寇西僨維司馬公威稜遐震電激兩河颯馳三晉遂指嶠

函雍涼掃汛

天子曰咨汝維坐鎮蠡爾遺孽豕虺螳奮有銜未膏有鼓未釁公撫其

徠乃戢厥愠先勝後戰神機獨運告成三載底綏入郡凡公之績成於

善任桓桓武臣以威以信發縱指示所嚮斯躡天篤眷公展厥底蘊秦

川既甯河西復燠酒泉報傾金城告稜天水傳烽咸陽偪近談笑禦之

指揮而燼雲中逆命狂如飲鳩賤陽跳跟河東為甚返旆渡河叛臣是

問推其藩籬斷其鞬鞞賊勢分崩獲醜執訊疆圉既奠遠敷棠蔭撫此

瘡痍育以陽潤方略亟上請奏不靳省兵擇吏屯開農訓擊鼓獻幽以

樂田峻露積崇墉車輪充牣流亢四歸荒殘丕振秦地無虞川師繼進

井絡重開鯨鯢膏刃天造草昧公功為雋於赫孟公功高益慎

帝曰吁來驂駟入覲何以錫之天閑神駿

詔行馳道光賁中禁保障秦蜀才唯汝僅欽哉汝往勿辭勞疾公乞骸

骨申命重巽鞠躬盡瘁卒歸以櫬丈人貞吉行險而順雲雷方屯經綸

奮迅帥秦十載袞衣金印八水同流二華比峻風虎雲龍會逢堯舜神  
爲列星生符瑞讖像列雲臺恩施祚胤刻示豐碑以永令聞

兵部尚書兼都察院右副都御史總督直隸山東河南諡忠勤張公存

仁傳 李敏

張存仁漢軍鑲藍旗人原係明朝甯遠副將天聰五年十月同明總兵  
祖大壽從大凌河投誠卽授一等副將世職六年三月

太宗文皇帝賜緞疋銀兩器皿等物七年十二月

賜鑲貂朝衣一襲八年二月

賜男婦四十口牛十二頭崇德元年以大凌河歸附各官爲部院承政

擢存仁爲都察院承政六月

賜存仁世襲敕書授一等副將世職準襲八次三年七月更定部院官

制改存仁爲都察院右參政五年四月疏陳攻取錦州之策言臣覩圍

困錦州之計實出萬全但慮出掠之利馬到卽收圍困之功積日始建

官軍不見目前之計必生苦難懈怠之心願

聖主振作軍心堅持困守之策截彼偵探禁我逃亡遠不過一歲近不

過一月自有可乘之機兵法全城爲上蓋貴得人得地不貴得空城之

意也昔元太祖翦滅人國勞數十餘年之力及取中原又欲屠近河人  
民隙地牧馬賴耶律楚材畫財賦之策而太祖勉從太祖身之日雖  
大業未成而世祖一統之基實賴耶律楚材一語留之由是以觀欲成  
大業者非人地兼得未易爲也人地兼得之術莫過攻心今我兵大勢  
壓境彼必議棄錦歸甯再急必議棄甯歸關祖帥跋扈畏罪豈肯輕離  
巢穴事若緩則慮持久事若急則慮身家祖帥肯恩失信人多以爲無  
顏再降臣確知彼心惟便是圖本無定見一當危急諸所不顧況伊素  
所恃者蒙古耳數年以來蒙古多慕  
聖化來歸彼必疑而防之防之嚴則思離離則思變伏願以屯種爲本  
時率精銳直抵錦城布散文書於蒙古以爲搖撼之計再多擒土人兵  
卒廣施招撫言之透徹心自變更心一動則未有不降者此攻心之策  
得人得地之術也大凌河之降松山之抗非往事之明效大驗耶古帝  
王傳檄而定天下莫不洞悉於此十二月再言兵家之事有時有形有  
勢三者變化無定婉轉而用之者在於人心我兵始困義州又困錦州  
至卽當避猶奮螳臂而當車轍乃思慮之所不及也雖然非彼之能抗  
我乃我兵圍困不嚴所以偷運糧料然亦籠中之物也臣思

聖主智勇兼全新春大兵必吞錦州或挖壕或礮擊不克不止臣料城之得也必其內蒙古有變中自潰亂倘無此事則城之得也亦無定期若欲久困必繞城以築臺兵圍數匝或者始能得之松山杏山塔山乃錦州之羽翼甯遠之咽喉此三城不破甯遠之肝膽不喪三城之中惟塔山可取其城在西山之下若從山上以礮擊之其室屋自壞不多費力而城可得城一得則錦州之羽翼折而甯遠之咽喉塞兵法云困堅城者必留其隙今錦州雖不甚堅固亦當留山海關以爲之隙況城內遼兵少而西兵多一人帶箭入城滿城驚惶各起遁走之心必不戀戰善用兵者巧於留隙則山海可得若據守山海則關外諸城自然離散故務取山海者實入內之要策困之不必多用蒙古兵其兵雖多法度不嚴萬一不如意一動不如一靜臣先言修廣甯而守之者因與白土廠相近實爲國家闢土地立城池漸次前進之計今大兵住義州超出尋常已爲望外之事故冒昧上陳臣聞烏真超哈先行兵時各帶子弟甚多今換班之際自身不去令家人代去臨陣不力久住必逃此換班之大弊故並奏之得

旨命察兵丁本身不去家人替代者六年大破明援兵於錦十月存仁

疏請宜相機度勢速行攻取章入

太宗是之七年既克錦州四月復進疏言今松錦既破明國重託之督

臣洪承疇甯錦倚賴之鎮臣祖大壽已為我

聖主擒矣竊思洪承疇欣自得歡然倖生是能審天時達世務仰慕

聖上為有福真主祖總兵悔盟背約仍覩面來歸是勢窮力竭見松山

已下援兵盡沒意欲蹈大凌河之漏網未可知也洪承疇既倖得生必

思見用我國則不宜久加拘禁令其鬚頭居官祖大壽係我國寇讐待

以不殺足矣在前途倘有可攻之地可克之城不可堅明人後來抗守

之意況矣總兵觀望於前焉知不蹈前轍乎宜頌

御劄於甯遠城中鎮將等官說明松錦生殺之理投順者必生抗逆者

必殺一一詳示定功陳害吳總兵有不搖動其心者乎

太宗旋頒御劄諭吳三桂及鎮守甯遠諸明將存仁亦遵

太宗命遺三桂書勸令速降六月編烏真超哈四旗為八旗擢存仁為

鑲藍旗梅勒章京八年隨鄭親王濟爾哈朗攻取前屯衛中後所二城

督放本旗紅衣礮克之順治元年二月敘功加半個前程世職是年同

固山額真葉臣招撫山西六府二十四州一百三十一縣攻太原府省

城指揮木旗紅衣礮拔其城又隨豫親王多鐸平定江南河南等處俱督放本旗紅衣礮有功二年隨貝勒博洛等往征浙江遂暫管浙江總督先是江鎮兵竄民苦剽掠城中逃避幾空存仁集諭紳衿開導撫綏民心帖然七月奏言近有借鬚頭反順爲逆者若俟反形旣露必處處勞大兵勦捕竊思不勞兵之法莫若速遣提學開科取士則讀書者有出仕之望而從反之念自息行蠲免薄稅斂則力農者少錢糧之苦而隨逆之心自消奉

世祖章皇帝旨開科以取士薄斂以勸農誠安民急務歸順各省準照恩詔事例一體遵行是月引年乞休不允九月僞國公方國安等從富陽渡江來犯杭城存仁遣副將張杰王定國督兵往勦斬首四千餘級餘賊復盤踞富陽又遣定國往餘杭防勦至關頭遇賊對壘我師奮勇掩擊追至小嶺二十餘里斬獲無算陣擒國安子士衍斬之十月僞大學士馬士英等兵渡錢塘至杭城十里立五營平南大將軍貝勒勒克德渾遣兵進勦未至賊聞風渡江遁去存仁同總兵田雄追斬五百餘級十一月陞兵部右侍郎兼都察院右副都御史總督浙江福建軍務兼理糧餉是月馬士英方國安渡錢塘窺杭城存仁同防守梅勒章京



季什哈總兵官田雄等率兵擊敗之。溺江死者無算。十二月遣官齎疏報捷。言逆賊馬士英方國安嘯聚江東。赭山杭州朱橋范村等處所在肆掠。梅勒章京朱瑪喇總兵官田雄副將張杰等分兵進剿。方逆水師數萬一鼓盡殲。其餘諸寇被官兵擒斬者甚眾。三年二月昌化縣賊首姚志卓嘯聚亡命攻陷縣城。與江東叛寇方國安相結存仁遣張杰等領兵追剿。志卓遁去。昌邑復平。四月疏報擒獲逆賊陳萬良等。五月敘破流賊及平定河南江南等處軍功。加世職爲三等昂邦章京。六月遣副將張國勳等剿滅太湖逆賊擒獲僞大學士馬士英等。斬之。八月再疏求罷不允。十一月存仁疏請錢塘一帶緊要地方議設水師五千以防海寇。下所司知之。四年五月海寇周雀芝據福州鎮東衛並海口民城存仁遣副將滿進忠等分兵攻擊兩城。俱下。又賊黨岑本高犯浦城。遣副將李繡敗之。十一月復引疾請代。

世祖慰留之。十二月遣副將馬成龍等往剿處州。大敗賊眾。恢復景甯。雲和龍泉三縣。尋以疾致仕。五年正月因新陞總督未至。仍以原銜遣官奏捷。疏言僞宜春王朱議衍率眾從江西入。據汀州山寨。總兵官于永紱破其寨。議衍就擒。奏入。

世祖命誅之二月分遣官兵恢復連城順昌將樂三縣先後擒斬偽侍郎趙士冕偽總兵黃鍾靈等六年八月仍起用存仁爲兵部尚書兼都察院右副都御史總督直隸山東河南時榆園巨寇爲害大名存仁知歸德侯方域有才能致書往咨其策方域條列以復遂用其計平賊七年

世祖詔令督撫按臣考校守令文藝有不諳者調用存仁躬蒞各郡命題考試等第公明居官廉幹者有一二語通曉卽注上等否則文雖佳亦乙之監司請其故存仁曰我武臣也

朝廷命我校文我第考實文有僞實難欺也況守令多從龍彥未嘗教之遽試短長恐友能更心眾服其識大體是年及九年三遇

恩詔加世職至一等精奇尼哈番兼一拖沙喇哈番世襲罔替未幾卒於官

贈太子太保廕子一人入監讀書

子祭葬謚忠勤崇祀直隸山東河南浙江福建五省名宦康熙二十三年

諭曰國家自

祖宗定鼎以來委任漢軍官員與滿洲一體其中頗有宣猷效力如孟  
喬芳張存仁輩朝廷亦得其用蓋

聖心眷注始終不替云瑞午張存仁弟存義之子順治十二年以

恩蔭授河南磁州知州十六年陞江南池州府知府坐事調山東沂州  
知州尋丁憂解任服闋補直隸易州知州康熙九年陞浙江杭州府知  
府十一年遷福建邵武府知府輕徭恤獄禮士愛民郡人賴焉十三年  
逆藩耿精忠反分遣逆檄徇下各郡縣瑞午誓死不從賊將執之瑞午  
罵賊不屈死于玳瑁珍珠玳瑁瑜媳婦王氏李氏俱隨任同日遇難賊平  
督撫上其事

贈太僕寺卿

子祭葬廢子一人入監讀書璩張存仁孫初襲佐領康熙十七年隨征  
福建六月偽將軍劉國軒等率逆賊萬餘來犯海澄縣璩力戰陣亡尋

議卹

贈拖沙喇哈番

碑傳集卷五

貴筑黃彭年編訂

碑傳集卷六目錄

國初功臣下

定南武壯王孔有德傳 八旗通志

平南敬親王尚可喜傳 盛京通志

懷順王晉封靖南王耿公仲明墓表 朱彝尊

又附額駙將軍勤禧耿公昭忠墓誌銘 徐乾學



國初功臣下

定南武壯王孔有德八旗通志傳

孔有德漢軍正紅旗人世居遼東天命六年三月

太祖高皇帝征明取遼東有德與同里人耿仲明奔入皮島並為明島

帥毛文龍部下未弁未幾文龍以罪為甯遠經畧袁崇煥所殺明山東

登州巡撫招有德與仲明往歸俱授參將天聰五年

太宗文皇帝親統大兵征明圍大凌河登州巡撫遣有德率騎兵八百

赴援至吳橋縣遇巡撫所遣買馬參將李九成二人以明政不綱共謀

為亂遂合將弁陳繼功李尙友曹得功等五十餘人率兵數千以叛陷

臨邑陵商河青城等縣殺敗官兵千數獲馬匹器械甚多還攻登州城

中耿仲明率遼東官十五人為內應遂破其城收遼東三千餘人以巡

撫素行仁義不忍殺縱之去於是明旅順口駐防參將陳有時廣鹿島

副將毛承祿亦殺旅順口廣鹿島官員率官兵反共趨登州有德以仲

明為總兵官陳有時毛承祿亦授為總兵其餘善戰之士各量功授職

兵勢甚盛，眾官弁欲尊有德為主。有德辭曰：「子初起義，何敢遽當王號？眾強之，乃自稱爲都元帥。」以李九成爲副元帥，鑄印登壇，宣告州郡。整飭馬兵，攻取城堡，遇官兵輒擊敗之，殘破各處地方。山東皆亂，威名大振。駐劄登州府，明遣總兵官祖大弼率兵數萬來攻登州圍之。有德等乘明兵懈，出戰突入其營，殺傷甚多。以副元帥李九成陣亡，始退入城堅守。尋聞明兵屢至，度不能支，乃與仲明等整頓戰艦，衝突出城來奔。我國爲旅順口城守總兵黃龍水兵截殺副將李應元、田良祚俱戰死。明甯遠登州及旅順口官兵又以船追擊有德等，因先已服廣鹿長山等島，欲從鎮江登岸。朝鮮又以兵助明邀擊之，適

太宗遣濟爾哈朗、阿濟格、杜度三貝勒率兵迎於江岸，相對立營。明兵及朝鮮兵見我兵勢盛，始退。於是數百船官兵家口兵器鎗礮等物盡運至江岸，不遺一物。三貝勒大宴有德，又以馬二千餘匹散與其將士乘騎，留船礮輜重於江岸，以兵守之。三貝勒攜歸附官兵起程。

太宗以有德等千里來歸，諭勿令在途勞苦，隨處設宴安插。東京復遣副將金玉和往東京，諭有德曰：「爾等身皆勞頓，宜休息數日，從容來見。」有德遣部下副將劉

承祖齋疏奏曰臣有德等所部官民先來者俱已安插給餉欲赴闕謝恩但續到官民尙未安插不敢輕行待事竣日候

旨朝謁七年五月

太宗遣文館遊擊范文程羅碩剛林安插有德等

諭曰孔耿二人令其統領兵馬駐劄東京號令鼓吹執事儀從俱許照舊惟刑人出兵二事當來奏聞所屬人民安插蓋州鞍山如或不願令往東京鄰近地方又遣文館覺羅龍什愛巴禮敦多惠傳

諭諸貝勒曰今欲賞明國新降元帥孔有德等物每貝勒可出上等鞍馬一匹空馬四匹朕與爾等共出馬四十四匹滿洲蒙古漢人各按世職每十備窠出馬一匹約馬百匹選上等等者賞其大帥餘馬付有德等令按品散給是月有德等自鎮江遣副將曹紹宗劉承祖等來奏起程緣由

太宗命督修岫巖攬盤通遠堡三城之濟爾哈朗阿濟格杜度三貝勒率兵迎之六月文館儒臣范文程敦多惠等自東京召新附元帥孔有德總兵官耿仲明及各官至

太宗率諸貝勒出德盛門十里迎至渾河岸中設黃幄左右各設五青



幄

太宗與諸貝勒率孔有德耿仲明及伊等帶來各官謝

天行三跪九叩頭禮畢議孔有德耿仲明謁見之禮應否抱見諸貝勒

咸謂不宜抱見但以禮相待可耳

太宗諭云元帥總兵奪取登州攻城畧地正當強盛而納款輸誠三遣

使者率其兵民航海衝敵來歸於我功孰大焉朕意當行抱見禮議既

定有德偕仲明率各官以次序立二人向前行漢禮朝見畢復近

御座前叩頭抱膝見嗣與大貝勒代善叩頭抱見次與諸貝勒序齒互

行抱見禮次各官行三跪九叩頭禮畢

命有德與仲明坐於

御座下有德等進獻金銀并金玉器皿綵緞衣服俱納之設大宴以金

卮酌酒

親賜有德及仲明宴畢各

賜蟒袍貂裘撒袋鞍馬等物越二日

太宗召有德及仲明率其所屬眾官入宮賜宴有德仲明拜見畢

命坐於

御座下左側次日大貝勒代善設宴有德及仲明拜見代善下榻答禮亦令坐於左側小榻次和碩諸貝勒設宴親迎至門坐有德左側仲明右側八月封孔有德爲都元帥

賜之勅印又諭有德等曰與爾等同破山東歸降諸將宜察其功之大小用印給劄諭畢

太宗率諸貝勒御樓召有德及仲明登樓宴之八年五月

賜有德所統兵號爲天祐兵閏八月從大兵征明由大同入邊有德遣部下副將黑成功率三十人佟三率五十人敗明兵八百人獲馬二十匹

賜有德及仲明銀各三百兩緞五疋緞衣五襲銀盃盤二副令其賞部下有功官員九年五月有德與仲明輸糧助賑

太宗以歸附人民糧已足用俱令運回崇德元年始建

國號大清大封諸貝勒王爵於是封有德爲恭順王是年冬十二月太宗親統大兵往征朝鮮

命有德同懷順王耿仲明知順王尙可喜及各固山下烏真超哈全軍在後護送紅衣法貢等物及烏鎗車牌輜重等物二年二月朝鮮降復

命有德同耿仲明尙可喜各率全軍及每牛錄甲士四人昇紅衣礮十六位領朝鮮兵船五十隻往取明皮島三年四月克之斬明守將沈總兵九月奉命大將軍睿親王多爾袞統兵征明徵有德及耿仲明尙可喜三王兵

勅曰王等將部下紅衣礮一切火器馬步官軍及戰車於本月二十五日俱至盛京各帶兩月行糧勿違冬十月有德及懷順王耿仲明昂邦章京石廷柱馬光遠等以神威將軍礮攻五臺克之又以神威將軍礮攻戚家堡石家堡並克之獲人三百十七名口俱付戶部參政馬福塔攜歸大兵從牆子嶺口拆毀邊牆而進有德與耿仲明兵俱從邊城大門之東小門平坦處舉火礮豎雲梯攻之

太宗復親率大兵從義州一路進發

命有德等三順王俟大營移後以神威將軍礮攻錦州城西臺有德等方欲進攻臺內礮藥自發臺崩遂克之十一月有德等招降大福堡又以神威將軍礮攻克大臺一座獲蒙古漢人男女共三百七十九名口

旨令盡殺其男子餘俱賜孔有德等時

太宗駐蹕連山

命有德等及烏真超哈兵以火礮攻五里河臺壞其兩角臺上人皆懼  
守備李計友李惟觀率兵來降一無所犯皆編爲民四年正月壬寅有  
德奉

命同耿仲明尙可喜等以紅衣礮擊松山城東隅山臺臺上藥發自焚  
百總一員及兵丁俱爲火所燔獲臺後盡殲其人路旁有二臺俱招降  
之王子

太宗駕至松山南岡相度城勢指示有德及耿仲明尙可喜石廷柱馬  
光遠曰城南門中間以孔有德兵右面以耿仲明兵左面以尙可喜兵  
俱用神威將軍礮攻擊耿仲明所攻處馬光遠以本旗兵協攻城門用  
紅衣礮九位東南隅用紅衣礮二位城隅中間用紅衣礮一位攻擊尙  
可喜所攻處石廷柱以本旗兵協攻城南門用紅衣礮八位西南隅用  
紅衣礮二位城隅中間用紅衣礮一位攻擊癸丑四鼓有德同耿仲明  
尙可喜各移礮前進五鼓放礮松山兵出城迎戰爲我兵射退入城於  
是用紅衣礮攻至未時城堞盡毀止餘城垣守城副將金國鳳死守用  
草木填其頽處以爲捍蔽禮親王代善以日將暮應俟明日攻之始撤

兵五年大兵更番圍明錦州六年四月

遣有德及尙可喜各率本部官兵詣錦州助鄭親王濟爾哈朗軍七年

克之順治元年有德隨睿親王入山海關擊敗流賊二年十月

賜有德貂裘蟒緞朝衣一襲金百兩銀一萬兩馬二匹旋

命有德還盛京仍諭厲兵秣馬以俟調遣四年以有德爲平南大將軍

率師往平湖南所向皆捷十二月有德報捷疏言臣等自岳州府進兵

至長沙僞巡撫何騰蛟總兵王進才已先遁去隨遣梅勒章京卓羅藍

拜等探其所向遇進才部賊捨舟登岸逆戰卓羅等擊斬之我師次湘

潭間僞平尙伯黃朝選擁賊十三萬屯於燕子窩臣率梅勒章京藍拜

佟代等由水路進至瀘口擊破北岸賊營臣等星夜進兵趨衡州朝選

與其四子匿於神祠內搜獲斬之餘孽盡殲臣又令懷順王耿仲明固

山額眞金礪梅勒章京卓羅等由衡州水路還長沙遇僞總兵楊國棟

擁賊二千屯天津湖前隊甲喇章京張國柱扎蘇藍等擊敗其眾次日

國棟領馬步賊三千從牛皮灘遁去我兵追斬國棟生擒僞副將七員

又聞賊困桂陽州令知順王尙可喜同藍拜等赴援留固山額眞金礪

等於衡州臣同懷順王耿仲明併卓羅等趨祁陽聞賊兵三千據熊飛

嶺隨率兵三百趨擊追入祁陽比我兵齊集圍其城殺偽總兵一員副將一員馬步賊七千又聞賊據寶慶留懷順王耿仲明爲後應臣引兵趨寶慶圍其城克之斬偽魯王朱鼎兆世子朱乾生偽總兵黃晉李茂功吳興偽監司劉佐偽副參遊守四十餘員馬步賊三萬二千又聞偽桂王據武岡州我兵夜發疾進令梅勒章京黑成功固山大烏赫納等爲前隊遇賊梗路黑成功等進擊賊眾奔入木城次日我兵縱火焚木賊奪門而入斬偽監軍道一員偽總兵副將以下一百餘員馬步賊首級一萬是日偽安國公劉承廕領偽總兵副將等官一百七十餘員馬步兵一萬八千有餘至夕陽橋臣同梅勒章京卓羅等擊敗之師抵武岡偽桂王遁劉承廕降先是知順王尙可喜等趨桂陽時聞郝搖旗所部賊一千四百墩翔鳳鋪令蕭章京線國安固山大蘇朗等擊敗之及師抵桂陽賊已解圍遁走退據道州卽令藍拜等進勦搖旗逸去又遣國安等引兵趨靖州追緝偽桂王有偽總兵蕭曠姚有性擁賊一萬土司兵二千據靖州國安等疾驅圍其城奪門而入生擒曠及有性餘賊悉殲又有偽侍郎蓋光英等領土司兵一萬四千揚言欲奪蕭曠姚有性侵犯我營復擊敗之我師趨沅州聞偽伯張憲弼部下偽總兵分立

五營於黔陽令藍拜等往圍其城賊出城迎戰藍拜等擊敗之斬賊七千有餘師至沅州憲弼擁賊三萬有奇出城拒戰我兵奮擊遂克其城湖南悉平貴州黎平府僞岷王朱挺峻亦來降計前後所獲僞桂王子朱爾珠驢山王朱挺琬安昌王朱挺眷併僞將軍宗室等二十七人招降僞國公劉承廕僞伯王雲程劉承永董英周思仲高清浩鄭應昌僞內閣吳秉僞巡撫傅上瑞及僞總兵四十七員僞副將以下二千餘員馬步兵六萬八千有奇獲馬匹船隻無算苗夷降者過半其未降者已遣人招撫新服地方需人料理隨令總兵官于時中副將王希用率所降兵二千四百駐衡州府又委副將何允爲總兵官同副將劉尙艾率新降兵一千二百駐武岡州投誠總兵官陳躍龍副將蕭遠領新降兵三千駐黎平府偏沅巡撫高斗光有疾委投誠僞伯周思仲代之又令投誠副將張勤領新降兵一千同周思仲駐沅州總兵官馬蛟麟駐常德府疏入

詔旨褒答之五年正月以湖南六府底定苗民就撫

賜有德黃金二百五十兩四月有德疏報大兵至辰州擒僞榮王朱有楨子朱松於苗峒又生擒僞奉國將軍朱運焯於興化土司隨破永甯

巢擒偽貴溪王朱長標兵至廣西全州何騰蛟等聞風遁去貴州銅仁府廣西全州興安縣灌陽縣苗獠共三十一處峒二百六十處俱各歸順擒獲偽威王朱寅衛并子朱載功偽長沙王朱由櫛偽輔國將軍朱華宗室共四十一人及偽伯偽總兵司道官員甚眾疏入下所司查敘九月有德等班師還六年五月

改封有德爲定南王授金冊其文曰茲孔有德爾原係漢臣見明朝之氣運衰微遂起兵行元帥事殘破山東地方全攜將吏軍民航海來歸原給都元帥敕印於崇德元年四月二十七日優加冊印封恭順王俾功名富貴帶礪山河子孫世世承襲一切過犯盡皆原宥後隨多羅克勤郡王取旅順口時爾率所部兵協攻平定朝鮮國時爾率所部隨輔政叔德豫親王破其救兵和碩英親王取皮島時爾率所部兵協攻圍困錦州時和碩鄭親王破洪軍門兵爾率所部兵交戰攝政王取杏山時爾率所部兵協攻和碩鄭親王取中後所前屯衛時爾率所部兵協攻攝政王平定明朝天下入山海關之日般敗流賊二十萬爾率所部兵交戰又追擊流賊至慶都縣爾率所部兵交戰輔政叔德豫親王領兵勦流賊滅福王平定河南江南在潼關般流賊時爾率所部兵交戰取



揚州時爾率所部兵協攻取江陰縣時爾率所部兵協攻又特命爾領兵進取湖南爾隨宜勦撫攻克郡邑處處殺賊招撫官吏兵民甚眾爾原封恭順王今授金冊金印加封爲定南王爾其益勵忠勤奉公守義以報特恩尙其欽哉是月有德奉

命率舊兵三千一百及新增兵一萬六千九百共二萬往定廣西仍挈家駐防其全省巡撫道府州縣各官併印信俱令攜往

賜之敕諭曰廣西逆賊盤聚煽亂斯民陷於水火茲特命爾統領大兵相機征勦投誠者撫之抗拒者誅之若武官有功覈實題敘有臨陣退縮遲悞兵機不遵號令應分處者聽王便宜從事若大罪不便自處者指名參奏地方既定之後凡兵機事務悉聽王調度其一應民事錢糧仍歸地方文官照舊料理文武各官有事見王俱照王禮謁見王受茲重任其益殫忠猷禮以律己廉以率下務輯甯疆圍寬朝廷南顧之憂欽哉七年十一月有德攻拔桂林府擒斬甚眾兩粵道通八年正月有德疏報攻克廣西省城底定桂平二府擒斬僞靖江王并世子將軍中尉閣部總兵文武官等四百七十三員招撫二百四十七員獲馬騾器物無算下所司察敘閏二月丁卯有德報遣總兵官線國安馬蛟麟等

領官兵前進七月克梧州柳州二府並所屬十二州縣下兵部知之九年三月有德奏報粵西桂平梧柳四郡俱已開闢尙餘五府未歸分遣鎮臣線國安馬雄全節等領兵二路進取臣親率大師直抵賓陽居中策應思南慶橫等二十二府州縣盡入版圖下兵部察敘又報僞慶國公陳邦輔殺僞宣國公焦璉率潯州郡縣並所部官兵繳印投誠下所司知之七月僞秦王孫可望令僞安西王李定國攻陷衡永全諸州進攻桂林府有德出戰敗績城陷自縊死偏沅巡撫金廷獻以

聞十年五月遣官諭祭

賜諡武壯是歲喪還京師十一年六月甲子

詔工部爲定南王孔有德造墳立碑十月丁丑

諭禮部曰朕念定南武壯王孔有德審時率眾航海來歸屢建功績佐朕平定天下勦巨寇靖南服開闢廣西勳勞懋著不意桂林之役眾寡不敵精忠自矢竟以身殉似此功臣名應不朽稽考舊典有立祠致祭之例爾部詳察具奏十月禮部覆准立定南武壯王祠以二妃陪祀俱設神主春秋致祭康熙三年四月有德女四貞疏言臣父孔有德死節桂林蒙

世祖章皇帝軫念孤忠易名賜葬仍命廟祀乃建祠一事工部疏議以  
孝陵碑未建不便卽行泣思先臣航海投誠舍生報國北討南征勳猷  
懋著今熒熒孤女僅延一綫所望國家春秋二祭庶令忠魂有歸伏祈  
再沛

成命速令興工則勞臣報國之靈與普天效忠之氣俱感激無涯矣得  
旨定南王先奉

世祖章皇帝旨每年春秋致祭著照舊遵行有德一子爲李定國所擄  
惟女四貞存

特恩照和碩格格食俸四貞適孫延齡十二年十二月吳三桂反

聖祖仁皇帝特旨以延齡爲撫蠻將軍率師駐防廣西十三年二月延  
齡據桂林叛降於三桂自稱安遠大將軍十四年四貞勸其反正代延  
齡具疏乞降

聖祖許之十五年冬吳三桂遣其孫吳世琮至桂林誘執延齡殺之十  
八年二月撫蠻滅寇將軍傅宏烈鎮南將軍莽依圖擊走吳世琮四貞  
歸於京師

平南敬親王尚可喜傳

盛京通志

尚可喜遼東人初爲明廣鹿島副將航海來歸授總兵官從征宣化代  
州俘獲甚眾崇德元年  
封智順王明年從克皮島七年請以所部隸漢軍遂爲漢軍鑲藍旗人  
八年從克中後所前屯衛二城順治二年從入關追擊流賊李自成至  
望都斬其將谷可成尋從英親王阿濟格道塞上自榆林趨綏德追勦  
自成兄子錦于延安會豫親王多鐸已破潼關定西安可喜遂與親王  
追勦自成於湖北別將兵徇下鄖陽荊州襄陽諸郡降僞將王光恩苗  
時化等復合大軍連敗賊東下九江自成走死九公山乃班師還鎮海  
城自成死錦與其黨郝搖旗王進才等擁眾數十萬走長沙常德降于  
明桂王朱由榔分據湖南郡邑三年可喜偕恭順王孔有德懷順王耿  
仲明往征之連敗錦進才于岳州長沙進取桂陽擊走搖旗於道州分  
兵克衡州寶慶武岡諸州郡湖南底定五年凱旋會提督李成棟以廣  
東叛附由榔六年成棟敗死信豐而由榔諸僞官猶分據廣東諸郡乃  
改封可喜平南王統師征之進克南雄斬其將楊傑等三十餘人七年  
克韶州清遠降其將蘇利吳六奇師次廣州成棟子元允與僞總督杜  
永和僞國公陳邦傳僞伯馬寶等屢以眾拒戰並擊敗之復以間招降

偽總兵郝尙久黃應傑於潮州惠州於是廣州勢漸孤而州城三面阻  
水守者於城外密布礮臺引水繞之三匝卒不可攻又其地炎蒸多雨  
弓矢解膠久相持未下可喜乃檄江西諸兵會剿既至潛遣人夜決礮  
臺下水令軍士藉薪徑渡奪礮臺以礮擊城西北隅城圯軍士畢登斬  
守將范承恩城中兵皆潰追殺潰眾至海濱溺死無算元允竄肇慶永  
和等竄瓊州奏捷得

旨嘉獎八年遣總兵許爾顯徐成功攻克肇慶羅定高雷諸州郡永和  
亦以瓊州降廣東悉平而流賊張獻忠之遺黨李定國據滇黔以附由  
榔寇掠廣西九年連陷桂林梧州南康平樂潯州橫州東犯化州吳川  
可喜遣兵赴援定國引去十一年定國復東犯高州雷州廉州薄肇慶  
可喜統兵至三水聞定國轉攻新會密授計將士設伏沿江要隘自率  
精銳攻定國營定國敗遁伏兵起擊之斬馘過半又遣副都統畢力克  
圖等追剿至橫州所陷郡邑悉復可喜遂留守廣東廣東寇亂初定而  
土賊間作遙結閩賊鄭成功爲沿海郡邑患可喜檄兵剿賊渠鄧耀于  
海康勦蕭國隆洪彪周祥等于恩平開平陽春陽江耀走交趾國隆投  
水死彪祥等悉就擒斬之蓋順治十七年事也

聖祖卽位

詔遷沿海民于內地番禹蚤戶周王者自稱恢粵將軍煽沿海民爲亂所至焚掠可喜遣兵擒之康熙三年總兵蘇利以碣石叛躬率兵迎戰海豐陣斬利復碣石衛城十二年疏請歸老遼東方下所司議適逆藩吳三桂以雲南叛

詔留鎮如故三桂以逆書誘可喜可喜執其使送京師十三年逆藩耿精忠以福建叛廣西將軍孫延齡以桂林叛可喜獲齡檄有三藩變語乃上疏自白並請發師協剿

詔慰諭之

命江西兵助可喜殲賊等潮州總兵劉進忠叛附精忠可喜令次子之孝討之十四年

加封可喜親王授之孝平南大將軍是時簡親王喇布統師出江西爲三桂精忠所阻未得達粵粵東土賊乘間竊發可喜檄兵剿之屢捷進忠亦屢敗求援精忠不能應乃以潮州附成功子錦錦遣賊萬餘助戰勢猖甚叛鎮祖澤清復踞高州引其黨連陷雷州廉州及德慶開建電白諸邑可喜連章告急

詔趣簡親王速進兵迄未得達明年可喜以寇氛方熾不卽撲滅積憂成疾日益篤而三桂驅賊逼肇慶誘其長子之信從逆可喜臥疾弗能制憤甚自縊左右救之甦遂不起及革曰我死必返葬海城魂魄有知猶可給役

先帝左右遂服

太宗所賜衣而卒年七十有三明年之信悔罪自歸迎大軍入粵

敕議可喜卹典諡曰敬二十年之孝奉其喪歸葬海城

聖祖以可喜忠誠無二遣內大臣往祭立碑墓道

懷順王晉封靖南王耿公仲明墓朱彝尊

開國輔運推誠宣力武臣靖南王旣薨三十年

天子命反葬遼東於是王孫多羅額駙太子太保鎮平將軍昭忠自福

州護遺骸以北葬有日矣和碩額駙太子太保聚忠請爲文表其墓按

王自登州航海攜軍民械器歸

太宗文皇帝功在草昧多不勝書具載

實錄今以聚忠所能記憶者述其大略表墓道焉王諱仲明字雲臺先世山東人徙蓋州衛生而面深黑手掌潔白如玉軀體偉長倜儻有大

志疎于財多智謀以登州參將來降

太宗嘉悅給總兵官敕印崇德元年四月

冊封懷順王從攻旅順口克之止勿屠戮從攻朝鮮擊破援師拔其城

朝鮮平還治戰艦從攻皮島取之是歲大饑斗林白金一兩王轉粟以

賑全活島民無算從攻松山杏山塔山中後所前屯衛王令將士屯田

次第克之順治元年

世祖章皇帝治師討賊入山海關方是時賊鋒甚銳聚黨十萬迎戰關

門王率所部兵奮擊大破之乘勝追逐至慶都縣又破之賊軍委金帛

于路以緩追者王號令夙嚴將士無利心追奔益疾躡至潼關復大破

之李自成走死旋徇河南諸府悉下遂渡淮拔揚州下江南所至功居

最四年進兵湖南抵武岡擒梟將劉肇基收湖南六年五月

世祖以金冊金印封為靖南王俾定廣東統軍作鎮南海王盡散其賞

給軍士運以車牛軍士咸樂附是年師次吉安府王薨于軍

世祖念王閒國勳旋冊王長子繼茂襲封靖南王王性純孝友愛二弟

宗邵貧不能婚葬輒傾囊以助人有小德雖一飯未嘗忘報軍所至以

招徠為先務圍城破軍令當屠必力爭于親王之統軍者松山之戰明



總兵官王廷臣死焉王與有舊贖其尸焚而瘞之或以訐王

太宗嘉王之義勿罪也自王薨後子忠敏王函王骨載之行開始厝于

廣州繼移厝福州蠻煙瘴雨之交烽燧矢石相向而遺骸得以無墜不

可謂非厚幸惟

天子仁聖始終念王之功王之精爽亦有以答之存著其號亡顯其名

卒歸葬于鄉井釣游羽獵之場弓冶之地距

太宗寢園密邇魂氣徜徉在

帝左右王之靈庶無憾于泉下矣王生于某年月日其葬于蓋州馬蘭

峪也在某年月日厥配贈太妃郭氏李氏附焉竊嘗覽觀載記曩代功

臣封爵之典遠及苗裔盟以白馬信以丹書俄而獲罪至耐金小過奪

其侯封每致慨報功之薄若王則紹封奕世其次尙主為近臣或專閭

于外迨王孫精忠逆命

天子猶加恩于王暨王諸孫如故嗚呼

本朝所以待閑國勳臣者厚矣凡此皆宜表諸石以昭垂無窮者也

又附額駙將軍勤僖耿公昭忠墓誌銘 徐乾學

漢制殿陛之下執戟而衛者以千數所謂三署郎也分領之司雖有五

官左右中郎將而實總於光祿勳一人故九卿皆處外朝而光祿勳獨以中朝稱蓋因其職在殿中特優之爾  
本朝侍衛之設彷彿三署郎之制然有差等而無統屬其事爲稍異耿公以異姓諸王子之貴加之額駙之親自順治十一年入侍闕庭海膺世祖章皇帝暨

今上皇帝寵遇之厚賞賚頻數而公奉職尤勤慎威儀進止皆有常度卽一等公侯大臣亦相與則而效之以是恩澤子弟中聲籍甚不幸家門構逆閭方煽亂公自分當死日與弟姪輩泥首闕下伏地請辜謂亂臣賊子出臣同產從坐之律所不敢辭

上素知公忠謹無他僅令頌繫於家以需後命旣而蒙恩寬宥盡復其官比

王師屢捷構逆者懼而思戢廷議急遣一人入收藩下軍

上念逆臣背叛久失軍心而兩王恩澤在人非親子弟莫可將者爰

命公爲鎮平將軍兼參贊大將軍機務

廷賜貂蟒諸御服而遣之

太皇太后以戚屬故又內出白金酒醪昇公爲諸軍賜公馳騎南發旣

至宣

上所以寬貸諸吏士之意并頒所賜物以撫之一時懽聲雷動莫不幸  
公之來而復恨見公之晚也公察將吏無異心申約束歸各省難民子  
女以數萬計其他息境安民諸政次第修舉時劉進忠據潮州韓大任  
寇吉安樂燦亦擁眾數萬跳梁宜黃山中其地皆與閩接首鼠觀望未  
肯下公設法招徠諭以

朝廷威德不數月望風送款鄰境悉平獨海氛未戢由海澄直犯泉州  
羽書日數至而會城精銳四出絕無可應之者公曰泉與興爲福州屏  
蔽無泉是無會城也吾甯可坐視邪亟簡藩下餘丁數百人授以資糧  
器甲俾親將陳紀統之而前賊見公旗號輒駭愕遁去泉賴以全事聞  
上壯公甚顧不欲久暴公於外驛書召還方公之頌繫也以兩先王兆  
域在閩慮底定之日或不能無侵越之者疏乞垂恤舊勳保全返葬  
上憐而許之至是始得奉兩世遺骸歸窆窆於蓋平云公技勇猷略超  
邁絕倫又雅擅文章工藝事所居圖書鼎彝照耀几席鑒別不爽銖黍  
與人言依於名理疊疊終日不倦客有引古而誤者未嘗遽正之必婉  
轉議論誦成文以相質使人心折旁及書法繪事琴弈簫筑醫筮博之

類往往精詣至於敦念舊故虛已下賢亟困救難汲汲如不及卽千金列駟贈之不惜也自閩歸

上念公兄弟家口眾多或不能給爲拔置佐領五人以統之俾得資其祿人以自養蓋尤異數云公諱昭忠字信公號在良由多羅額駙加太子少保和碩額駙品級進太子少師再進太子太保受光祿大夫世籍山東後徙遼東蓋州祖諱仲明自癸酉歸

朝封懷順王入關改封靖南王考諱繼茂有文武才嗣封靖南王平西粵功最薨諡忠敏妣周氏封靖南王妃王氏贈靖南王夫人公生於崇德庚辰二月卒於康熙丙寅正月得年四十有七公之疾也

上遣侍臣將御醫就家製珍藥所以救之者百方及訃聞震悼雪涕侍衛大臣奉

命賻酌者再至既殯

諭祭易名有加常等元配多羅縣主

世祖章皇帝所賜昏也秉性淑慎先公二十三年卒繼配喻氏封一品夫人子嘉祚候補某官明年嘉祚將啟縣主西山妙峰之窆奉公柩合葬於唐縣金蓋山新阡先期屬叔父額駙公請銘於余銘曰

山出器車河馬圖盛世所產皆璠璣猗嗟靖南起東隅翊戴  
聖人清坤輿碧梧翠竹滿庭除時值偃武敦詩書進以恭恪巖周廬退  
則揖讓友士夫擇言而發擇地趨郭晞李愿洵其徒彼弄兵者膏  
天鈇公壽未老名不渝丸丸松柏映龜趺千秋忠孝垂令模

碑傳集卷六

貴筑黃彭年編訂

碑傳集卷七目錄

明臣宰輔

光祿大夫太子太保內翰林國史院大學士贈少保兼太子太保文康

宋公權神道碑銘

邵長蘅代湯潛菴先生

又太子太保國史院大學士贈少保諡文康宋公墓誌銘

徐作肅

又宋文康公權傳

顧棟高

內祕書院大學士成公克鞏傳

大名府志

少保大學士王文通公永吉神道碑銘

吳偉業

附錄涇河閘議

王永吉

光祿大夫少師兼太子太師保和殿大學士戶部尚書曲沃文清衛公

周祚神道碑

徐元文

內祕書院大學士東部尚書諡文定孫公廷銓傳

王士禛

保和殿大學士諡文端杜公立德墓誌銘

王熙

又誥授光祿大夫太子太傅加太子太師禮部尚書保和殿大學士諡

文端杜公墓誌銘

張玉書

又太子太師保和殿大學士杜文端公墓誌銘

惠周惕

又宮師太學士諡文端杜公敬修先生傳

趙士麟

碑傳集卷七

嘉興錢儀吉纂錄

明臣宰輔

光祿大夫太子太保內翰林國史院大學士贈少保兼太子太保文康

宋公權神道碑銘邵長蘅代湯潛庵先生

明崇禎十七年三月流賊李自成擁眾號百萬既剽太原掠潼關剽夫

同昌平長驅陷京師遣賊將略地四出商邱宋公時以遵化監軍擢巡

撫甫三日賊驟至公知勢不措夜間道走入白羊峪圖後舉會故總兵

唐鈺亦道亡遇之邀與俱部曲稍稍集有五十騎公灑泣誓眾諭以舉

兵意斬一卒異議者以徇勒兵襲太平斬賊將黃錠遣守備某從一騎

馳入喜峰謁賊將謬為白事者突前擊斬將左右出不意皆誓伏因撫

定之囊其頭還報松棚三屯相繼下兩日有卒三千突入遵化擒偽官

十人得偽印七當此時

王師已入關自成迎戰關門敗奔還聞公舉兵屠其將恚甚將致毒於

遵化公遣唐鈺乞援

本朝而伏千人於城外約曰賊至而發第如吾令詰旦賊數千騎薄城



伏卒如公戒易兜整旛幟噪而出遶賊後大呼曰北兵十萬至矣賊賊欲走城中出三百騎躡之遂大敗遁化獲全未幾

王師入都賊遁公集將士諭曰我封疆臣國亡無所屬復故主讐者即吾主也盡誅偽官籍所復四路二十一州縣上於朝曰主讐復臣事畢矣具疏乞歸田

詔不聽公歸巡撫如故公復抗疏以三事請其一首議崇禎廟號疏略曰崇禎帝十七年宵衣旰食圖致治安聲色玩好一無所嗜不幸有君

無臣釀成大亂臣每清夜撫膺死有餘辜幸逢聖主殲賊復讐祭葬以禮血氣之倫莫不感泣伏冀

敕定廟號以垂萬世仁至義盡此臣所為報故主以報陛下者其二請除苛賦舉遺逸皆嘉納之是歲即順治改元初年也公

既受事疏請定三年考成令又請按兵受田以社屯弊又有陳六事論

圜地諸疏多見施行流寇餘孽猶蔓延三輔公在鎮二年前後擊降解散其黨數萬人召拜內翰林國史院大學士值

國家初造公處滿漢間持大體不激不隨以濟國事上下倚之丁亥己丑兩主會試文體為一正遭生母丁太夫人艱請奔喪不許

詔給假歸葬入

朝晉太子太保尋致仕歸公在相位凡六年歸則自號歸德老農日夜與故人飲極歡或諫宜稍節笑曰曾參爲相國酣飲吾忝相國亦酣飲吾視參竟何如後年餘薨於里第訃聞贈少保兼太子太保諡文康遣官臨祭營葬官其子一人嗚呼自古易姓之際蓋難言之公以文臣當封疆寄倉卒受事不幸遭離陽九天崩地坼是時在朝諸臣相率鼠竄喙伏甚者頓首賊庭北面勸進污僞命者比肩也公明知大廈傾敗猶欲以一木相撐拄驅數百烏合之卒斬將拔邑其知勇有過人者不得已以報韓之心爲哭秦之舉旣而歸命

本朝首抗疏言人所不敢言嗚呼可謂盡心矣論者以公事與李勣魏徵相類愚則以謂勣與徵事唐爲故主之讐公事

本朝爲復故主之讐後世必有論公之世而推原其心者公相業可紀者尙多它日載在史官余可不具論而於遵化事尤詳者以此也公諱權字雨恭天啟乙丑成進士初令陽曲魏闢生祠遍天下陽曲獨無闢所遣訶事者至縣人爲危之會闢敗得免崇禎間歷吏工兵給事中三疏劾冢宰銓政大弊貽禍封疆語激切枋臣銜之出爲山西按察司副

使以母老乞歸後數年流賊陷歸德一賊以令箭護其居曰吾故晉人  
感公恩以此報男婦匿公家得脫者近千人賊退公負母渡河走曹南  
走城武又遷白門京口所至拾薪汲水以供朝夕能得太夫人歡常刻  
壬午詩一卷題曰白華客況自爲之序曰白華志養也客況者何余無  
家也余何以無家中州羣盜如毛城破家亡棄子負母幸不罹難也嗟  
夫孝子仁人之用心讀者傷之等起大名道調順廣再調遵化及巡撫  
之命下而明事已去矣按朱微子之後以國氏漢以來代有聞人商邱  
之宋至莊敏公始大會祖處士公諱雷祖鄉飲公諱陽鄉飲生福山公  
諱沾以孝廉令福山卒官貧不能斂邑人作墮淚碑記其事是爲公考  
莊敏公者諱纘明隆萬間名臣官冢宰與海忠介瑞齋名處士公之兄  
子而公之從祖祖父公生明萬厯戊戌卒順治壬辰年五十有五配劉  
氏贈一品夫人與公同年生後七年卒年六十有二墓在闕伯臺左劉  
夫人祔副室李氏趙氏郝氏趙氏以子貴封太孺人贈宜人子男四長焯  
罹寇亂不知所終李山次榮以廕厯官今遷山東按察使次焯以廕厯  
吏部戶部員外郎皆趙宜人出次焯舉人內閣中書舍人郝出孫男十  
人基太學生至庠生起候補主事餘俱諸生女若孫會及姻戚詳誌狀

可互見者不書公八歲喪福山公扶匭歸跣足號慟如成人福之父老  
歎嗟以爲異學問淵博詩宗少陵摩詰文宗歐蘇所推獎多知名士商  
邱諸生侯方域以古文辭名世亦公門人著有白華堂詩疏彙如干卷  
鏤板行公子所焮皆蚤世按察公以公行狀誌表來請文其墓隧之碑  
某已丑受知公爲門下士又辱按察公姻媾不敢辭乃序次其實而銘  
之按察公清名重朝野

天子知其廉將大用銘曰

白馬作賓宋爰肇封後以國氏緜歷漢唐弘著建武均化九江元魏曰  
弁廣平遠祖開元相業上媿房杜宋有二難曰庠曰祁政事文學祥譽  
長離翼翼商邑幹挺條遠莊敏發聞晦久斯顯文康繼之陽九嶇崎歷  
否而秦忠孝靡虧遂秉國鈞鐘鏞鼎彝  
帝曰汝權汝子臯夔公拜稽首臣驚乞歸踰艾縣車涯涘孰闕闕伯臺  
左有封鬱鬱有原膺膺有碑揭揭有豐其貽有碩其世刻茲銘辭視古  
儔匹

又太子太保國史院大學士贈少保諡文康宋公墓誌銘

徐作肅

順治九年太子太保國史院大學士宋公薨事聞於

上特贈少保宗伯議禮

賜祭營北廕子有差明年冬公子犖等既奉公葬其里闕伯臺之左矣時以謚典未下暫輟其幽宮之石後六年公得謚曰文康是年公元配詔封夫人劉氏卒又二年而祔於公禮也犖等並以其狀來請誌曰公諱權字平公號雨恭明末爲順天巡撫李自成破京師遣其將東略地公自遵化倉卒走白羊峪連兵擊賊遇黃錠等執之數日

王師入關自成敗公以錠等詰將吏曰我封疆重臣誓復國讐殺賊者卽我主也若從賊釋錠不從殺賊同我歸

清眾憤呼殺賊公乃籍所部來歸

詔以公仍巡撫順天總轄山海永平密雲昌平等處公商邱人周封微子於宋子孫以國爲姓相傳公微子之後云曾王父雷曾王母于氏俞氏王父暘王母田氏父沾以孝廉仕福山令嫡母張氏母丁氏自暘以下皆以公

詔贈資政大夫國史院大學士自田以下皆以公

詔贈夫人丁氏

詔封太夫人雷之弟曰霓者生纈是曰莊敏公爲明名臣公年二十八

登天啟乙丑進士初仕陽曲令擢吏科給事中調工兵兩科左右給事中  
中以建言出爲山西按察使副使終養起大名道副使調順廣道副使  
再調遵化崇禎十七年三月陞都察院右僉都御史受命甫三日而京  
師破旣擒賊來歸以原官受

新命請解組不許順治三年

詔進內翰林國史院大學士公爲人清慎仁厚事親孝爲吏廉而慈在  
朝廷慷慨遇事敢言及與同列友和衷退處淡於利欲其爲宰也治聲  
聞傍郡邑後賊陷商邱賊將晉人悉公治者猶曰此宋公家也遣人護  
其居是時璫人魏忠賢竊政生祠遍海內當事檄建生祠於陽曲公獨  
持之在諫垣劾冢宰用人不效貽禍封疆凡三奏直聲大著銜之者眾  
而憲副之命由此出後

太宗破昌平有讀公疏于側者

太宗異之曰中原若行此豈不長有太平乎命錄之去任順廣城破已  
三日吏請檄稅不聽集耆老諭之復農業民始不散走歸

朝廷上言首乞崇禎廟號謂舊主十七年間聲色不嗜而臣下不能盡  
職以致盜起覆國幸

聖主殲賊復警祭葬以禮普天誦慕倘  
天恩隆渥敕定廟號以光萬世誰不歸懷

詔可士論躋之明末銓政既失爭爲躁進多竭百姓以圖遷轉巡撫未  
幾而營巡撫長吏尤而效之公謂安民由於吏治吏治由於考績古法  
昭然蓋事有一定之程則思守無則思競無久道黜陟而欲政成難矣  
請定考成之令以三年通鳳等處土寇高元甯祁得珍楊爾善作亂次  
第平之勸歸田者萬餘人覩時事條明分義定郵符辨等威息訛言嚴  
職守肅關禁以上又疏圍地又論屯田之弊準以按兵授田請汰屯撫  
監司廳官密雲等處祖軍爲累切陳其害得除民便之爲之歌德蒙  
恩賜宴湯泉復

賜母丁太夫人宴遂以不次參密勿方公之未代也復平海子紅門等  
賊前後并平懷柔馬山固山等賊且數萬丁亥總裁會試是時文體詭  
僻公力正之奏言文體正則忠孝由此出文體不正則奸惡由此出而  
進士以狀謁者不受曰爲國得人非爲私也順治五年奉

救纂

太宗實錄丁太夫人憂請終制不許益力請

遺宮温慰

賜茶酒元孤其居喪也再

命總裁會試辭復不許疏歸葬者再

詔始給假六月

賜太夫人祭一壇造墳併福山公張太夫人合葬歸途加太子太保葬

畢赴

闕時天下之奸宄半營爲胥吏以害民倍逾往額有司不敢問藩臬藩

臬不敢問巡撫公請裁之順治八年

上親政以起廢會推巡方之事陳未幾致政歸自號歸德老農一寓於

酒時引故人往來稱詩劇飲而疾有諫者曰若知我耶吾母逝吾事畢

矣飲如故未幾而薨于宦于鄉各爲之請祀于庠焉公生八歲而福山

公卒於官公從兩母二千里間關以歸時王父母尚在焚煢相依及王

父母嫡母相繼以逝公卒不負丁太夫人之教以顯烈名世聞公歸養

時手書孝經于堂省定不廢遭邑難負母踰河尋至白門至京口而終

以成留侯之志大從龍之績者公之於國於家庶幾盡矣公詩文清和

粹麗善書畫喜濟人急歲饑收童乞百餘而食之後聽之去避寇城武



買田以耕去捐之學宮他行事概如此劉夫人者舉人永貽女也年十  
六歸公時張太夫人已歿事丁太夫人朝夕惟謹太夫人嘗語人曰娶  
婦若此足矣公之以建祠忤逆璫也魏忠賢使使來偵公欲抗疏夫人  
曰人臣之義以直獲咎在所不計然不念老母三十年之苦乎萬一得  
罪且無依何如以病辭歸養公慨然拂衣適忠賢敗而止賊至遵化夫  
人奉太夫人遁山中飲食趨侍不少愆公入朝又以歸請夫人無子勉  
公納李趙郝三夫人友愛之聲著于里公薨子榮請鬻產襄事夫人曰  
產厯自先人非而父置也且  
朝廷恩恤蓋以重而父之清德何必膏之居平雖貴顯不侈珍綺諸子  
幼勉之與賢士友不輕以鞭扑施臧獲曾爲至戚僕婦所侮公起官其  
人悚懼以請曰不記有侮者汝又何罪嗚呼夫人之明大義飭懿行潛  
泊優容公其得內助矣公薨于順治九年六月十二日葬于順治十年  
十二月十二日享年五十有五夫人卒于順治十六年六月二十六日  
葬於順治十八年十二月初九日享年六十有二子四人焯幼以城破  
亡李夫人出榮侍衛娶明兵部左侍郎葉公廷桂女焯廕中書科中書  
舍人娶監察御史王公應昌女趙夫人出焯廕官監生初聘少保兼太

子太保刑部尙書劉公餘祐女未歸殤娶中書科中書舍人梁公遂女  
郝夫人出皆有才名足以繼公女三人一適明太常寺卿侯公執蒲子  
生員慮一適明光祿寺署丞侯公執中子生員勲李夫人出一許字子  
次子官生士元郝夫人出孫男八四爲榮出陸聘戶部郎中崔公掄奇  
女餘未聘四爲忻出遠聘庠生劉公榛女起聘庠生葉公元渥女餘未  
聘孫女六四爲榮出一許字貢生侯公忭子方至三未字二爲忻出一  
許字舉人徐公作肅子世際一未字子與公鄉會同譜既習公而重之  
以婚姻謹次如左而爲銘曰

惟公遠世肇自殷恪神明之系思皇迭迭有明踵焉去曠而壽偉哉莊  
敏駿起其業隆萬之際福山繼之不以仁人而竟厥惠善屈而伸在昔  
之云報施無戾公也篤生教則有母蜚聲蚤歲中更陸沈志穢逆仇爰  
依日月翼翼其衷桓桓其施迺親揆席公之訏謨苗薤蠹剔書在簡策

惟帝錫公而先而後昭德是赫最屬歸然龍章爛然寵茲幽宅夫人耐焉  
於配既宜慶惟永錫  
又宋文康公權傳領棟高

宋權字元平世爲商邱人明吏部尙書纒從孫中天啟乙丑進士初授陽曲令愍帝時歷吏工兵給事中三疏糾察冢宰銓政大弊貽禍封疆枋國者惡其切直出爲山西按察副使以母老乞歸等起大名道再調遵化甲申巡撫順天視事甫三日而京師失守時李自成擁眾百萬西略地至遵化權走白羊峪集部曲得五十騎勒兵太平斬賊將黃錠又馳斬喜峯一賊將定其眾松柵三屯相繼下兩日間有眾三千擒僞官十人得僞印一未幾

王師入定燕京賊走權籍所復四路二十一州縣上于朝有旨巡撫如故疏論三事首請議崇禎廟號次請除苛賦舉遺佚皆嘉納之是歲實

世祖章皇帝改元順治之年也權既受任後遂上疏言明季積弊所宜芟除者明自神熹來朝政惰竄銓法弊壞監司重任率指目爲轉遷地司閭者動以招撫爲名馴至燎原不可撲滅屯軍無一人就耕奸弁猾胥上下其手糧不足額則扣剋軍餉以補之以故兵輒譁且潰疆事重困權條列其狀上考績疏又上土寇疏又上屯田疏皆爬梳數十年積習悉見施行又言土賊條聚條散大軍不宜輕出致賊望風逃遁請以

殄滅責之守臣是時畿南初定流寇餘孽猶蔓延權前後擊降解散者凡數萬在鎮逾二年三輔肅清入

朝拜內翰林國史院大學士務調和滿漢同心協力以襄國事恭纂

太宗文皇帝實錄丁亥乙丑兩主會試釐文體禁闖人毋受進士謁曰得人以為國非私也時禁天下鐵器弓矢畜馬權以百姓無戰守具賊

益至無忌憚從容言於

世祖卒弛其禁居相位六年致政歸自號歸德老農日延故人賈開宗門人侯方域與子犖等校文賦詩以為常踰年薨權自筮仕為廉吏及歿家無宿儲子犖鬻產以葬

朝廷賜祭贈少保兼太子太保諡文康

內祕書院大學士成公克鞏傳大名府志

成克鞏字子固號青壇明大學士基命第三子崇禎十六年進士

本朝定鼎授國史院檢討順治二年典試江南三年主武會試九年以

宏文院學士副胡統虞主會試元文首題悖註克鞏力爭不得未署評

既被吏議或勸以無評自解答曰業同事不可獨擠人也遂同鑄級十

年遷吏部右侍郎轉左侍郎晉尙書拜內祕書院大學士時天下初定

世祖章皇帝銳於有爲以克鞏名臣子少參機務鍊達政體當任學士

時數

召對稱旨柄用不次度越資俸在前者凡十餘人未幾領戶兵二部兼理刑部

事會計舉典都御史員缺特命克鞏以內宏文院大學士攝理克鞏感激知無不言首上修省一

疏繼參舊憲臣徇比匪人請撤回滿漢巡按之不稱職者又請增設御

史定曹銓置簿之條以核功過嚴督撫考察之例以屬法廉立劇邑久

任之規以課成效嚴誣告反坐之例以杜刁風皆切中時要悉見施行

十四年值講筵上命內臣將畫工就邸舍圖像內廷裝潢屆秋試克鞏睹科場積弊進

朝士與分校者語以慎重又飭子弟淡於進取後闡獄起不用其言者

皆罹於法而克鞏子弟無可摺撫者上心善之明年改保和殿大學士又明年晉少傅以盛滿求退

溫旨慰留居常或中夜出片紙作國書密詢時事克鞏亦入片紙占對

雖家人子弟不聞所言其縝密如此十八年

仁皇帝御極三月主會試克鞏屢持文衡前後所得士如湯斌張永祺  
沈荃李來泰馬世俊唐德亮張玉書米漢雯許三禮嚴我斯皆一時名  
士多所建豎爲世名臣而郭士望梁化鳳亦以忠節武功著是時四輔  
臣佐政克鞏滿大學士巴額同爲首揆諸大典禮文章準古酌今盡出  
其手至停寢食十月以母疾請假弗許用原銜兼內國史院大學士康  
熙元年改內秘書院大學士積勞致病連疏乞休奉

俞旨遂不復出論者謂克鞏相業與父基命後先輝映基命當前明黨  
禍未熄之時中外交訐以一身繫天下安危劬勞不遑甯處克鞏值

承清大定之後百度具興因革損益酌劑均調注措咸宜而不動聲色

天下帖然享和平之福二十六年聞

太皇太后哀詔輿疾赴

闕歸又四年卒年八十四從祀鄉賢克鞏幼穎敏八歲辨塾師解朱絃  
之誤年十三受知于學使左光斗卽期以公輔器筮仕

興朝迴翔館閣參贊機宜者十年清端恪慎屢荷

恩綸廕弟及子姪先後六人旣致仕優游吟詠又三十年生平篤於天  
倫十歲喪母執禮如成人暮年喪繼母不以老自恕營父葬無大小必

躬必親廬墓三年晚歲於第中築臺學臺旦夕讀書其中所著倫史編

入

四庫全書子亮光另有傳孫曾十餘皆有名

少保大學士王文通公永吉神道碑銘 吳偉業

順治十六年二月丁卯

上以故大學士王公守都察院左副都御史卒於其位為之震悼而贈

諡祭葬褒終之典畢備且命書其勳德於墓道之碑曰以昭朕篤念舊

輔之意於永永勿忘其長子明德繕疏以謝退而屬偉業為之辭偉業

震恐曰紀事臣職也未有承制而用草莽固陋褻

王章而私令甲禮之所不敢出也明德固以請曰

上命即其家伐石樹表而螭首未有刻文匪惟抑沒先人將以隕越鉅

典不共是懼吾子其謂之何偉業既辭不獲命謹按故光祿大夫左副

都御史贈少保兼太子太保吏部尚書諡文通王公諱永吉字修之一

字鐵山揚州高郵人也其先世徙自毘陵曾大父諱木大父諱煥父諱

自學皆以公貴贈少保妣皆贈夫人公生而環異長身修髯具文武材

略由進士起家再為縣令於大田於仁和一為推官於饒州咸著異政

從戶部郎備通州兵事有威名遂推以巡撫山東未一歲改薊門總督其時流寇已曠突河華滔天阻兵羣孽扇行所在蟻結燕齊雲朔魚爛土崩公受賑於倉卒之時投袂在敗亡之日猶能輯甯東夏擁護巖關障退奔衝叫呼堵挂既而有謀不用勢竟莫支變服間行投死無二忠著於前史事隔於興運故不得備書其初入

本朝一見授大理卿守法律持大體以刑不上大夫請郎吏之謫罰者得以贖論晉工部侍郎用疏辭報罷再起戶部侍郎上封事十條於蘆政馬草尤中肯綮又陳投充五大害謂其上干國法下失人心慷慨切

至

報可施行尋擢兵部尙書賑饑眞定卽道上拜都察院左都御史未至召入爲秘書院大學士其在兵部也絕請謁以嚴選格飭訓令以定兵制備倭克舉其職且念土寇用反律而閭左剽劫不得與同科卽收者宜下刑曹非所司所當置獄其有無辜連染者請出之以息冤濫眞定爲州縣三十有二凶災延蔓數百餘里公以

上賑卹恩甚厚不可委屬城長吏倍道兼馳所過人人慰勞老幼滿於車下興發成於手中得調度之宜有賙救之實又以其間訪官吏良猾



風俗利病爲書奏之

上久知公忠勤任事故有以大用公也公居平益擊江南漕弊京通是

其根株非大釐革不足與更始會緣兵部前事從內院出奪一官視通

州倉公初不以左降有所弛易受

命立馳至潞河訶輓卒以何不前對曰爲江船江船者楊村淤淺轉運

之船也具得其稽索侵牟狀公笑曰吾分爲三番遞運則弊不得行矣

已而果然嘗夜宿通惠河傳籌發運艘危坐難兩巨燭手漢書一冊風

雪繞其鬚髯達旦不寢人望之曰高郵公眞勞臣也明年

召入爲國史院大學士管吏部尚書事

上時御南苑手脫所服冠以賜而

命之公頓首出坐堂上進其屬問曰新舊人以名第需次者幾何人曰

千人矣掾吏之以年勞在冊者幾何人曰倍之矣問其循序爲注補曰

員缺之汰也資歷之有不相當也卽如是有十年之人而不得官也問

其設法爲疏通曰參罰之多也開復之不易也卽如是有十年之官而

不得遷也公太息起曰是安用我主爵者爲乃舉職掌所當釐正者分

爲二十疏杜門請假繕寫十日而始成奏既上見者咸服其精切蓋公

天性強於吏職能斷大事處之不疑以吏部用人爲天下安危治亂之本上以協恭同事外以厭服羣情綱紀畢張苞苴抑絕卽下至流品勾稽年贏月縮銓除移駿甲是乙非他人視之叢薈紛糾頭目眩瞶者無不吐決如流笑譚不倦而公亦自此漸以病矣公病而

尚方賜藥物趣問累

詔不得已復出出而坐兒子科場事責授太常少卿未幾卽進左副都御史有意復嚮用之而公竟病不起嗚呼斯可謂出身爲物以死勤事之君子已公亦奚憾矣哉其或有不量公者曰古稱得士可以後亡公之初節不可爲不用也何以不能挽橫流救末造乎是不然山東亡命之徒起如龍山滄浪洲諸賊天下之巨猾也公以一節挑三百騎未浹月而收縛散遣之殆盡亦足以見其略矣京師倚邊腹建牙爲犄角舊制額兵十萬有無尚不能支乃抽調潰亡之後不復能軍廷議遂裁一督師一保督三巡撫二巡治六鎮帥而獨留薊督一官以任公子之以各路零星收拾之罷卒又闕其一年之餉而以當駸駸渡河百萬方張之流寇撩猛虎以空拳救燎原於杯水尙謂公獨力能辦之然乎否乎撤甯前併山海以爲揜梧根本之計此何等時也謀國者狐疑相仗公爭

輿傳七

十一

之數月猶不見從賊大同圍急而後遣之故公以單騎十日盡發關甯  
勁旅顛沛勤王去京師二百里而已無少極若夫公之南還也柄臣不  
過資其空名而未嘗假之實力然猶扼淮不可蹈海何之走單舸於颶  
風鰲浪之中幾至觸石橫流妻孥破沒而後束身歸命嗟乎世之量  
公者固失之矣彼謂智者覩危知變轉敗爲功又豈所以知公也哉

旅登

朝非勳非舊遠受客卿之禮驟立羣僚之上苟非盡瘁竭誠何以報  
恩塞責又自悼推遷興毀恥以其餘生倖富貴庶幾乘機構會殫未死  
之力以救濟元元是以出入數年焦形極敝此固公之自待如此而其  
用心良已苦矣才大則磨斲自多名高而牴牾亦甚公於是乎術補其  
資道全其用有寬厚愛人之德而議獄不厭其深詳有變通宜民之方  
而守官必主於繩墨其意在別嫌疑適隱伏絕賓客棄親知取一切以  
自立於無過然後可以保持善類調護艱難負方圓並畫之才逼膏火  
自煎之勢靡事不爲繼之以死維當寧以馭騏驥者利其銜策擇棟梁  
者善其斧斤顛倒詘信妙於駕御而勞臣中壽奪我股肱宜乎  
手詔爲之驚嗟而拊髀加之痛惜也偉業辱與公游每見其酒酣脫帽

顧盼風生詠啁譚笑而語不及私簡易威儀而望之增悚輒驚以爲莫能測識及往問公疾公自言昔年經虎口葬魚腹瀕於死者數矣主上待我厚今犬馬氣衰便恐無緣酬答不覺涕泗橫流故今日執筆表公心事以告萬世其使王氏子孫知

朝廷所以保全先臣疇載無極而後人之過此者得此碑於苔侵石泐之餘摩挲捫讀論公之心而參考於紀載必有爲之彷徨而愴歎者斯於公亦可無負也已公生卒皆以己亥葬於其鄉之躊躇山而鄒趙兩夫人以詔耐子七人孫六人餘在誌傳中公嘗剖股肉以療親居喪稱死孝而高郵大水捍災患有功皆其大節不可不紀嗚呼觀公於此二者則其爲君國以不有其身又可得而知也爲之銘曰

於赫三事徽音丕顯允文允武王臣蹇蹇迺告圻父曰子腹心乃陟上宰左右一人錫之天閑爾亦千里駕我日車掉鞅不已維玉及瑤垂帶以朝耀首有飾翠帽豐貂雲臺是圖憂公見貌于思于思遇天一笑亥有二首辰在降婁害於股肱箕尾以游追命舊勞大書深刻史臣作歌爰紀哀職淮水方澤我公障之高城無恙我公相之卜茲墨食公其來思穹碑巖巖宰樹參差後千百年視此銘詩

附錄 涇河開議

王永吉

黃淮外河水勢蕩蕩滔天來路甚猛逼入清口內河河身窄狹兩岸束縛迂回四百二十里直至瓜洲纔得入江出路甚長其細前賢恐其震盪洶湧高寶地卑水聚中飽勢不能容必致決裂所以於山陽縣南去百里之內造涇河開分水一枝直趨射陽湖東北入於海此開既成固疏淮安下流之壅實減高寶上流之勢法宜修造堅厚闊大石閘一座其閘底須與下河河底俱相平庶無高昂弔口之弊此開與子嬰閘內河南河北兩條大堤較之運河更高更闊只是單行水道直通射陽湖匯合下海原與民間田地絕不相通倘或此堤少有殘缺修補不難或有不知淮揚水利者必曰沿隄減水開洞多矣何必爭此涇河一閘殊不知高寶之南惟有芒稻河洩水極大直捷入江高寶之北惟有子嬰涇河洩水極大轉折入海全入浸灌民田既可洩水又不傷稼故爲甚利而無害也若沿隄小閘名曰斗門所洩之水不及大閘五之一況當上河水湍急之時下河溝港俱已泛漲田地皆沈再加各閘齊放既不通江又難到海一望汪洋廬舍盡沒東風一起巨浪拍天直捲堤根一線漕隄內外洗刷所以潰決最易由此觀之欲保隄利運導水安民舍

修復涇河之外固無他也

謹案原編尚有重濬射陽湖議一首已見經世文編今不錄

光祿大夫少師兼太子太師保和殿大學士戶部尚書曲沃文清衛公

周祚神道碑徐元文

少師大學士衛公歿之一年其令子台瑞持公事狀屬元文為文勒諸麗牲之石維元文成進士公實座主具悉公行事公光輔

兩朝寅亮公忠厥勳茂著其為

天子所眷倚士大夫所慕說者凡厥有位咸所聞知備書而刻之石以垂示後世固其宜也公少厲風節為諸生時值黨議方熾提學僉事袁

繼咸為巡按御史所誣公率諸生頌冤因并逮御史勘訊士論稱之中

崇禎丙子省試第一丁丑舉進士為永平府推官歷戶部郎中見時政

日亂移疾家居

本朝定鼎以薦

召補原官改吏部考功郎中調文選丁外艱服闋再補本職在銓曹

最久惟以獎恬抑躁留意人才為務朝退則杜門與兄少司馬公飲酒

賦詩相樂若無官者有干以私輒不得入或銜之中以蜚語亦不辨會

世祖皇帝灼知其廉能事得白陞太僕寺少卿數月擢刑部左侍郎調吏部再進工部尚書太子太保以營建大工告成

上面加慰勞賜鞍馬及手圖山水一幀以示寵異奉

命賑濟畿南公精於措置使民實沾上惠全活甚多尋加少保仍兼太子太保改吏部尚書俄拜文淵閣大學士兼刑部尚書未幾加少傅兼薦愿臺閣踐冢揆才及數年終章皇帝之世恩遇冠於百僚

今上御極再命典辛丑會試兩闈所得七百五十人多奇偉英特之士翕然有得人之稱時冢宰員闕公以內院大學士權吏部尚書一年回內院請假視兄少司馬公喪葬畢還朝充甲辰武會試總裁官公所居必舉其職不自逸暇遂以積勞成疾又屢遭骨肉喪哀痛增劇已酉具疏乞身

救賜馳驛回籍調理仍食一品俸壬子

上念公舊輔碩德端方清慎足以表率具僚慰答民望特旨以原官召陛見之日

各以時事所當行公感激敷陳退又條上數事多見采納改保和殿大學士兼戶部尚書會宿疾遽作懇辭還里

上遣侍臣偕御醫診視慰諭再三始允其請仍令馳驛歸守官食俸如故康熙十四年三月薨年六十有四訃至之日

上深加痛悼賜諡文清葬祭之禮有加焉公諱周祚字文錫號聞石平陽之曲沃人其世系子孫葬地月日別具誌中不更錄嗚呼公可謂厚於德豐於遇者矣公白爲郎官日深識雅度卽有公輔之目早結主知參大政委任備至生平敬以事上儉以居身誠以服物不爲赫赫之名噉噉之行凡有論列輒削其藁雖子弟不以告語臨終獻替之言忠愛悱惻尤爲朝士所傳誦夫古之純臣有嘉謨入告我后退則曰維我后之德不敢自以爲功公其庶幾近之詩曰樂只君子天子葵之言君臣之際相信以誠克有終之難也公服官四十餘年再入相泣冢宰爲卿貳者三晉宮保師傳者四及夫解組歸田猶享大官之厚祿以終其身雖本朝之所以勸禮大臣者無有弗至非公之盡忠所事足以致之亦烏能無憾哉元文嘗聞公在工部時

三殿工起勾稽出入省金錢數十萬小吏蹙額曰衛公不去吾屬飢欲



死矣公御下未嘗苛急人自不敢爲私與人往還交際簡劄小紙必手  
自精寫食惟乾魚菜羹不常設肉所居邸宅湫隘僅蔽風雨用陶淵明  
詩榜於小齋曰結廬在人境而無車馬喧休暇之日晏坐其中門生屬  
吏稀見顏色在昔易名之典河津薛先生敬軒得諡文清爲允公風節  
凜然實與頡頏元文故備著俾後瞻拜公之神道者其尙覽此有所興  
起焉

謹案原編有清理庶獄五條疏一首已見經世文編今不錄

內祕書院大學士吏部尚書諡文定孫公廷銓傳

王士禛

公孫氏諱廷銓字道相別字沚亭青州益都人世居顏神鎮曾祖考廷  
壽祖考震考元昌三世皆有一行曾祖考祖考俱

皇贈光祿大夫戶部尚書考封光祿大夫戶部尚書封公有丈夫子四  
公長也公少具夙慧讀書有神解長而博極羣書中明崇禎十二年鄉  
試明年舉禮部賜同進士出身釋褐知大名之魏縣一年調撫甯改監  
紀推官等以世亂歸鄉里順治二年薦授河間府推官分司天津未幾  
內擢吏部稽勳司主事歷驗封文選三年典陝西鄉試進考功文選二  
司郎中公之在吏部也清白著聞時故相國溧陽陳公爲尙書嘗云吾

吏部皆一時之選以語大器其惟選司二君乎謂公及曲沃文清衛公也擢太常寺少卿提督四譯館八年

世祖皇帝親政遣廷臣祭告五嶽四瀆帝王陵寢公奉

命往祭南鎮禹陵南海道加太僕寺卿管左通政十年元旦

賜宴朝堂

世祖獨目屬公

天語詢姓名里居甚悉其年二月超拜戶部左侍郎明年請告歸省還

朝改兵部尋遷吏部會廷推大司馬至再特傳

上諭曰中樞重任宜慎簡畀孫某可兵部尚書公疏辭不允乃就職在

本兵僅半載軍政肅然提鎮大帥私謁不及門轉戶部尚書公之佐戶

部也每謂歲會無總錄無以劑羸絀之宜至是殫慮綜理俾錢穀舊隸

諸部者各還所司條貫釐然歲會之成自此始典計二載政尚清簡務

持大體其始也晨入晡出比其去也日坐堂皇數刻而已曲沃公以吏

部尚書大拜廷議推公為代

特旨加太子太保疏辭不允初曲沃公以清望入相

上難其代時論以為非公不可至是果然公在吏部久諳習故事既為

尙書益爲

朝廷惜人才慎名器疏淹滯杜僥倖恆曰

聖主在上人臣奉法守職而已安所行度外事今之吏部服膺虛公兩

言足矣加少保十六年海寇入犯江南

世祖下詔親征公率九卿上疏諫其略曰古創業之君亦或躬履戎行

然必其時大勢未定強敵尙存非親援枹鼓不足以作將帥三軍之氣

若夫大業已成強敵已殲卽有餘孽跳梁不過偏師小隊折箠而笞之

未有以萬乘之尊輒爲微釁小醜而動者也且

大駕旣出若扈蹕威儀太從簡損則不足以肅觀瞻嚴警衛若張皇六

師備陳羽騎則舟車之需輸輓之煩在所不免況江海之間風濤不測

兼以水土未習霧露不時上之繫

皇太后倦倦顧愛之心下之懸億萬臣民京師根本之慮其與一隅未

靖孰爲重輕不可不察也

世祖嘉納之會江南大捷遂輟行公掌銓六年恪守舊章吏不敢上下

其手事有未便則條上更張之期于盡善如請寬有司考成請議監司

久任請復學道陞補條議川湖廣西雲貴委署官陞遷之例皆切中時

弊多見施行嘗語同列曰吾輩臨事勿徒爲一司計也其通格之關於諸司者當并計之勿徒爲一時計也其利害之隱伏于天下者當并計之公之老成謀國皆此類也十八年正月

世祖升遐公位冢宰持大議定國是廷議侃侃無所頽避輔政大臣不悅公弗顧也時二十七日

國制已滿梓宮移景山

兩宮顯號尙未舉行公宣言于朝曰

新主卽位旬日矣

皇太后當改稱

太皇太后

佟妃當尊稱

皇太后兩宮徽號迄今未議何以昭示天下於是率九卿上請舉大禮

疏繼廷議

大行皇帝諡號眾相顧未發公首日

先皇龍興中土混一六合功業崇高同于開創宜諡爲

世祖高皇帝眾皆和之而輔政大臣鰲拜獨不可遂定諡

章皇帝公言雖未用物論歸焉頃之請急歸省

上命曲沃公以閣臣出掌部事而虛左以待公康熙元年還朝二年五月拜內秘書院大學士與同列高陽李公及曲沃公同心夾輔三年曲沃公休沐歸未幾公亦

子告蓋居政府僅一載而公病矣公之歸也年始踰五十兩親皆善飯

無恙踰年丁尚書公艱日定省太夫人側猶孺子也所居在山中卻埽

謝賓客焚香埽地晏坐著書平生精琴理得意忘言在絃指之外撰顏

山雜記四卷漢史億二卷歸厚錄十八卷自訂詩文集各一卷琴譜指

法一卷其南征紀略二卷則奉使祭告時作也晚著春秋鳩考未成書

以屬次子寶侗十三年九月以疾薨于里第公之未病也有烏自南而

北千百其羣皆墮于鎮城內外未幾公薨公少嗜讀書爲文從政一本

經術行己事上一本恭敬至于潔廉之操始終一致故受

世祖特達之知屢有才德兼備端慎練勤之襲自吏部郎游歷九卿入

枋大政而家無餘財與曲沃公同時清望相埒無所軒輊云公歿時年

止六十有二子二人寶仍官光祿寺署正寶侗有才名未仕卒孫七人

嗣端今官都察院經歷續端翰林院待詔續厚續勤嗣忠續廉續慎會  
孫六人維謙維謨維謹維諫維謹維誠

論曰文定公可謂名相矣昔先正于文定公嘗論大臣有德望有才望  
有清望公于德望清望可謂兼之固不欲屑屑以才著而言才相者卒  
無以加焉公著史論有云所謂大臣者善功不伐善諫不名丙魏是也  
嗚呼可以知公志矣

謹案原編有請興屯政疏請崇恬退明禮讓疏用人四事疏請正  
人心疏四首已見經世文編今不錄

保和殿大學士諡文端杜公立德墓誌銘 五照

康熙三十年夏六月八日光祿大夫太子太師保和殿大學士兼禮部

尚書杜公薨於家有司以公遺表上聞

天子為之震悼賜祭加等為二壇飭所司治葬事諡曰文端公之子員  
外郎恭俊將以某月某日葬公於某原而屬余銘諸墓余公之年家子  
也少時數侍公於長安邸中見其接物溫和平議論歸於忠厚疑然先進  
典刑迨後侍公同朝從閣臣之後則又習見公以誠心質行發皇功業  
有古大臣之風心竊慕效而不能及也雖不文其敢辭公姓杜氏世居

鎮江府之金壇縣明初有諱敬者以昭信校尉從永樂中靖難有功授  
梁城所千戶世襲遂爲通州之資坻人公生有異兆長而攻苦績學舉  
明崇禎癸未進士恭遇

聖朝龍興以地方人才薦舉補授中書科中書舍人是爲

世祖章皇帝入關之二年尋考選兵科給事中累轉吏科都給事中時  
天下初定

世祖軫念生民甫脫湯火思欲減租賦興文學俾兆民阜成臻於至治  
而法制未立四方尙未罷兵繇役數起吏或因緣爲奸公次第條舉其  
事疏言自古帝王致治必由經術宜及時舉行

經筵日講擇廷臣經明行修者爲講官庶幾裨益聖治又言荒地以墾  
勘爲憑亡丁以審編爲據請自今蠲荒之數分疏款項預行頒示使小  
民咸喻

上指則胥吏不能爲奸又言修編之法簡易便民近因軍興刳草豆  
未有定額往往取辦臨時愚民無知賣妻鬻子徒飽奸吏之囊橐誠可  
憐愍請

敕該部酌定價直使民先事爲備又言禮部示諭朝期每月不過三次

請於朔望行大朝之禮使羣臣得以陛見陳所欲言若進見稀闕則上下之情不通且非臣子尊王之意其言愷切深中時事

世祖由是器公擢公太常寺少卿尋以大臣論薦超擢工部右侍郎轉兵部左侍郎奉詔賑濟大名全活者甚眾旋遷吏部左侍郎會丁父憂以前任兵部時舊案鐫秩一級服闋補太僕寺卿轉大理寺卿刑部侍郎尋加太子少保陞刑部尚書公任刑部號稱寬平吏讞獄或不當輒卻其獄卽當受而著讞法必求其可生之比分別奏之

世祖章皇帝喜公用法平恕卽皆從輕比如公奏於是益知公可大任矣辛丑正月

世祖上賓

今天子御極以公

先帝舊臣歷有聲績七月調公戶部尚書初公爲給事中稔知錢穀出入盈縮及吏所以侵牟狀於是奏請各部寺錢糧皆歸戶部考成一切皆自嘗省吏但坐曹治文書不得爲奸課以晨報

上賜公羊酒表裏五月

上諭加太子太保尋轉吏部尚書澄敘官方銓政以肅丁未六月京察



自陳請罷溫旨慰留康熙八年特拜公內國史院大學士是時朝廷清  
平百度修舉

天子以寬仁慈恕休養天下天下稱治安者久矣公稟守成憲一以忠  
謹事

上亦知公持重有大體加委任焉是年

乾清宮告成擇日臨御欽天監奏言吉神在某方不宜從中門入公嘗  
次對面陳

皇上遷正新宮自宜從中門入且帝星所在卽爲吉神欽天監妄奏非  
是

上以爲然是月

恩賜綵緞六匹明年五月升祔

章皇后禮成推恩羣臣賜如之十月改內三院復爲內閣授公保和殿  
大學士兼禮部尚書加一級辛亥纂修

玉牒告成賜表裏五襲白金百兩四月

詔修

太祖

太宗聖訓以公充總裁官壬子七月

世祖章皇帝實錄成賜鞍馬白金綵緞加太子太傅是月

賜御苑蓮藕癸丑京察復自陳求罷不許八月

命充纂修

太宗實錄總裁官甲寅十一月

命公相跡

山陵於懷柔縣乙卯恭題

仁孝皇后神主旋遇冊立

皇太子恩加一級給新銜誥命

賜公貂皮朝服元狐裘各一丁巳賜團龍紗服及御筆大書者三年

七月公引年求去位公素好謙讓至是陳請益力

上知公心褒諭不允尋遣充冊立

中宮副使持節行禮己未恭題

孝昭皇后神主庚申

詔赴瀛臺賜御書一軸行書唐詩一卷公以求去未得反獲榮寵益增

棟懼尋遇病不視事時值滇逆蕩平

上思與天下更始議頒

恩赦詔書以公臥病未與議

命近臣持詔款問所增益壬戌正月賜羣臣昇平宴

上念公在告特撤御宴上尊就第賜公

手詔慰問尤爲特恩殊數云久之公病不愈復上疏乞休詞甚哀懇

上不得已許公致仕賜公御製送行詩一章御書勒石心經一卷怡情

洛社圖章一方柏梁體詩一冊遣行人護送許所過地方馳驛人以爲

榮公既致仕家居又以

太宗實錄告成賜公銀幣鞍馬加太子太師二十六年冬十二月

太皇太后崩明年正月公入哭臨

上以公老且病不任拜起

命學士張公英掖公行

天語慰勞撤賜御茗文綺以示寵眷公在內閣十四年以彝鼎重望爲

海內儀表功業施被於人而不謂己出嘉謀日聞於

上而不使人知遭遇

聖時白官遵職海內又安雖以三逆之梗草薶禽獮曾不旋踵用能以忠謹受知爲鼎臣緝緯太平之業聲施無窮懋事

兩朝寵遇優渥亦未有如公之盛者古稱君明臣良千載一時厥語眞不虛哉公爲人慈和謙慎恂恂寡言及當大事決大疑則持正毅然不可奪居諫垣因事陳奏不見於封事者裨益尤多歷掌三部練習朝章遇事有措置援據掌故參酌時宜兼集眾長期於允當其任司寇最久於亭平庶獄尤極敬慎常曰我待罪都官數年不能自必無過但見得一分盡我一分職分以仰答

聖恩於萬一耳蓋能眞實力行不愧其所言者及在政地奉公思職誠懇出於自然一意佐

聖主施恩布澤以嘉惠海內遇物坦平不存畛域之見雖布衣下位無生平之雅者果有一長必爲稱引嘗主浙江鄉試再主禮部會試皆稱得人遇昆弟尤相友善旧宅祿蔭皆不吝推與今歷任至廬州太守君名立本者公之異母弟也家居惟課子弟讀書不與寒素爭進取皆人情所難者公諱立德字純一號敬修享年八十有一會祖某祖某父某皆以公貴贈如其官曾祖妣某繼某祖妣某繼某妣某皆一品夫人公

元配誥贈一品王夫人初作先公卒繼配王夫人子男四人長恭著庚子副榜貢生娶御史李及秀女次恭瑒恩廕生皆早卒俱繼配王夫人出次恭俊候補員外郎娶翰林院侍讀學士李公錄子女副室李出次恭瑋例監生娶誥封工部員外郎王鼎呂女副室李出女二長適吏部尚書張公士甄封夫人元配王夫人出次適戶部郎中李其凝封恭人繼配王夫人出其凝故大學士文勒公長子也銘曰

顯允文端令儀維則清篤忠誠百僚是式在昔起家經術文章彩筆五色雲錦七襄

景運肇開聖作物觀公以才徵雲龍風虎特達之知三錫九遷畫省夕拜卿月清懸秋官祥刑度支判賦言陟統均延登揆路公忠奉職翼翼小心順承

天施以沛商霖在野在朝推公長者勳茂彌謙位高善下温然冬曦藹若春陽光大含宏行以直方功成釋位

帝優耆老寵以天章煌煌睿藻

敕下所司給傳護行都人聚觀歆羨其榮曰  
聖天子特頒殊數優獎耆俊匪私公故完福令名惟公則有駿望鴻猷

其傳不朽天不慙遺

皇心愍惻載錫嘉名為營兆域梁城之原穹隆其邱公魄妥安神從天游赫奕聲光流慶孫子我為銘詩昭示無止

又誥授光祿大夫太子太傅加太子太師禮部尚書保和殿大學士諡

文端杜公墓誌銘  
張玉書

太子太師保和殿大學士寶坻杜公在政府十有四年

予告歸里越十年為康熙辛未春秋八十有一以六月八日薨於里第

遺表至

天子知公已逝不待有司陳奏即降

旨褒憫諭祭加等葬如制及禮臣以易名典請又召九卿等詢公立身

服官本末僉言故大學士某持已正直奉職清勤有古大臣風

上以諸臣言是予諡曰文端比詞臣撰賜碑文進又仰廡

睿裁增易至再寵卹之渥為近代所未有公性沈默寡言笑奏對之頃

應聲而出不持為異同方逆寇初殄國家將按行誅罰眾議未決公偁

偁陳於

御前辭氣激切

上嘗述其語以示近臣謂能斷大事夫大臣致政日久且已身歿而  
天子追憶其言論風采嗟嘉歎不置非始終一節以忠誠上結主知  
何以致此初玉書待罪記注夙欽公行誼及爲學士復侍公于政府比  
承乏從閣臣後方欲就公考質故事以奉爲典型而公逝矣公子員外  
郎恭俊旣以其年二月葬公梁城所之東原而以墓碑屬余銘余不能  
辭也謹按狀公諱立德字純一號敬修先世居鎮江之金壇縣明初諱  
敬者以靖難功授梁城所千戶遂爲通州寶坻縣人公舉前癸未進士  
順治二年

世祖章皇帝定鼎燕京訪求遺彥朱文康公巡撫順天薦補中書科中  
書舍人尋考選戶科給事中明年典浙省試稱得人錢塘黃文僖公與  
焉累遷吏科都給事中中以開國規模宜崇尚經術而固結海內新附  
之心尤在寬卹民力使人皆樂業於是疏請開講筵端政本而繼以蠲  
荒稅禁加派皆有裨於治理內擢太常寺少卿以并研胡公薦超拜工  
部侍郎未幾調兵部畿輔水奉  
詔分賑大名全活者甚眾奏稱  
旨復調吏部會丁父憂去以在兵部時註誤鐫秩一級補太僕寺卿轉

大理尋爲刑部侍郎越兩年加太子少保晉刑部尙書公斷獄平恕凡  
獻重辟屢易橐而後定卽罪既當猶必求其可生之路或引輕比上請

世祖章皇帝深知公明慎奏輒報可歲辛丑

皇上御極倚任老成以公歷著聲績調戶部尙書公以錢糧分隸部寺  
條緒凌雜吏得因緣爲奸定議總歸戶部考成公私稱便康熙三年典  
會試是科改試策論得沈珩等百五十人冬調吏部丙午丁未之間銓  
法多所更變賴公秉法不撓均平酌劑仕路無壅滯焉八年四月曲沃  
衛文清公致政拜公內國史院大學士時

天子初親大政庶績允釐公一意奉公恪守

先帝成憲請所施設務力持政體肅紀綱而要旨歸於和平惇大是年  
乾清宮成擇日臨御欽天監奏吉神在某方不宜從中門入公言紫微  
帝星所在諸吉神無不拱向

皇上遷正新宮應從中門入監臣所奏非是

上從公言明年改內三院爲殿閣公爲保和殿大學士兼禮部尙書十  
二年復典會試得韓莢等百五十人文體自是一變甲寅以後三逆相  
繼煽亂於時廟堂之上



命將遣師常決計於俄頃之際或密授方略或宣諭招徠贊策草制悉閣臣是任惟公與李文勤公馮文毅公同時居政府實協心力以參機務而又從容整暇絕不示喜愠之色以故數年間羽書旁午而中外人心晏然若處無事十七年春

天子方振興文教命羣臣引薦文學之士備顧問公舉名宿曹溶等八人以應一日

上顧閣臣謂在廷諸臣誰堪大用者公隨面疏數人比退或訝公不稍引嫌公曰自筮仕至今日惟此心不欺可邀

聖鑒他非所計也十八年自陳請罷秋地震復請罷皆溫旨慰留二十年冬忽覲疾不能視事會滇逆蕩平將降德音加恩肆赦

上以公未與議命玉書持

詔款就示公于邸第問所損益公頓首言

皇上天地父母之心纖細具備臣愚更何臆議既還奏詔書始下明年正月  
上以武功耆定讜廷臣於內殿賦柏梁體詩因公在告特撤

御筵上尊

手詔賜公曰卿弼亮老臣久任機密端醇恪其勤慎素著茲海宇蕩平時當令序內殿賜宴羣臣念卿臥病不克同此懽讌特遣中使慰問賜以醴饌卿其加餐珍攝以副朕惓惓至意至五月公疏乞致政詞益懇上不得已允公請

詔給驛遣官護行比出國門復

賜御製五言律詩一章及御書心經怡情洛社圖章以示優異二十六年冬

太皇太后升遐公以明年春奔赴哭臨與馮文毅公同陛見

上恐公不任拜起

命學士張公英扶掖而行慰勞倍至既出復頒賜綺幣公自謝政後至是凡六年矣瀕行過余邸舍追述昔年共事之誼曰惟公知我握手續綬若重有所屬者今日得據所見聞執筆書公隧道之石豈公之意固在是耶夫公立朝垂四十載枋政日久國家大典禮政事多屬公釐定若總裁

實錄

聖訓

玉牒持節冊立

中宮恭題

神主相視

山陵以及清理刑獄測驗法無一不與前後錫賚

御書卷軸並黑狐紫貂金幣鞍馬嘉魚蓮藕之屬無一不備

主臣交得恩禮有終蓋至公而稱極盛而公之所以結

主知膺殊遇者大抵清挺特立而不市矯激之名平易近人而不容依

附之迹異時士大夫嘗以黨論相齟齬矣而公皦然而不滓門生故吏

非不充斥朝列而公坦然而不私公之在位也不名一善及其釋位而

去也人皆愍然以思今公既沒而天下屈指大人長德爲一時模楷者

必以公爲首嗚呼此公所爲不可及與曾祖諱仁祖諱朝先父諱守禮

皆以公貴贈如公官妣皆一品夫人元配王氏贈一品夫人先公卒後

夫人王氏今尙存子男四人恭著副榜貢生次恭裕恩廕生皆早卒恭

俊候補員外郎次恭瑋例監生女二一適吏部尙書張公士甄一適戶

部郎中李君其凝餘詳誌中不載銘曰

天翊景運宗臣篤生嶽嶽文端允爲國楨頥然長身規言矩步穆如其容不吐不茹曰作耳目公才獨優助乃忠順入告謀猷晉長秋官惟刑是恤片言平反五教用弼爰領度支九府就理爰陟統均八枋具舉有位式敘迺正台階尹實佐鼎說資和梅洵歷巖廊四十餘載赤心奉公白首靡改芒寒色正孤標絕倫陽煦春和復與物親躡屐不殺威鳳不博國有老成廉頑惇薄

帝眷良弼重若蒼輿密語造膝決用不疑公屢引年遲久乃許宸章昭回以榮餞祖謝傳東山裴公綠野警則景星光燭區夏惟公之壽宜躋期頤梁木忽折胡不憖遺哲人云亡

帝心震悼哀誄載頒隆文示報朝堂集議易名孔嘉

敕營堂斧東潞之涯掩靄松楸嶢嶢兆域妥宅於茲慶流無極

又太子太師保和殿大學士杜文端公墓誌銘惠周揚

康熙三十年夏六月八日光祿大夫太子太傅太子太師保和殿大學

士兼禮部尚書杜公薨於家有司以公遺表上聞

天子惻然降

溫旨議諡諡曰文端其孤恭俊將以某月某日葬公於某原因以狀來

皇朝通志卷七

乞銘謹按杜氏本鎮江之金壇人有諱敬者以昭信校尉從明世祖北伐有功授梁城所千戶世襲故爲通州之寶坻人公生有異兆長而攻苦績學舉明崇禎癸未進士不仕至我朝

世祖章皇帝順治二年始用薦者仕爲中書科中書舍人尋考選兵科給事中累轉吏科都給事中是時天下初定

上欲減租賦興文學與天下更始而法制未立四方尙未罷兵繇役數起吏或因緣爲奸公爲給事第條舉其事疏言自古帝王之治必由經術宜及時舉行

經筵日講擇廷臣之經明行修者爲講官減繁文從簡要庶幾裨益聖治天下知所嚮學又言荒地以闢勘爲憑亡丁以審編爲據乃審勘動逾數月駁查又復經年輾轉濡遲吏胥乘是中飽故上有蠲賦之實而下不受蠲賦之惠者弊由於此請自今蠲荒之數分疏款項預行頒示使天下窮鄉小民咸喻

上指則吏胥不敢爲奸又言軍興草豆之價未有定額取辦臨時完欠不分數目淆亂民之賣妻粥子以赴公上之急而飽吏胥之橐者誠可

憐憫請

敕該部職司酌定價值使民先事爲備又言禮部示諭朝期每月不過三次臣愚以爲旦日爲朔十五爲望旦日者一月之始也請於朔望行大朝之禮五日二十五存常朝之名羣臣得以陛見陳所欲言尊嚴之下尙恐有見而不言者若進見稀闊則上下不通且非臣子所以尊王之義其言愷切深中時事

上由是器公擢公太常寺少卿復以薦爲工部右侍郎轉兵部左侍郎

奉詔賑濟大名全活甚眾還報稱

旨遷吏部左侍郎會丁父憂以前任兵部時逃人案鐫秩一級服闋調太僕寺卿轉大理寺卿遷刑部侍郎以考滿加太子太保升刑部尙書公任刑部號稱寬平吏讞或不當輒卻其獄卽當受而著讞法必求其可生之比爲

上分別奏之

上亦卒從輕比如公奏於是益知公可大任矣會

上崩

今天子卽位以公

先帝舊臣素有聲績尤敬禮之卽調公戶部尙書初公爲給事中稔知錢穀出入盈縮及吏所以侵牟狀于是奏禱各部寺錢糧歸戶部考成一切皆自訾省吏但坐曹行文書不得爲奸諫以最報

上賜公羊酒一樽袍表裏一襲加太子太保轉吏部尙書以恩賜蟒緞表裏康熙八年特拜公內國史院大學士是時朝廷清平百度修舉天子以寬仁慈恕休養天下天下無事者數十年矣公以爲遭逢聖明不當有所改作一以忠謹事

上

上亦知公持重有大體傾心倚任之前後所得

上賜不可勝計是年某殿落成擇日將御欽天監奏言吉神在某方不宜從中門入公口陳

天子當陽無由旁門之理且帝星所在卽爲吉神欽天監妄奏非是

上以爲然卽賜公綵緞六匹明年升祔

章皇后推恩羣臣賜如之改內三院爲內閣授公保和殿大學士兼禮

部尙書加一級

命纂修玉牒又修

太祖

太宗聖訓

詔公總裁賜宴內廷

詔公坐殿內漢大學士入殿坐自公始又賜御苑蓮藕

世祖實錄成以公初為總裁又賜鞍馬白金綵緞加太子太傅疏辭不

許又以地震自陳求罷又不許

仁孝皇后崩

命公相脉

山陵又

命書

神主兼以冊立

皇太子恩加一級賜公貂皮朝服團龍紗服及御書公素謙讓屢上書

求去位至是陳情益力

上益愈重公屢下優詔勞勉之

命主纂修

太宗實錄又



命往眎沙河

山陵書

孝昭皇后神主賜御書公以求去未得反獲褒寵益悚懼稱病不眎事已而果病

上輒命學士卽公第問公以事公言以爲可然後施行時賜羣臣昇平宴公

御宴一席酒一樽

手詔與公曰卿弼亮老臣久任機密端醇恪恭勤慎素著海宇蕩平時當令序賜宴羣臣念卿臥疾不克同此歡讌朕心憮然其賜卿醴饌卿其加餐以副朕意久之公病不愈上疏請告詞甚哀懇

上不得已許公致仕賜公御製送行詩一章許所至縣邑給驛傳公既致仕家居又以

太宗實錄告成賜公銀幣鞍馬加太子太師二十六年冬十二月

太皇太后崩明年正月公入哭臨

上以公老且病不能拜起

命學士張公英掖公而行撤賜御茗并表裏五端

溫語慰遣之公在相位十四年未嘗有所興革而百官遵職海內又安雖以三藩之梗燿巨撲滅會不旋踵至今稱太平宰相必首曰杜公而世祖皇帝及

今天子寵禮優渥前後如一亦未有如公之盛者豈非所謂君明臣良千載一時者耶公爲人恬退寡言及論是非利害毅然不可奪居諫垣因事陳奏不見於封事者裨益尤多及爲宰相

天子有所問輒從容條對退而默不自言其所彈劾雖

天子近幸之臣不少避其所薦雖布衣下位無生平之雅者亦爲稱引嘗主浙江鄉試再主禮部會試皆稱得人其遇昆弟尤友愛

今上親政恩隆一子公移廕其弟立本即今任廬州太守者也家居惟課子弟讀書然不爲科名計與寒素爭進取皆人情所難者公諱立德字純一享年八十有一曾祖諱某祖諱某父諱某皆以公貴贈如其官曾祖妣某氏繼某氏祖妣某氏繼某氏妣某氏皆封一品夫人公兩娶王氏前夫人誥贈一品先公卒後夫人今尙在子四長曰恭著庚子副榜貢生娶御史李及秀女次曰恭瑤恩廕承直郎皆早卒次恭俊廕監生候補員外郎娶翰林侍讀學士李錄子女次恭璿例監生娶工部員

外王鼎呂女女二長適吏部尚書張士甄封夫人次適戶部郎中李其  
凝封恭人其凝故大學士文勤公長子也銘曰

伊耆之裔紹國於杜世有聞人以膺爵士在漢曰周在晉曰預維佑維  
衍先後繩武自元迄明昧其世譜子孫復始由我太師太師之生適際  
昌期蔚然經術

天子是毗任公諫職踐公台司公有一德始終不渝遂知政事俾掌樞  
機

帝曰臣哉輔朕於少公曰君哉逸臣以老公拜稽首返其田里  
帝命宮臣卽賜於第公之來朝掖以拜舞公之言旋遽以不起煌煌密  
章用表公德余忝同僚作銘幽宅俾公令聞與國無極

又宮師大學士諡文端杜公敬修先生傳趙士麟

公姓杜氏諱立德字純一號敬修世居鎮江府之金壇縣明初有諱敬  
者以昭信校尉從永樂中靖難有功授梁城所千戶世襲遂爲通州之  
寶坻人舉明崇禎癸未進士

世祖章皇帝定鼎之二年以人才薦補授中書科中書舍人尋考選兵  
科給事中累轉吏科都給事擢太常寺少卿尋以大臣論薦超擢工部

右侍郎轉兵部左侍郎奉

詔賑濟大名還報稱

旨遷吏部左侍郎會丁父憂以前任兵部時舊案鑄秩一級服闋補太僕寺卿轉大理寺卿刑部侍郎尋加太子少保陞刑部尚書辛丑正月

世祖上賓今

天子御極以公

先帝舊臣歷有聲績調公戶部尚書加太子太保尋轉吏部尚書丁未

京察

溫旨慰留康熙八年己酉特拜公內國史院大學士改內三院復爲內閣授公保和殿大學士兼禮部尚書加一級辛亥

詔修

太祖

太宗聖訓以公充總裁官壬子

世祖章皇帝實錄成賜鞍馬白金彩緞加太子太傅癸丑京察請罷

優旨慰留八月

命充纂修

太宗實錄總裁官甲寅

命公相眎

山陵於懷柔縣乙卯恭題

仁孝皇后神主旋遇冊立

皇太子恩加一級給新銜誥命遣充冊立

中宮副使持節行禮己未恭題

孝昭皇后神主壬戌公先因病乞休慰留久之不愈再請

上以公詞懇切允其致仕

御製送行詩以賜之復遣行人護送馳驛人榮之公既致仕

太宗實錄告成賜公銀幣鞍馬加太子太師二十六年冬十二月

太皇太后崩明年正月臨哭

上以公老且病不任拜起

命學士張公英掖公而行

天語慰勞撤賜御茗文綺以示寵眷康熙三十年六月八日卒於家享

年八十有一有司以公遺表上

天子為之震悼賜祭加等為二壇飭所司治葬事諡曰文端蓋異數也

公生有異兆長而攻苦績學登第後居諫垣時天下初定

世祖念民生甫脫湯火思欲減租賦興文學以俾兆民阜成而法制未立四方尙未罷兵繇役數起吏或因緣爲奸公次第條舉言甚剴切深中時事有所彈劾不避貴近章聯上人憚之

世祖由是器公屢遷至大司寇吏讞獄或不當輒卻其獄卽當授而著讞法必求其可生之比分別奏之

世祖嘉公用法平恕卽皆從輕如公奏於是益知公可大任矣旗人王某逃至山東匿妻子於前妻父張某家他往無踪捕者獲其妻適里中有投井者面目不可辨其妻誣張謀死其夫王讞成抵罪上之秋曹公奉

命清理刑獄檢王案反覆披閱見單填有鬚長三寸語王逃牌察無鬚公曰計王自張逃出與捕獲其妻纔數日耳鬚安能暴長宜矜疑眾不可無何其主旋獲王到同事愕然謂公神明是日啟此

世祖嘉之又一日奏事畢趨出

世祖顧問侍臣曰爾等識此人否卽人所謂杜佛不要錢稔知錢穀盈縮及吏所以侵牟狀於是奏請各部寺錢糧皆歸戶部考成一切皆自

嘗省吏但坐曹治文書不得爲奸課以最難時准關鹽商虧課至四十餘萬有年巡鹽使題請緩徵意在徐沒下部議獨懼公持不可有容請以若干金壽乞公無言公曰吾俸餼足以自給安忍置國家如許金錢而得巨資肥己耶力主三年帶徵議人憾之轉冢宰澄敘官方銓政以肅厯掌三部練習朝章遇事有措置援據掌故參酌時宜兼習眾長期于允當其任司寇最久平反庶獄尤極敬慎常曰我待罪都官數年不能自必無過但見得一分盡我一分職分以仰答聖恩于萬一耳蓋能真實力行不愧所言者及晉端揆朝政清平百度修舉

天子以寬仁慈恕休養天下天下久已治安公惟稟守成憲一以忠謹上亦知公持重有大體加委任焉是年

乾清宮告成擇日臨御欽天監奏言吉神在某方不宜從中門入公當次對謂

皇上遷正新宮自宜從中門入且

至尊所在卽爲吉神欽天監妄奏非是

上以爲然吳逆之梗賊將據兩川欽天監奏土星入於井

上以問閣臣公曰井鬼屬在蜀分土入於井蓋土剋水之象兩川之平必矣逾月果捷至時渠魁俘于京

上命閣臣傳問諸王貝勒滿漢大臣及九列公議逆罪久未定公奏云此輩重負

國恩宜置重典不宜曲宥

上然之顧謂起居注書于冊且嘉公有古大臣風又逆裔原領叛本四十萬懼追沒請仍貨於海上歲計可得若干萬所司奏之

上問閣臣公曰此詭言懼追耳且欲生事海邊後將靡所弗至

上是之後遇病不視事值滇逆蕩平

上思與天下更始議頒

恩赦詔書以公臥病未與議

命近臣持詔款問所增益公以

皇上天為心纖細俱備臣愚更何臆議為對正月賜羣臣昇平宴

上念公在告特撤

御宴上尊就第賜公

手詔慰問其榮重類如此公在內閣十四年以彝鼎重望為海內儀表

皇朝通志

卷七



功業覃被于人而不謂己出嘉謀日聞于上而不使人知遭遇

聖時雖以三逆之梗草薶禽獮曾不旋踵緝緯太平之業聲施無窮歷

兩朝寵遇優渥未有如公之盛久之公病不愈復上疏乞休詞甚哀懇上不得已允其請賜公

御製送行詩外御書勒石心經一卷怡情洛社圖章一方柏梁體詩一冊前後所賜御書元狐貂裘團龍蟒服寶鞍上駟文綺白鏹之屬甚多古稱君明臣良千載一時真不虛哉公爲人慈和謙慎恂恂寡言及當大事決大疑則持正侃然不可奪遇物坦平不存畛域雖布衣下士無生平之雅者有一善必爲稱引主浙江鄉試甲辰會試皆稱得人遇昆弟尤相友愛田宅祿廩皆先推與今官廬州太守名立本者公異母弟也家居惟課子弟讀書然不爲科名計與寒士爭進取皆人情所難者曾祖仁祖朝先父守禮皆以公貴贈如公官曾祖妣趙繼張祖妣李繼張皆一品夫人公元配王誥贈一品夫人先公卒後夫人王今尙在子男四人長恭著庚子副榜貢生次恭琰恩廕生皆早卒次恭俊候補員

外郎次恭璿例監生餘載家乘中

論曰夫爵祿者人主之所予也弗予弗得功名者運會之所遭也勿遭勿立至若砥修仁義必求在我公廉刻自厲其爲大臣事其上以不欺爲本推於人甚恕且剛決明敏多識故事議論慨然及枚卜益奮勵無所迴避動靜纖悉謹而有法至考其大節偉如也古者功德之臣進受國寵退加榮名非獨私其後也所以不忘君名示國有人而詩人又播其事聲于詠歌以揚無窮今去古遠爲制不同猶有幽堂之石隧道之碑得以紀德昭烈而又蒙

皇上賜之以謚加之以祭褒之以文其所以照臨杜氏恩厚寵榮遠越前古麟受業于甲辰廿載親承座右仰先生久敢不蒐實撥有以備采擇焉頌曰

君子之守志於不奪不學而剛有摧必折毅哉我公其剛不屈公在政

府有謬其言光輔

兩朝毗贊太平異等  
恩禮享有榮名謙尊而光廣大含宏廉而不闕欲然若冲公初奮跡以學以文梧省夕拜卿月懸清愷悌之仁西曹祥刑度支減賦冢宰統均

公誠長者克已存誠見利如畏見義乃爭雖欲毀公其何以能公在相  
位終日如默問其寇逆不旋踵滅問其卿士百官以職問其庶民耕織  
衣食孰不事君胡能必信孰不作相誰能有竟降嶽乘箕令聞無窮福  
祿壽考有始有終

碑傳集卷八目錄

國初部院大臣上

光祿大夫工部尚書幼菴朱公之弼墓誌銘

徐乾學

光祿大夫工部尚書冀公如錫墓誌銘

王熙

折庫納傳

入旗通志

通議大夫戶部右侍郎朱公裴墓誌銘

王鳳

戶部侍郎焦公毓瑞傳

王士禛

又戶部左侍郎石虹焦公神道碑陰記

唐夢賚

胡宛委先生兆龍傳

謝東

都察院左副都御史董公篤行墓誌銘


呂兆璫

刑部尚書敏果魏公象樞墓誌銘

陳廷敬

又資政大夫刑部尚書諡敏果魏公神道碑

徐乾學



106-430

碑傳集卷八

嘉興錢儀吉纂錄

國初部院大臣上

光祿大夫工部尚書幼菴朱公之弼墓誌銘

徐乾學

光祿大夫工部尚書幼菴朱公始以諫臣事

世祖章皇帝讜直端亮著聲於朝廷

世祖方嚮用公驟遷既列於九卿矣公遇事敢言不能為媿阿依比中

間以註誤得降秩在朝公卿輩益重公

世祖亦雅知公旋由卿寺擢中丞倚任日重公感激知遇累月之間章

數十上至其所難言雖城社狐鼠之姦苟利國家不避也洎乎

今皇帝御極眷注尤隆命貳司農簡任少宰遂由都御史洊歷三部尚

書所建明為尤多後以會推事被

旨詰責九卿皆知於公無與也而公難進易退之節始終不渝遂引罪

去位家居課兒講誦經史暇或策杖逍遙郭外寄興詩酒人未見其有

愠容余通籍時公已位正卿舍弟立齋於公有通門之誼以是數從公

游比往來尤密又次兒炯出公門下今年秋公臥疾數往候公十月之

朔執手榻前猶相與慰答如平生歡既而曰身後事幸君留意越三日  
捐賓客其孤儼屬公門人編修周金然吳苑來徵銘於余且告葬速余  
追惟公之立朝大節載在國史天下所共知至讀其疏章指陳剴切雖  
宋之田表正范蜀公殆無以過其爲給事也所言重名器以尊  
朝廷革久役以清弊蠹嚴禁派糧積弊及糧船私載事皆施行其論破  
積習以圖寔效謂國家之事全在六部而今日六部之病惟在推諉大  
抵疑事畏事之念多任勞任怨之意少一遇事至有才者不肯決無才  
者不能決事稍重大則請會議不然則遷延日月行外察報而已不然  
則卸擔於人聽督撫參奏不然則畏首畏尾聽科道指名而已苟且塞  
責無容再議而已上下推諉以爲固然彼此相安以苟歲月如此國家  
之事安得不廢百姓安得不困而欲望致太平必無之事也因歷數六  
部推諉之病皆  
皇上不擇人不久任不責成無法柄以馭之之故自今宜行試詢考覈  
之法視其殿最以定功罪而行賞罰法在必行無所姑息則風紀整飭  
寔效可觀矣其在御史臺也論振綱紀以收澄清之效嚴考核以定畫  
一之制謂民之不安吏之不察由巡按之不得其人而其要惟在責成

堂官嚴考核而已蓋巡按之賢不肖卽堂官之賢不肖也自今巡按瀕職請未治巡按之罪先治堂官之罪若臣等定差不公考核不當受私請屬阻撓事權諸御史亦得舉奏夫自治而後可以治人正已而後可以率眾責成有歸則紀綱自振至於巡方事宜諸御史並有見聞但令會同參酌定爲畫一之制自足以興利除害不然議論益多端緒愈亂

巡按止皇皇補救細過之不暇則亦安所措其手足哉是時世祖皇帝方嚴懲貪之典凡貪官得贓十兩以上流徙塞北著爲令公疏論曰此令一出而天下不復有清官矣何則有司畏令之嚴皆攫取民財以媚其上官上官挾

朝廷之禁以恫喝求之於下無所不至雖欲不貪勢不能也清官由此而變爲貪官小貪由此而變爲大貪矣且自

上諭宣傳之後撫按所糾者皆罷輒殘疾與夫小貪之人必無有以大貪入告者何則一經提問有司無不求減贓罪圖保身命雖有盈千累百之贓而及其結讞期以不滿十兩而止是有司之貪者未糾以前徒層累而輸於上官被糾之後又層累而輸於問官而尺籍所科百不一二蓋雖起古龔黃之徒爲今日之有司未有不犯十兩之令者而今日



普天之下盡是不取十兩之有司豈今日之有司皆出古循吏上哉良  
以有嚴令之名無行令之寔令嚴則思遁也

皇上一大廉者而獎之以勵眾廉於以惠百姓而格天心或有裨益也會天  
旱極言山東前撫臣耿焯河南撫臣賈漢復以墾荒蒙賞而百姓以賠  
熟受困歲增數十萬之賦稅大約多得之於鞭苔敲剝呼天搶地之子  
遺而非額內樂輸之賦稅怨苦之氣積爲沴厲又部臣救荒無術賑濟  
濡遲公上章糾劾適中州報災戶部覆奏

皇上步禱精誠格天六月內甘澍已降遠近霑足奈何彰德衛輝獨請  
獨恤公言於

上曰此小人之言明欺君父百里不同風千里不同雨豈輦下得雨普  
天率土毫無差別且堯湯之世何以有九年七年之水旱也復奏云河  
南撫臣以被災細數報部覆請再勘旣以撫臣爲不可信矣而又倚之  
以踏看藉使撫臣告災如前部臣信之不可不信將必另差人踏看不  
過徒增地方煩擾耳又自夏徂冬被災州縣豈盡停徵待至勘明已屬  
明春雖復蠲免徒飽吏橐而嗷嗷待哺者已轉爲溝中之瘠矣與尙書

王宏祚力爭再三奉

旨令宏祚陳狀宏祚雖強辨然終詞屈

今天子親政公爲大司空極言閩地兵米之苦謂延建汀邵士民苦於買米之攤賠至有願輸田入官者而漳泉之間則直派之百姓宜救督撫窮治所司使百姓免腹削而朝廷百萬之金錢歸於有用又言私派民夫之害謂閩民旣罄其食以供兵復驅枵腹之性命以供無窮之役閩民何罪臣寔痛之

天子下詔切責督撫大吏大吏以下多得罪閩中積弊遂革旣爲大司寇則請旗下軫恤家人更定私嫁之條俾免離析請復康熙七年酌省存留錢糧以紓百姓又以懲貪過峻請自今非係官吏因事賄賂者凡求索科歛逼抑取受及無祿人仍遵律文科斷至於鋤大猾釐積蠹諸國家大事皆他人所不能言亦不敢言反且以爲不足言者而公獨侃侃陳奏鋒發矢激中外屏氣嗚呼若公者豈非其忠亮之節出於性成者歟公之以侍郎左官也人或勸公具疏白明公曰吾昨一歲四遷不以無功辭今甫一謫卽以無過辨可乎人服公得大臣體其再左遷也余弟立齋時爲憲長與公同罷笑謂公曰曩固聞公之義而避之今得

從公後其敢有所言公曰然哉余弟嘗言每議事與公及蔚州魏公接茵而坐三人者所見畧同公議論尤以惜人才重國體爲急在部遇事有不可輒獨爲一議同官或迫之不能奪其公忠愛國無事不然所傳奏牘不過什之一二而已公諱之弼字右君幼菴其號本徽國文公裔世爲聞延平人至四世祖鳳梧公來學京師因家焉曾祖雲菴公諱英祖忠齋公諱國相考裕我公諱世奇忠齋公生三子其次曰濟寰公諱世才公之本生父也生子二人長卽公次侍讀學士肯齋公諱之佐裕我公無子以公爲後其後以公貴贈其三世及本生父皆光祿大夫刑部尙書曾祖妣張氏妣左氏本生母武氏皆贈一品夫人公生而端凝穎敏絕倫順治二年登賢書明年成進士選授禮科給事中歷遷工科部給事中己丑分校禮闈得人最盛踰一年丁外艱服闋補戶科都給事中未幾除太常少卿歷右通政宗人府丞擢戶部右侍郎其明年以公事貶官十五年補光祿少卿轉通政司右參議明年以左參議擢都察院左副都御史

今上卽位爲戶部右侍郎居二年轉左甲辰充殿試讀卷官明年轉吏部左侍郎又明年七月拜都察院左都御史十月調工部尙書又二年

爲刑部尙書癸丑充殿試讀卷官疏請爲本生母終喪久之丁內艱服  
闋補工部尙書壬戌會試總裁九月充讀卷官明年冬解職家居凡四  
年康熙丁卯十月以疾卒距生天啟辛酉六月享年六十有七公事親  
以色養居喪盡禮與弟肯齋公友愛自延師受室及諸居處服御皆爲  
辦治自少至老每食未嘗不共又能推恩以及其九族姻黨執友待以  
舉火者甚眾其有窶窶之不舉者嫁娶之不備者公皆爲之仗助無所  
吝倦嘗買妾詢知其爲士人女也弗御而嫁之年十六讀書塾中聞鄰  
有哭聲以貧甚將鬻其子公爲之贖金代贖若此者在於他人雖得其  
一節猶足以傳而於公之盛德固瑣屑不能以悉書也公嘗撰述薛文  
清胡文定論政之語用以自警居常好手輯先儒遺書刻之家塾其所  
精思熟復者尤在近思錄朱子節要上蔡語錄諸書燕寢門闥並勒箴  
銘蓋其淵源根柢如此故其立身持論無造次苟且得於學問者深矣  
娶劉氏先公卒誥贈一品夫人子三人長儼刑部陝西清吏司郎中娶  
袁氏繼娶吳氏次伺候補內閣中書舍人娶張氏次价官監生出爲肯  
齋公後娶張氏女六人一適通政司經歷林國樑一適內黃教諭鄧備  
一適孔興濟一早卒一適興濟爲繼室一適翰林院檢討田成玉孫男

三人好仁揚武兆昌孫女三人儼等以今年十二月奉公與劉夫人合葬於永定門外管村祖塋之北阡銘曰

在昔世祖惇大明作公言於官饗蹇諤泊乎

今皇熙洽化醇公言于朝侃侃閭閻靡事不言靡言不殫小廉大法公在朝端上殿如虎當門有蘭一辭引去退易進難進則盡忠退亦希直國之老成進退惟式諫草雖焚豐碑斯刻謂余之私國史有辭

光祿大夫工部尚書冀公如錫墓誌銘

王熙

康熙二十五年秋八月光祿大夫原任工部尚書加一級冀公以疾卒於家明年長子植持公狀來謁且請銘焉嗚呼公敷歷中外垂四十年知公者眾矣植不以銘他屬而以屬余謂余言爲可徵也余雖不敏其何敢辭按狀公諱如錫字公冶一字鎔我先世本晉人遠祖有奉先者始遷於廣平之尹固村曾祖邦彥祖一貫父爾行俱以公貴累贈光祿大夫工部尚書曾祖妣田祖妣杜妣馬俱以公貴累贈一品夫人公生而穎異授書輒成誦十七補博士弟子員食廩餼篤志勤學雖寒暑不輟年二十贈公捐館舍哀毀骨立弟如鏞如鏐俱幼弱公撫育教誨以

兄兼師己卯舉於鄉丙戌成進士授刑部福建司主事屬當提牢遇罪人應流徙者囊橐多爲居停所匿凍餓枕藉公力追給之全活無算轉本部山東司員外郎貴州司郎中皆明恕平允不以苛察爲能出知湖廣襄陽府兵燹後人民逃亡所在山寇嘯聚公招徠綏輯伏莽漸靖獨白雲山賊負固最陸梁公先事戒嚴一日得諜書通衢尅日攻城人心危懼公厲將士登陴以待賊不敢犯禁旅會勦需糧如干皆立辦又建議燒豹尾山毀望京城以便進師無幾賊平師旋駐襄養馬四十餘日閻井晏然公之力也居民王宣治夫婦夜被殺廉賊無跡越三日公夢中若有人語曰小北門失火問之無有復臥夢如前頃之果得報公策馬往救適有盜人臥衾者爲邏卒所獲以愬公公心動叱之曰盜衾小事殺某夫婦者汝也其人怖服鞫之果得實一郡驚以爲神尋舉卓異陞河東鹽運司運使去之日百姓攀號百餘里至山右通商惠民興利釐弊公事暇究心理學諸書案間常置近思錄朱子節要薛文清讀書錄二程遺書魯齋遺書日咀玩不去手朔望集諸生於薛文清家廟中講學河汾之間彬彬有鄒魯之風陞河南布政司參政分守汝南會州縣各報墾荒數遣御史清丈公曰所報多不實欺

朝廷累百姓此萬世害也御史韙之甫三月陞浙江按察使在任八閱  
月清欽案一百七十餘件內陞太常寺卿尋轉通政司通政使奉  
命祭告岳瀆陞工部右侍郎監造

世祖章皇帝山陵奏罷各省灰車省費甚鉅轉工部左侍郎丁內艱勺  
水不入口者三日服闋補兵部左侍郎管右侍郎事擢都察院左都御  
史振綱紀杜夤緣所建白皆切中利弊有申明內外職任之要疏嚴有  
司初授之法疏請禁砌款粘單疏請禁奴僕首主疏直陳鹽政害民疏  
皆報可陞工部尚書丙辰充殿試讀卷官遇

覃恩加一級淮揚患河決奉使往視星馳露宿具形勢條奏上賚朝衣  
一襲丁巳解組歸居里中益殫心於濂洛關閩之學以躬行實踐爲務  
平時飲食衣服惟尙樸素往來鄉城一車二僕見之者不知其爲尚書  
也懸車十年片楮不入公門晚年尤耽周易嘗語子侄曰吾終身學易  
雖於道之大原未能的確理會而天時人事吉凶消長殊覺意味無窮  
蓋公認理真切遇事敢任言論警闕往往出入人意表顧未嘗輕爲著作  
立朝居鄉持己接物必衷於道而行是以出處裕然身名俱泰皆得力  
於易也公生於萬厯四十一年十二月初一日卒於康熙二十五年八

月十六日享年七十有四配誥封一品夫人張氏庠生揚善女子三植拔貢生娶檢討申涵盼女繼娶參領王學孟女棟庠生娶大學士魏公裔介女架庠生娶太學生李運昌女女八七適望族一幼未許聘孫方烜植出方炎方烜棟出方烜架出以康熙二十六年月日葬於某鄉之原銘曰

冀氏之先興於晉陽遷居平干枝葉蕃昌篤生司空爰萃厥祥宣猷郎署固守巖疆盤根錯節令名孔彰旋參大藩遂司憲綱踐陟卿貳回翔廟堂謹論昌言聞於萬邦鳩工庀材鉅典用襄晚賦遂初言歸故鄉潛心墳典默默契義皇生順沒甯迺得其常吉壤既安終焉允臧貞珉用勒傳世無疆

折庫納傳 入旗通志

折庫納滿洲鑲白旗人由中書累陞至內院侍讀學士順治十二年七月陞國史院學士兼禮部侍郎十三年修通鑑全書充副總裁官十五年改內三院為殿閣別建翰林院衙門以折庫納為翰林院掌院學士仍兼禮部侍郎十六年八月折庫納密陳四事一曰均田以為披甲人恆產年來用兵披甲人買馬製械奴僕逃亡生業凋零艱難日甚我

學傳



國家初定中原凡官兵俱計丁授田富厚有力之家占田多者至數百  
晌滿洲披甲人或父子兄弟所得之田不過數晌征役甚煩授田甚少  
殊爲可憫今正當有事之秋凡官兵應勿論人丁多少概視差等均授  
其田其閒散人戶亦行量給凡有增減定例或十年或十五年一加編  
審如此則田畝得均而甲兵日廣居則資生有策行則軍威克壯一日  
增烏眞超哈兵力今各省多用烏眞超哈在京各固山披甲馬兵不過  
百人而固山額眞梅勒章京甲喇章京牛朶章京亦在其內兵少若此  
征戰安所賴乎按烏眞超哈定例不論新舊每壯丁五名各出馬步甲  
一副合而計之其堪披甲者亦不甚多臣愚以爲凡直隸山西陝西河  
南各處邊疆之人有精壯善騎射者請勅督撫提督凡司道副參以上  
每年定限選拔送京編入烏眞超哈牛朶披甲訓練二三年皆同舊人  
或令駐防或令出征事必有濟矣一日慎選綠旗官兵今天下錢糧大  
半耗於綠旗雖星羅碁布徧滿海內一有寇警全然無益仍請在內禁  
旅此皆將帥失人故也今後凡提鎮等緊要員缺請不論滿州蒙古烏  
眞超哈漢人但選其夙嫻軍旅精明強幹之員補授至該地方武弁及  
閑散聽用各員內不乏才幹之人若該督撫提鎮所見既確一遇緊要

缺出宜卽行酌量陞補以示鼓勵簡閱士卒內有精勇者號爲前鋒兵  
錢糧量加優給視其勞績擢用以開上進之路汰其老弱官兵不得充  
數冒濫庶軍政修明不致虛糜糧餉而地方有事亦有攸賴矣一日亟  
收人心近聞江南各州縣寇亂有望風迎降者有縛官獻城者此皆將  
帥紀律不明有司撫綏無術致失人心若此夫叛逆固不可寬若詳究  
其由豈有闔城官民同謀從逆之理必有奸宄之徒首爲倡亂今  
天威遠震大軍已發滅寇在旦夕間設將叛逆之人概伸國法數十城  
百姓盡皆誅戮不但有傷我

國家如天之仁恐後此有不幸而陷於賊者將益堅其從逆之心矣請  
速密

論大兵但誅其渠魁其迫脅株連愚民概予赦免則財賦之地不至傷  
殘而

聖德垂之萬世矣疏入下所司議多見施行九月奉

命同漢學士胡兆龍王熙艾元徵教習庶吉士尋調都察院左副都御  
史康熙七年同漢軍左副都御史金世德等疏論督撫處分言督撫原  
有撫綏百姓之責近例處分止有貪墨欠賦并違限錯擬等罪而百姓

失所地方未治並無處分之例嗣後如有百姓困苦流離拋棄田地  
方毫無治理者應將該督撫革職從重治罪

從之九年復改任翰林院掌院學士充監修

玉牒副總裁官明年陞兵部督捕右侍郎十一年三月疏奏窩隱逃  
人有定例處分至流徙處有窩隱逃人者未定處分之例今尙陽堡甯古  
塔等處流徙人等如窩隱逃人不便復擬流徙應枷號三箇月責四十  
板疏入如所請十六年正月卒於官

通議大夫戶部右侍郎朱公裴墓誌銘

康熙

康熙三十九年夏五月戶部右侍郎聞喜朱公卒於家將葬公子運午  
郵公狀來京師請銘於余以公爲御史時余長西臺與公共事久且相  
善也雖不文誼不得辭按狀公諱裴姓朱氏字小晉號裴公其先家大  
同有名弃者仕宋以忠節著後遷於聞喜遂爲聞喜人一世祖敬敬生  
鑑鑑生魁魁生世雄世雄生汝貫是爲公會祖汝貫生守易守易生繼  
授俱以公貴累贈通議大夫太僕寺少卿公甫成童慷慨有大志讀書  
不屑章句務爲當世有用之學年十七受知於巡鹺楊公移公名赴道  
時袁公繼咸爲學使者三試之刻寸香爲限公文立就補博士弟子員

皇清定鼎乙酉舉山西鄉試第一丙戌成進士授直隸易州知州時方有圈地之令公躬行阡陌露處草野畫疆分界踰月而定州人安之調補江西甯州以誑誤未任尋補河南禹州知州禹俗悍而驚寇亂後民益不馴公下車以嚴爲政首捕大盜張陽論寘諸法諸生余愛故宦室子原聘某氏爲汝州盜武剛所奪已而氏自歸於余生剛以劫妻訟初某氏意生素封也及歸見生甚貧又先有配則大悔乃右武而證成之論生死公廉得力爲平反爲榜殺某氏而出余生於獄鴻溝地當滎陽汜水滎澤河陰四縣搜捕餘寇株繫男婦三百餘人公憫其無辜俱釋之擢刑部浙江司員外丁母艱服闋補前官公故精於律例讞訊覆奏不假吏胥手積案一清戊戌

世祖章皇帝召試部郎以下六十餘人公奏對稱

旨改授廣東道監察御史巡視南城已又巡視北城西城俱以風力稱踰年巡按山東墨吏多望風解綬去既掌浙江道事巡視陝西川湖茶馬直登聞鼓掌京畿道事尋掌河南道印管理京察大計軍政三鉅典凡在臺十一年改禮科給事中有請復詹事及禁殉葬二疏而禁殉葬一疏尤持大體大畧謂屠殘民命于造化之和僭竊典禮關王制之鉅

今日泥信幽明慘忍傷生未有如此之甚者夫以主命責問奴僕或畏威而不敢不從或懷德而不忍不從二者俱不可爲訓且好生惡死人之常情捐軀輕生非盛世所宜有疏上報可丙辰陞太僕寺少卿戊午陞太常寺正卿本年陞都察院右副御史明年陞工部右侍郎監造奉先殿充殿試讀卷官轉戶部右侍郎管鼓鑄局時逆藩煽動軍興旁午公籌畫兵餉至日昃不暇食又以銅價騰貴約行權關解銅之法以充俸餉中外賴之會有稽察年力之議公引疾乞休

召見懋勤殿具以年齒對得

旨原品致仕既歸里築別業於城北曰擷蔬園日與故人爲文酒之會布衣蔬食訥訥如也家居不謁州府獨鄉里公事必正顏力爭建橋梁修廢制立義學恤嫠族雖千金不恡鄉人德之戊辰以太皇太后喪入臨歸辛未地震趨避傷足不能步履凡臥家九年而卒余惟冀州之地山逶迤而土深厚其人多沈毅剛果忠信篤實有唐虞之遺風公自川牧起家實心從政及居言路指陳侃侃俱軍國大計性坦率無城府從不以睚眦中傷人蓄德養望馴致卿貳優游田園康甯壽考非偶然也公生於某年月日卒於某年月日元配孫淑人先公卒

子女孫曾婚嫁氏族詳載公狀子運午以某年月日奉公柩葬於某鄉之原銘曰

聖主肇基英賢騰舉時維朱公應運興起兩牧巖城民安盜弭入佐秋官改平訟理戕戕惠文忠直是矢洊登卿貳清白靡媿篤棊忱恂天子所子進難退易懸車歸里相羊林泉潤澤桑梓香山綠野後先齊美令德考終鄉黨欣企幽宮永安既受多祉餘慶芊綿覃及孫子

戶部侍郎焦公毓瑞傳王十補

公諱毓瑞字輯五別字石虹姓焦氏其先素強人始祖成永樂中徙章邱之清平鄉大王父瑄贈都御史王父馨萬厯辛丑進士巡撫甯夏都察院右副都御史卒贈工部左侍郎考日芬建昌府推官贈太僕寺卿妣張贈夫人初中丞公爲大名監司公生於官舍幼不好嬉戲動中規矩讀書目十行下章邱令南皮湯君號知人一見器之曰公輔材也順治丙戌秋復行鄉試舉東省明年丁亥舉禮部己丑釋褐改國史院庶吉士辛卯授廣東道監察御史壬辰奉命巡視京通二倉爬梳夙弊奸胥絜息

世祖章皇帝駐蹕通州公朝

傳

九

行在

特賜貂裘蟒服故事非閣部大臣不得賜蓋異數云癸巳被

命巡按宣大兼理學政雲中當姜瓖畔逆之後人心艱危公至招流宄

嚴保甲課農桑葺學校勤考課修城浚池存問孤寡邊人誦之未及瓜

而撤差之

旨下士民泣送者百里不絕丙申巡視河東鹽政舊例每包以鹽二百

斤為率踰額罪及商賈公為酌定成規不贏不縮商民便之在事一載

苞苴不行歸裝惟襪被圖書而已尋宅父憂庚子補雲南道御史辛丑

今上御極遂掌河南道事癸卯內陞公在臺首尾十三年凡所建白務

存國體不谿刻近名不黨同伐異然邪正是非之介持之毅然亡所避

上以是信公孤立無黨援其受知

兩朝蓋以此需次歸侍太夫人子舍凡八年而太夫人沒癸丑起田間

用新例借補廣西道御史尋陞太常寺少卿進通政使司左通政甲寅

進太僕寺卿戊午進太常寺卿己未進通政使司通政使會京察一日

奏事畢

上召公至

御座側親詢屬員甲乙次第公奏對稱

旨

上霽顏顧閣臣曰焦某敷奏詳明可稱老成練達自是受知益深未幾擢都察院左副都御史尋進刑部右侍郎矜慎庶獄每九卿會議朝堂公言必盡終無所依違太湖縣民因事行財法司擬以授受同科律應死公獨曰受者百二十金乃爲滿貫以授者分計三人各四十金法止杖耳律云皆計所得是其證也奏請得末減遂爲定例

皇陵栽柏人二十三人賂部胥七百元法司擬滿貫律當死公援前例力爭亦得末減山東饑高苑民十三人持囊橐向大姓索糧有司以盜論傳大辟公謂是不過饑民冀緩須臾之死囊橐豈兵杖耶左都御史蔚州魏公是公議竟從寬典先是官司寇者端毅冀公之博大端恪姚公之縝密爲朝論所推時以公爲無愧奉特旨調兵部右侍郎知貢舉轉左侍郎淮安有商三十三人舟自廟灣趨膠州遇颶風引至朝鮮執送京師議者謂犯禁通海應下西曹其人辨言有官給照票墮水失去公議行查淮安將亦有無給照事立辨竟



送法司罪難釋矣已而巡撫咨覆實給照事遂得白其所平反率此類也秋

賜宴西苑頒賚表裏蒞藕其冬雲南平壬戌上元

賜宴乾清宮

上手金卮賜酒

詔賦柏梁體詩公有天河洗甲通蠻鄉之句二月奉

命告祭太昊諸陵癸亥上元復

賜宴乾清宮賜綵緞滇馬甲子戶部侍郎缺

上特諭吏部焦某操守可嘉可戶部公自司寇移佐司馬自司馬移佐

司徒皆出

特簡廷臣亡與比然食少事多未幾而病作子在成均日嘗從容為公言山居甚適公以方在中樞兵事旁午不敢輒引退既屢被知遇程書衡石日夕况瘁益不敢言洗沐以死勤事未及遂初非公志也公外和中介人不可得而親疎廷議侃侃視首鼠持兩端者若將浼焉諸公卿或有異同卒折而從公則公至誠有以感之也使公無死旦晚且枋用然清白聞於

主上至誠信於同列其用雖未究亦可以無憾矣公居家孝友爲德於鄉黨宗族甚眾不具論論其立朝之大者

論曰漢郭躬陳寵皆世習律令爲名家躬斷秦彭之獄寵罷鉗鑽之刑其慶延於世有以也焦公儒者法家非所好然觀廷議數大獄務依矜恕不力求其生不已雖陳郭何加焉今

國家重經術細文法公又以德望結

主知方佐致太平而天不憖遺忽焉以歿惜哉

又戶部左侍郎石虹焦公神道碑陰記唐夢賚

皇帝二十五年十一月朔四日

遣官祭戶部左侍郎石虹焦公於其廬

賜金造葬今冢宰李公鄴園志其墓少司寇高公念東撰神道碑宮詹王公阮亭爲之傳煌煌巨典三先生燕許之章詳哉其言之矣而公之孤歲貢生舜年候補七品京職舜同復造余里門匍匐請記其碑陰嗚呼卽微兩孤請余甯能無一詞於公耶凡公之世系贈爵遷除盼賜及嘉猷盛德之大事碑志所及載與兩孤所爲狀已詳者不復贅茲記其遺事公家世有隱德至祖甯夏中丞公功在邊陲績在世史余自童子

時卽聞中丞歸田盛德戚疏延致無虛日一肩輿實壺觴佳釀自隨殊  
自飲也一日送客里門樵者搯路不少避且曰誰教公家爲善良仕宦  
者而令避公耶中丞公聞之反大喜賜之酒公父司李贈太僕寺卿余  
外舅也嘗中憐園林棋枰賓從間時時爲余稱說中丞公二事蓋其遺  
教如此余與公同己丑殿試同選庶常

王芝殿公已在選中輔臣學士雜呼公名公面赧不應眾擁之始出余  
時謂公此范景仁舉禮部唱名不肯自陳狀耶或朝回衙散節序宴遊  
同儕喧噉時公穆然而已無何卽退戶無雜交迨解館授御史人或謂  
御史熏灼賓客過覘公意蕭然殊不自釋已按雲中及視河東嶮政某  
孝廉曾從行歸與余言其服御胥有節制如寒素以余所知前後按視  
雲中河東者交遜謝公狷介云當其往河東也贈太僕公戒鈔書二胥  
令公自擇一役眇公促令眇者具裝旣抵晉署署中一門役侍立公視  
之娟娟孺子也問之果縣令自鄉塾中勒令服役者立遣之歸一日刑  
一人公署已下鑰矣忘脫其三木公徘徊終夕不能寐蓋其矜慎如此  
由侍御晉太僕累年不調一少卿驟陞踰公公殊安之無何  
上臨軒內計羣吏公嘗獨對其屬僚抵任歷俸月日及某某才行具奏

甚悉卽

上所問某官貌歲伊何某非緣某事遷來乎公一一對揚休命如

上指而

上始器公矣此後擢憲副擢少司馬司農皆

上意也當司農命下公寓書於予謂將何以報稱

上德意余覆劄謂方今司空估計倉場度支

當宁綜覈畢具況在地官公等其自爲釐剔無復重煩

上慮爲也已而再寓書有云開歲京察例自陳吾其休矣余謂公素健

無疾何遽至此其有所感乎無何諸孤來訃公薨於位既聞訃始從邸

抄見同署會計公疏條奏軍國大計所爲安上全下損益之數而公逝

矣中外知與不知咸惜公未竟其用以答

神堯知人之明也按公生平孝謹雍穆不爲皎厲風概如石奮魏舒時

而施設未竟則非蘭臺石渠所預知矣贈太僕公嘗謂余曰人家教子

譙阿厲禁至不可堪亦安用此吾於子未嘗疾言遽色亦登一第蓋公

之明惠亦天性然耳方公需次內陞時侍養太母夫人歷有年所太母

偶不懌公卽傍皇出宿於外起居無甯晷迨言笑如平時而後卽安蓋

自榮養以至侍藥考終無間惟予知公之純孝也與人交油油無失色然意所不可斤斤不少假易佐部事部吏不諳輒致之法邇來部堂少管吏者管吏自公始其里居時余過從往往見所觀書皆勝國文獻會典通紀等書公之言曰三古以上書如毋追委貌奈不適於用何吾取其近今可用者其留意經濟如此公爲司馬寄余書曰屯田鼓鑄歷代行之俱有成效我

朝曾一舉行反致累官病民原無治人遂歸咎於良法之不可復豈不誣哉若損下益上補苴目前如昔人所云不加賦而財用足者又出桑孔下矣幸今四方蕩平兵馬或散或裁需餉較前減半持籌者當合盤打算一歲所入足敷一歲之用即當寬卹民力以培國本愚以爲先復夏稅秋糧之舊例俾追呼少緩小民得從事南畝則家有蓋藏人鮮流移而額賦自無虧欠除害卽是興利不必多開利源自無不足之患矣尤在封疆大吏以身率屬務使吏治澄清貪黷斂戢大家實心做事太平何難立見乎況明歲上元昌期天人協應固不爽耳其言如是煌煌乎經國訂謨收弄篋行竊謂林舉把鉏漸緩輸將乃甫司九扈遽召裴衣管葛抱負尙托空言此余所爲咨嗟涕洟以爲未竟其用者也念已

丑之役山左同館五人王冰壺少宰安復旦少參墓木已拱矣公騎箕尾之年姜玉璿檢討亦復相從九原黃公酒壚徒有余在微諸孤之請余甯無一言於公耶用是撫公遺事志之碑陰綴故舊之見聞詔其孫子蘭芽玉茁振振方興而伯仲一門簪笏並盛歲時蠱鼠之間拂拭麗牲之石定有感於余言若公之卒葬月日與子姓婚嫁已詳者例不更書

胡宛委先生兆龍傳

詳東

嗚呼東何人也敢傳公公兩為主考官所得士及門下士所教習士今奕奕滿朝宁爲卿貳侍從身在日月之際者不下數十人無不思爲文章不朽公以報公恩者何有於貧賤失志之一布衣碌碌無所短長於世者爲文傳公顧常考文體於銘誌碑版文之外有史傳有家傳史傳者傳之

國史此史官之事也家傳者凡草野之士皆得爲之亦可備史館他日之采輯此則東輩受知於公而後死者之責也徵公母弟暨公子之言東當竊爲之沉重以言公諱兆龍字子衮號宛委先世浙東山陰人忠簡公銓二十世孫也祖父俱宦游京師因家焉公年十五補順天府學

生順治二年乙酉年十九舉鄉試丙戌成進士選庶吉士丁亥授翰林  
弘文院編修戊子主考湖廣庚寅奉

詔使浙西因至鄉里拜先世墳墓壬辰遷弘文院侍講癸巳特擢侍講  
學士旋陞詹事府詹事仍兼秘書院侍講學士甲午陞掌院學士十二

月陞禮部右侍郎未任明年正月奉  
上諭以侍郎仍在內院辦事是年二月充會試總裁官四月充日講官  
充纂修

聖訓副總裁教習庶吉士丙申三月署戶部尚書事五月署吏部尚書  
事管京察十二月仍回內院考滿

子封蔭加禮部尚書銜丁酉八月充  
經筵講官戊戌正月奉

命往長沙冊封義王五月還朝坐事牽連落所加銜秩仍以學士供職  
尋改吏部右侍郎文淵閣學士己亥三月加太子少保庚子仲冬扈

駕巡幸近畿天寒且勞苦遂得疾明年辛丑  
先皇帝升遐公慟哭疾益甚

今皇帝登極授資政大夫封三代蔭一子入監讀書十月

特恩任吏部左侍郎明年壬寅秋準解任養病癸卯十二月卒年三十  
七蒙

恩賜葬祭有加禮祖奇峰公任衛參軍通州倅父機石公北城兵馬司  
副指揮俱以公貴封贈如公官祖母張母錢俱以公貴累封太夫人夫  
人娶劉氏封夫人少保戶部尙書劉公玉孺女子三介社官生劉夫人  
出其二殤以康熙甲寅年三月葬於某阡

賜瑩公立朝十七年職任禁近本朝學士同大學士並縮機密章奏如  
唐宋知政事最爲親要公以忠誠結

先皇帝之知凡啟贊朝廟軍國事甚多其裨益民生之功甚鉅然其訐  
謨甚秘世莫得而聞亦非東草莽之士所能言也言其最著於人者公  
乙未副相國吳江金公主會試公誓遊眞才得以得人報

國閱卷目不交睫者十晝夜進士四百人多知名士一時翕然稱得人  
於今爲

天子大臣以文章經術顯當世爲名臣者人才最盛是公報

國之一驗也故事教習庶吉士多優游養望不事劇切公自乙未至辛  
丑四任館師督課密凡經學古文諸體無不討論精審經公指授皆



有法度署大司農僅兩月會計天下出入之數尤詳核兵餉案牘勾校莫不立辦

天子奇公才署冢宰六閱月始舉京察舊制多散佚公參酌規條澄敘流品一時紀綱肅然開國以來未嘗有也

冊封降王自京師至長沙往返萬里冒犯霜露一日夜走三百里得當歸報會忌公者以總督張公自刺事牽連及公然

先皇帝卒調知公無他

寵眷如故蓋公之忠誠謹慎能見信於

聖主而不能不見忌於同朝其任事功侔上相然厚重不宣洩故天下莫知其造膝之言可謂得大臣體矣東昔嘗同公弟兩孝廉學因從公受爲文之法公依據先輩善誨不倦每見公入朝必辨色起昏而退食不數見賓客務遠權勢几榻間圖書數卷泊如也手評論六經三史及三唐詩旁及內典楞嚴經指月錄宗鏡諸書日分別立程不稍自寬假書摹晉人論古詩本建安黃初近體本開元天寶持論斷斷然古文愛廬陵南豐人有乞者必手自結搆不假手門下客故公所著息游堂集數卷雖少而精潔不可刪其必傳無疑也公孝事大母父母大母病公

亦病矣猶謹侍湯藥必親嘗以進友愛兩弟如子勉之爲學成名相對  
謹肅若朝典兩弟侍坐公前未嘗輕見言笑

先皇帝知公特深凡爲謠詠伎刻思以憾公陷公者計萬方卒不能就  
君臣一德終始無間迨

宮車晏駕公哭臨致毀遂身殉可感也公丰度秀偉瞻顧嚴重見公者  
如見天人其垂歿也大書几上作數語研究性命歸宿處忽有鳴鶴二

隻不知所自來盤旋空中久之而公端坐逝矣公沒後數年公父母相  
繼歿仲弟孝廉君亦歿三子復殤其二今存者獨公季弟及長君兩世

僅兩人耳然公遺書秩然園林精舍整齊清邃不改舊觀東以受學老  
門人時時過從公季弟及公子憐而客之念公生平政事文章旁及言

笑談讌之事厯厯如昨公年雖不得四十然卒以功名終彼伏機構難  
思擠公於不測者竟莫能厭其志也公歿十年家貧不能葬其門生故

吏以  
朝廷矜悼大臣賜祭葬之禮葬之於京西之某阡

都察院左副都御史董公篤行墓誌銘 呂光琳

都御史董公之沒已閱歲矣嗣君嘉孚子之壻也請銘其壙子太息者

久之曰士君子際喜起之運陟要津沈毅有大畧其於天下治忽之故  
政事得失之關往往前籌不爽非古今所稱名臣者耶乃甘賦歸來蕭  
然賫志以逝此其禔躬過峻風勵維嚴迄營魄地下猶凜凜若冰霜焉  
竊於董公見之矣公諱篤行天因其字順治乙酉舉人丙戌進士歷官  
都察院左副都御史加一級以原品歸里余忝姻婭其生平大概得之  
燕閒語語間者甚悉以故知公者莫余若也公洛中世家祚遠不可復  
攷今之瓜瓞綿繇則自公之高祖諱和者始和字時春正德丁卯經魁  
贈文林郎配張氏生子二汝謙汝豫謙字大益娶高氏生用威嘉靖丁  
卯舉人辛未進士官鳳陽知府豫字思順號四溪嘉靖戊子舉人陝西  
膚施令調神木封文林郎祀鄉賢名宦配朱氏繼司氏生四子曰櫟曰  
梃曰朮曰來朮乃公之大父字竹亭邑庠生贈通奉大夫配孟氏繼熊  
氏俱贈夫人子四維貞維新維翰應祥翰卽公父號鳴喬萬厯戊午經  
魁贈通奉大夫元配王氏生公與公之弟景行累贈夫人繼葉氏亦贈  
夫人誓死殉夫以節烈奉旌方公母王氏棄栝捲時公甫弱冠弟景行  
髮尙未燥太夫人病劇公侍湯藥目不交睫衣不解帶願以身代卒不  
起哀毀骨立三年如一日鳴喬公捐館舍侍疾持喪如太夫人時其事

葉夫人無異毛裏葉夫人以節顯公以孝聞兩兼有焉嗣是天降喪亂  
 洛城灰燼公攜家避難河朔集昆友輩仍孜孜講誦不輟值  
 皇朝鼎運開科公感會風雲遂聯兩榜釋褐後陟鼇坡游鶴禁擢居大  
 諫首陳黜陟大典謂庸劣則蠹民闕冗則誤國何可使一日居民上既  
 而與定規制使天下之田賦有則無苦樂不均之歎其關於民瘼非淺  
 也諸如清官方釐弊政蒿目時弊者多與宣公奏議相頡頏旬日間補  
 禮垣而先試其能於貢舉之役江左戊子一榜稱為得人由是入對從  
 容屢參機務爰從銀臺晉岡卿協理兵部督捕堂事明允持平所全活  
 者數千家洎政多年榮冠京尹鴻猷日麗太常擅禮樂之宗瑣闥高聲  
 通政司駁封之柄公履盈思挹將拜表以乞  
 聞而獎眷彌殷晉職都憲雖公未以節鉞出鎮固庶司百度之所總也  
 公則凡几温温不自用而用人虛懷其若谷焉至申詞令而飛白簡之  
 霜扶奸邪而奮破柱之勇抑又斷斷如也及四牡騤騤為  
 天子代祭南海贈爵益級古所稱同律加地者非耶至歸里後惟日與  
 戚友續耆英香山之社於世俗榮利泊如也而心切時事家不忘  
 國以洛陽地未析畝諳諳告之長吏如河夫一役公所力請蠲免者也

傳  
 八

公以德惠及人類如此大抵公之生平廉以持己靜以寡慾寬以御眾羣以保世故能順受介社令終有俶且克昌厥後也公生於萬曆壬子正月十八日卒於康熙丁卯十二月二十三日壽七十有六卜於康熙己巳十一月初三日葬北邙之新阡公初配穆氏累贈夫人繼黃氏封夫人喬氏封恭人梁氏待封男嘉孚恩廕官監候選國子監典簿余季女配焉孫三萬山萬戶萬選萬山聘余姪長葛教諭賈恒女萬戶聘庠生穆公諱瑤女萬選聘壬戌科進士兵部車駕主事前翰林院庶吉士袁公諱拱女俱余女出例並書之銘曰

廉貞者其德也休容者其量也效蕃宣享期頤生順而沒甯體胖而心

舒繁惟董公萬年之攸居

刑部尚書敏果魏公象樞墓誌銘 陳廷敬

國朝以理學名儒爲時用有清節直聲謀議勞烈聞天下則刑部尚書致仕魏公自公卿大夫以至窮閭委巷有識之士莫不樂道其行事而慨然歎慕其爲人蓋公之學用於時而天下信之久矣若夫

朝廷之知公與公之受知於

朝廷

君臣遭遇之隆俾得以行其所學世之人容有不得盡知者焉今欲誌公而傳之無已亦第舉其世之所能知者而於其所不能知者則俟之百世以後之知公者而已此亦公之意也公起家

先朝為名諫議其始彈擊封疆大吏中外憚之由刑科給事中轉工科右給事中刑科左給事中時

世廟初親萬幾公言慎起居盡啟沃責備時宰人為公危

上曰給事中言是因災異言天變為人事所致語多忤權貴者

詔廷臣集議左給事故事不與議公則抗疏請與議議時面折諸貴人無所阿避由是眾皆側目矣遷吏科都給事中掌大計戒僚吏絕賂賂

日夜宿省中邸寓則令兵馬司傳檄關防於是言四事其一事

上尤嘉允謂言官糾拾例當復雖失實不當反坐得

旨比年糾拾反坐言官壞吏治塞言路其已之所糾拾與麗八法同科

編之

令勅又言言官得罪宜治以考功法不可置重典在諫垣前後疏凡三十餘上其大要崇治本別人才修實政通民隱皆關時大政於是忌者思有以中之而未得其牙蘖也會故相溧陽得罪遂藉是以傾公

上察其誣釋勿坐然方其時倚重言官比事未發不糾舉謂何於是則空垣皆鐫級而黜之公坐是黜爲詹事府主簿稍遷光祿寺丞尋乞養母太夫人以去講學讀書修身教家以化其鄉人居十年太夫人歿喪葬悉準古禮當是時

今天子銳意堯舜三代之治政具畢張進賢退不肖思得學問經術有名跡可用佐

國家興理平者於是相國益都馮公首薦公

上召公以病辭再

召趨朝授貴州道御史公初進見退而喜曰

聖主在上以宏太平無疆之業實惟其時矣一切小功近利姑且補苴

之論非所以告

君也乃言教化爲王道所先滿漢臣僚宜敦家教以廣盛化言督撫有不容不盡之職分有不容不去之因循宜責成互糾並請慎重督撫之選言科臣余司仁欺罔不法言湖南布政使劉顯貴侵公帑不當內陞言制祿所以養廉今罰俸例太嚴密請紀過以示罰增秩以示恩言朝儀祀事貴肅言戒淫巧以正人心言輯禮書以勵天下前後所言

上多褒納比一年陞京卿留管御史事未幾遷左僉都御史是時方急  
滇事用兵公所言戰守機宜有密奏輒削其稟累遷順天府尹大理寺  
卿戶部左右侍郎措兵食察帑藏公經營擘畫為多蓋公十九在言官  
言官有章疏故其議論風采在人耳目間恆易有所豎立六曹卿貳以  
循分盡職為賢而已其可傳于世者嘗少公則不然至是又上三疏言  
事曰確估值以杜浮冒曰核關課以防侵漁曰簡藩司以清賦稅皆  
命確議以聞公在戶部稍久聲績益著左都御史缺

上特簡任公公則首請申明憲綱其言曰國家根本在百姓百姓安危  
在督撫督撫忍肥家悞國以屬官之奇貪為一已之奇貨耶臣願諸臣  
為

國家培元氣為

朝廷正紀綱為臣子勵名節列十事以上

俞旨嘉焉次言吏治漸壞公道宜彰今貪官廉官參處同例盡職溺職  
保薦無分豈稱賞罰至意舉清廉知縣陸龍其効知州曹廷俞最貪宜  
斥既又舉督學道公明者二人貪墨者二人廉者或復其官或不次用  
貪者悉置諸法其時為吏者肅然知警動矣為左都御史九月遷刑部



尚書上言

主上宵旰憂勤臣不敢計身家恤嫌怨奉

陛下之法與海內臣工共相遵守臣忝風紀之司職多未盡敢援漢臣汲黯自請爲郎故事得拾遺補闕辭新命而就見所領職

上鑒其無欺從之仍加刑部尚書銜一日拜三疏言撫臣溺職司官不法等事疏甫入而地震公言地臣道臣失職則地反常臣總風憲咎實在臣是日獨被

召對近

御座前語移時或至泣下其言祕不傳公旣於言無所不盡尤留意人才所薦引皆蒙擢用至是又列薦侍郎以下十人尋復申刑部之

命始去言路然公始終以言表著者如此其爲司寇持法不撓嘗曰法

自

天子寬之則爲施仁刑官市恩則爲散法至遇

上所矜宥則又未嘗不對僚屬感頌德意宛轉以求其法之可生也康

熙甲子春以病乞歸

上溫旨慰留八月再乞歸降

旨稱其實心任事令以原官致仕馳驛回籍

恩禮有加焉蓋公之進退不違乎禮而其所建白施設彰彰如是可謂能行其所學者矣夫公之所以能致此者本

主上知公公受知之深故也不然公抱其學修其身施於家而已矣化其鄉人而已矣其所建白施設豈能彰彰如此之盛哉又豈能進退不違乎禮如此哉是以記公之事而推本於

君臣遭遇之隆以見

君之得臣臣之得行其所學非偶然也戊午鄉試

特命公磨勘順天試卷與公偕命者兵部侍郎孫公光祀及余余時爲翰林學士從公後公則相率宿禮闈如鎖廳校士竭日夜力繼晷焚膏覃思品薦蓋是科黜者三人其臨事精審有力皆此類也大臣巡察畿輔則

特簡命公與偕行者吏部侍郎科爾坤公兩人同心諮訪誅翦奸慝稱使命焉奏事殿廷

命侍臣傳諭居官勤慎每當敷奏剴切詳明不負職任

賜御書唐詩一卷清慎勤恪物大字各一幅廷臣間賜貂朝衣於公則

論以今年暫著來年別製更賜公臥疾數日朝

上見之命近侍問公飲食如何他日

賜葠膏一器人葠二斤自餘恩意與羣臣同者不書書公之特被者如此則

上之於公爲何如也公之歸也陛辭

上曰比行當三入朝入則賜大內珍饌

命內侍視公所食幾何再入則

賜茶三入則

賜御筆題寒松堂額古北口詩一卷以榮其行去國之日朝士大夫祖

餞國門之外道旁觀者相與感歎以爲

君臣相遇近古未有所謂進退以禮者不其然與公歸而張額于堂藏

書于閣更有書數百卷無長物顧瞻而樂之笑曰尙書門第秀才家風

貽子孫足矣公歸三年而卒康熙丁卯七月二十九日也得年七十有

一 上聞悼惜

勅所司給祭葬如禮諡曰敏果蓋此皆公事之可記世之所知其所不

能知雖余亦不得記焉公諱象樞字環溪號庸齋以  
 賜額故晚而稱寒松老人蔚州人也其先江南鳳陽人明永樂中從軍  
 北渡河以武功顯世授明威將軍隨侍代王之國大同襲指揮有遷蔚  
 州者數傳至儒官公諱宣有德行隱居不仕王父諱九經考諱卿孝義  
 聞鄉國爲新城主簿兩世皆以公贈資政大夫刑部尙書祖妣劉氏妣  
 蔣氏李氏皆贈夫人李夫人生二子公其仲也公生而聰穎英異稍長  
 孝弟忠信出天性壬午以春秋舉于鄉癸未上公車比入試矣聞王父  
 病急馳歸時流賊披猖所至以官職挽人士公奉母居山洞中賊慕公  
 名大索不得我  
 朝丙戌首設科舉進士選庶吉士歷今官公娶李氏太學生名經權女  
 封夫人男三人學誠壬戌進士內閣試辦事中書舍人學謙學謚俱庠  
 生幼某嗣公兄某爲後女三人一適天城參將劉君三汲子鄒平縣丞  
 天賜一適大同府中路通判李君濬子候補內閣中書舍人恆姚一適  
 陝西平涼府通判姚君永康子之稷孫一人吉祥公將葬學誠以狀來  
 乞銘以余公之鄉人也謂稔知公嗚呼余何以銘公公自少至老未嘗  
 一日輟書不讀讀有所得未嘗不見之行事而尤遂於宋儒之書故所

事八

得于理學者爲尤深所著有儒宗錄知言錄若干卷公嘗謂余曰昔孔子沒羣弟子各以其學傳四方自子夏教授于西河之上彬彬乎文學之風晉有人哉薛公文清以來曹公眞予而後斯道將猶未絕也子得無意于斯乎余愧公言而莫之能學也余又烏乎銘公旣不得辭則排纂公事而繫以銘銘曰

斯文未墜誰與作者四祀孔明河東磊砢參井之墟有爛其書于代有光豈適鄉閭惟蔚州公翼翼崇崇敬我桑梓惠我顓蒙開來繼往爲天下宗相彼洛闢誦言滿家干祿則已吐棄如遐公喟然云豈謂是耶其辭金腹其道瓦礫或飾其貌或騰其說公探密微老而彌樂公有令聞流于海邦公有偉行勒之鐘鏞銘公宜此永藏幽宮

又資政大夫刑部尙書諡敏果魏公神道碑

徐乾學

刑部尙書魏敏果公之葬在某原有司以天子命襄其事於是

諭祭有碑而太宰澤州陳公爲之誌銘康熙二十八年夏五月崑山徐乾學復刻其墓碑曰蔚州魏氏其先鳳陽人明永樂初從軍有功以明威將軍隨代王之國大同世襲大同衛指揮使其後支子遷蔚州累代

隱居行義有諱宦者爲儒官尤爲鄉里所推公之祖考諱九經考諱卿  
爲新城主簿皆贈如公官祖妣劉氏妣蔣氏李氏皆贈夫人公李出也  
公諱象樞字環溪又號庸齋少讀書日誦數千言嚴重無子弟之過王  
午舉於鄉偕計吏入都既至聞新城病奔歸遂遭大故時寇氛方熾士  
大夫爲所得帆被汙公艱難喪紀奉母窟山谷得免

世祖皇帝龍興遼水入關定鼎丙戌開科公中進士選庶吉士館試賦  
詩有云上溯羲與軒而及濂洛澤慷慨天人期區區非所畫館師重之  
明年改授刑科給事中尋轉工科右給事中刑科左給事中時  
世祖皇帝初親政公所條奏彈劾凡二十餘上最後請

聖躬慎起居一疏詞逼輔臣大略言

聖政維新機務孔多中外相望治平非同昔日如

皇上近巡京畿輔臣當陪侍法從以盡啟沃之忠儻遠有所幸亦宜諫  
止

鑾輿以副保傅之責人謂公獲罪且不測卒奉

俞旨又因災變陳言則謂天地之變乃人事反常所致語侵權貴尤亟  
下部院科道議之左給事例不與議公固以請許之公與諸臣抗爭是

非在廷爲之側目卒無以折公也已丑分校禮闈陞史科都給事中會  
大計鎮廳閱冊令兵馬司晝夜巡徼一時凜凜復上四疏皆言計典其  
一以爲糾拾之舊制當復而言官不宜反坐疏下所司確議遂著爲令  
又言言官進言不寔第宜以考功法處分不可加以罪譴闕敢言之氣  
督撫會推宜核事寔勿徇虛名又陳四款以佐

聖主勤民大政詳陳民情民食民困之大端皆

報可會溧陽得罪坐言官不先事發六科之長皆斥公隨例降補詹事  
府主簿累陞光祿寺丞己亥得請終養家居講求理學以躬行寔踐深  
造自得爲宗丁李夫人憂喪葬悉準古禮壬子服除益都馮公方入閣  
特疏薦公清能矯俗才堪辦事

上卽召公公以疾辭再

召乃趨朝有

旨以御史用八月授貴州道監察御史滿歲內陞京卿仍管御史事公  
方嚴爲中外所憚四方餽遺無至門者公自

先朝告歸十餘年起自田間人見

今上出謂所知曰堯舜繼世臣敢不盡其愚忠其所言大要以爲方今

俗尚奢靡人鮮廉讓寔政治之所宜先要以制度數核名寔杜欺罔定  
民志盡臣職

上皆以公言爲是是歲冬十二月擢都察院左僉都御史明年二月拜  
順天府府尹四月除大理寺卿七月陞戶部右侍郎十一月轉左侍郎  
一歲五遷在戶部方西南用兵有籌餉三疏其略以爲杜浮冒防侵漁  
清賦稅生財足食之正經也

上因命公同侍郎班公迪清查部庫八閱月而事竣

上嘉悅之戒于陞都察院左都御史公曰憲府任重非僅言責勉爲  
皇上風勵百司使大法小廉足我願矣首疏申明憲綱十事言

國家之根本在百姓百姓之安危在督撫願諸臣爲百姓留膏血爲  
國家培元氣臣不敢不爲

朝廷正紀綱爲臣子勵名節

特旨謂切中時弊立見施行舉廉介知縣陸龍其復其官劾貪酷知州  
曹廷俞置諸法中外肅然九月與侍郎孫公光祀學士陳公廷敬磨勘  
順天試卷因條陳科場八弊嚴立關防之法復條學政十弊舉學臣賢  
者勞之辨邵嘉參劣者盧元培程汝璞士論快之己未春二月內殿奏



對畢

上命翰林張英高士奇捧

御書唐詩一卷清慎勤格物大字各一幅賜公曰

上以爾居官克稱此三言奏事剴切詳明不負職掌故有此賜他日

賜紫貂披領

上諭公今年暫著明年別製爲卿換之公掌憲未滿歲有刑部尙書之

命上疏言當貪風日長吏治不清大吏因循小民困苦之際仰見

皇上宵旰焦勞於上臣不計身家不避嫌怨奉

朝廷之法與海內臣工共相遵守內而科道外而督撫參劾之疏屢達

御覽已有澄清之機臣職風紀夙夜兢兢不敢自安昔漢臣汲黯自請

爲中郎補過拾遺臣亦請辭司寇留御史臺

上可其奏遂加刑部尙書留任總憲於是方上疏糾參司官劉源溺職

撫臣某卽日京師地大震公與副都御史施公維翰入奏曰地道臣也

臣失其職地爲之不甯臣不能肅風紀以修職業請先罪臣以回天變

上卽召公入內殿公伏地涕泣請屏左右語移時是時用事大臣爲之

股粟然公之語近侍皆莫得聞施公迎于後左門見公淚流頰未乾也

是日公與施宿署中語施云今民生困苦已極而大臣之家日益富饒皆地方官吏諂媚上司朘削百姓督撫司道轉餽送在京大臣以天地有限物力民生易竭脂膏盡歸貪吏私橐小民愁苦之氣上千天和致召水旱日食星變地震泉涌之異又會推選擇徇私不公行間將帥復無紀律蠲免錢糧灾黎不沾寔惠刑官鬻獄豪右罔利等威蕩然貴賤倒置皆爲可憂施公曰公何不極言之公曰

聖明燭照何待吾言吾儕負

國萬死不足塞辜明日

上以六條宣廷臣集議大略如公指於是朝士或謂出於公造膝所請公之密友與子弟究不知公所陳何語也公常言大臣之誼在以人事君郝中丞浴起於徙所公所舉也其遵

論舉廉一疏舉侍郎以下有清望者十人

上次第皆用之庚申復補刑部尚書公持論以爲司寇執法之官書言士制百姓於刑之中又言茲用不犯於有司犯者固不可以宥而法固不可以斁也論者乃惟以縱姦爲寬大非所敢知若乃法外之矜全乃主上如天之德亦非臣下之所可市恩也公立心仁恕獨當官而行其

言之嚴正如此辛酉扈從謁

孝陵一慟幾絕賦詩志哀明年奉

命同少宰科公爾坤巡察畿輔公以

特典祇畏夙夜單騎案行墨吏豪家聞風斂戢為除秦甚者若而人還

報甚當

上意公老年馳驅登頓所至案牘填委積勞成疾一日

上見其羸瘦垂問

賜以葠膏一器人葠二斤公逾感激疾甚欲引去而口不忍言也甲子

春奏事

乾清門量踏於地扶歸即日疏乞骸骨

上慰留乃復力疾視事子弟勸邸舍少休公曰吾耽逸一日罪人待讞

者增一日苦矣八月具疏再請

上惜其去以詞甚迫許之令馳驛還里

諭以三觀乃行始入

賜以御廚珍饌令內臣視公食多少再入

賜茶再入

賜御筆寒松堂匾額古北口詩公歸因自號寒松老人云去國之日公卿祖餞相與感歎以爲公清勁之節始終不撓固不愧斯稱而

天子之知公亦可謂至矣公官至尙書門庭蕭寂度閣有書數百卷無異秀才時所增惟

綸誥宸章及諫草一囊而已歸後四年乃卒於家丁卯七月晦日也壽七十有一

天子覽遺疏爲之震悼典禮有加

親定謚曰敏果生平所著書甚多晚皆刪去存十之三合以奏議若干卷名曰寒松堂全集元配李氏封夫人側室劉氏樊氏子四人學誠康熙二十一年進士內閣辦事中書舍人學謙學謚邑諸生學訥尙幼女

三人銘曰

嗚呼魏公躬行君子

本朝以來諤諤一士彼其囁嚅所謂一死公之盡言亦少慙矣寔惟中孚非以掠美公忤於人人諒公只寒松晚節徜徉田里秀才家風尙書門第非余頌公公自云爾

謹案原編有請頒禮制書疏復入覲考察疏禁咨議停閣疏三首

已見經世文編今不錄

碑傳集卷八

貴筑黃彭年編訂

碑傳集卷九目錄

國初部院大臣下

光祿大夫太子太保禮部尚書王公崇簡行狀

汪琬錄

又光祿大夫太子太保禮部尚書贈太子太傅保和殿大學士諡文貞

王公合葬墓表

徐乾學

又王文貞公傳


毛際可

工部右侍郎高公辛傳墓誌銘

王熙

工部尚書傅維鱗傳

靈壽縣志



106-480

國初部院大臣下

光祿大夫太子太保禮部尚書王公崇簡行狀

汪琬節錄

宛平王文貞公崇簡字敬哉崇禎癸未進士甲申三月方為生母焦營葬在城外遂避難奔金陵轉徙吳越間久之始歸順治三年授內翰林國史院庶吉士特免教習與修明實錄尋除祕書院檢討歷侍讀遷國子監祭酒入為宏文院侍讀學士遷詹事兼侍讀學士以疾請告十二年以刑部右侍郎戴明說薦起原官尋進吏部右侍郎轉左不數月拜禮部尚書明年加太子太保文貞學問該博務為經濟有用之術在宏文院

詔察明季殉難諸臣始末即疏言在內如東閣大學士范景文以下二十有三人在外如山西巡撫都御史蔡懋德等五人或以其身仗節死或父母兄弟婦子相隨死或家人闔門大小俱死其忠烈相同宜並賜褒揚以廣作忠之典在禮部會御史乞更定帝王廟祀典文貞因疏言歷代帝王廟創自前明迄於



本朝曾經增定皆祀從來開創帝王功業顯著者至於守成令主槩不  
及與中問如商之中宗高宗周之成王康王其行事具見詩書漢之文  
帝史稱其節用愛民家給人足宋之仁宗恭儉仁恕明之孝宗亦與仁  
宗相類憂勤惕厲終始不渝此七君者宜百世祀不當以守成見格又  
言宋臣潘美不當在從祀列張浚三命為將而三敗一敗於富平關陝  
遂陷再敗於淮西鄆瓊叛命三敗於符離中原遂不可復且劾李綱殺  
曲端與岳飛議不合雖為南渡名臣初無灼然可見之功亦當罷其從

祀  
詔議裕祭禮疏言宜奉

肇

興

景

顯四祖及

太祖南向

太宗東向

詔議大享殿合祀禮疏言

本朝所封啟運山宜附中岳壇天柱隆業二山宜附北岳壇如前明附祀例時有建議請祀周公於孔子廟者疏斥其非又有議北岳恆山不當立廟曲陽者非是文貞以先儒言考之曰按曲陽有三兩漢地里志上曲陽屬常山郡在恆山北谷下曲陽屬鉅鹿郡有鼓聚昔陽亭晉荀吳滅鼓其處也今之曲陽既非鼓聚又不在北谷距恆山絕遠昔趙宋時北岳不在境內以真定在汴京之北故移置曲陽今天下一統宜從議者移祀渾源州得禮之宜

上皆從其言十八年冬以病疏請解任方文貞任國史院學士長子文靖升宏文院學士

世祖諭曰父子同官固爲盛事然令肩隨侍直可乎遂進文貞侍郎及文貞引疾文靖先已爲禮部侍郎加尙書銜父子同長禮部朝論榮之文貞林居十五年卒年七十七平生清慎不苟於財嘗貸前明中貴何某金百兩何死於盜無所歸金舍諸僧寺且設位爲文以告之同年生宋某寓赤金百兩白金千兩其家不之知宋歿促其子至與之其子大驚願以半奉公笑應之曰如是則與乾沒有異乎悉予之無聲色博奕之尙晚歲益嗜澹泊禮遇單門後進到卽延入握手歎曲著青箱堂詩

十卷續詩十二卷文集十卷沒祀鄉賢

特命諸王大臣皆往酌酒亦異數也

謹案王文貞高司空皆為明進士傳司空為明舉人故依例附諸

大臣之後為下卷

又光祿大夫太子太保禮部尚書贈太子太傅保和殿大學士諡文貞

王公合葬墓表 徐乾學

今太子太傅大學士宛平王公在

世祖皇帝時與先太子太保禮部尚書文貞公後先入翰林文貞公拜

國史院學士太傅公亦遷宏文院學士文貞公之為禮部也太傅公亦

以考績加禮部尚書然勳階皆次文貞公下故不得追贈其先世及誥

封父母文貞公之屢得恩典也輒地封其本生父母至太傅公之加尚

書始得以一品誥命贈梁夫人云及

今皇蒞政太傅公在中樞文貞公薨後服闋膺爰立之命次年恭遇

太宗皇帝實錄告成以勞晉秩太子太傅然後

覃恩及于四世贈文貞公如其官梁太夫人亦再贈一品公既拜命嗚咽屬某曰吾受

國異數榮及所生願吾親不得見矣卽銘幽之辭已不及備將揭石墓道載前人功德表

天子殊恩願非子文不可敢固以請某惟乙未歲以貢入京師拜公階下公一見待以國士指授為文旨要使稍有所聞以至今日者皆公力也敢以不敏辭謹按公行狀及墓銘碑文為記其大略如左公諱崇簡字敬哉其先家任邱白公曾祖諱龍始來京師祖諱鏗考陝西參政加右布政司使諱愛母張氏三世皆以公贈禮部尚書妣贈一品夫人愛無子以兄錦衣衛正千戶諱爵之仲子為後即公也錦衣公及本生嫡母張氏生母焦氏並得地封公七歲喪布政公未幾錦衣公亦歿早孤熒然嗣母張夫人督之成立情過己出公事兩夫人曲盡孝道年二十六舉鄉試負海內重名為清流引重中崇禎十六年進士甲申三月京師破值焦夫人喪給假治葬在外挈家潛奔金陵轉徙吳越間久之江南平北還時

世祖廣求文學耆宿以充館選首授公內翰林國史院庶吉士特免教習預修明實錄除秘書院檢討歷侍讀國子監祭酒宏文院侍讀學士詔察明末殉難臣公疏言內外死事者合二十有八人以上皆得贈諡

時論以爲允遷詹事府少詹事兼侍讀學士如故以疾請告十二年侍  
郎戴公明說薦公可大用

世祖違部議特起之其明年以原官兼宏文院侍讀學士遷國史院學  
士及太傅公既遷宏文院

世祖臨朝歎爲盛事然以父子不可同列擢公吏部右侍郎兼學士尋  
轉左遂拜禮部尚書明年加太子太保公建言帝王廟祀宜及守成令  
辟因列商中宗以下七人以上又言宋臣潘美張浚宜罷祀

詔從其言公學問該博尤諳練歷朝典故居禮官多所建白皆折衷古  
今合於經義時議翕然歸重然公自以父子並列六卿彌存謙退以夙  
疾請告者再

優詔不許會

世祖崩復固請如前十八年冬始得

子告康熙三年病良已遂以老乞致仕春秋纔六十三自是徜徉林下  
者凡十有五年初公值喪亂播遷本無意當世用遭遇

世祖皇帝以文學被知遇時與道會感激思奮然其確乎不可羈縻以  
富貴之意時時見於言語發於吟詠後堅請至四卒行其志

本朝大臣年未及乞休於

主恩方渥之際進退終始卓然大節如公比者前此所未有也公家食益讀書引掖後進爲文章凡四方人士至都者以不及見公爲恥客至攝齊升堂必下階握手酌醴延款恆至夜分乃散其論文曰爲文必本於道道不出尋常行習之間自世有學道之名此道之所以日弊也又曰學莫要於自得知之非艱行之維艱知而能行此聖賢之所以幾於得也平生嗜學不倦年七十欲依古人以每歲盡讀五經爲夏課其爲文雖卮言爛語無非仁義道德嘗爲青箱堂記云階前闢路臺方丈餘歲之夏秋日暮父子兄弟六七人率坐臺上或莊論詩書或稱述祖父遺事旁及故舊家世之興衰以爲勸誡一偶不至徬徨四顧若有缺然者世傳陳仲弓之家門雍穆公蓋近之至今太傅公秉鈞贊化一本公之家學而推而大之以及於天下則傳所謂施於有政者豈不然歟公元配梁夫人撫治鄖陽右副都御史贈兵部右侍郎諱應澤第二女以淑慎佐公成名孝廉常口授論語孝經教其子女公年二十卽請置側室廣嗣續其卒時年三十八公哀思之終身不再娶公薨於康熙十七年十一月某日

上聞震悼

救給葬祭如故事諡曰文貞太傅公與其諸弟以十八年四月某日葬公於梁夫人先所窆地畏吾邨之西原後十年而乾學復表其墓道太傅公名熙公冢子丁亥進士見任太子太傅保和殿大學士兼禮部尙書加三級梁夫人出餘子樞官監生湖廣常德府桃源縣知縣卒次然官監教習見任刑部江西清吏司主事次照廕生見任雲南按察司僉事分巡驛鹽道次燕廕生見任江南鎮江府知府加二級次默歲貢生見任兵部督捕司務孫男十一人長克善廕生江西按察使司僉事分巡驛鹽道次克昌廕生戶部陝西清吏司員外郎加二級克寬監生次克任庠生克遠庠生克端監生克剛雙鶴蘭蓀穩住存住曾孫男五人長均次增次基次長麟次仲鳳余及公門垂四十年期待良厚再至京師公已薨逝自愧迂疏伉直與時齟齬茲請告將行撰公墓文深媿無所成就辜負知己特書公雅尙及學問得力處以告來者庶幾百世以後聞風興起也夫

又王文貞公傳

毛際可

公諱崇簡字敬哉其先隸河間之任邱曾祖龍遷居都下祖鏗父愛本

生父爵皆仕明以世德顯公生而穎異少爲諸生有聲左公光斗督學順天得公文以公輔期之公于書無所不窺尤究極六經以爲士君子欲進斯世于三代之盛必以經術爲本嘗論春秋志在尊王而以夏時冠正月豈爲下不倍之義乎孔子所書之春卽周之春正月卽周之正月又云詩之正變以聲不以體宮商角徵羽正也變宮變徵變也一時宿儒翕然宗之丁卯舉于鄉癸未登進士第明年闖寇陷京師遂盡室南奔

皇清定鼎始問道歸里會

世祖遴選文學侍從之臣首擢公庶常分校丙戌會試陞秘書院檢討  
歷侍讀國子監祭酒宏文院侍讀學士詹事府少詹事以疾告歸時有薦公可大用者

特旨起補原官尋陟國史院學士先是公長子今相國亦爲宏文院學士

世祖顧笑曰父子同官固爲盛事然令肩隨以侍班可乎特晉公吏部侍郎不數月拜禮部尙書又明年加太子太傅而相國以考績加禮部尙書公顧以盛滿爲憂因夙疾屢疏乞罷皆不允已而

學傳七

五



世祖升遐公日夕治

大行喪及

今上登極禮勞劇疾益甚再疏請告得允越三載遂引年致仕公歷官  
殫心職掌所言皆洞中窾要其在翰林日有

旨察明季殉難諸臣公疏在內大學士范景文在外巡撫蔡懋德等宜  
褒揚以作忠義之氣時喪亂後聞見失實公疏出遂為定論及官宗伯

奉

詔議裕祭禮言人人殊公言

肇

興

景

顯及

太祖宜南向

太宗宜東向出入證據多宋儒司馬光諸人所未發又議大享殿合祀

禮公言

本朝所封啟運山宜附中岳壇天柱隆業二山宜附北岳壇時議者謂

北岳恆山當移祀渾源州不應立廟曲陽公謂趙宋時北岳不在境內以真定在汴京之北故移置曲陽考漢書地理志所謂曲陽者有三惟上曲陽屬常山郡在恆山北谷今之曲陽距恆山絕遠議者言是又謂創業守成難易正等如商中宗高宗周成王康王漢文帝宋仁宗明孝宗皆宜祀歷代帝王廟其議論精卓不磨類若此公雖歸老于家凡朝廷有大政士大夫疑不能決者皆就公取正焉年七十七以壽終竊嘗慨漢高以馬上得天下承秦火之後禮崩樂壞而當時嫺禮制者僅一叔孫通故儀文草創不足為萬世法仰惟我

世祖睿烈宏謨混一區宇即超然遠覽前世興衰治亂之由起弊維風整肅百度制作之隆上軌往古固由

聰明天亶亦賴大臣如公等贊襄帷幄以開文明之化嗚呼盛矣今上纘承大業

特簡令子以名家碩德之裔由大司馬入典機務而相國當河海清晏聖德日新相與黼黻

皇途益取庭訓而光大之後先濟美宣力兩朝考諸史冊可方公之先世王公祐及其子旦然公以盛德享大年

躋髦期則尤不易逮遺命吾儒以理為主不得隨俗作佛事及公歿

朝廷遣使唁問

賜祭葬如禮禮臣請易名文貞

制曰可及入祀鄉賢

特命諸王大僚而下酌酒以奠澤宮之旁冠蓋櫛比父老聚觀歎息以

為希覲六子長卽保和殿大學士熙次檟桃源知縣次然建昌知縣次

照工部虞衡司郎中次燕戶部山東司員外次默國子監學正孫克善

刑部山西司郎中克昌陝西司員外俱相國子餘皆績學厲行振振未

艾所著有青箱諸集文在廬陵南豐間而詩格直追初盛唐人平生薦

拔士知名者甚眾

毛際可曰余嘗執經于王浴青先生先生文貞公猶子也故得其行事

尤詳使公得居鼎鉉調變之位必卓然有以自見乃急流勇退若以讓

之後人而已不與焉語曰不于其身必于其子孫諒哉

工部右侍郎高公辛傳墓誌銘 王熙

乙丑孟冬原任工部右侍郎韓城高公以疾卒於家越明年祠部請卹

賜諭祭如例褒終之典備焉於是丁卯春其孫亦烜將大葬公乃件繫

事狀重趺京師介公門下士長洲宋公謁余而請銘惟公與先文貞實同舉南宮仕又同朝有執友之誼既又與余同官水部後先三十餘年其休光令聞所得於觀記間者蓋歷歷可指數也安敢以不文辭按狀公先世籍直隸河間府滄州青縣人故居在長蘆鎮始祖諱圭仕元爲吏部尙書一子成早卒以孫益蔭爲韓城令明初遂於韓之寺莊里家焉傳七世至諱仲行者邑增廣生以公貴贈通議大夫敦崇實行雅善詞賦生五子幼諱愉乙卯副榜贈通議大夫性孝友尙節槩嘗鬻產濟荒邑侯建坊旌之祀於警宗卽公之父也公申明癸未科進士值我皇清定鼎拔茅彙征授大理寺左評事加一級戊子同考順天辛卯擢科員歷吏戶兵刑科給事中乙未會試同考丙申陞順天府府丞遇恩詔加一級轉大理寺左少卿戊戌充讀卷官侍經筵陞太僕寺卿通政使己亥給假辛丑補原職晉督捕右侍郎壬寅終養服闋補工部右侍郎庚戌

覃恩封通議大夫公始生時室有異光母王太夫人見金甲神環列預卜其不凡稍長穎悟絕人讀書過目成誦弱冠登賢書癸未眷闈尙居贈公憂忽改期秋試乃獲雋焉初爲廷評讞決審慎克舉其職及歷諫

垣正色敢言諤諤不避權貴凡人才賢否政治得失靡不愷切入告前後所奏輒奉

俞旨公鄉韓城土狹人稠閭閻口食仰給延綏宜洛諸郡伏莽出沒不常公疏請設兵神道嶺以衛車牛民賴以濟潼關去韓數百里例有徵粟輓輸甚苦公再疏免運邑民德之至立碑感頌公之澤及桑梓如此其於民生休戚痾瘵乃心不忍膜外視之槩可知也時同鄉寶雞黨公致政歸

世祖從容問曰卿引退秦中誰可參酌國是對曰通達政體者督捕霍達也直言敢諫者刑科高辛傳也

上領之鄉會分校矢竭公慎所得皆海內名宿長洲宋公其最著者也任京兆時秋闈前大羅諸生忽有中使傳

命送柴范二生入闈公弗許

世祖章皇帝召至乾清門詰問何故不令若人闈公仰對曰臣奉命衡文知爲朝廷取眞才恐伊等狡言罔上耳

世祖章皇帝大笑因速令二生入公又奏曰臣職司考校要當試之歸出何晏也一題試畢方錄於是直聲震一時由是益知公忠誠可大用

矣其晉陟卿貳也所至皆振飭紀綱清釐習染赫然改觀在督捕則執法平允絕株連濫及之弊在工部則勾稽瑣屑極拮据之勞復爲上所器重方駿駸柄用而公以監修

太和殿積勞受寒遂患足疾力請乞還

上溫旨準暫假調理痊復起用歸而堅臥不出者十餘年而公已老矣公狀貌魁傑望而知爲偉人天懷伉爽不設城府不立崖岸飲酒至石餘不亂性純孝居贈君憂哀毀骨立不御酒肉鹽酪者三年晚侍王太夫人色養承歡依依孺慕每值壽辰率其夫人長跪進饌執喪哀痛杖而後起葬祭盡禮必信必誠居恆樂善好施急人之急傾囊倒篋不名一錢門下士有抱商瞿之憂者解金帛爲之納妾尤篤於故舊練裙葛帔叩門嘯嗚者告則必有以應其得請而歸也治一別墅題曰懶園疊石濬池藝花蒔藥臥遊偃息若將終身賓客過之者輒刻燭賭碁笑言移日歲時召同學老友置酒盡歡問賦詩爲贈有青衫君子在白髮故人親之句軍興旁午饑饉頻仍盡散其所積以濟貧乏所全活甚眾族人有不給者爲之謀棗餼代賦役理嫁娶其秀良者置諸家塾延師教之復施田以供祭祀閭門之內規重矩疊足爲合境師法閭里有是非

可否造請質成片言折服其偶敗於檢者面亦相戒毋使我公知之王  
彥方之居太原司馬温公之寓洛下不是過也跡公生平清忠亮直孝  
友睦嫻蘊抱寬宏襟期磊落有辭金卻玉之操而不以矯異立名有伏  
蒲折檻之誠而不以訐直賈譽緩急仗助則兩范遜其仁心恬退止足  
則二疏避其高致見機明決寄託遙深營綠野午橋之墅非耽樂乎林  
泉吟黃花晚節之篇豈流連於詩酒敦風節以勵俗捐奉養以濟人出  
處咸關於重輕致澤何分於朝野人皆惜公之未竟其用而不知功著  
於

國行修於鄉爲名臣爲舊德公亦奚憾也哉公有令子出宰霍山方報  
最而訃至公歎曰此有數焉復何尤雖神氣如常而忽忽不樂乙丑十  
月疾革徹瑟之夕止呼朝服隨我無一言及家事嗚呼瓊瑰入夢蛟龍  
告災卜子夏之離索奚堪喪子楊伯起之清白固應有孫彌留牀蓐語  
不及私瞻戀

闕廷歿而猶視非所謂昭明有融高朗令終者歟公姓高氏諱辛傳字  
弗若別號效元生於前萬厯四十一年癸丑七月初三日卒於康熙二  
十四年乙丑十月初六日享年七十有三元配王氏封淑人繼配段氏

再配張氏俱封淑人子二長櫻霍山知縣先公卒次榛太學生考授州同以執喪不勝哀而卒女二人孫二人長亦烜次亦烜庠生孫女二人曾孫一人亦烜出亦烜卜于某年月日葬公于某鄉之原余爲公年家子奉教有素猶記公七十誕辰余撰祝嘏之詞以進輒取人惟求舊之語爲公勸駕冀得望見顏色曾幾何時竟忍淚執筆而誌公之墓其尤可哀也已銘曰

人爲  
岩堯太華俛彼咸京龍門屹如終以渭涇山川迴蟠靈氣斯判篤生偉

國楨幹皦皦高公玉質金相魁磊特達風采激昂起家廷評晉擢騎省蹇諤立朝號稱骨鯁早囊封事軫念民窮清卿數厯夙夜匪躬爰佐中樞爰掌邦土奏績荒閭程工執度志存勇退解組歸來匡居坐嘯樂聖銜杯分宅指困周急賑乏囊鮮餘金家無長物洽鄰悖族教養兼修門內雍穆萬石恬侯道重關西化行瀟澹爭者質成望廬而返鋒車未起箕尾遽升崆峒震折一柱摧崩令嗣早逝琴書誰與有孫代興窅窅是舉松楸堂斧佳城鬱蒼一坏千古長瘞靈光惟公與德貞珉同壽勒石幽宮用示不朽



工部尚書傳維鱗傳靈壽縣志

傳維鱗原名維楨字掌雷號歛齋永清長子也少穎悟郡守范志完最器識之中崇禎壬午科舉人順治丙戌成進士選入翰林爲庶吉士尋授編修分修明史戊子典試江南旋晉左中允以直言忤執政出爲東昌兵備道駐臨清從來仕者重內輕外人或唁之鱗曰內外皆王臣此正可以別利器毅然之任臨清當水路要衝凡大師經臨設法供應不令民間輸半菽齊民感之甲午山左大饑施粥設賑安集流亡賴以活者凡數萬人又屯田爲民累窮年芟蕪卒無成功鱗著屯田苦民書御史采以入告盡除之民賴以安居二年治行爲天下最

特召爲少廷尉子子變調胄監遷太僕寺少卿陞通政使甫五日左副都御史缺銓部未及疏名

世祖謂鱗曰無以易若卽拜左副都御史明日上勸學疏纒纒數百言意極忠懇給諫陳協見曰此十四年來第一疏也又密策邊海機務上嘉納之戊戌遷戶部右侍郎尋加太子少保己亥有海警

詔親征簡鱗以從俾總理糧餉會海寇平遂不果是年冬請假治母塋歸里靈邑地瘠民苦賠糧乃率士民具呈請蠲荒賦得

恩旨蠲糧若干詳田賦志辛丑假滿補工部右侍郎陞左侍郎旋晉工部尚書

賜冠服裘緞有差壬寅冬十一月天雨雪冰凝丹陛鱗早朝墜階傷左臂

上遣內大臣存問者再越數日復遣醫診視

賜藥餌被褥督工

孝陵以勞瘁成痼疾丙午疏請養病得

旨回籍調理抵家漸有起色丁未春丁外艱哀毀骨立自是病日甚夏

五月卒於家

賜祭葬所著有明書四思堂集

碑傳集卷九

賈筑黃彭年編訂

碑傳集卷十目錄

明臣部院大臣

通政使司通政使前刑部尚書東谷白公允謙墓表 魏象樞

禮部左侍郎兼祕書院侍讀學士呂公崇烈神道碑 陸潤章

子告光祿大夫太子太保兵部尚書王公宏祚墓誌銘 張英

又兵部尚書王端簡公宏祚傳 穆彤

戶部右侍郎郝傑墓誌 馮溥

資政大夫刑部尚書任公潛墓誌銘 孫廷銓

光祿大夫太子太保都察院右都御史吏部左侍郎孫公承澤行狀 王

崇簡

通議大夫兵部右侍郎永甯張公鼎延神道碑銘 吳偉業

光祿大夫太子太保左都御史徐公起元墓誌銘 金之俊

名宦戶部右侍郎周公亮工傳 林佑

又周櫟園先生傳 魯曾煜

又賴古堂詩鈔小傳 鄭方坤

又江南糧儲參議道前戶部右侍郎櫟園周公墓誌銘 姜宸英

又贈周櫟園先生序

陳維崧

明臣部院大臣

通政使司通政使前刑部尙書東谷白公允謙墓表

魏象樞

於戲是爲

皇清通政使前刑部尙書晉大儒東谷先生之墓先生薛文清後一人也其學專事求仁復性而以存誠主敬爲功要在躬行而實踐之嘗作仁敬誠贊矣曰每日隨事求仁則此心常在少有斷敬卽是自欺但不敢自欺處卽敬卽誠卽仁至於仁而事畢矣又作復性贊矣曰仁卽性也誠敬所以復其性也於戲觀先生之言以考先生之生平則皆不出乎此矣先生明季成進士選庶吉士當

國初召入翰林以忠誠受知

世祖皇帝擢吏部侍郎刑部尙書

世祖英明天縱注意刑法懲姦不拘常律先生獨謂開國規模宜崇宏

大務以寬平佐  
聖治凡事兢兢畏慎公私出人律未嘗去手丁酉歲科場獄起北闈一

二敗事已伏辜獨南闈所坐無主名先生懼非辜未敢卽讞決會有蜚語上聞

世祖怒寘考官於法降先生一級蘇松巡按王秉衡坐贓死

世祖欲沒其妻子入官先生念罪人不孥同三法司議免

世祖召先生詰問再三先生援律正對獨自引辜

世祖不懌素知先生無所欺僅降三級調用而已當是時

天威嚴重廷臣被詰者皆震栗失措先生從容敷奏不激不撓卒之感悟

聖主曲示包容非誠且敬能如是乎先生補太常考合祀議雅樂遷通

政爭冤民叩闈事侃侃方言未嘗以前故少卻值

今上嗣位

國有大事奮顏抗議尤多方駁駁進用屬遘微疾遽疏乞歸堅卧不起

於戲進不敢以口素負

國家退不敢以寵祿負一己出處較然不欺其志非誠且敬能如是乎

先生既歸杜門卻掃以歸庸名齋日取六經性理諸書研窮體究刪朱

子近思錄文清讀書錄各為一書教訓子弟及其鄉人晚歲工夫愈深

涵養愈熟深入性天之奧然益刻厲進修不肯少懈疾革集子孫問曰誠敬無心二者孰是少間曰無心涉外道當以誠敬爲主言訖而瞑蓋先生一生得力用行惟是舍藏亦惟是生順惟是歿寧亦惟是如饑之食如渴之飲欲須臾離而不可得於戲至矣故余斷謂先生文清以後一人而敘其立身行義之大仍蔽以先生之二言曰誠曰敬子繼先生登

朝居官暇相過從必以學問正宗勸勉望余殊深余陳情終養歸先生賦白華六章以贈未幾先生亦

子告家居相去二千里有便必教以學余有所問手答不倦爲余作家祠碑記仁人之言藹如子再補臺班貽書訓誨備至先生於余不獨道義之殷又情誼之篤如此先生之歿旣自爲誌其孤舉人方鴻復遣使請子表其墓子雖欲以不文謝其可得乎先生姓白氏諱允謙字子益東谷其號澤之陽城人世繫官爵生卒月日子孫葬地具自誌中不更錄於戲先生之人不待文而顯而余質言書此匪獨慰其孤之請且以告吾鄉之人庶幾覽之而感慕興起發憤力學繼前人於不墜他日復有如先生之於文清者夫亦先生之志云爾若子則重負先生之志矣



禮部左侍郎兼秘書院侍讀學士呂公崇烈神道碑施閏章

禮部左侍郎兼秘書院侍讀學士安邑呂公既卒之三年宣城施閏章寓書其家求得其誌狀則已訖葬事矣閏章列在弟子於是考德撰詞碑其墓曰公諱崇烈字伯承世居安邑之運城遠祖有諱完者廬墓馴狼邑志稱孝曾大父德大父萬里父國祚皆蓄德不仕以發於公卒皆以公貴累贈顯聞公在明末登癸未進士授翰林院庶吉士會甲申國變賊中僞太師牛金星知公名遣人物色不屈過歸及

國朝熾賊平中原徵用耆舊郡縣敦促公強起除翰林宏文院檢討與纂譯書史賜白金是時闕門額俊一歲再行順治丙戌春分校禮闈秋又貳翰林宏文院檢討張公端典試江南並以得士著三遷至秘書院侍讀學士爲史局纂修副總裁賜綵幣以

思加一級贈三世如其官辛卯頌

詔廣東就加禮部右侍郎兼秘書院侍讀既歸

天子以爲勞賜善馬轉禮部左侍郎兼官如故會旱求直言公疏稱用賢可以弭災

上特敕同內大臣賑視畿甸得便宜言事公所舉刺數人皆稱其可否

天子嘉納而公引年乞骸骨甚力得

優旨致仕乘傳歸十年而公卒年七十有二公爲人質古少從曹公善  
繼講學步趨守寸尺侍御李公曰宣闢宏運書院禮致曹先生公曰從  
與遊又從人都詣首善書院聞諸鉅公耆宿之說輒以程朱學爲己任  
是時天啟間魏閣用事毀天下書院公顏其齋曰慶見講論不輟故學  
者稱公爲見齋先生其官京師敕門者無拒客客無少長疏戚容接霽  
然于以私則搖手不應其人慚汗又好語之曰窮達分定卽營營無銖  
黍益也閏章以丙戌鄉舉受公知暨官刑部尙書郎數就請業公曰子  
文與道近不患不名世獨願子爲顏曾耳其期待如此分主貢舉必先  
集家人誓而後入莫敢私纖芥有使命則戒勿擾驛毋納餽嶺南之役  
歸橐中惟端硯數方而已拯人急卽不問有無家居坐卧一草堂視嗟  
侍御史長吏有至者講學外無它語咨以事利病卽侃侃言之不諱爲  
文章不事浮藻必歸於道德指授來學反復懇懇山以右縉紳後起之  
賢者強半出其門公請告出都時諸弟子泣拜道左謝曰吾老矣諸君  
惟努力行道毋徒念老夫至今思之未嘗不流涕也生平用靜儉爲養  
生旣病卻醫藥笑曰吾壽近孔子矣復何求卒之日爲康熙五年七月

二十三日端拱而逝於平公厯官卿侍未老拂衣口無華言家無長物  
束身篤謹與物仁恕昌其道以熏乎人殆庶幾與河汾子比德矣公始  
從曹先生學及其歿也哀之如父母已又請祀於宏運書院祭必齋戒  
今宜奉公入祀其側所謂崇往以勸來也公始艱於嗣晚舉一子曰坪  
以廕當得官京曹余見之都下秀挺有父風三女皆嫁名族其在運城  
嘗建郭南名賢祠廣書院田租避鹹水鑿泉井以甦渴者行事多類此  
不勝書銘曰

滔滔下土罕道是處猗惟喆人蹈墨履繩樂羣斯恕守身斯固沈靜寡  
言峙岳涵淵論文得士受寵

天子游錫累遷公不色喜嗟公筮仕委曲艱難既顯勇退名跡以完鳴  
條之區伊蒲之側獨奮以興羣歸厥德閔子薄植公勛孔多道遠棄子  
有淚滂沱歿不及諫葬不與會銜哀勒銘敢告來世

子告光祿大夫太子太保兵部尚書王公宏祚墓誌銘

張英

康熙十三年九月子告光祿大夫太子太保兵部尚書加一級仍支一  
品俸王公自金陵上疏稱老臣疾篤且旦夕先朝露思無以報

闕恩倦倦以敬

天法

祖圖治勤民入告

天子覽奏降俞旨慰問越數日有司以公薨聞於朝

天子感悼詔議卹禮有加

特賜之諡諡曰端簡明年葬公於金陵之口口山其子工部員外郎瑜

以子與公同朝久能言公大節請銘於子子乃述公世族官爵及生平

功業行誼言論之尤著者而誌於墓焉公諱宏祚字懋自號玉銘以思

具先大夫一號思齋先世陝西三原人端毅公諱恕康僖公諱承裕相

繼為明名臣成化間端毅公從子順欽公始家於滇之永昌公曾祖良

弼公諱廷相祖封文林郎贈奉政大夫崇正公諱信父瞻雲公諱國治

萬歷癸卯舉於鄉起家新繁令遷德安郡丞歷官刑部郎中所至皆有

治聲自曾祖而下皆以公貴贈光祿大夫太子太保戶部尚書曾祖母

任氏祖母吳氏母鄭氏皆贈一品夫人公敏達宏碩自諸生時即以經

濟為學庚午登賢書丁丑副南宮歷官戶部郎中督餉大同

本朝定鼎擢公尚嵐兵備道順治二年以才能召至京師仍官戶部郎中公博通掌故尤善強記于天下州郡錢穀之

數一見能識不忘時故府圖籍散軼賦役繁淆司農特疏留公久任纂  
修賦役全書加太僕寺少卿六年加太僕寺正卿十年擢戶部右侍郎  
十五年特晉戶部尚書十八年請假回滇營葬事康熙二年還  
朝補刑部尚書未幾復調戶部尚書公在農曹閱十餘年殫精專力周  
咨博訪以定一代賦法酌盈縮之平權損益之當釐正夙弊興復舊章  
凡啟禎末年繁苛之令悉捐除之土田戶賦徭役一以萬厯間爲率書  
既成上之

世祖皇帝其大指在懲墨吏之橫征杜貪胥之私派且使  
皇上知閭閻賦役之艱難而起節儉之思使小民知版籍徵輸之纖悉  
而絕侵漁之擾裕國紓民有典有則

世祖御製敕諭載於簡端令永遵爲式此我

國家憲章之大而公之首爲裁定者也故自耶著不數年而至大司農

蓋

世祖特以計部任之矣一日御南苑召詢天下錢穀出人之數公條對  
獨得要領且多所敷陳

世祖嘉悅久之

本朝數十年來內外翕然稱大司農者必曰王公洞達天下利病奏  
牘不下數十謂安民生在首嚴私派講強兵則首嚴冒餉可謂要言不  
煩者矣又云水旱災傷望恩甚切有司查核經年始報今後一行報災  
卽當疏請又云今日民生不苦於正供而苦於雜派乞諭督撫加意廉  
察時以滇南初入版圖疏請闕賓興以廣文教慎署員以安民生又謹  
列十條大指以設重鎮稽丁田卹士紳撫土司寬新制爲至要又陳五  
事爲司道宜久任州縣宜部選投誠宜解散荒殘宜軫恤爐座宜多設  
皆切中時會疏入悉見施行公遇事沈毅有識廟堂有大謀大議必正  
色抗言務求至當不隨眾論爲可否康熙四年會以星變地震求言疏  
曰星辰有定數今異星忽見則天失其常矣坤道主靜今倏爾震動則  
地失其常矣六卿各有定制今更易太煩則人事失其常矣挽回天地  
之變首在率循人事之常中外以爲名言漕粟自通倉運入京倉車輛  
之費以萬計議者欲于水次令各旗支給可省  
朝廷輓輸之力公曰水次支給受者艱于轉運減值而糶則狼戾散軼  
于四方若支給于京倉雖有糶者顆粒皆在都下此昔人根本之深計  
不當以小利而變法公之明于大計類如此會有主裁州縣存留之計

者與公議不合又欲變漕糧官運法爲民運紛更舊制公固爭之不能得遂兩議具疏皆悉如公請而主議者益中傷之旋以失察吏胥報罷天子鑒公老成忠恪念

世祖皇帝特敕公纂修賦役全書委任優崇勞績素著

詔留公京師補兵部尙書公在中樞時綢繆區畫皆中機宜均提鎮內外之陞遷調剖分缺選授之法疏請設川湖總督以重楚蜀彈壓之寄尤公先事之智也九年以年邁乞休疏再上始得請

天子嘉公舊勞

特賜溫綸命馳驛給俸以示恩眷都人士大夫祖餞東門外作詩歌以榮公之行比于二疏有加焉南歸感疾寓居金陵屢疏辭俸

天子優詔答之不允其請去年疾革猶伏枕草遺疏謝

上不忘忠懇如此始終之義可以無愧古大臣之風矣公性純孝奉瞻雲公及鄭太夫人教惟謹能以清白世其家瞻雲公鄭太夫人歿于滇南逾數年滇省始入版圖計音至公哀號躃踊慟不欲生凡三疏請回籍終制詞益懇切是時

聖祖方倚公典掌計務

温綸慰留者再四不獲已勉以繼續視事十八年請歸營窀穸築廬墓側盡哀盡禮

天子優以卹典公父母及元配周夫人各與祭葬人子之顯榮其親者可謂至矣而終天之戚垂暮不已居金陵猶手輯永思錄數卷至今讀之尙覺淚盈盈從紙上出也友愛周至視從子璋如己子順治十八年俾承公蔭家訓嚴肅皆有法度子瑜官京師手書以清慎勤訓誠之歲不下數十紙用能克紹家學歸漢之日修學宮立義塾贍宗族周貧乏爲善日不暇給公與人忠信誠篤而奉山喬嶽之概溢于言表温恭嚴恪終日無懈容讀書至老不衰尤精於鑒拔順治十二年三月充

殿試讀卷官以史公大成文首薦果得傳臚第一康熙六年會試膺命大主考取黃初緒百五十人是科號稱得士通達治體明而能斷立法垂憲爲國之紀膺

兩朝之異數作邦家之元老遺榮知足天格平康德福如公可謂備矣享年七十有二生於明萬厯癸卯年三月初五日卒於

皇清康熙甲寅年九月二十二日元配周氏誥贈一品夫人吏部郎中周公良材女男四人琦官監生娶劉氏庠生劉公士麟女珣廕生娶朱



氏前刑部主事朱公揚先女早逝瑜工部營膳司員外郎娶馮氏明經馮公運新女繼娶焦氏太史焦公竑孫女瑄廕生娶蔣氏孝廉蔣公士煒女女三人長適前吏部主事胡公璇子騰驥早逝次適前刑部主事朱公揚先子繼次字都察院左副都御史孫公建宗子珏早逝姪璋原任山西澤州知州孫五人世道庠生世珂廕生世瀚廩生世耀世泰姪孫二人紹曾承會會孫福庠俱幼公以

天子命賜葬極哀榮禮古人云既忠且孝宜銘如公者洵無愧矣銘曰景運龐鴻挺生鉅公翼我

世祖六服來同賦簡役平公秉其成三壤既則九式維均六官之長公柄其三仁育義正山負海涵瞻公之度精金良玉其言侃侃其容穆穆成功而歸不激不隨進退有道卷舒以時飲和令終返于幽宅天子曰咨錫謚表德寵命載申葬公高原康保無疆以裕後昆

又兵部尚書王端簡公宏祚傳

穆形

康熙十三年歲在甲寅秋九月予告大司馬思齋王公以疾薨於江甯

賜葬三茅山之陽又踰年吳中受業弟子穆形爲立傳傳曰公諱宏祚

字懋自號玉銘晚年繫思高堂因號思齋其先陝西三原人太子太保  
吏部尚書贈太師端毅公南京戶部尚書康僖公裔也既以順欽公從  
戎至滇之金齒司遂占籍卽今永昌府云曾祖良弼公祖崇正公竝傳  
隱德父瞻雲公中萬曆癸卯鄉試歷官蜀楚著賢聲兩祀名宦常榜署  
齋曰體認天理處繼晉秋曹以議減總河劉公獄去國天下惜之癸卯  
生公公生而岐疑性純孝沉毅寡言有才智讀書目十行下講經世大  
畧卽具廟堂之度焉十四補弟子員庚午舉孝廉丁丑中副名動京師  
當事亟用公壬午遂由蘇州牧陞戶部郎督餉大同  
本朝定鼎擢公尙嵐道用制府吳公孝昌議復留大同再歲以才能  
召仍官戶部郎中是時草昧初闢圖籍散失天下戶口田畝錢穀多寡  
出入損益之數莫能核公精典故善強記凡諸州郡所上筭卽纖細無  
不明晰宰執重倚公特疏久任公竭志纂脩賦役全書及成  
御製敕諭頒行天下令各藩司遵守燎如指掌者公所定書也公謂百  
姓不苦於正供而苦於雜派雜派者墨吏之便於民無便者也法令不  
立則吏不知畏吏不知畏法則民不得安閭閻菽帛之輸  
朝廷悉知自以艱難成節儉

舉孝廉

七

朝廷版籍賦稅之事小民悉知自以燭照絕侵漁故裁定賦役一準萬  
厯間法例晚末苛細巧取悉芟除之規模典則歸然一代章程諸臣工  
咸拱手推讓以爲能用是加公太僕寺少卿正卿遷左右侍郎又晉公  
尙書加太子少保旋加太子太保

上御南苑諸臣侍特

召公問天下錢穀出入之數公從容舉要領對言簡事明敷陳中綦

上喜目之曰此真司農也又上論國計謂安民生必首絕私徵講強兵  
則首嚴冒餉至於水旱災傷則蠲恤宜速又曰今拯救民生之要莫若  
稍寬徵輸之期

朝廷寬一分小民卽受一分之賜明暢愷切天下頌之又籌滇南事萬  
里如見經畫井然諸條議

上莫不拊髀稱善悉見施行因滇黔阻化

王帥蕩平公始知親喪日月而元配周夫人亦相繼去世哀毀躄踊泣

絕復甦卽欲不俟

命而奔

天子慰留再四勉以墨綬視事辛丑請歸葬築廬墓側

上諭所司優議

卹典公父母以及元配一品夫人皆

予祭葬事竣趨還

朝改刑部尙書未幾復調戶部會星變求直言上疏曰星辰有定次今異星忽見則天失其常矣坤道主靜今忽地震則地失其常矣六卿有定制今更易太煩則人事失其常矣挽回天地之變首在率循人事之常中外以爲名言漕糧例自通倉運入京議者謂於水次支散可省車輛費萬計公曰水次支給則受者負載艱勢必減值而售米狼戾在外京倉支給雖有糶者類粒皆在內此昔人根本深計不當以小利變法也其諳於大計類如此曾有主裁州縣存留與變漕糧官運爲民運者公固爭不得遂以兩議上竝如公指無何以失察吏胥報罷

上悉公忠

詔留尋補公兵部尙書庚戌引年乞休疏再上得

請馳驛給俸長安士大夫賦詩祖道以爲榮至金陵感疾疏辭俸不允僑卜秦淮之上攝靜調養爐香甌茗坐擁圖書間與二三隱逸楸枰詩話味道參禪以怡恬淡當事每有政務難決者輒往就問指畫井井無

不佩服然公雖退其忠君愛民之心殷殷不置咸望東山再起而公則  
傷然道履或命筍輿陟牛首雨花棲霞祖堂之勝以舒襟抱因登三茅  
峰棲心高寄玉函金軸無不探覽得趙文敏手書九天生神章真跡摹  
勒於石而傳焉甲寅疾甚手遺疏馳上方

俞旨慰問而公薨震悼輟朝

賜祭葬諡曰端簡朝野聞公訃莫不揮涕慨噫云公智畫深長不露威  
采咨決大事無詭隨亦無使給徐折衷以理可否適宜聞者悅服所謂  
古大臣風公無遜焉居恆念與瞻雲公遠退食之暇往往涕沾臆居金  
陵手輯永思錄數卷讀者悲動

今上御極初邀

覃恩請以廕廕猶子璋蓋公篤行敦脩實其天性云讀書宦老不輟於  
古人嘉言懿行輒疊疊無倦公子瑜官京師手書清慎勤訓誠之格言  
諄誨郵跡相接聞者得其片語共當箴銘今繕部君砥礪官方克振家  
學人亦以端簡公望之公於文藝鑒拔獨精乙未充讀卷官首舉史公  
大成卷臚唱第一丁未會試總裁鈔選超越是科得人特盛而彤亦幸  
在選中以公見知故習公益深公大節倬行在史冊千載傳之亦奚藉

文以傳但彤蒙一日之知又辱爲史官紀燉揚休其職也卽不文烏能辭若世系與卒生年月及生平言行足爲人師者別有述特傳其功業大端有關民生國計者如此

太史氏曰漢祖定關中相國何先收丞相府圖籍以知天下戶口阨塞強弱之數史稱何之勳爛焉端簡於圖册散軼能裁定賦役書較若畫一天下遵之視丞相何奚若哉古云人趨實治無失世趨靡運之否晚近取浮華尙文詞聲氣其中靡矣卽欲治得乎如端簡公斯能以實效治天下者哉抑三原端毅公持危定傾稱社稷臣公無愧焉克世其風矣然吾觀公識高見遠臨事和而能斷殆宋世兩文正之間乎士君子以經學樹功名治國家保令望壽考以歿如端簡公斯足法云

戶部右侍郎郝傑墓誌

馮溥

皇上御極之十有六年歲己亥少司徒郝公以疾終長公今少宰敏公計聞於朝

皇上惻焉念厥前勞

詔祭葬皆如例禮也長公以余嘗侍公杖履悉公行事因以狀來請銘余不敢以不文辭按公狀諱傑字君萬別號棫清先生始祖郝文忠公

經元初僑寓於燕因家焉遂世爲霸州人文忠節義文章無論識與不識咸卜其後之必昌迺歷元明之世子孫繁滋無大貴顯者傳至智庵公諱九思喜行其善於鄉隱德寢寢彰矣生子二次諱鴻猷世稱銘燕先生公父也公生而瑰異幼不好弄稍長慷慨有大節十餘歲出就學使者試爲文立數千言學使者奇之由是聲名籍甚畿輔士子無敢望項背少丁母王夫人艱水漿不入口哀毀幾至滅性鄉黨之言孝者歸焉甲子舉孝廉時銘燕先生爲秦之延長令當流寇衝斥之時公周旋艱險守禦孤城流寇不敢窺及銘燕先生以病去延之士民皆哭未踰年城陷至今延人思銘燕先生卽思公丁丑舉進士授太常寺博士戊寅銘燕先生卒公哀號毀瘁祭葬一依古禮不用二氏里中化之甲申皇清定鼎召收遺逸公旣夙負重望且近在畿輔地因首膺

召命入拜戶科給事中念

國家初創必先爲根本計且民志不定則僭踰易生惟禮可以已之因上言宜開經筵祀闕里以示天下所先中云有一國者有一國之規模有天下者有天下之規模

皇上爲天下主必紀綱定而朝廷尊滿洲貴人宜辨章服別儀從

人望而知敬漢官亦宜辨章服別儀從使滿大見而加禮疏上內外是  
之公雖居言路未嘗撻拾人短長以沽直名凡有所言皆存忠厚開國  
之意時庶務未定廷臣有過無大小輒下刑部公復上言曰法者天下  
之平也法量過以爲受則法行而人知恩若罪無大小悉歸司寇則考  
功之法廢矣使天下之士朝囚首而對簿暮冠帶而服官非所以尊體  
統而養廉恥也自是乃分別降罰先議而後請

音羣下始無輕詣西曹者未幾江南平降臣蔡奔琛阮大鍼等咸冀復  
用公上疏謂奔琛以賄得內閣與大鍼等朋黨爲奸以亡江南易曰開  
國承家小人勿用正謂此也奔琛等宜黜歸公於天下事知之明而守  
之固雖不務苛細而嚙笑亦未假人故其奏對皆關治道之大而不爲  
目前之計晉通政司右參議丁繼母邊夫人艱服闋補光祿寺少卿尋  
以少廷尉晉大廷尉時重囚不時報決公以天道生殺各有其時王政  
同天則陰陽之氣不致乖戾因上言熱審及秋決例得  
旨報可自是始定秋後律狀中所載皆其大節班班可紀者至於他所  
建白不可勝紀癸巳晉戶部右侍郎時長君敏公亦自閩之藩參內徵  
爲通政司右參議公曰盈虛消息天道也豈有父子同列九卿而不知



止者哉遽移疾歸歸而優游里閭與諸父老故舊爲歡恂恂如也處橫  
逆犯而不校有干有司者則一切遜謝曰吾故吾也豈以此改其初服  
耶丁酉敏公以少司徒遇

覃恩晉級封公如其官公家距京甚近間或至京邸輒去敏公以公不  
樂居京師思上疏爲溫清計草已就而計聞病革語不及私惟諄諄以  
兩世爲大臣勸敏公以盡所未盡忠孝之性不忘於彌留之際嗚呼難  
哉逝之日親族哭於廡百姓哭於路朋友設位哀泣鄉人會弔宅不能  
容公平生事繼母倍孝內外無間言繼祖母張氏雙目失明年九十病  
危公扶掖出入侍湯藥不稍懈兄弟之間備極友愛嫂李氏少寡公以  
子子之以女女之且爲之纖悉籌畫俾無憾以終其節族黨歸義焉尤  
喜教育人才凡族姓里巷諸幼子弟以貧失學者無不委曲成就其婚  
葬無資時緩急者蓋不可以更僕數比歲大禮公傾廩賑給人人飽德  
以故仕宦累年而四壁蕭然晏如也嗟乎言以教宣行以道傳公在朝  
剛毅正直磊落可觀然皆以坦易之意出之與人不爲城府人亦不可  
犯以非禮其進退容與無少繫吝尤人所難樂善忘勢雖田夫野老尤  
必盡誠跡其行事可謂篤實光輝君子者矣其以啟少宰之緒不誣云

資政大夫刑部尚書任公潛墓誌銘

孫廷幹

吾黨多士大夫而其孝友有稱聞老而孺慕不衰者文水最著昔甲申之變公自賊中逸歸父老奔問官守余適從之因得其死生情狀又見其創痕自髮際垂于眉末殷然尙未復也心甚壯之自是又復十年公爲大司寇

子告以歸方招予爲林泉之遊曾幾何時而遽聞其沒也今太公年八十餘千里移書問其誌余益發書而歎甚傷其意也爲述其畧焉按狀任氏之先出于黃帝其在成周則薛伯足徵也漢唐以下歷世久遠或見或隱靡得而詳明洪武初有曰全者始自樂安徙居益都之南鄙五世滋大又一傳而昌曰經則公祖父也樂善羞行施于鄉黨是生太公曰克明則彬彬儒行比迹康成太邱之間矣而夫人曰楊氏明詩習禮嚴毅有風裁家法最善首舉維公名潛字文水及長狀貌魁異髯而軼羣綜博貫穿細大兼舉爲文附拔如雲舉岳峙與人交意豁如也少遊諸生談經折角又獨留意古今治平大畧或慷慨談時雖當世之能臣無能易其說也而獨承歡子舍浣濯廁踰則婉如也愉如也似不能言者年三十舉于鄉又六年賜進士第初除知芮城又調榆次芮城固彈

丸而榆次巖邑也其令芮城勞之來之不厭其簡其令榆次勞之來之亦不憚其煩居三年署循吏卓異上考擢儀曹尋改御史按視蘇松蘇松之土沃土也其俗文辯而巧其吏舞文而多猾其長令攫金滿贏而善事上官故爲難治比公爲之期年報政載鶴二石二書畫百卷以歸其民似釋負也其吏似行霜也其令長似洗髓而易腸也而吳之士顧又似瘠者而是時闖賊煽禍已燔秦燦晉震動蜀楚直走大梁大梁者中都陵寢之屏蔽又周潞諸藩連封接軫宗器存焉故賊之操之爲已亟而前此捍禦之策又虛無具則危道也適公按吳復命中途抵里未及詣闕而當寧議守大梁者皆推轂公於是復以御史監軍大梁受事兩月方簡料師徒修飾戰具誓師厲眾擐甲登陴而賊勢憑陵百萬之眾蜂屯蟻附于汴城之下矣公遂激厲親藩器甲授之弓人寶玉出于王府調和文武撫勉百姓明信賞罰手劔而從之城以內百萬戶莫不振振然而城之下百萬賊無能狡焉以逞者悉銳不克賊老自歸而公亦以中鉛折肱得告還里無何賊焰燎原中原板蕩莫可收拾公復受命起復總督聞命疾馳方欲匹馬渡河號召忠義招集往日守汴部曲僚屬共圖國難未至河一日程夜宿長垣適賊以偏師潛行呼于城下

其門自開公尙未之覺也披衣問之則賊在闕中矣公旣被執從者皆驚相失獨二僕不肯去遂俱驅至彰德陷之不屈脅之不屈執而兵之鉞交于顛反皮障眼血流被胸憤絕不復自覺賊驚相顧自相詰也已而解縛復甦檻車北去比至都則賊之前隊已陷都城爭取府庫掠民間子女信猜相爭不復他顧遂得間逸歸則所爲見其創痕自髮際垂及眉末者也未幾

大清入關鐵賊定鼎使者四出訪求耆舊或以其名上聞趨起送入京授戶部右侍郎督理京省錢法時

大命初集百費繁興公私廩藏焚劫靡遺公收括銅料招揀工匠躬督率之以是倉卒取給用罔不贍數月以太夫人病劇得請歸省旋丁內艱服闋復補前職尋遷左侍郎總督倉場又晉都察院右都御史先是明末漕政弊壞京軍缺饟以致不支及

大清開國需漕倍重王公勳爵集于京師則有祿賜文武新舊官僚九職以上則有歲俸八旗甲士未授田者尙多則有月饌或授田矣而災傷水旱之不獲斧斨車甲莫取資焉官家計丁而償者則又有澇糧是皆于漕平給之需之如此其亟也而明朝領運皆衛所世官其旗甲則

其軍餘也官有常職旗有見丁更番而來不煩改設茲改命之後悉已就裁更置流官衛設一人又時或缺焉未補領運無人或多委署既未必賢矣而旗甲聽其自招又往往聚游手而付之以是需漕日亟而侵漕日甚比其抵通或復收兌不時倉蠹爲奸吏有徵求官無勾考或有運糧萬計一粒無交者亦將借口焉公以公廉白律而羣下無敢干者掛欠遂驟減于前又漕糧抵壩正兌悉入

京庾改兌則入通倉其入京庾者五閘盤剝有費入敷尖耗有如此皆于正糧之外兌之于南登之于北自明末來閘壩衝決船袋耗折歷茲復京運遲留

輦下百萬之眾待餉者急不能徐期以故改京倉爲河兌千艘萬車雲集壩上日不暇給又其盤閘尖耗之數遂不復問之如是則倉與漕蒙官與旗市利歸官胥而虧在公家矣公特疏駁正收其半以實

京庾舍其半以寬漕力自是公儲耗米歲增十萬有餘三歲遷刑部尚書凡有大獄原情比律手自定擬有鍛鍊周內者絕勿聽以是稱平無何遭疾懷歸以原官致仕優游田野半歲卒

天子悼之特遣行人臨祭營葬事焉迹其行事則可謂公忠者乎若夫

其天性之篤著述之富生沒之年子女姻亞之譜則有厥弟注之記載存他人言之勿肖也故不復附焉銘曰

騎箕尾乎道將藏爲雷雨乎澤將長惟君與父何用不臧有廢而興天道難量攀龍墜髯求死不得乎爲我心傷乘雲歸矣而愍遺一老宛然在堂悠悠千載誰相望且歸休乎山之陽

光祿大夫太子太保都察院右都御史吏部左侍郎孫公承澤行狀上

崇簡

曾祖釗祖仲良父金贈光祿大夫太子太保吏部左侍郎曾祖妣楊祖妣裴妣張贈一品夫人順天府上林苑采育孫公承澤字耳伯號北海年八十三狀先世山東青州府益都縣明永樂中諱明善遷實京畿至曾祖蓋三傳矣公中崇禎庚午順天舉人辛未進士歷任陳留知縣調祥符縣以卓異授刑科給事中歷陞戶工左右給事中刑科都給事中大清定鼎補吏科都給事中歷陞太常少卿翰林院提督四譯館通政司左右通政太常卿大理卿兵部左右侍郎吏部左侍郎管右侍郎事尋以都察院右都御史太子太保年六十引疾家食二十餘年而歿嗚呼公于死生進退之際蓋有可考者矣以宏傑博達之才宣力中外著

續於前代不具論最著者爲海內正人之望至崇禎甲申任用奄寺至  
賊犯闕累疏糾正迨三月十八日城守大璫絕降賊中官宴飲城上司  
馬奏聞不省憤甚約兵部主事成德翌辰請召對及至午門惟一老闍  
坐地上屬之上達亡何宮人紛紛出走遂與德別抵舍而室人劉氏及  
子婦林氏投井死矣斯時也公蓋知死所矣自縊不死仰藥不死入井  
不死公于解懸挽溺者不能無憾也乃爲賊之紀功司執去惟求速死  
賊河南人夙知公曰公有遺德於吾鄉命僞尉守之無致公死公數日  
不食不死恭逢

大清驅賊西遁公乘間歸采育時君崩國破百姓遭賊酷害不啻湯火  
中一旦我

大清掃蕩逆寇改葬烈帝且令臣民成服三日義聲動天下不惟畿輔  
得脫屠毒雪痛憤願歸命臣服惟恐後且徵求四出公雖欲潛隱村墟  
豈誼之所敢出哉遂仍官公給諫卽疏陳大仇未報不敢受職願效命  
先驅以盡臣誼旋奉

旨朝臣矢報具見同仇大兵進征逆黨卽當殄滅復命中書傳諭卽日  
受職于是官都給事中則請復六科職掌官太常則請還千畝以供郊

祀官大理則請依律以緩決官兵部則籌容民畜眾官吏部則篤推賢讓能其相機宜以佐維新之治者公未嘗言於人人則無不重其譽望年甫六十藉重聽乞身營退谷以見志公自幼有志於學砥礪以自匡飭未嘗識人問佻宕之習於古今治亂經濟皆究其原委而于人之邪正尤兢兢焉當諸生時有建權闡魏忠賢祠于其里者相率拜祠下公獨不往時人目爲東林秀才公嘗與予論東林爲宋楊龜山先生無錫之書院明顧公憲成購於寺僧置龜山祠與同志闡明理學於其中初非要名植黨明之季也推斥正人者概指東林爲黨人予謂逆黨擅權凡糾閤死者皆時所指爲東林而附逆獻媚則夙所嫉惡東林之人迨李自成之變東林死節者比比而委蛇于僞命偷生視息皆自以不爲東林之人也其邪正有不待辨而昭然者公以爲然海內士君子聞公之風咸企慕爲當今文獻就正所聞公概不爲因緣閉戶著書歲有成帙經翼一書自公爲縣令時卽多方哀輯有世所未覩者復作孔易傳義合闡尙書集解禹貢考詩經朱翼春秋程傳補儀禮經傳合解皆闡明聖賢微旨多前人所未發嘗以學者不達古今經濟皆非實學于是著歷代史翼及水利考治河紀明史未有成書久或失實纂述春明夢



錄人物志山書廣記元明典故編年考典制紀畧寰宇志畧山居小  
箋研山齋集考等書于理學則有宋五先生明四先生學約道統明辨  
諸儒集抄考正晚年定論皆公一力搜羅定正手自脫稿歷二十年日  
不釋卷今年目力不及猶著益智錄日令子孫朗誦於側刪定成書勤  
勤開示來學之意至歿不衰病間晤魏侍郎諄諄以闡述聖賢之學相  
推讓與葉太史方藹言勉以做官事小爲人事大及予往視則曰幼爲  
諸生老爲經生已爲厚幸惟時當多事未能恣然並不及私閱日而公  
歿矣平生無聲色之好嘗貯古器及名人書畫與客談經史之餘出以  
爲娛教子孫讀書砥行不使少習世俗之華腴鄉試及應仕進者皆不  
令預曰衣食粗足當知止足歿前一日沐浴更衣賦詩有云進退死生  
兩大事孤心留取照幽墟嗚呼此亦足以見公志矣遺囑治喪一遵集  
禮公歿諸子孫泣涕顧予曰公病間謂不孝等我生平無善狀宗伯王  
公敬哉處士顧子甯人陸子翼王知吾仕學之本末質之足矣幸爲賜  
狀嗚呼予何忍辭謹撮其死生進退之大者如此其功名著於前代惠  
澤及於公私皆略而不書或亦公之志也配高氏前卒副配劉氏以甲  
申殉節子四人道樸廩生恩蔭侍衛江南揚州府泰州同知終養娶林

氏刑部侍郎德馨女死節道楷恩蔭生前卒道懷監生道林廩生女一  
孫男八人煥燿煌煌炳燁煥燁孫女八人曾孫二人坪城曾孫女一

通議大夫兵部右侍郎永甯張公鼎延神道碑銘吳偉業

世祖皇帝御極之十年兵部右侍郎張公鼎延夙夜左右執事有恪

上憫其勤勞加恩賜金幣馳傳歸里公卿祖道於長安門外都人以為

榮又六年公以病卒於永甯之故第其子兗州太守瑄吏科都給事中

璿泣而言曰維我

國家天造之初卿貳大僚不敢遽以彰骨為請有年至致事者輒留宿

衛奉朝請於京師其蒙恩

予告有之自先臣始是不可以莫之紀也又三年兗州服闋補淮安守

而命偉業書公墓隧之碑謹按張氏陝西同州人始祖仲文避兵徙洛

之永甯仲文以下六世諱士益緣其子中丞公貴得封中丞公諱論仕

至四川巡撫都御史以元配段夫人生公萬厯壬戌進士起家行人

考選兵科劾兵部尚書霍維華以罪廷諍惠安伯張慶臻賄改敕書及

宣大總督張曉巡撫張三杰失事狀所言皆施行當時推其讜直陞兵

科都給事中在明季啟禎之世蘭州土司奢崇明反連結水西中丞初

事

按蜀繼受任滇撫克遂前功先後收復四十七城拓地二千里五峯山  
桃紅壩之捷馘其渠魁叩筴蕩定論功爲西南第一方中丞歸自按蜀  
以清卿居里負知兵名而公被擢在省垣將吏勇怯軍機進止皆其職  
所當執奏每在直中夜治文書參密畫旬日不敢洗沐其劾張慶臻也  
上怒慶臻動舊掌京營行金主書竄易詔草文華召對事連長山相劉  
公鴻訓劉賢相其曲意慶臻有端受取事未得考實公雖糾摘慶臻無  
所避終不欲傅上怒致大臣辟故與御史吳玉持論並劄正而公微爲  
持平在廷服其知國體後于平臺數被引見敷奏詳敏上以爲能眷遇  
寢隆以中丞撫蜀子例不得居諫職請避歸忌者撫其里居蜚語聞左  
官薄謫而中丞亦功成納節矣流寇之渡河而南也首陷澠池盧氏次  
及永甯永山城不修礮盜亦動邑無奠令民皆搖心中丞卽巴渝之舊  
部遏宛維之嚴衝誓眾登陣捐金犒士天寒路止離風雪較瘵之患城  
全身瘁屬疾不起公時已從行人司副再遷爲南京吏部驗封司郎中  
職事修舉駸駸且復嚮用旣奔喪成服伏闕上書曰臣父出定蠻方還  
并鄉里戮力兵間致于僇仆惟主上念葛亮之渡瀘以勞定國憐子囊  
之城郢沒不忘君庶俾先臣死骨不朽上省章嫌其稱譽過實下所司

按嚴竟坐免官或以爲用事者因徵文修舊劾非盡出於上意也監軍道湯開遠好直諫追訟公曰永甯鄉紳張論以死勤事不蒙優錄并其子錮之熊耳以西塢壁以百數有不聞之解體乎閱七年李自成再起中州先破宜陽永甯而雒陽遂至不守公流離中條上形勢請于宜永之交如韓城山鄉者宿重兵守要害山道阨狹可以益其吭而弗出且曰臣爲親受譴不獲復奉闕廷敢因耳目所及一陳滅賊之策永填溝壑終無所恨上亦躋之然竟弗召也嘗憤中樞失策流涕告所知曰嵩山縣互三百里宜永當適中之地永有東西二嶠之固尤足設險賊之出入秦豫磬牙穿穴於其中始先人守永卽所以守雒守雒卽所以守中原當時不圖其功覆用爲罪山民憤歎人無鬪志賊勢披猖未必不繇於此嗟乎吾父子功罪已矣如國事何哉當自成破永公守南城事急主僕匿於垣井賊燭以炬弗見投之以石弗傷越兩日有一嫗來汲僕謀於公緣綆先上方及幕賊攜刃者至將加害嫗給言吾子也遂脫脫已嫗忽不見僕傳語其儕篝火井旁號公出之歸于溪源寨五日中午夜心動跨驢急行天明而跡者至報曰已去乃免公有井異記著其事文多不載公之免也宗人多死兩子幸無恙避地河北懷縣間行歸營

中丞竈窆於故山中碑傳十一賊騎充斥公畫伏林莽夜穿竈穴葬畢仰天慟曰  
孤子自此可無憾矣汴梁之急也公建議秦兵雖奉詔來救賊銳甚未  
可爭鋒可駐師鞏縣扼虎牢之險爲持久及孫傳廷敗於柿園歸秦埽  
眾復出關自謂必勝公獨貽書戒勿輕敵宜修復雒陽進戰退守出萬  
全之計迺吾謀適弗用而明亦已亡矣兩河並復郡邑受僞署誅鋤大  
姓搜牢金帛公子弟被執彭考惴惴宗族之弗全會  
本朝受命大庇生民百度維新九品式敘公用薦徵拜吏部驗封司郎  
中由驗封改考功管大計是時天下新定長吏丞尉軍中以便宜除拜  
皆白版假守年勞治行掾史輒去其籍莫得勾稽公據典章覈流品浮  
僞必黜貪殘必懲奏免千有餘人銓格以正甲戌分校禮闈所得士有  
至公輔者累資晉太僕少卿換大理尋爲正陟侍郎於工部爲左於刑  
部兵部爲右階通奉大夫再進秩一等禮遇視六卿蓋異數也其在  
大理刑部也屢決大獄亭疑奏讞依于仁恕仍抗章舉正職業申嚴律令  
不爲煩苛大者定僕區之法寬株送之條盛夏請解出繫囚桀黠民安  
指莊田詭勢自匿者必正其欺謾至今奉爲繁令焉公爲人曉習文法  
在事勤力鮮所回隱同列或語以受任日淺宜引嫌避可否公搯擊出

涕曰某遭本鄉傾覆生類殄盡提攜細弱歸命

聖朝出虎口攀龍鱗際風雲脫湯火若不能出身自効裨益萬分何以見陳許汝穎之士乎其居心盡節如此中丞有別墅在金門山所產質當篠簞埒於江陵之橘成都之桑公之謝政歸田疇廬舍次第整比於其間立家廟設義莊以尊祖收族暇則偕少參諸公爲阡陌之游作五老圖自爲文記之有勸之復出者笑弗應二子中外並歷顯仕垂組揭節歸拜公于德里公與廉夫人慨然太息曰吾出晉井之中上見烽火接天下見積屍擗距當此時未識軀命所在詎意今日骨肉復完鳴騶夾道上先人之邱隴哉語曰知足不辱

聖主之優老臣恩不可以忘也公兄弟三人季曰世延夫婦死於兵公撫其二孤臧璋有恩紀廉夫人視遇如所生人以爲難夫人事公母段太君以孝內治蕭飭先於公二年以沒公字慎之別字玉調有文集二十餘卷墓在豐原之墟以廉夫人祔子三人長瑄次璿也季淑塲女三人孫男一挺之孫女一餘詳在墓誌偉業聞活千人者必有封中丞之討蘭州與水西也不多殺戮以侈首功不附宦寺以趣賞率繫人焚部可撫者撫之巴童竇女無歸者歸之其仁恩結於蜀人猶宋之有張益

州焉黃巾禍亂食祿之家多見屠滅張氏子孫獨完受其福嗚呼上下  
三十餘年觀公父子之際亦可以知天道矣初偉業之識淮安君於浙  
也因吾友張黃門枚菴以定交繼在京師得交吏垣君距今十有餘年  
矣淮安友道敦篤契分特深熟聞公家世行歷言之庶足考信茲以揭  
德樹旣爲屬容敢用不文辭謹掇拾大者著之如右而系之以詩曰  
金門之符有珣有玕上指白雲下拂青鸞于焉冥衍于焉考槃河水漣漣  
二嶠嶺岷篤生中丞功著西土紹啟我公主闕是補謬謬在廷不茹不  
吐亂之始生載禦其侮皤皤黃髮有勞賈多覆曰僭慝讒口則那心之  
憂矣涕泣滂沱人亦有言我罪伊何洛之竭矣乃穿我墉井之冽矣乃  
逃我躬誰其擠之我是用急誰其拯之使我心惻亂其有定天降厥祐  
王師徂征生民乃救

帝思耆德召置左右豈不懷歸竭蹶恐後乃亞詞空乃貳司馬

帝曰汝勞錫之休假錦綺千純黃金百冶公拜稽首歸永之野飲此旨  
酒瞻望北邙哀我人斯何辜流亡懋余一老歸焉永臧蒼蒼者天矢諸  
弗忘伐彼簣管爰作笙箛嘒嘒管聲薦我蘋藻凡爾子孫不暇有詔神  
之聽之工祝致告維厥祖是承維先公是行龔鼎及鼐刻茲令名如嵩

與少不驚不崩後千百年家以永存

光祿大夫太子太保左都御史徐公起元墓誌銘

金之俊

順治十有六年歲次己亥秋台州府大夫丞徐君諱祥煥泣持其先人  
總憲望仁公行狀來屬余誌其墓而併爲之銘以余與公同朝十餘載  
且先後相繼同官凡公之立朝行己與夫生平敬歷中外之眞品大業  
炳炳烺烺得之耳聞目見者最爲委悉余雖老病無文誼不能辭謹按  
狀公徐姓諱起元字貞復別號望仁遼東遼陽人也先世爲江南廬州  
府合肥縣人明初以軍功徙遼遂家焉世簪纓勿替遠不及詳公考明  
川公以孝友著聞遼左碩德粹履有陳太邱風公妣董太夫人淑慎柔  
嘉六行咸備生丈夫子一人是卽公公生而警敏沈毅少不好弄治麟  
經補博士弟子員試輒高等壬子登順天賢書癸丑下第歸益篤學礪  
行一時學者爭延致爲師今少傳萬涵甯公亦嘗從公受業庚申秉鐸  
山東淄川訓士之方悉倣胡安定公先德行而後文藝淄川士習蒸蒸  
一變辛酉丁外艱服闋補河南閔鄉教諭所以訓閔士者如淄閔弟子  
愛敬而信從之亦如淄己巳授湖廣保康令保康彈九邑戶不滿三百  
皆家鮮宿春一切日用所需必取辦鄰壤又居萬山中巖谷邇迴往來



甚難公爲百計籌畫置立集場平其關石通其有無俾強暴不相侵智巧毋相奪商賈麇至邑民賴以稍蘇邑南有湯峽河可以達大河抵襄陽奈萬蓮洞口有巨石嶮橫塞河泓公審觀形勢令居民沿山伐竹木烈而焚之不三月間巨石剝落殆盡卽五丁開山神力當不過此於是峽平水注凡入山採木者順流而下直達樊城可得倍值地方至今猶蒙其利也壬申丁丙艱丙子補湖廣應山令時流賊起自秦隴蹂躪楚豫勢方披猖而應適當其衝公蒞任察城守之具百無一備爲之築垣濬濠修櫓繕器捐橐中資募壯士千餘人躬自簡練務人人可用以防不虞未幾賊渠入大王張獻忠突逼孤城公親率壯士邀擊屢戰獲捷所得甲仗衣畜無算賊鋒首挫忿圖報復羣賊如闖塌天整世王一斗粟滿天星老徊徊等環集城下悉力仰攻公爲整備火器乘城禦之神暇而氣壯賊咸失利去比應之鄰邑望風降賊者眾獨公固守四載屹若金湯匪但治行卓越爲諸道最而武功赫然尤一時豔稱未有也己卯冬大計吏撫按交章薦劾爭言當大用公了此賊不難會閣督部師至亦素重公望題授鄖陽同知管鄖鎮餉時鄖兵萬餘屯住竹山縣自鄖至竹六百里而遙河身淺窄以小舟溯流牽挽歷灘百二計半月

方達又大帥左良玉馬步兵三萬餘屯興安縣亦移竹就糧較原住竹  
兵數且三倍焉公慮兵多糧匱不免庚癸呼乃向治院繼成袁公假步  
兵五百晝夜協運七日卽至以蕞爾山邑屯兵數萬轉餉不竭公之力  
也適太守缺當事者舉公署府事旋實授公感激奮勵於戰守機宜靡  
不殫力料理辛巳八月張獻忠領賊眾數萬攻城公備禦已預用火器  
中其左臂賊踉蹌走壬午十二月闖賊李自成從白馬洞渡江攻陷襄  
陽而南陽承天荊州等處所過州邑俱望風瓦解湖北半楚孤存一鄭  
耳賊意且輕鄭遣騎萬餘徑抵城北安營以爲鄭可旦夕下也公督率  
壯士躬冒矢石出敵不意直躡其營所殺傷凡三千餘賊乃宵遁癸未  
二月賊驍將劉宗敏等統馬步五萬攻城三面環繞其鋒甚惡公約眾  
歃血誓曰今日之事有死無二且歷數某處某處順賊者卒被慘戮將  
士爲之感動皆泣下如雨無不一以當百乃部署諸將分方迎敵終日  
對仗凡枕戈擐甲者七十餘日賊死傷過半竄歸襄陽癸未四月賊復  
來用麥秆雜土於黑夜築臺三層距城百步許高與城齊計四十五座  
駕砲擊城城內人望而却立勢且岌岌公謂諸將士曰鄭之存亡在此  
舉矣與其嬰城兀守曷若以戰爲守而守乃固於五月三日傾城兵出

戰用火礮火箭燔燒麥臺頃刻而四十五座立燼聞賊聞之親督精銳  
來援行至浙川知火器精利且士皆殊死戰度弗能敵因轉鄧州回襄  
陽尋渡河入豫迎敵孫督秦兵秦兵不戰而潰遂乘勝入關中據險僭  
亂當是時郎西北偏漢中興安商維一帶處處署有偽官獨鄧陽孤鎮  
四面皆賊內無糧餉外絕救援如撐漏舟于瀾天駭浪中不覆溺者幾  
希是年秋廷議錄公之功擢陞副使隨晉郎陽撫治公益感知遇嘔心  
經理寢食靡遑時郎所亟需者火藥公乃令各營俱設硝房埽土淋煎  
而硝足矣礮不給乃用火酒煮硝功與礮等礮足矣鉛又不給乃募市  
廢鐵設法鼓鑄圓如走珠自是火藥不勝用矣從襄陽陷後餉道梗阻  
公多方曉諭居民俾悉出蓋藏樂輸靡後不數月而民間儲蓄告罄又  
倡率寮屬竭力捐濟不數月而官橐又罄惟相率拾野菜剝榆皮采橡  
實聊以充腹僅免易子析骸耳公偵知賊有糧艘屯河下募死士夜駕  
小舟順流而下乘其無備奪取賊船賊窘攻城益急護糧益堅公又夜  
遣人以火箭焚之賊糧悉盡甲申正月闖賊以郎久不下復令驍將路  
應標等來攻計四十七晝夜公身先士卒奮勇堵禦斬馘無算賊將僅  
以身遁三月又令賊下得海等益兵萬餘來攻仍敗遁如前五月又令

驍賊武寅臺等二人來城下要盟云中原大勢已去孤郾在重圍中糧  
盡援絕能支幾時盍早自全公義憤填胸卽城下斬之誓不與賊俱生  
賊知公忠義難撼甚於城堅不可拔乃更益兵列營爲持入計公復出  
奇謀多方以禦之夜襲以擾之使賊片刻弗甯者六閱月賊患莫支退  
營楊溪鋪別築土城自守時縱遊兵突城下公應之愈嚴愈整毋偵賊  
出營卽遣奇兵迎敵以挫其鋒十二月六日公親率銳卒薄土城下索  
賊復密遣人入賊營爲內應夜半火發內外夾擊賊大窘開東門逃竄  
乘勝追擊殺傷殆盡賊帥路應標殲焉方期露布告捷而明代已革九  
閩月矣嗟夫明以天下之全力不能守其九廟而公未嘗擁重兵資厚  
餉獨以兩袖清風一腔熱血守張巡許遠之所不能守終明之世中原  
板蕩孤郾屹然以待

皇清定鼎之日完而歸之猗歟偉哉今

天子嘉公全城殊績仍令撫治如故公爲起瘡痍集流散戢綏彌至於  
是郾之人感公福澤家戶戶祝特爲畫像立祠丙戌擢都察院左副都  
御史已丑晉階太子太保正直和平始終如一不矜圭角人自不敢干  
以私辛卯公念明川公已葬淄川而董太夫人櫬尙寄金陵因乞假迎

歸合葬於淄王辰

聖上眷倚老成仍命以原官管大理卿事公循例引年蒙

恩許允典禮優渥公始得以險阻艱難備嘗勞瘁之身卜別墅於都城西南隅負郭臨流稍憩息焉每佳辰月夕與親朋握手道故浮觴嘯詠竟日忘倦白鬚飄然顏精若童人望之羨爲神仙中人也戊戌九月初五日竟無疾而逝嗚呼公之爲人也軌步趨矜然諾孝友篤自性成忠義助以學問衮影夢寐恆自期爲聖賢教人弟子亦期共爲聖賢自起家縣令以至建牙開府無不身視民家視國故百姓愛之如父母士卒護之如頭目以之守城城完以之攻賊賊破堅蓋世無前之偉烈垂千秋不朽之令名然未嘗沾沾焉向人稍有德色至歿之日囊橐蕭然幾無以斂此在他人爲最難得者清節於公之生平直其一端也若夫待昆弟無爾我撫諸姪若己子九世同居不析箸緩急族黨靡有厭倦心則又皆公制行之緒餘已公生於萬厯乙酉年七月二十六日未時卒於順治戊戌年九月初五日卯時享年七十有四卜於某年月日葬於某所元配趙氏一品夫人生子一卽祚煥以侍衛歷官台州府同知甫蒞任一日卽值海賊陷城賊逼降抗不受僞職卒護憑赴省此蓋得於

公之教忠者素也生女一適海州守忠鵠李公長子一元候選縣令繼配郭氏一品夫人生女一未字祚煥配卞氏平定州守圖閣公女繼揚氏瓊崖參將苑菁公女繼董氏貢士峻明公女孫一天培配甯氏內閣大學士萬涵公女姪國楨任磁州參將祚炳任青苑縣令爲之銘曰公篤生兮稟星辰公制行兮倅古人公司鐸兮安定均公烹鮮兮召杜倫公建牙兮威且仁公禦寇兮若天神鞏孤城于磐石兮傲殉節之張巡雖世代忽滄桑兮賴忠義之獨伸垂紳正笏以肅紀綱兮憲度惟新屈指懸車而娛泉石兮二百餘旬生也榮死也哀兮輝茲貞岷歲可遷石可朽兮芳名詎淪

名宦戶部右侍郎周公亮工傳

林偁

康熙三十有五年夏四月閩八郡士大夫詣當事諸有司請崇祀故戶部右侍郎櫟園周公於郡學宮之名宦祠僉報可以七月二十五日奉主行事蓋距公泣閩時已四十有九年距公歿亦二十五年矣適公子在浚遊閩謂茲舉於

國典家乘均有光宜大書以傳於後且屬偁文之偁生晚不及見公又愧學淺名微何足以傳公於不朽固辭不獲乃以嚮所聞諸父老者摺

拾公全閩之大畧務質核俾傳名宦者采焉公諱亮工字元亮先世有仕江西者因家金谿後遷江甯其自江甯再遷河南則自公大父始也故公遂爲祥符人以先世之常居櫟下也自號爲櫟園公爲人警敏負奇氣於古今之書無不讀於遠近知名之士無不交自爲諸生聲譽已著及舉崇禎庚辰進士授濰縣令堅城守殺賊才望益大重擢監察御史方入都而逆闖陷京師明亡公遂歸江甯養親不復有宦情矣順治二年

王師南下特徵君以原官招撫兩淮尋授兩淮鹽運使改鹽法道三年擢布政司參政淮揚海防兵備道政績皆可書四年陞福建按察使六年以按察使署理兵備海防督學三道事冬入覲轉福建右布政使七年還閩以右布政使署建南道事八年署左布政使事九年署漳南道十年署興南道陞左布政使公前後在閩凡八年所歷監司任殆徧皆從草昧荆棘中以扶士氣拯民瘼爲己任故功德之在人者深其初蒞按察也未入境而民亂公從杉關入據光澤城守破土寇李鳳毛念邵郡去會城數百里又東與建甯鄰倘閩上游不靖則頑民叛將勢相連合將與江右南昌應患大未可圖也乃卽邵郡治蒞事率家人戍兵百

餘備戰守以計誅叛將熊再法秦登虎等三千人凡在郡經理七閱月  
閩西境以安而福州白戍子兵荒流莩載道羣盜滿山公爬梳喫咻逐  
假令鉏豪強撫逃亡閩民始依公爲命大寮位公上者亦不得不倚公  
如左右手故委公署道員者七公靖大亂者六如永安之招曾省也建  
甯之滅陳和尚也延平之剿吳賽娘邵武之縛耿虎也而守清漳保泉  
州活十四寨功最鉅公功益顯忌公者亦益多年

上擢公爲都察院左副都御史卽疏言閩事首論除降寇鄭芝龍又陳  
用兵機宜六事

世祖皇帝深嘉納而公禍基此矣尋陞戶部總督錢法右侍郎先是芝  
龍旣降其子成功猶據廈門屠漳州刺殺總督日以降愚我翼緩援兵  
朝廷亦羈縻芝龍以南安伯奉朝請公之以中丞入也極陳其逆狀  
世祖密下公疏於部遂執芝龍下獄芝龍知公發其事乃大恨揮金謀  
報公適督閩者方修怨撼公一二巨帥向與公齟齬者爭相媒孽飛章  
上告公遂聽勘再人聞當是時爲公訟冤者衆人情洶洶適成功以舟  
師數萬突至逕趨福州倉卒城守無備勢在呼吸巡撫宜公永貴知公  
爲人心所屬又長於殺賊乃便宜出公藉公率士民分守時賊焚掠四



郊火光照耀城中且數日屢攻城不克乃剋期備至急攻西南隅鉦鼓  
聲殷地公坐射烏樓盡以平日所善諸文士爲部曲指揮守禦復親發  
大砲擊賊殲其渠帥是日微公城幾陷賊更大治攻具乘雨夜潛師肉  
薄登公百方禦之士民皆踴躍殺賊無算賊知爲公也氣奪遁去巡撫  
乃疏公全城功舉朝爲動色然向獄終未解也及按察程公之璿至乃  
亟別公冤狀上請有旨并逮訊所牽引及千人閩民罷市號冤不可得焚香祝送出關千里  
不絕久之

延訊事漸白會

世祖賓天

今上卽位推原

先帝意出公而芝龍遂論決矣已錄守閩功補公僉事青州海防道再  
遷江南江安督糧道未幾投劾歸遂歿公好讀書善爲文章雖千厥固  
固未嘗一日廢吟詠其獎引後進如不及博物好古其天性也惜乎已  
試輒蹶於平日抱負十未能展二三然其治閩之久功德昭然人知其  
功在於守城殺賊而不知其中朝殺賊之功爲尤大此真無愧於開國

之名臣直乎閩民愈久而思不忘也公所著書百餘卷晚年盡焚之其前行世者不可得而掩也

又周櫟園先生傳

周曾煜

周亮工字元亮籍江甯遷汴爲祥符人以先世居櫟下又號櫟園海內稱爲櫟園先生亮工行甚敏備善讀書奧篇隱帙無不津逮崇禎庚辰進士守土有能聲而以福建全城功爲大時

國朝閩嶠甫定山海輿壤猶多伏戎大帥慮泉州十四寨居民從逆將帥師夷其地亮工時官布政爭之力且以其家百口保無他帥感其言直從之閩人爲建報恩祠刻石射鳥詩話二樓以紀活命事亮工工古文詞根柢槃深一稟秦漢風骨而獨闢性靈未嘗章撫字範索之象貌也性嗜土類尤篤親念故當明季汴城遭寇亮工官山東舊鄉遺黎渡河而北亮工遣弟亮節收錄存郵振以糗構屏屨所活又眾仕至工部侍郎所著有賴古堂集并雜纂數十種行於世子在浚在延尤有學魯曾煜曰世之學者誦先生文悅之豈知兩活命事余特揚之其他不具述聞先生死之日或夢金甲神鼓吹翟葆曲旃珣輿迎之去汴進士

劉慎云

又賴古堂詩鈔小傳

鄭方坤

周亮工字元亮一字減齋又別自號櫟園學者稱之曰櫟下先生先世自金陵徙居撫州之櫟下數傳復徙大梁考其世唯櫟下居最久取以自號志不忘也少好學能文章弱冠從海內諸名士游聲稱籍甚崇禎庚辰成進士授維令以守城功擢御史十日而京師陷問道歸里門明年王師下江南遂以御史招撫授鹽法道遷閩臬踰年陞右轄尋轉左時山海崎嶇無尺寸乾淨土公至創以雕勦收餘憊而煦哺之使反側子自安平李鳳毛之亂解清漳之圍見者胥驚爲神施鬼設不知皆從書卷中體驗古人成局而變化出之者也既以御史臺徵上章言閩事

輒

報可又密有所建白頗摘抉用事者驟擢少司農而聞者咋舌曰禍始

此矣已而督臣果飛章誣劾奉

詔赴閩勘時有司已鍛鍊具獄比到吏民守府訟冤者以千百計按察

司與五司理會鞫得其冤狀與平反撫軍不敢任請廷質

詔逮法司復訊仍以辟上秋有

詔朝審讞之日忽大風從西北起吹爰書入雲端移時乃下於是羣公

卿揚言曰天意如此獄可疑適緣

大行遺詔遂未竟朝審案援赦論釋尋出爲青州海防道轉江安糧道再被論事白而卒生平喜爲詩宗仰少陵然機杼必自己出不屑爲公家言劇鉞瀚濯而歸之大雅而訟繫前後數年所得詩尤多方坐獄堂下健卒猙獰立呼暑聲如沸手拳據地顧伍伯乞紙筆作送客游大梁二十絕句投筆起對簿詩語皆驚人獄成奏上人謂且不測公赫蹏細書與所親曰今日當得

旨束衣待之所謂時至則行也又一札云今日尙不得

旨又活一日屬友人爲作又活一日印章卽此而論較子瞻獄中夢遶雲山心似鹿魂飛湯火命如雞之句其度越古人何等哉當公之被逮入都也百姓皆炷香號哭追送數千里謂公活我顧奈何反以閩事累公語悲痛不可聽詳閩人高兆四泣記中其時連染者近千人考治榜掠痍死無算猶數百人從公對簿輿大呼白公忠直無罪情詞慷慨卒無一言撓敗吁難已某閩人也先祖二銘公辱公文章道義之交嘗枉駕三造敝廬閩里傳爲佳話緡公遺集蓋不禁廢書而三歎也

又江南糧儲參議道前戶部右侍郎櫟園周公墓誌銘

姜宸英

公諱亮，字元亮，別號樸園。祥符人。先世有諱匡者，仕宋，知江西撫州軍事，因家焉。其後三徙，定居樸下。至公，祖贈鴻臚寺序班庭槐，游大梁而樂之，復占籍開封。鴻臚生子文煒，即公父。國子監生任，諸暨簿。公中明崇禎十三年進士，授維令。是時，維被敵圍，公以一書生乘障，親集鏃，其身城以不陷。事聞，行取授浙江道監察御史。未幾，京師破，順治二

年

詔起公以御史招撫兩淮，改兩淮鹽法道。陞海防兵備道，遷福建按察使。踰年，陞布政司右布政，尋轉左首尾。在閩八年，其以按察駐節邵武也。邵武在萬山中，嘯聚彌山谷城外，烽火燭天。公權宜治軍事，募敢死士，日開門轉戰，谿谷間多所擒獲。夜則獨坐譙樓上，仰天長嘯，賦詩高詠。衛士擊刁斗聲，中夜與相聞。事少間，建詩話樓，祀宋嚴滄浪。其上召邑諸生能詩者，日與倡和。境內益安，爲右藩時，屢奉檄，歷署建南汀南漳泉諸道，皆數反側，地人所顧，却不敢就。獨單車往來鋒鏑中，百方經畧，所至輒見紀故自

內召出境，及被劾還質質，竟傳速復入都。百姓皆扶老攜幼，頂香迎道。左爭奏酒食，勸盡觴，號哭聲竟數百里。閩詩人高兆作四泣詩紀其事。

初公以左副都御史徵上章言閩事報可又密有所建白頗摘挾用事者驟擢戶部右侍郎而聞者咋舌曰禍始此矣未幾督臣果飛章劾奏詔赴閩勘比到前督臣已罷去按察使與五司理會鞠得其冤狀列狀上中丞時久旱贖具兩大湖民爲作歌曰束卷雨云復逮下刑部訊秋朝審可疑故事獄上可疑者報聞卽釋而是時適傳

恩赦凡已論囚槩減等公反以赦例當隨輩徙塞外待春發遣緣

大行遺詔免尋以僉事出任青州海防道公生平喜爲詩凡按部所過山川風俗及臨陳對敵呼吸生死居閒召客燕飲詠吹彈六博揄袂賦笑無不以詩爲遊戲心營口授史不給書而頽繫前後數年所得詩尤多方坐獄堂下健卒猙獰立銀鑼纍纍呼聲如沸手拳據地顧伍伯乞紙筆作送客遊大梁詩二十絕句投筆起對簿詩語皆驚人素與黃山吳生善吳從公獄中久其爲北雪詩序畧日記初冬余與生夜坐爲詩漏下數十刻嗚嗚吟不止或至心傷則相對泣嘗對卧薄板上忽聯句或兩人擁敗絮從口吻中濕筆露臂爭書薄板躍起短燭撲滅一笑而止其高致如此按青逾年遷參議江南督糧道復遭劾解職聽勘尋解尋卒公材器揮霍善經濟喜議論疾握觥拘文吏當大疑難剴斷

生較神氣安甯無不迎刃解者自筮仕卽在兵間尋擢臺職益欲以意  
氣自奮不事遭亂歸才爲時需十年之間晉歷卿貳然時時與世牴牾  
庚戌再被論忽夜起傍徨取火盡燒其生平所著述百餘卷曰使吾終  
身顛踣而不偶者此物也辛亥冬某遇公西陵佛寺留飲拊几太息謂  
余曰吾與子相見知無幾今我年六十子歸爲我作恕老堂酌酒歌而  
已恕老堂者公所居著書處也余渡江詩不果作然竊歎公之才其軀  
軻厯落而老且衰於此視其中默默如不自聊將遂已也循公之迹考  
公之志則古之大人君子其身尊名立人望之若不可及而當其壯年  
適邁俛仰身世出處盛衰之故其皆有不自得者乎則夫世之辭富貴  
而就貧賤甯獨善其身以置生民之休戚理亂於不顧至於老死而不  
悔者彼亦誠有所激也嗚呼可以知公矣公好獎與後進嘗真一簿坐  
上與客言海內人才某某輒疏記之諸所嘗經過雖深山穴處中物色  
無不到見少年能文士觴辭隻韻立爲延譽或數屏車騎過之老生貧  
交相依如兄弟其爲文及詩機杼必自己出語矜矻獲不蹈襲前人一  
字劇鍊滴濯而歸之大雅尤嗜繪事及古篆籀法每天明盥漱出外舍  
從容談說古人圖史書畫方名彝器皆條分節解盡其指趣客退則手

一卷燈熒熒然至夜分歸寢以爲常元配馮淑人生子五在浚國學生  
考充官學教習在延庠生在建在都在青皆國學生孫男女四人卒年  
六十有一將以某月日葬於某原銘曰

謂莫知耶爲大司農謂達其時胡厥而終詭轡備規滑稽乃容余不忍  
爲奚辭固窮烏石巍巍滔滔大江文蒸武施惟公之功公之德威汜於  
數邦肆我文辭砭鍼警萬派千支於海朝宗如賁待詔如懸待撞晚  
厯嶽崎益放而洪誰其司之命彼祝融悠悠我思蒼蒼彼穹北山之岷  
嗟櫟園公

又贈周櫟園先生序 陳維崧

櫟園先生頌繫之五年

天子憐其冤事大白於是先生既脫獄南還至揚州揚人士識與不識  
聞先生至無不大喜爭持牛酒賀陳生維崧適遊揚亦欲一見先生私  
輒自計曰維崧江表鄙人耳家貧誦於衣食奔走江淮間未獲以文章  
末技奏於先生今來廣陵又多與博徒賣漿者游雖欲見先生恐未有  
路也獨居深念不能自決者累日如臯冒君辟疆余父執也一日自外  
至語維崧曰櫟園先生知陳生亟欲一相見子無悞陳生聞是言竊自



喜旦夕謁先生則先生已枉車騎跡陳生於市中以故左日已曠復上  
謁先生則揖陳生入置酒食陳生攝衣就坐醉則歌先生所爲詩先生  
擊唾壺和之一座盡驚先生起謂維嶽曰老臣獲戾六年於茲矣六年  
以來關木索嬰金鐵見獄吏則頭搶地視卒隸則涕忱息自分旦夕就  
湯鑊以快舞文者意覆盆之中甯知復有今日與諸君相勞苦乎賴  
國家大恩卒賜前濯第念頻年對簿株連瓜蔓何止千人爲老臣拷掠  
垂斃者百數十人矣爲老臣斃三木下者十餘人矣有司白臣冤道死  
者一人痲死二人餘皆瀕死數矣卒無有一人誣服者他變姓名微服  
爲隳臣橐饋計又不知幾何家焉嗟夫何以致此夙夜自思惟是結髮  
爲吏實未嘗有所恨以至斯也一客起曰誠如公言蓋公所至多善政  
吏民戴之閩人士至作四泣圖此皆地遠不遑論論吾所及見者公備  
兵揚州江南甫定告密繁興猶憶一日者有急裝自北來以馬箠叩營  
門叩已據地坐諸將愕倉卒不知所出公直前上謁急裝者熟視久徐  
曰彼韎韐而白皙何爲者公嘆惜曰君貴人吾亦貴人有事當告我急  
裝者採腰下出一牘背耳語良久則泰州桀黠奴董宦室者反詞也公  
厲聲曰若誠反當族然安知非奸民搆姑詞之第君馬勞不宜復有所

乘坐休之命驛騎及吾廩馬以去急裝者喜越日偵騎至桀黠奴所言  
果妄事乃解其好全活人類如此又一客曰當公治兵時而江南撫軍  
某者性險鷲尤嗜殺人一日漏下二鼓公寢門闖矣諸將譁云撫軍趨  
議事且言速駕車以來不及則單騎來又不及步來人聲鼎沸一市人  
盡驚往來轅門間公佯卧不起敕諸騎士前後植檠戟箭鼓大作列炬  
如白晝然後起起又徐徐行撫軍催騎道相望至則諸將士悉堅銳毅  
弩相向白刃夾道立堂下撫軍坐堂上公至撫軍恚良久語曰吏報城  
外某處有賊巢吾待公至將盡撲殺之公奈何來嫻嫻者公曰以吾料  
之必無是撫軍怫然曰觀察能以百口保鼠輩乎公應曰諾撫軍沮則  
令諸持長鉞者退公曰適倉卒未尊食煩公爲某置食食訖徐徐出呼  
騎士轅門外譙讓之曰躬隨撫軍趨吾會食向者驚呼奚爲掉其髮徧  
答之一市人始知嚮所傳聞實謬悉散去城外亦卒無有所謂賊是日  
也微公事幾殆客言未竟更雜述先生數十事皆倉卒間戡定大難恩  
澤及人者階下人聞之躡足語至有泣者最後一客年七十餘狀微僕  
齒缺落且盡述公解任維揚日揚城十萬戶砌城留遮道泣聯袂成帷  
天日爲之霾既已就道哭聲撼天地城闕崩摧語絮絮不可竟陳生離

席伏奉卮酒先生前曰吾向在如皋冒君辟疆受先生知最深談先生  
事最悉今又聽客所言昔李廣爲將殺降卒乃自剄于公治獄平恕後  
乃克昌今先生陰德奚啻于公疇昔之事吾固知其往而必返也豈惟  
復返自此以後無疆之慶卽以此卜之矣座客孝威鄧氏墨倩程氏曰  
今年先生正五十揚人士思有以觴之卽以子言爲先生壽可乎先生  
大笑爲陳生盡一觴

謹案原編有請禁苛派鋪戶狀一首已見經世文編今不錄

碑傳集卷十一目錄

康熙朝宰輔上

光祿大夫太子太傅禮部尚書保和殿大學士加一級柏鄉魏公喬介

墓誌銘 徐乾學


又太子太傅保和殿大學士兼吏部尚書魏公傳 任履遷

經筵講官太子太保東閣大學士兼吏部尚書熊文端公賜履年譜 孔

繼涌

又故東閣大學士吏部尚書熊文端公事狀 彭紹升

文華殿大學士馮文毅公溥事實 並節錄



106-558

康熙朝宰輔上

光祿大夫太子太傅禮部尚書保和殿大學士加一級柏鄉魏公裔介

墓誌銘 徐乾學

光祿大夫太子太傅禮部尚書保和殿大學士加一級柏鄉公薨於里第其孤以宅幽之銘屬其門下士崑山徐乾學且謂先公生平有成命遂弗獲辭公姓魏氏魏萬之後分有晉國子孫以國為氏世有顯人其尤著者漢高平憲侯相唐鄭文貞公徵譜牒失傳莫能詳其世次元季有寒臘者居鄗南之聖德邨是為柏鄉始遷之祖數傳至孝廉壽壽之後世次乃可得而詳焉壽生嚴嚴生衡山知縣謙光是為公之高祖考謙光生大成封文林郎永城知縣公曾祖考也祖考純粹萬厯甲辰進士山西道監察御史考柏祥天啟辛酉考授知縣未仕妣某氏自高祖而下皆以公貴贈光祿大夫太子太保內秘書院大學士加一級妣皆贈夫人公諱裔介字石生別號貞菴又號崑林自少沈默寡言笑穎悟絕倫嘗讀書邑西山之桃源洞講習經術世務或終日端坐究心於明

體達用之學會邑城兵亂父子走避西山遊騎邀劫之力關得免亂兵縱火焚邑屋盡空歲又大祲人相食因赴郡至樂城題詩壁間投筆歎曰今寇盜縱橫生民塗炭將何日而蘇乎蓋天下已任之意隱然見於此矣壬午舉於順天

大清定鼎中順治三年進士選庶吉士明年改授工科給事中丁艱九年補故官明年轉工科左給事中又明年升兵科都給事中十二年內升太常少卿提督四驛館未幾擢都察院左副都御史十四年擢左都御史

恩詔加一級坐事當落職仍視事明年復遇

恩詔還職已而以公建言多裨國是加太子太保十六年日月

世祖章皇帝下罪己之詔令羣臣亦各自陳公疏上削去宮保及所增秩官如故其後上疏請清政本以公糾參不早並下吏議旋以指陳有

據當還故官而

世祖升遐蓋終

世祖之世十三四年間公歷官諫垣御史臺今

上御極之初復居御史臺踰年改元考績復宮保晉吏部尚書康熙三

年人贊機政嘗請告遷葬事竣趨還朝十年以疾乞歸

優詔許之公在言路最久先後二百餘疏或立見施行或始訓於眾議後卒以公言爲然或

天子排眾議而獨伸公言用著爲律令其書具在可得而考也在工垣

時

世祖已御極五載公言少而勤學古人比之日出之光竊恐年歲既盛嗜欲日開宜及時講學肇舉經筵日講以隆萬世治本又言燕趙之民椎牛裹糧首先歸命此漢高之關中光武之河內也屢奉

詔書蠲賦獨於畿輔未沾實惠宜切責奉行之吏彰信兆民其應

詔陳言謂時事孔亟民不聊生山左萑苻未靖畿輔因以燎原江右叛將甫擒雲中忽而豕突巴蜀湖湘遊魂遺孽所以屢

九重之宵旰者舉不足慮惟是上下之情未通滿漢之氣中闕大臣關茸以保富貴小臣鉗結而惜功名綱紀日弛法度日壞貪官暴吏轉相吞噬以鳴得意臣實憂之欲改絃易轍盡反其平日所爲非精心熟慮未有能得其要領宜召對羣臣虛心諮訪仍令史官記注以求救時之

實



制下立行其說時匿逃之律甚峻因廷臣入對陳言特寬其禁中外大悅公在吏垣

世祖已親政公言督撫封疆重臣當慎遴擇不宜專用遼左舊人又言攝政王時隱匿逃人法大嚴犯者家長坐斬時天下囂然喪其樂生之心後以言官陳說始寬其禁責成州縣法至善也今日久視爲文具宜嚴飭有司緝逃及格者紀錄失察奪俸多則降秩若舍此之外別有峻法竊恐赤子無知陷於刑戮下拂人心上干天和非尋常政治小小得失而已

皇上愛民如子各旗亦宜仰體

聖意遇下以恩彼雖奴隸豈無戀主心而紛紛烏獸窳胡爲也時朝儀未定公又言深居高拱不如詢訪臣鄰批答詳明不若親承顏色稽之故實有朔望之朝有三六九之朝有早晚之朝有內朝外朝今縱不能如舊例當一月三朝以副勵精圖治至意自是始定月逢五視朝之制直隸河南山東水災公言勘報移覆尙需時日議蠲議賑稍緩須臾無救死徙言最悚切會有

詔訪明季京城殉難諸臣公疏舉大學士范景文等三十人略言運際

昇平則良臣奏績時逢板蕩則烈士腐心故刎頸血裾焚身湛族慷慨  
從容不必一致要皆乾坤之正氣與日月爭光乞宣付史館顯加褒錄  
於是諸臣先後得旌錄於祭諡

世祖敬天恤民每遇水旱饑饉

諭羣臣條奏興革事宜直言無隱公時復在工垣言天下大利害咸中  
察要會歲荒流民載道出帑金二十四萬兩分命大臣十六員賑濟畿  
輔全活數十萬人皆自公發之在兵垣綜覈軍政所識拔後皆爲大將  
奉

詔令內外大小臣工精思職守公陳用兵大勢言往事誠無及矣今者  
劉文秀復起於川南孫可望竊據于貴竹李定國伺隙于西粵張名振  
流氛於海島連年征討尙逋天誅爲目前進取之計蜀爲滇黔之門戶  
蜀旣守而滇黔之勢盛故蜀不可不先取此西南之情形也粵西稍弱  
昨歲桂林之役未之大創必圖再犯以牽制我湖南之師宜令藩鎮更  
番迭出相機戰守擾其畊牧則賊勢自潰此三方者攻瑕宜先粵西粵  
西潰則可望膽落滇黔亦當瓦解乃若鯨波未息則嚴設斥堠絕其覬  
覷大修戰艦諸路并力合剿勿使事久變生其後諸路進兵卒如公言

又請錄用建言得罪諸臣請做唐李吉甫元和國計簿令度支歲計出入盈縮進呈

御覽請增官吏祿俸請禁金玉錦繡浮屠塔廟一切侈靡蠱耗之事請立勸農官請自今罪人勿發甯古塔冰雪昏霧之地請遣大臣督視河工言皆剗至公爲副憲方議吏員納銀事例公言此衰世苟且之政也今縱不能加小吏工食奈何著爲令甲以資得官使銓政由此而壞其領御史臺也凡以舉舊典通壅滯核姦弊勵臣節善風俗清學校與夫田賦財用兵制屯政關國計民生之大者無不條分縷析指次如掌遇日食陳言經傳月食者日光過望遙奪月光是爲陽勝陰也日食者日月同會月掩日精是爲陽不勝陰也今五月朔日食在易卦爲姤陰微而卽抗陽其變非細於五月望後月食爲日月交食月食至旣亦屬災變此在漢唐令主尙能恐懼修省況敬天勤民慎德緩刑如我皇上修救之實可弗講乎歷舉兩漢日食詔書及光武時大中大夫鄭興所云國無善政謫見日月要在困人之心擇人處位留思柔克之政垂意洪範之法願廣開言路停罷土木寬守令考成參罰釋解冤滯矜恤鰥寡孤獨酌復五品以下官俸并令南方專意招撫固防險隘撤還

旗下戍兵省數百萬供億之費待歲稔財充決意大舉春月侍經筵聽講漢文帝春和之詔公因舉仁政所先四事卽日以聞雲南平請捐無名賦稅以慰新附之氓薦地方人才以收歲穴之士恤投誠文武以來膚敏之彥寬一切禁網以安溪峒之蠻其因事納忠多此類京師人生女多棄不舉公請嚴禁惡俗

世祖宣示講筵命閣臣紀其事正陽門外茶園居民稠密爲前朝嘉蔬圃地所司檄歸之官公過其地百姓遮道訴公入言于上立以予民公嘗言天下未平皆由徵求太急刑罰太繁以致良法美意不能遍及窮簷今當獎進直言激發唯諾共尙寬大平易之術勿爲刻薄瑣碎之計

有旨令對狀終以其言直不問

世祖嘗召至中和殿諭之曰朕擢用卿非有人薦達公稽首謝曰敢不竭孤忠以報知遇南苑閱武每

賜宴行宮應制賦詩

天顏喜甚一日侍坐問民間收穫公曰畿內百姓困苦豐年所收僅供官稅

上稱唐太宗英主對曰晚年無魏徵苦諫遂窮兵高麗至貽後悔是時  
恩資豐貂名馬金幣之屬甚多

世祖幸南苑別殿夜半閱明孝宗實錄有召對兵部尙書劉大夏都御  
史戴珊事心喜曰朕所用何遠不若大夏珊明日宣真定尙書梁公與

公詣  
行櫪備顧問其蒙

恩眷如此今

天子冲齡踐阼輔政大臣議加練餉五百萬公疏爭之力中

旨停罷雲南初定戍兵未還公請罷雲南大兵兼宜亟防荆襄要害以

杜亂萌後滇南變亂人謂公爲先見公在政府張弛寬猛調劑異同密

勿從容協和寮案單辭片語解紛抉策彗星見尙書龔公請赦輔臣曰

古有之乎公條舉故事以對且曰

世祖皇帝亦行之輔臣歎服

皇上親政深感

兩朝恩遇夙夜匪懈終以直道忌者眾亟請回籍養痾  
上以其懇切不强留也公服官日夕讀書輿中輒攜一卷及奉身而退

優游林泉紬繹經史百家之書拳拳服膺於窮理盡性之義有所深省  
獨得而不以告人其見於所著書及語錄有約言錄內外篇聖學知統  
錄二卷知統翼錄二卷致知格物解二卷晚歲又著論性書二卷所纂  
書有重訂周程張朱正脈薛文清讀書錄纂要其經學則有易經大全  
纂要四書精義彙解惺心篇捷解孝經注義其史學則貫穿全史上下  
數千年成敗得失錄其要而論斷之以附左氏外傳之例曰經世編凡  
七十二卷生平賦詩數千首有嶼舫詩集嶼舫近艸爲文六千餘首有  
兼濟堂集京邸集崑林小品崑林論鈔林下集二集共五十餘卷其他  
著述尙夥又著希賢錄一書分五門二十五目以括格致誠正修齊治  
平之要詩以陶韋爲宗文出入於昌黎廬陵其於科舉之文亦必規先  
正大家而尤惡近日之雷同勦襲浮蔓支離故庚戌南宮之試公爲主  
司文體爲之一變云公孝行純篤與人交質直無城府久要不忘尤善  
獎掖後進急人之難周人之急不啻飲食嗜欲懸車十六年課督農桑  
循行阡陌混迹於田夫野老人不知其爲舊相也嘗自作贊生平嚮慕  
留侯二疏及裴晉公白樂天之爲人其出處亦略相類云公生於萬曆  
之丙辰卒於康熙之丙寅享年七十有一元配內邱韓氏繼室高邑袁

氏俱贈一品夫人續靈壽傅氏子三人勲公弟裔慤之子也始生之日  
公以父命命側室蔡子之以廢仕至建昌府知府嘉孚候補國子監典  
簿蒞彤候補內閣中書舍人女四人皆適名族孫男二人世晉世賁孫  
女六人勲等以己巳年四月葬公於某變之某原以某夫人附銘曰  
從盈必大始封天啟參國趙魏蕃昌施祉高平鄭國頻復其始繇延蘊  
崇篤生夫子翊我興運官用儒起道宏言傳匡輔鄉理移病致位弗俟  
年齒星終踰四徧祥閭里急流勇退自贊云爾稽古典學著厥統系壽  
考彌性隕予仰止赤志商封銘藏奚委宅兆食墨固安歸體利其後人  
綬福百祀

儀吉案歸愚文鈔有魏母王太夫人墓誌云雍正三年太傅公繼

配誥封一品夫人王太夫人卒距太傅公薨三十有九年又云

歸太傅公為繼室時太傅公任給諫時也又云方太夫人之來歸

也原配袁太夫人既卒遺子若女云云與此誌不同蓋後人誤述

也沈誌又云太傅公為憲副時以州臣劉正宗不忠其疏

又太子太傅保和殿大學士兼吏部尚書魏公傳在厥運

公姓魏氏名裔介字石生柏鄉人性沈默寡言笑順治三年成進士由

庶常改給諫歷工科吏科居憂起補兵科當是時天下初定公忼慨敢  
言事首請舉

經筵以降治本又應

詔言上下之情未通滿漢之氣中闕請召對羣臣虛心咨訪仍令史官  
記注十年正月

世祖臨朝定一月三朝之制又言逃人宜寬蠲賦宜信會畿輔水陳狀  
世祖爲立發帑金二十四萬又言用兵當先蜀次粵西則滇黔自然瓦  
解其後三路進兵如公策

世祖知公可大用擢太常少卿遷左副都御史

召至中和殿面諭曰朕知卿用卿非由薦舉時順治十二年也公感激  
益發抒所欲言十四年進左都御史因日食陳六事一湔洗敢言之臣  
二罷土木之工三寬催科以優循吏四督撫奉行恩詔不可稽遲五酌  
增五品以下官俸六減南方戍兵歲省供億百萬乃可俟時大舉皆得  
旨允行俄以公罪革官仍視事如故明年春侍

講筵請法天以行仁政恤癘獨掩觝齟課農桑其因事納忠皆此類也  
明年



恩詔還職以建言多裨國是特加太子太保先是公策海寇情勢籌控禦方略至是鄭孽突犯鎮江遂請設水師鎮京口至今為定制又明年世祖下詔罪已并令羣臣自陳公慨然痛自陳劾落太保直糾首輔劉正宗

世祖震怒又以公不早言竝下獄然卒直公出之時方大旱出之日甘霖沛焉十八年

聖祖卽位輔政大臣議加練餉五百萬公力爭得免康熙元年言雲南戍兵宜撤獨荆襄控制滇黔川粵宜選大將宿重兵以杜亂萌及吳逆作亂人服其先見自入諫垣至是先後二百餘疏內贊政典外籌軍務皆中機要

兩聖人或行或不卽行要未嘗有知而不言者號稱敢言第一二年攷績復加太子太保晉吏部尚書補內秘書院大學士贊機政九年典會試得人最盛十年以疾告

優詔許之明年

世祖實錄成加太子太傅公既歸益務讀書所著集百餘卷蓋閑居十六年乃卒壽七十有一

謹案原編有軍屯疏明季利弊論復黃張園書請召對羣臣疏請  
因變修省疏知府久任疏請停察荒疏踏勘蝗荒議八首已見經  
世文編今不錄

經筵講官太子太保東閣大學士兼吏部尚書熊文端公賜履年譜 孔

疏通

謹案先生諱賜履字青岳又字敬脩號素九別號愚齋湖廣漢陽府孝  
感人世籍南昌明洪武初有諱邦顯者字冲霆以熊爲楚姓江漢鄖鄂  
間祖宗故壤也遂占籍湖北德安之孝昌邑則遷楚之始祖也邦顯生  
斐章斐章生二子長正邦字鳳川先生之高祖也次正道字思存鳳川  
公生三子長乾次爲先生曾祖又次朝曾祖諱翰字中台隱居不仕祖  
諱啟運字應亭以貲仕

皇清並贈光祿大夫東閣大學士兼吏部尚書父諱祚延字祈公主連  
奇書院講席著有宏毅齋集明末寇起死難

皇清受命命祠於鄉賢誥贈徵仕郎翰林院檢討世廕一子爲博士弟  
子員奉祀事晉贈光祿大夫東閣大學士兼吏部尚書故明崇禎八年  
乙亥十一月五日先生生十一年戊寅四歲先生弟賜贖生十六年癸

未九歲闖賊陷德安獻賊陷武昌祈公公死之初祈公公避亂於白雲山以里中數被焚掠乃團練鄉勇保障里閭楚自崇禎之初年盜賊蠭起所在麻沸而數年稍得寧謐者祈公公守禦之力也至是闖獻屢至兵食交匱遂及於難甲申十歲卽我

大清順治元年也

天子當陽羣凶次滅生民漸就寧宇先生母李太夫人課讀二子父師之嚴兼於慈母每深夜篝鐙績絰與讀書聲琅琅然互答也六年己丑先生十五歲學已有成自經史以及外氏六通五覺十祕九府之書罔不心摹手寫穿穴貫串故凡星經地志六甲五緯測算鉤稽諸術無不可手繪爲圖口勒成帙而後由博反約歸源濂洛如天地左海百派統滙是以學有本原不修鞏祝一日舅氏李公嘉卉願而謂之曰賢甥雅志潛修獨不早爲先世表敷計邪遂出應試七年庚寅十六歲充博士弟子員十一年甲午二十四歲貢入成均十四年丁酉二十三歲以詩經舉鄉魁十五年戊戌二十四歲會試中式殿試得三甲授國書庶吉士讀書館中十六年己亥二十五歲散館授翰林院檢討十七年庚子二十六歲充順天鄉試副總裁得楊士玠若干人學憲某以祈公公及李

太夫人義節疏聞於朝得請祈公公專祠於瞽宗太夫人旌閭先生曰  
今而後庶稍酬舅氏訓矣詣院長請歸不許曰

上方崇獎儒術褒君學行第一願可求退耶十八年辛丑二十七歲冬  
十月特改授秘書院檢討

特諭建直房於景運門外遂翰林入直以資勸講蓋意有在也未行而  
世祖章皇帝升遐康熙元年壬寅二十八歲二年癸卯二十九歲夏四  
月陞國子監司業冬十一月陞秘書院侍讀三年甲辰三十歲請假回  
籍遷葬時先生祖墓瀕湖爲水所齧前牀將見故請歸四年乙巳三十  
一歲入都補宏文院侍讀五年丙午三十二歲順天武鄉試總裁六年  
丁未三十三歲充

世祖實錄纂修官著閑道錄成

上以民生失所詔求直言先生上疏其略曰民生至今日困極矣國家  
日言生聚愈彫蔽日言軫恤愈瘡痍日言招徠蠲免而流亡眾逋負積  
惟由官吏致之蓋私派倍於官徵浮征溢於正額意外之誅求無名之  
賠補百狀千名疊出并至正使年歲熟稔不飽糠粃一遇凶荒死徙立  
至蠲徵則吏收其實民受其名賑濟則官增其肥民重其瘠強者爲寇

盜弱者析骸易子勢必至者是非獨守令罪也上有監司又有督撫  
報上以廉則無賄以結上官由是而廉者糾劾貪者薦舉由是而濁者  
得計清者易操苟不厲民將焉取此夫有司之職業在地方上官之激  
勸在舉劾年來督撫之薦循卓者果有政績可指乎所糾參者直暴其  
污穢殘酷所在乎且循卓者果無以上糾參者果罪之魁乎摸稜容隱  
已耳以至以督責爲能而不問慈惠以催科爲政而不問撫綏以夤緣  
之巧拙爲優劣餽遺之厚薄疏密爲殿最而不問品誼局幹何不視斯  
民如秦人視越人之肥瘠也亦可謂上負朝廷下負生靈矣伏乞  
皇上將現在督撫大加甄別不肖者立賜斥罷遇督撫缺出不拘內外  
大小臣工

敕部院大臣從公保舉而以民之安否課守令以守令之污廉課督撫  
不以虛文美人聽聞則治民之實事也疏又言政事紛更國體日傷乞  
敕議政王貝勒大臣九卿科道將國家制度詳慎會議沿革損益勒爲  
會典又言國家設官滿漢相制堂屬相維欲其同寅協恭職無他卸近  
日各衙門以意見爲嫌疑以嫌疑爲推諉陰拱緘默瞻顧依阿而奸人  
循吏因以偷換文法宜立振頌風使漢官勿以阿附滿官爲工堂官勿

以偏任司官爲計宰執不必以唯諾爲休容臺諫不必以箝結爲將順  
又言學校廢弛經訓不明士子皆揣摩舉業爲七科名掇富貴之具不  
知聖賢之歸綱常名教之重又或汎濫百家沈淪二氏習詖淫邪遁之  
說充塞仁義宜使士子講明正學非翼贊六經語孟之書不得讀非濂  
洛關岡之學不得講又言風俗奢僭禮制衰壞爲饑寒本原盜賊訟獄  
凶荒之所由起幾萬言上之七年戊申三十四歲陞授秘書院侍讀學  
士有諫北巡一疏又有請除積習銷隱憂一疏大意以講學勤政二者  
不可偏廢奉

嚴旨命據實明白指陳回奏先生奏略云臣前疏中據理據事固已臚  
陳之矣竊見唐虞之盛猶吁咈一堂動色相告絕無後世諛頌之辭臣  
雖愚陋猥效古人告君之意奏上吏議降二級奉

旨免議八年己酉三十五歲九年庚戌三十六歲夏四月陞國史院學  
士秋八月充

世祖實錄副總裁十月充武殿試讀卷官一日御門先生捧奏牘已及  
降階等

上目屬之召入命作大字先生書敬天法祖知人安民八字進

上顧侍臣曰書法亦如其人顧不自炫耳隨命講大學中庸兩首節竟曰眞講官也

賜宴出翼日改除翰林院掌院學士兼禮部侍郎十年辛亥三十七歲春二月

詔舉經筵大典於保和殿

命爲經筵講官先生進講尙書人心惟危一節

上曰今日可爲得行其言矣自是春秋

經筵爲故事三月

上又以經筵體嚴時暫工夫切實在日講

命先生爲日講官日進講於弘德殿夏四月充

太祖

太宗聖訓副總裁五月充孝經衍義總裁給假回籍省親孝經衍義先生被命卽發凡起例手爲定之脫稿則韓文懿諸公也已卯書已告成時三藩作逆閭事旁午未及繕寫進呈丙辰乃頒行焉十一年壬子三十八歲

命教習庶吉士二月遵

旨到京供職秋御史孟某疏參考試廕生郎中恥之於人大矣一題近於譏刺殊欠正大部駁奉

旨孟某著嚴飭行十二年癸丑三十九歲會試總裁得韓莢等一百五

十人有薦舉原任直隸內黃縣知縣張沐原任江南江都縣知縣軒轅

肩一疏冬上特召至起居注館同葉方藹張英韓莢等試作太極圖說大稱

旨拔置第一因問平時所著明道之書先生以閑道錄對

命取進呈先生趨歸取刻本詣弘德殿恭進次早入侍講筵

上齷色謂曰朕披閱所著閑道錄正大精醇斯誠斯文的派也少頃又

顧謂曰錄中崇正闢邪極透切有功聖道不淺遂親題其籤曰熊學士

閑道錄置之

御凡益異數也冬十月吳逆三桂反彙進講義十四年乙卯四十一歲

辭內閣疏略云本年三月三十日該吏部傳宣

聖諭翰林院掌院學士熊賜履素有才能居官清慎著陸內閣大學士

欽此臣跪讀之下罔知攸措竊臣緣粗涉章句遂得執經講幄自謂備

生福命至此極矣蓋幼齡失怙病患嬰纏今老母縋髮常在牀席故幾



番講罷輒冒陳下悃蒙

皇上面諭四書尙書講畢卽允放回詎意逆賊猖狂致塵宵旰

皇上特降溫綸置之政府臣雖至愚亦稍知狗馬之義當國家多故爲臣子者卽捐軀矢效分誼應然亦何忍避劇辭艱但臣自揣政事俱未諳曉從來闊論難行古人所戒臣實犯之又何敢自欺以欺

皇上尙貪進忘恥冒昧祇承他日負乘溺職誤國家大務累

皇祖知人之明伏乞收回

成命俾臣仍待罪翰林講求經義以備顧問疏上不許遂以武英殿大學士兼刑部尙書理討事十五年丙辰四十二歲五緯陣圖成秋以內閣票擬事致仕回籍時楚氛未靖乃奉李太夫人卜築於金陵城北青溪之蓮花橋又遷於溪西之清涼臺長子志伊生側室蕭孺人出十六年丁巳四十三歲十七年戊午四十四歲福建平十七年己未四十五歲兩廣平十九年庚申四十六歲四川平三月女采蘋生側室陳孺人出四歲殤於痘二十年辛酉四十七歲雲南平二十一年壬戌四十八歲築下學堂五楹貯藏書先是先生自通籍後居京師坊間無書卽有且價昂不易得十餘年間僅二萬餘卷及去職留寓金陵金陵藏書甲

天下多人未見者遂肆力購求或就人家假歸手錄之七年之中積有八萬餘卷合前共十萬卷有奇爰依次插架爲下學堂書目一帙並載每書之本末以仿於劉略荀簿王志阮錄殷滄之序錄李肇之釋題晁公武之讀書志崇文總目之序釋焉二十二年癸亥四十九歲二十三年甲子五十歲冬

上南巡十一月朔先生隨眾郊迎特蒙

慰問召至行宮諮訪再四翼日

遣侍衛二格子至私第傳諭謂念昔年講幄啟沃勤勞特賜羊酒果脯又賜

御書太極圖說及

御製詩下學堂劄記成二十四年乙丑五十一歲學統成二十五年丙寅五十二歲撲園邇語成二十六年丁卯五十三歲些餘集成二十七年戊辰五十四歲秋以禮部尙書起先生於家冬口月八日李太夫人卒訃至

上命大學士伊桑阿學士彭孫適至私邸奠茶酒傳諭温慰先生奔喪南歸二十八年己巳五十五歲春

上南巡二月二十五日先生郊迎

上遣侍衛關保禮部尚書張玉書工部尚書蘇赫諄論加餐並賜鹿尾

鹿脯餅饅茶蘋粿果羊酒二十九日復遣侍衛關保二格子賜

御題經義齋額并尚稜十斤以扶孱瘠先生謝疏有云

皇上裁取孝經經義兩言題臣齋額臣中夜捫循媿汗無地然義不敢

辭惟恪遵

聖訓省蓋前愆冬葬李太夫人於孝昌之王母湖二十九年庚午五十

六歲春遷葬於宏樂之文脊山秋

上以禮部尚書起先生於家先生疏請終制許之三十年辛未五十七

歲春服闋秋入都引見

上於暢春園補禮部尚書十月武會試總裁三十一年壬申五十八歲

除吏部尚書冬十二月奉

旨詣察荒地初河臣靳輔以揚屬之高郵江都鳳屬之靈璧盱眙徐屬

之豐廢地向少淮屬之山陽安東清河桃源宿遷邳睢甯徐屬之徐蕭

碭山河占地最多請察勘豁免陞科

特命先生往釐焉二十五日先生同兩江督傅臘塔江蘇撫宋攀往來

踏勘凡豁山陽清河桃源宿遷睢寧安東高郵靈璧徐豐蕭陽山淮安  
 大河廢地三千七百二十八頃三十七畝八分九釐六毫三絲九忽五  
 微一沙六塵銀六千六百五十四兩四錢一分一釐三毫四絲六忽三  
 纖七沙三塵九渺三漠三埃二邊九巡米二千三百五十八石八斗二  
 升五合八抄九撮三圭五粟七顆四粒一黍九稷一禾五糠九粃麥七  
 百二十六石二斗二升二勺二抄九撮四圭六粟四顆五粒四黍一稷  
 三禾八糠豆二十八石四斗二升五合四抄三撮九圭五粟四粒四顆  
 八黍八稷五禾又山陽縣改輸糧餉田地應免原納葦柴一萬八千束  
 海山桃源宿遷安東流陽大河淤田一千一百三十七頃一十畝八分  
 六釐三毫四絲陸銀二千一百七十八兩七分一釐一毫一絲七忽二  
 微八纖五沙八渺三邊八巡米九百七十四石六斗二升五合三勺九  
 抄八圭五粟八顆五粒七黍三稷九禾一糠四粃麥三百二十四石八  
 斗二升五合七勺二抄八撮六圭一粟一顆二黍四稷一禾一粃三十  
 二年癸酉五十九歲正月朔孔志生側室龔孺人出三十三年甲戌六  
 十歲春會試總裁得裴之仙等一百五十九人三十四年乙亥六十一  
 歲春先生弟賜瓚以捐納事奏對欺飾下獄御史龔翔麟劾先生偽學

欺罔請并治罪

上曰吾信熊賜履無他也置不問冬賜贖亦獲赦龔蓋先生及門也三十五年丙子六十二歲夫人李氏卒三十六年丁丑六十三歲春會試總裁請假營葬三十七年戊寅六十四歲冢孫述祖生三十八年己卯六十五歲春二月二日

命入侍

皇子進講

上將南巡闕河先生詩有云腐儒管見只蹄筌此日居然上講筵爲語當年立雪者涪州原不負伊川蓋先生所著學統闕道錄劄記並命進講

兩宮俱有正學宿德之褒故志恩也疏請解銓務不允冬

上一日宣滿漢大臣於廷問之曰朕久欲復相熊尙書今還他舊職爾等以爲何如倘別有所見可卽直陳勿更退有後言也皆稽首而對曰皇上進退臣工至公至慎熊賜履侍從已久表裏儼然

皇上老其材而用之臣等幸甚遂拜先生東閣大學士兼吏部尙書皆如故五月廿三日以大暑輟講

皇子賜朱刻朱文公年譜且傳令旨云以先生專講正學開導有益特賜此書蓋亦出

上意也二十九年庚辰六十六歲會試總裁得王露等若干人志孔殤四十年辛巳六十七歲四十一年壬午六十八歲乞休不許

御書澡修堂額以賜冬十一月十五日

召試南內

御書存誠涵物理守敬積天眞一聯內監捧出傳旨云卿學本此道其實也先生復將引歸

上知之十二月二十二日

特製咏雁詩賜之以諭挽留之意焉四十二年癸未六十九歲會試總

裁先生屢疏乞休

上乃許解機務食俸留京師備顧問冬暫假省祭著澡修堂集成四十年甲申七十歲春還京師除日

上書壽考二大字以賜四十四年乙酉七十一歲四十五年丙戌七十

二歲春三月二十四日第八女淑口生先生以年老乞歸十月

召見於乾清宮諮諭累日特給驛傳遣官護送還金陵四十六年丁亥

七十三歲二月十一日志皋生

上南巡幸江甯首

召見先生於行在恩禮爲本朝冠回鑾之日

上解所服貂帽及團龍御服賜之曰卿復之如見朕矣先生感激涕下  
冬自築壽藏於上元青龍山題曰愚齋自卜藏真處四十七年戊子七  
十五歲春三月志夔生梅園存稿成秋八月先生薨於金陵遺疏謝恩  
途次爲人竄易

上一覽察其僞命兩江總督察查原稿側室龔孺人出篋中

上敕守臣存問諭祭葬加贈太子太保諡文端長子志伊服闋入都以

京職用

御製碑曰自古薦業之臣律已清嚴居官恪慎爲國家之耆舊作寮案  
之觀型則恩禮必厚以始終而勳名克垂於琬琰爾熊賜履賦性端凝  
持躬峻整秉忠貞以立志涵經史以敷華早擢詞垣聲名炳耀久趨講  
幄敷奏詳明領袖玉堂品行無慚師表從容丹陛文章不忝儒宗陟春  
卿則典禮寅清晉冢宰則秉銓嚴慎念茲懿德入贊鈞衡眷乃清風共  
襄密勿允協絲綸之重望益持皎潔之貞操屢典會闈公明尤著頻承

清問恩寵靡涯既乃引退陳情暫休邸第歸田再請旋返林泉每值南  
巡頻通朝謁精神尙固眷渥有加方期永享太平何意奄歸長夜用深  
軫悼丕示哀榮分頒外府之金馳奠大官之醴錫之嘉諡贈以崇階嗚  
呼追念老成儼風規之猶在用酬勞勩賁泉壤以增光視此豐碑俾垂  
永世後

上御宇之六十年復召志契志夔入見

特諭大學士馬齊曰熊賜履家甚清寒後嗣作何周給

賜宅一區於京師令子孫肄業焉述曰先生卒後之六十年其外孫孔  
繼涵爲考證遺文排纂事實錄爲年譜一卷夫先生立朝制行太節炳  
然受

兩朝知遇亦至隆矣方先生之進呈明史

聖祖仁皇帝已有朱熹司馬光之目載在起居注固無事後人贊揚爲  
也獨涵九齡失怙母氏嬰疾無告窮民躬丁其慘而於舅家兄弟間居  
南北恐數傳而後罔識自出用是勒成一帙期諸永永涵雖無文事取  
其實無敢或誣小廉曲謹不事鋪張是則無憾于心者也并爲熊文端  
公世譜女譜附後貽諸子孫俾知中外世承皆克守我先聖修身爲己



之學庶或紹余鄙志無忝祖德云爾

又故東閣大學士吏部尚書熊文端公事狀

該編升

公諱賜履字青岳湖北孝感人順治十四年舉于鄉明年成進士選庶吉士授檢討十七年充順天鄉試副考官康熙二年遷國子監司業四年遷宏文院侍讀六年五月

聖祖詔臣工直陳政事得失公于是上書曰臣荆楚鄙儒猥蒙

先帝簡拔授以清班繼荷

皇上殊恩累遷今職

兩朝知遇高厚難名中夜捫衷汗流浹背伏念臣自幼讀書辨志竊以聖賢爲師數年以來恭遇

皇上高拱深居經筵未舉區區獻納微忱無由上達且以出位陳詞典制有禁因循緘默尸素到今臣之罪也亦臣之分也茲者伏遇

皇上恪謹天戒軫念民依虛己下詢采及對非此正微賤小臣圖報涓埃之日也謹仰遵

明詔殫竭愚衷惟

皇上留神省覽伏讀

詔書有曰今聞直隸各省人民多有失所疾苦窮困深可軫念或因官更貪酷朘削民生或因法制未便致民失業嗚乎

皇上此心乃二帝三王之心

皇上此言乃二帝三王之言也夫民生今日其困苦亦孔亟矣國家曰言生聚而彫弊愈甚曰言軫卹而創痍不起曰言招集言捐免而流亡滿目逋欠浸多近而畿甸遠而各省流離瑣尾所在皆然溯厥由來惟是官吏之割剝徭賦之繁重有以致之誠有如此

聖諭所云者蓋小民水耕火耨終歲勤勞僅足以贍給俯仰而夏稅秋糧朝催莫督賣絲糶穀十室九空私派倍于官征雜項浮于正額分外之誅求無名之賠補種種剝膚及髓一有不應卽已顛頓呼號于捶撻敲朴之下而無能安其家室井廬之樂哀此小民正使年熟歲稔尙難保須臾之命一旦水旱頻仍飢饉見告其不轉徙流亡填溝渠而委道路者幾何哉蠲徵則吏收其實而民受其名賑濟則官增其肥而民重其瘠彊者斬木揭竿弱者析骸易子此理勢所必至者嗚呼此固民情之大可憫而國計之重可憂者也雖然此不獨守令之過也上之有監司又上之有督撫朝廷之于守令方責之以廉而上官實教之以

食  
皇上固授以養民之職而上官自課以厲民之行今日之爲守令者亦  
甚難矣督撫廉則監司廉守令亦不得不廉督撫貪則監司貪守令亦  
不得不貪表有影原有流此又理勢之必然者也今之爲督撫者求所  
謂精白乃心爲國家安輯地方愛養黎庶者臣不敢謂無其人獨是國  
家以全省民命舉而付託于其身畀以察吏安民之權屬以興利除害  
之任其待之不爲不隆而任之不爲不重矣乃日望其察吏而吏治日  
壞日望其安民而民生日蹙日望其興利除害而一利未行一害未去  
不可不謂之上負朝廷下負生靈矣大抵有司之職業在地方而上官  
之激勸在舉劾年來督撫之所薦揚者果小民之戴爲父母而尊若神  
君者乎其劾爲貪庸者果百姓之畏若豺虎而疾如蛇蝎者乎是未可  
知也以督責爲能而不問其慈惠以催科爲政而不問其撫綏以貢緣  
之巧拙爲優劣而不問其材幹之長短以禮節之厚薄爲殿最而不論  
其品誼之高下此風一倡爭先效尤交蟠互結牢不可破是以數年以  
來早澇時聞死亡載道而此輩與金饌玉暮宴朝歌恬焉不知有困窮  
疾苦之足念在此輩不過爲一時之利梯一己之貪欲而不知其斂怨

聚愁爲國家釀此不解之毒在廷諸臣習爲瞻徇務相容隱不肯舉發其貪惡之迹以告

皇上間有一二指名糾參者亦不過淡寫輕描微示其意而皇上亦莫得洞悉其黨國養姦橫虐殃民之實狀故此輩得以久竊威權爲壘斷之長計而無舉赤子顛連莫告者正未知何日有再生之地也伏乞

皇上將見任督撫大加甄別其賢而能者加銜久任貪汙不肖者立賜黜退無令久居人上荼毒生民嗣後遇督撫缺出不拘內外大小臣工果有端方清正望重才優如古大臣其人者

敕下部院大臣從公保舉授以茲任其考課也以民生之苦樂爲守令之賢否以守令之貪廉爲督撫之優劣則督撫得其人監司自得其人監司得其人守令亦得其人自然廉者勸貪者懲有利必興有害必除而民之不獲其所者寡矣不此之計日做做焉言計吏言安民言舉劾言蠲賑終不過空文故套美人聽聞毫無補于吏治民生之實事何則任之非其人行之失其意雖周官周禮祇足爲厲民禍世之具而已此聖諭之所已及而臣詳切言之者也雖然內臣者外臣之表也京師者

四方之倡也本原之地在乎朝廷而已朝廷一舉一動萬方之則倣九  
土之觀瞻于是乎出而其大者則在立綱陳紀用人行政之間今朝廷  
之可議者不止一端臣請擇其至重且大者言之一曰政事極其紛更  
而國體因之日傷也從來聖君賢相開國承家必取一代之典章法制  
斟酌損益著爲百世不易之令模遠之子孫率由無變亂之患近之臣  
民遵守無叢勝之虞三代聖王所以保世滋大無疆唯休也我

國家所用章程一踵勝朝之舊雖其事極弊而難行者類無不承訛襲  
陋苟且因仍不聞略加整頓去其太甚而急功喜事之輩又從而意爲  
更變于其間但知趨目前尺寸之利以便其私而就中莫大之憂無窮  
之患潛滋暗伏不知所以爲之計朝舉夕罷旋罷而旋舉甲張乙弛條  
弛而條張

乞 王言屢褻朝政滋煩議論日多成功絕少此時事之最當講究者也伏

皇上敕下議政王貝勒大臣九卿科道將

國家制度文爲詳慎會議何者當沿何者當革何者宜益何者宜損參  
以古制酌以時宜務期允當勒爲會典著爲成憲則上有道揆下有法

守億萬年無疆之基業在此矣一曰職業極其墮窳而士氣因之日靡也

國家之設官也滿漢相制堂屬相維使事無偏畸責無他委近見各衙門大小臣工大率以意見為嫌疑以嫌疑為惟委明知其事之必不可行而不以為否明知其事之必不可行而不以為是緘默瞻顧而姦吏猾胥因得以舞文弄法偷換手眼比年以來此風尤甚外託老成愼重之名內懷持祿養交之念憂憤者謂之疏狂建白者目為浮躁廉靜者斥為矯激端方者詆為迂腐間有修身體道讀書窮理之士則羣指為道學之人而誹笑之排擯之勢不至于禁錮其終身而己此識者所為深憂永歎而不能不為世道之感也伏乞

皇上立振頽風作興士氣申飭滿漢諸臣虛衷酌理實意任事化情面為肝膽轉推委為擔當是曰是非曰非可則可否則否漢官勿阿附滿官堂官勿偏任司官宰執盡心論思勿以唯諾為休容臺諫極力糾繩勿以鉗結為將順則職業修舉而官箴日肅士氣日奮矣一曰學校極其廢弛而文教因之日衰也宋儒程顥曰治天下以正風俗得賢為本又曰三代養賢為本而德化行焉治道出焉明乎學校為賢才之藪教

化之基而學術事功之根柢也今者庠序之教缺焉不講矣師道不立  
經訓不明士子伏案呻吟惟是揣摩舉業以爲弋科名擢富貴之具絕  
不知讀書講學求聖賢理道之歸卽號爲高明有志者又或泛濫于百  
家沈淪于二氏惑世誣民充塞仁義斯道之淪晦未有甚于此時者矣  
伏乞

皇上隆重師儒興起學校畿輔則責成學院各省則責成學道使之統  
率士子講明正學非六經語孟之書不得讀非濂雒關閩之傳不得講  
扶持正教削去從前浮薄偏曲之陋習與空虛荒誕之邪說而又舉行  
貢監之法令于士子中擇其志趣端卓英俊可造者縣學一人州學二  
人郡學三人貢之國雖寬其館舍以居之豐其廩餼以養之廷臣中有  
老師宿儒如宋胡瑗元許衡其人者特簡一二人使司成均主教導日  
進諸生而陶淑造就之其道必本于人倫達乎天德其教自洒掃應對  
以致于義精仁熟漸摩誘掖循序有三載之後學成才就司成次其  
優劣等第彙送吏部量其才之大小學之淺深而授之秩其公卿大夫  
之子弟亦如之至于山林高蹈之士有經明行修德業完備者仍請  
敕下地方官悉心咨訪據實奏聞優禮延聘加意褒崇以爲士習人心

之勸則道術以明教化大行人才日出矣一曰風俗極其僭濫而禮制因之日壞也禮者聖王所以節性防淫而維係人心者也小民至無知也其氣易勝其情易流勝者每至不可禦流者常至不可遏其不至于橫潰四出者由有禮教持之于先又有法制繩之于後也臣觀今日風俗其奢侈凌越不可殫述一裘而費中人之產一宴而靡終歲之糧輿隸被貴介之衣倡優擬命婦之飾習爲固然爭相雄長彼又安知王章之不可渝天敘之不可紊乎夫禮教之不行自貴近先之朝廷崇儉約重等威誰敢有好侈靡逾制度者風行草偃理有固然夫奢則必貪廉恥喪矣奢則必僭名分蕩矣奢則必驕奢則必競禮讓衰節文亂矣嗚呼此飢之本寒之原也盜賊獄訟水旱災荒之所由起也伏乞皇上躬行節儉爲天下先

明詔內外臣民一以儉約爲主自王公以及士庶凡宮室車馬衣服僕從一切器用之物俱規定經制限以成數不許少有逾越久之儉德日彰貪風日息民俗醇人心厚以幾敦龐之治不難矣雖然猶非本計也至于根本切要之地端在我

皇上之一身矣蓋



萬民者萬幾所受裁萬化所從出也孟子曰天下之本在國國之本在家家之本在身董子曰正心以正朝廷正朝廷以正百官正百官以正萬民正萬民以正四方二子之言萬世之龜鑑也聖如堯舜可謂至矣而諄諄于危微精一之誠明雖生知之聖亦藉學問之功也我

皇上神明天縱睿哲性成豈區區常情之所能窺然生長深宮春秋方富誠宜選擇左右輔養

聖躬薰陶德性伏乞慎選耆儒碩德置之左右優以保衡之任隆以師傅之禮不必勞以職事拘以文貌使之出入禁閣時親便座從容閒燕講論道理又妙選天下英俊使之陪侍法從朝夕獻納切劘治體毋徒事講幄之虛文毋徒應經筵之故事毋以寒暑有輟毋以晨夕有間至于大學衍義尤爲切要下手之書其中體用兼舉本末貫通法戒靡遺洪纖畢具誠千聖之心傳百王之治統而萬世君師天下者之律令格例也伏願

皇上延訪眞儒深明厥旨者講求研究于是考之以六經之文監之以歷代之迹實體諸躬默會之衷以爲敷政出治之本若夫左右近習必端其選綴衣虎賁亦擇其人壬人佞倖不置于前豔色娃娃聲不御于側

非聖之書擯而不讀無益之事戒而不爲內而深宮燕閒之間外而大  
廷廣眾之際微而起居言動之恆凡所以維持此身者無不備所以防  
閑此心者無不周君志清明君身彊固舉夫立政敷教知人安民無非  
天德之流行天則之昭著是

皇上直接夫二帝三王相傳之心法自有以措斯世于唐虞三代之盛  
又何吏治之不清民生之不遂哉易傳曰正其本萬事理差之豪釐謬  
以千里此

聖諭之所未及而臣推本言之者也臣志學有年粗知章句凡所敷陳  
率皆聞諸師友考諸經傳而非敢妄爲臆說以自干罔

上之誅昔宋儒朱熹入對有戒其勿以正心誠意之說進者熹曰生平  
所學止此四字臣之心亦如是而已矣伏乞

皇上諒其樸愚恕其狂妄俯賜包涵留神采擇天下幸甚疏入輔臣鼂  
拜惡其侵已請治公安言罪

聖祖弗許曰彼自陳國家事何預汝等邪七年遷祕書院侍讀學士復  
上言朝政積習未除國計隱憂可慮年來災異頻仍饑荒疊見正宵旰  
憂勤徹縣減膳之日講學勤政在今日最爲切要乞

時御便殿接見羣臣講論政治設誠而致行之庶可轉咎徵為休徵疏  
入釐拜傳

旨詰問積習隱憂實事以所陳無據下部議降二級用

聖祖原之八年釐拜敗

聖祖手書前事付廷臣令并案輔臣欺罔罪公再疏請舉

經筵設起居注官會

聖祖欲巡幸邊外公疏言水旱頻仍

聖駕不宜輕出

詔罷前命竝嘉其直俾繼今以後事有未當其悉陳所見朕不憚改焉

儀吉謹案康熙十七年冬諭吏兵二部曰朕頃以秋冬農隙講武之

時欲一往邊外閱視不久即還今覽諸臣前後各奏稱今歲災變甚多

不宜出邊致兵民困苦直言港濶深為可嘉已允所請停止邊外之行

以後國家車馬大事情知有未當務抒所見直陳朕不憚更改爾部即傳

論遵行是當時不止能公一疏也宣化縣九年四月擢國史院學士

志云允科臣疏停止亦未詳何人俟考  
召入內廷命作楷書公大書敬天法祖知人安民八字以進復承命講  
大學中庸首節

聖祖首肯者數四十月改內三院為內閣設翰林院以公為掌院學士  
兼禮部侍郎遂以明年二月肇舉

經筵大典于保和殿以公爲講官知經筵事頃之

聖祖以春秋兩講爲期闕疏遂命公日進講弘德殿每詔日進講

聖祖有疑必問公上陳道德下道民隱引伸觸類竭盡表裏蓋公自初

應詔上書卽力言

聖學爲第一要務其後屢以爲言會

聖祖日益勤學旣開經筵益盡心于堯舜義孔之道暨周程張朱五子  
之書咨諏討論達于政事仁浹而義炳其端緒實自公發之及公去位  
後

聖祖每論侍學諸臣未嘗不稱公之忠益也十年夏乞省母疾歸尋還

朝十一年

命教習庶吉士十二年充會試副考官其年冬公以疾假數日疾已入

直時有詔徹三藩

聖祖舉以問之曰國家方太平以無事爲福道在休養綏定之而已今  
無故徙數十萬安居樂業之眾移置窮荒不毛之墟倉卒逼迫勢逐刑  
驅未有不生懟怨眾怒不可激一夫稱亂所至瓦解解前事如此可勿戒

與

聖祖以語諸大臣皆言吳三桂僅一子質于朝可勿慮其它又安能爲未幾三桂反明年耿進忠反十四年春授公武英殿大學士兼刑部尙書公疏辭不許旣受

命參畫軍機及諸道糧餉並請嚴飭軍行所過不得蹂踐禾稼使兵不病民民不失業時方纂

太祖

太宗聖訓孝經衍義重修

太宗實錄公並充總裁官十五年陝西總督有開復疏防官員一疏內閣誤票三法司核議旣檢舉大學士索額圖索初擬票稿不得謂公有改寫情弊請察議免歸家于江甯二十三年

聖祖南巡

召對行在賞賚有加尋書經義齋三字題其居二十七年夏起禮部尙書冬丁母憂歸先是公因進見言西夷噶爾丹且有變宜爲備至二十九年邊人告警

聖祖念公言趣起前官三十年充經筵講官及武會試正考官明年春

命往江南鞫河督王新命侵帑事論罪如律冬移吏部尙書會河督靳輔請豁近河公占民田額賦

詔公會督撫察勘還奏免高郵山陽等州縣額賦三千七百二十八頃有奇三十三年充會試正考官三十五年春

聖祖親征噶爾丹公言內大臣費揚古可重任

聖祖命爲撫遠大將軍統西路兵前行及戰大捷噶爾丹尋走死三十六年復充會試正考官三十八年拜東閣大學士知經筵如故嘗進言海內乂安休養化導正在此時宜益崇學校廣教化豫積貯戒奢汰則萬世太平之業也每燕見輒陳四方水旱官方得失推古聖人所以憂民保治之意竭慮無隱

聖祖輒改容稱善三十九年充會試正考官四十二年復充會試正考官四十一年春公年六十九乞休

詔解機務留京食俸四十五年疏辭食俸乞歸江甯陛辭

聖祖召入講論累日公因言

巡幸所至官民供辦不無煩費唯

上留意

聖祖頌之命馳驛歸官為護送明年

聖祖視河工幸江甯

賜御用冠服會纂朱子全書

詔李文貞與公移書往復商定公平生論學以默識為真修以篤行為

至教其居也恭其動也毅其事上也誠其與人也恕辭達而已不為飾

時措而已不為矯以是由程朱之涂而上溯乎孔孟其言曰聖賢之道

不外乎庸庸乃所以為神也所著書有學統學辨學規學餘經義齋諸

集四十八年十月卒于家年七十有五

命禮部遣司官二人視其喪賜銀一千兩祭葬如制贈太子太保謚文

端子三人志伊志契志夔志伊以疾廢五十一年

聖祖追念公學行召志契志夔入京以年稚不能應

詔六十年二子年十餘始入京吏部引見

聖祖命歿年長錄用且憫其家貧

諭諸大臣飭公故舊門生各助金買屋京城以居餘交江甯織造生息

歲廩其家逾年志夔卒乾隆九年授志契翰林院孔目公之薨也碑誌

之文缺焉紹升讀公書恨未悉公行事三十六年入京與志契遇得其

家所書公事略竝考集中諸疏及論學書爲之狀埃史官采錄焉

文華殿大學士馮文毅公溥事實

並節錄

公字孔博別字易齋青州益都人順治丙戌會試中式丁亥進士仕至文華殿大學士兼吏部尚書康熙三十年卒年八十三父孝豐公士衡卒時太夫人遭重疾方愈聞變一慟亦卒兩喪相距祇六日先生哭晝夜不止亦氣絕如屬纊然醫者云是哭泣傷藏耳五氣結韜匪藥可療俟其偃蹇一二日當醒也已而果然

毛奇齡撰年譜

康熙丙午時四大臣欲省差大臣二員設立衙門于督撫之旁以廉督撫吏部滿尙書阿思哈侍郎太必免議設衙門於各省東西一切書役蒞隸人員聽其招募頒與敕印等項先生執不可謂創造衙門費將不貲內之傷度支外之勞民力毀房壞屋勢必不免且國家設立督撫皆係重臣今又不信復遣兩大臣實逼處此東西相望而稽察之甚無謂也夫權太重則勢相軋勢相軋則當之者碎保無下屬仰承左右譏苛爲民害者時太必免蒙古人性暴無禮聞見先生語則大恚瞋目起立張拳向先生先生徐應曰難助何足安尊拳哉夫爾我等也旣係公議汝必不容吾兩議何耶且議之可否自有



聖裁豈爾我所得而專主之堅執不可疏遂上

上是先生議其事得止同上○儀吉榮公

戊申升都察院左都御史掌院事先生首具王言不宜反汗一疏謂當

慎重于未有

旨之先不當更移于已奉

旨之後以是時盛京缺工部侍郎多規避已會推奉

旨不旬日而三易其人故首及之同上

時有紅本已發科鈔輔政大臣鼇拜取回改批溥奏言本章既經批紅

發鈔不便更改鼇拜欲罪溥

上特旨嘉獎溥所言是

諭輔政大臣此後當益加詳慎批發又言藩王將軍督撫提鎮購買馬

匹以資戰守事屬相同今平南王尚可喜靖南王耿繼茂續順公沈永

忠獨牒戶部請免其所買馬匹之稅臣思若許濬

恩免稅似應一例遵行若

國課所關可喜等不應獨邀異數且恐有匪人借買馬之名漏稅作弊

請照順治十六年定例概行收稅以昭畫一皆下部議行史館

時逃人法最嚴先生疏根本之計終及逃人大略謂初年所逃皆係八旗戰爭所得之人故禁之當嚴今天下承平日久或係投充或係新買或係入官似此人等卽在地方有司尙難稽察愚民無知鮮有不爲其所欺者此非敢于抗

朝廷之法也臣以爲昔逃者係舊人則當用舊法若係新人亦當稍示寬典使督捕詳議分別以爲定例此亦本治之一端也又嘗因遵

諭陳言請寬刑稅如曰省刑者非謂其犯罪而姑寬之也古者罪人不孥今一事而連數人或數十人此等人非其本身犯大罪也雖事終亦必省釋但其候審之勞盤費之苦至有本犯尙未完結而牽連者先朝露矣且問官貪懦不卽審結多有遲至二三年或七八年者縱或未死而拋家失業棄妻離子可矜孰甚乞

皇上敕部嚴禁諸凡案件除叛逆外不得牽累多人其無益證佐槩免提究有寬限者卽治督撫以才力不及之罪則刑可省矣且薄稅者非謂其應納而姑免之也古云二月賣新絲五月糴新穀言在上徵收之急也今者正月卽開徵矣慶酬未已追呼已至舊逋未償新貸又起而有司之不肖者更設重刑以懲之臣前有緩徵一疏部覆未準乞

皇上再行酌議夏稅定于六月秋稅定于十月上緩國脈下寬民命則稅已薄矣詳年譜

魏敏果公言康熙王子子患怔忡之證正調理閒大學士馮公溥一疏為薦舉賢才等事內稱魏象樞清能矯俗才堪任事用之於內必能為朝廷振飭紀綱用之於外必能為朝廷愛養百姓等語部議奉

旨魏象樞著來京引見維時同列薦章者為兵部主事成性性江南人也為余己丑分校所得房首理學清品孤介澹靈先奉

旨以科員用師弟同膺盛典一時傳為美談閏七月引見八月補授貴州道監察御史偶於朝班見馮公曰某與先生雖同榜成進士然素無

深交乃何以見知于先生而辱薦章耶先生曰公居諫垣赫赫有直諫聲此人所共知也若余之知公則更有在憶余為祭酒時每值丁祭凡

不與陪祀各官例于前一日瞻拜公每期必至敬慎成禮一日大雨如注泥深三尺同事者曰此番必無一人來矣言未畢而公至肅然瞻拜

而去此外果無一人余益起敬而深信之知為至誠君子即此一節他事可類推矣太夫人在堂未敢有違大孝今服闋應

召而來此後皆報

君之日公其勉旃余聞公言感愧交集古云觀人於其所忽其先生之

謂乎

寒林堂集

乞休臨行陳五事言願

皇上無費財無遠出勿輕遣官勿輕勦臺灣勿增關稅鹽課俱報聞

海洲

集

平專集卷十一

貴筑黃彭年編訂

碑傳集卷十二目錄

康熙朝宰輔中

子告光祿大夫少傅兼太子太傅保和殿大學士兼禮部尚書加六級

諡文靖王公熙行狀 韓葵

又光祿大夫少傅兼太子太傅禮部尚書保和殿大學士諡文靖王公

墓誌銘 張玉書

附錄一則

光祿大夫太子太傅禮部尚書武英殿大學士吳文僖公正治墓誌銘


彭定求

光祿大夫太子太傅吏部尚書文華殿大學士加一級宋文恪公德宜

行狀 徐苞學

資政大夫文華殿大學士戶部尚書掌翰林院事徐公元文行狀 韓葵

又文華殿大學士戶部尚書掌翰林院事徐公神道碑 張玉書



106-608

康熙朝宰輔中

子告光祿大夫少傅兼太子太傅保和殿大學士兼禮部尚書加六級

諡文靖王公熙行狀

韓炎

公諱熙字子雍一字胥廷號慕齋先世居任邱自高祖贈宮保公諱龍

者來京師始著籍宛平詳文貞公狀中公生而穎異五六歲間即能誦

孝經學庸兩論文貞公時為講解有疑即問輒驚人十五歲為諸生順

治丙戌舉京兆試明年成進士選授國史院庶吉士習滿書己丑授國

史院檢討壬辰分校會試癸巳

御試滿書拔前列蓋公天資高所諱經書解會入微為一時最

世祖召見引文院命以滿語奏對大加褒賞隨陞國子監司業復

諭閣臣王熙既為司業恐其荒於滿書可傳諭祭酒姑爾馬忒同署問

甚皆以滿語勿令間斷蓋自是

上嚮用之意切矣又

賜滿文洪武寶訓三國志二書八月轉左春坊左中允充順治大訓纂



修官甲午

命譯書經兼爲滿學士講解本章秋陞司經局洗馬冬十月

召入南苑譯勸善書及大學衍義一日

世祖猝至直幄閱公所譯書喜諭閣臣稱善久之遂令長直南苑乙未

隨獵

賜乘御馬是科館選庶吉士

特命公引見南苑五月陞右春坊右諭德充孝經衍義纂修官丙申始

選擇日講官公未列名特蒙擢用

御試滿書復第一賜御服貂裘秋陞左春坊左庶子冬十月

世祖幸景山臻祿閣召日講官五人進講公講書堯典稱

旨命每日進講

諭嗣後講官不必立講遂侍坐丁酉奉有

駕出卽隨不必請旨之諭三月陞弘文院侍講學士充

經筵講官七月陞弘文院學士時文貞公任國史院學士

世祖諭曰父子同官古今所少以爾誠恪特加此恩戊戌教習庶吉士

秋主武會試十一月授翰林院掌院學士兼禮部侍郎己亥十月復奉

旨教習戊戌己亥兩科庶吉士庚子十月以學士三年考滿加禮部尚書銜時文貞公已長禮部父子同部尚書海內榮之以爲

國家異數王氏盛事晚近數百年所未有也辛丑

世祖不豫自元旦至五日屢入請安榻前面奉

天語密有奏對初六日漏三下

召入養心殿諭曰朕勢將不起爾可詳聽朕言速撰詔書公匍伏飲泣

筆不能下

世祖諭抑悲痛卽於榻前起草公拭淚吞聲先成第一條以進恐

聖躬過勞奏移乾清門下西圍屏內撰擬凡三次進覽皆卽報可日入

始脫稿而

世祖竟於是夕上賓公哀慟幾絕感慕終身始公長直南苑

駕出必從從必蒙勞問又每日進講嘉謨嘉猷入告者必多一時稱爲

內相而至於洮類憑几之辰大漸弗悟興之會手定

詔草獨屬之朝夕左右之儒臣度必有決大策定大議者而公出一不

以語子弟世遂莫得而傳其識見度量有古大臣之所難而非如孔子

夏之不言温室樹而已也翌日同內閣擬

尊諡又同撰

今上皇帝卽位年號又爲輔政大臣撰誓文四月改授弘文院學士兼禮部尙書十二月以禮部尙書管左侍郎事丙午陞都察院左都御史公入臺振肅風紀慷慨任事知無不言首陳養兵裕餉之議其略曰今直省錢糧以十分計之大半耗於兵餉而餉之多者又莫如雲貴閩廣等省卽就雲貴二省言之彼地之賦稅會不足兵餉十分之一而藩下官兵歲需俸餉二百餘萬恐非經久之謀臣愚以藩下甲兵家口食餉原有定額在朝廷計口授餐所費已不少而甲兵家口眾多或尙未能周給請敕該王就甲兵家口中酌量餘丁多寡或令於省城就近之地屯種或分布於附近之府州縣屯種漸減計口授餐之費亦裕餉之一策又請禁官員貿易之害以利民生大指謂近閩廣江西湖廣等省官員多自置貨物售之所屬兵民甚者指稱藩下挾勢橫行假借營兵放債取利至於省會要區百貨叢集詰其資本俱屬官商嗟此小民從何謀利祈

敕下該部詳議自今以後凡閩廣江楚等省王公將軍督撫提鎮不許持己資貿易與民爭利或指稱藩下官司所管官不能覺察及已發覺

而徇隱不以實奏者嚴定處分條例通行申飭又疏請停現任官員捐助之例謂捐助一項在本地紳衿富民可云取之私家蓄積若地方官員每捐則千金數百金米則千石數百石不知何從得之不過云設法捐輸此設法之中更有不可究詰者若謂實出己資恐攜私囊而充國用者未必比比而是大約展轉相尋出自百姓而已況中間誇張鋪敘捏少爲多是又徒有捐助之虛名更屬無益近者別項捐納雖停而修城備賑及修造軍器等項仍有紀錄之例如遇降罰亦得抵銷終非所以飭勵廉隅昭垂法守祈

敕下部詳議凡係地方現任文武官員捐助則例一槩停止又疏請改招民授官之例近例招民百家優授知縣夫縣令率治百里撫綏眾民關係匪輕倘有不肖之輩授以此職則百姓之累無窮况招民百家送至盛京往來之費非數千金不足不惜數千金而得一縣令則借資爲市其心可知既希圖謀利其一邑之民安危又可知臣愚以爲嗣後招民百家之人應給與閑散官名色頂帶牌匾旌獎勿授以理民之職任又請停認工贖罪之例現今流徙甯古塔尙陽堡犯人認工釋罪令其修葺城樓部院衙門此等犯人流徙之時家產已盡籍沒入官能認造

此數萬金城樓之工價從何而得不過借認工爲名指稱奉  
旨取回視原籍稍可給之家挾詐逼勒一不給與動稱違誤

欽工交與地方官追取良民受害而奸惡之人得歸愈縱其惡不知畏  
忌此例亟應停止公所上疏急當務折亂萌正官方持大體大指歸於  
培養萬民每奏一篇

報旨未嘗不稱善下部議或行或格而公疏要爲不可易也時

上初親政宵旰萬幾會天旱金星晝見

兩諭各部院以例繁滋弊事多錯悞上千天和令更改從前過失公上

疏請酌復

世祖章皇帝舊章以昭政典言臣伏念

先帝御極有年憂勤圖治各部院應行事宜皆經宸衷詳定盡善無遺

茲者數年以來有因言官條奏改易者有因各部院題請更張者有會

議興革者法經屢變則例繁多反啟各衙門任意輕重乘機作弊之端

自古聖賢之君莫不以敬天法祖爲兢兢

皇上當勵精圖治之日法

祖卽所以敬

天臣請

敕下部院各衙門將見行事例逐一詳查有應仍遵

世祖皇帝時典制者開列具題改正施行卽比年以來因時定例實有便於今日國計民生者亦須詳察始末條晰不得不然之故具陳統候睿裁定奪畫一永遠遵

上覽疏深嘉歎卽行各部院確議於是

世祖皇帝時舊章次第酌復中外稱便云公在臺二十有一月所建白甚眾其懲貪崇儉獎廉嚴徇底察侵蝕裁冗員疏銓法課官學諸疏皆鑿鑿可施行文多不具載戊申七月陞工部尙書監修各宮殿大工恩賜有加兩視

孝陵大工壬子從耕耜田癸丑五月轉兵部尙書六月同議撤三藩事十二月聞吳逆之報卽赴

內朝集議至除夕始歸甲寅三月密疏請早正叛子之誅并清亂黨之患以安人心絕禍本其略曰逆賊三桂負恩反叛肆虐滇黔毒流蜀楚散布僞劄煽惑人心今大兵已抵荆南剋期進剿元惡授首在指日間獨是叛子吳應熊素憑勢位黨羽眾多擅利散財蓄養亡命依附之輩

實繁有徒今既被羈守凡彼匪類蔓引瓜連但得一日偷生豈肯甘心  
就死卽如種種流言訛傳不止奸謀百出未易周防大寇在外大惡在  
內不早爲果斷貽禍匪輕且大逆不道不限籍之同異皆處斬三桂逆  
天叛

主今古罕聞討平之後脅從尙可邀恩而首惡必無可赦應熊之當誅  
戮無待再計而決者亦何庸緩其斧鑕而不以安天下之心哉爲今之  
計惟速將應熊正法傳旨湖南四川諸處老賊聞之必且魂迷意亂氣  
沮神昏羣賊聞之內失所援自然解體卽兵士百姓聞之公義所激勇  
氣自倍至應熊親隨人等繫纆之中益成死黨聞發禁刑部者不下五  
六百人夫人眾則難防時久則易玩速

敕法司訊別情罪重者立決次者分給各旗消除內變之根源掃蕩逆  
賊之隱禍

上命議政王貝勒大臣九卿科道會議應熊尋伏法始三桂憑藉其子  
爲內應反書朝聞是夜京師內外所在失火尋有僞朱三太子之獄捕  
繫百千人掠治訖不得主名皆其黨爲之而三桂狂獠所及西煽秦隴  
東蔓江浙自謂角距已成朝廷必不殺其子以爲招故上書多嫚語

上神聖已燭其奸特以尚主示不忍及應熊詠三桂驚悸殊不意舉軍  
慟哭竟以是志發病死人皆躉公之能聲大義云乙卯冬恭遇冊立  
皇太子充捧冊副使丙辰奉

論專管密本前此漢官不與聞兵機益異數也戊午冬居文貞公憂服  
闋不出壬戌五月

特投保和殿大學士兼禮部尚書時黔南甫平海內苦兵革久民願休  
息公爲相務以和平寬大宣

上德意以培養元元不欲紛更多事以傷清靜甯一之治以故奉法循  
紀不敢失尺寸其有當變革者必酌乎人情公論之同然直言於

上前無隱而一不以己與也不沽譽不市恩不立黨惟中立以敬謹自  
將性無鉗忌能容眾尤樂獎進人才賓禮後進往公在

先朝內直中外咸安之自同列大臣以暨詞館諸曹若不知公之居中  
用事者昔高令公在中書領著作寬中宏量時有陰德楊侍郎在帝左

右十餘年不列人一密事公久似之及居相位風度故在也公能持大  
體有遠慮蒞爲學士撰平定三逆方略失

上指一日



上諭閣臣曰當三桂初反時漢官有言不必發兵七旬有苗格者又其時漢官盡移其妻子回家何也卽顧炎曰汝爲朕載之焚退而皇恐語公曰當奈何公奮曰待縛我之東市君乃載耳公大言於閣中曰有苗格乃會議時魏蔚州語告者截去首尾遂失其本意然若如其言豈不是悞國漢官移家故有之亦多有否者日久何從分別豈不是背主漢官負此兩大罪之名復何顏立於朝乎因語大學士明公幸好爲我執奏也翌日入見明公爲

上言略引其端公卽繼之懇懇如閣中語  
上微笑曰朕固知此兩事載不得也事遂寢公又嘗語諸學士吾嘗從

駕椒園

世祖問我幾子以二子對蒙

賜名克善克勤克善能文我不令之與試不然者當丁酉時我不免作高郵公矣吾又屢辭典會試師生沿習久恐亦不可不慎也一日

上臨朝極言漢官門生座師市恩交通之弊公言臣不曾爲主考僅壬辰分校得士二十餘人今在朝者惟金鉉張可前二人有弊無弊難逃

聖明洞鑒

上意少解，蒞以學士。隨公先後四年，見公在

上前，或危論或微言，率能動

上聽，大抵謹身於無過，而隨機以爲人，其事不可勝數也。自少能文章，然在閣中不多草。

詔蓋能爲而不能爲，以讓之同列，而詩歌賦頌不得已，間進一二，輒工。則奏曰：「實代作，非老臣所及，亦不取先詞館諸臣也。」

上於閣臣中，眷禮常獨異。朝坐列左翼，第七後列第三，與宴常以漢大臣充獻爵官。

東巡有微疾，遣醫相繼。

命乘肩輿，累頒表裏珍味。

太皇太后喪。

哀詔及擬諡號，上冊文皆公草也。戊辰會試，公復辭避，不列名。

上特命爲主考官，常從游瀛臺、暢春園、玉泉山，禁中佩文式、古淵鑿齋、閩風臺、瑞景軒、翠華館諸勝，無不歷，而四時花卉、碧桃、牡丹、千葉蓮花

之屬，頻與燕賞。諸閣臣多不與。賜席寵堂，匾命內務府製給。又

賜曲江風度匾一及

御書卷扇對聯法帖甚多然公寵愈加而若不自勝望實愈尊而益歎然自下求退之懷固未嘗一日釋也當歲壬申以足疾疏請解任

詔報曰卿効力年久自

世祖章皇帝時簡侍禁廷恪恭盡職朕屢加擢用游進綸扉夙夜殫心勤勞自勵今

先帝舊臣俱已凋謝惟卿獨在班列朕眷倚良殷雖精力就衰而老成練達之臣常侍左右殊有裨益着勉自調攝照舊供職不必求罷乙亥夏復請告

溫旨慰留如初丁丑以年七十引年以請復奉有宣力

兩朝久贊機務眷倚方殷不必引年之旨己卯冬擬再請

上先諭閣臣斷來章遂不果明年夏復請

上仍降旨慰留不忍其去也辛巳七月疾忽大作大學士伊公以狀奏聞行在

上命賜寶露上藥服之病少間九月復具疏申前請始奉

俞旨卿耆舊大臣恪慎敏練簡任機務宣力年久覽奏以患病乞休情

詞懇切准以原官致仕隨上疏謝恩得

旨報聞特加少傅兼太子太傅先是

太祖實錄成加太子太傅至是進少傅

上特以榮公之去往者致事諸大臣無有也是年冬十月

遣侍衛賜帑幣上珍明年上元節

賜燕於家四月

遣侍衛至公榻前恭捧

聖諭手書一道諭大學士王熙卿耆年舊德歷官最久自去歲告病在

家朕無日不注念老臣也邇來九卿皆求匾額字對想卿身雖在告心

未嘗一日不在朝中故特書匾一面對一聯臨米芾書一幅賜卿卿其

勉強餐食輔以醫藥以慰朕不忘舊臣之至意

上又念公病不能興傳諭勿謝公匍伏感涕命子克昌孫景曾隨侍衛

詣暢春園叩頭謝恩復

傳諭如病少愈朕尙欲一見故公遺疏謝恩有冀臣病之再甦許瞻天

之有日頌

君恩也冬病漸篤今癸未上元節復

賜宴於家公榮

君之賜強起猶進一箸閱四日痰忽作藥萬方不一效至二十七日而

上聞震悼馳遣侍衛奠乳茶及酒并命錄諸子弟姓名數以來三月口

上特命皇長子直郡王率滿大學士及禁近諸貴臣至公喪前命王行

三叩禮舉哀諸大臣等同跪舉哀道路擁觀父老多泣下蓋

上之加恩不特以禮始終有曠古異數之所未及者實維

先帝愍遺之一老今惜已彫謝無餘追遺寵而卹舊勞以至斯極也讀

壬申詔旨

上已告公於生前矣以故自漢大學士九卿詹事及百執事之長無不

歎歎感動合詞爲公謝恩豈惟王氏一門非常之寵光而照耀史冊無

不神遊

聖世遭逢之極盛足以興起於無窮也既內閣以易名之典請

上親定諡曰文靖亦象公惟肖云公內行完備十二歲母梁夫人病篤

誓減算以益母壽禱于天者四晝夜母歿哀號昏絕數次口鼻出血升

餘文貞抱置懷中食頃始甦侍文貞公時事無鉅細必稟命逢先世諱日文貞公必集子姓齋宿外舍公率先致敬文貞公立家廟三楹公拓地而丹雘焉歲時饗脩執事有恪公以文貞公好游歲常徧歷西山諸勝恐勞於登涉乃構怡園於宅之西偏亭臺花木歲加葺治文貞公願而樂之及侍疾奉湯藥不敢頃刻離左右文貞公捐館舍號泣如孺子哀嚴盡禮感慕者終身頌書屋曰慕齋明志也伯叔父四人公皆恤其子若孫公兄弟六人友愛倍至丁酉恭遇

恩詔例送一子入監讀書公推以與其三弟今布政公然戊申又廕送其四弟照入監諸弟歷官四方時時手書勞苦如面勸以服官行己之大義中丞公燕遠任黔中尤願其盡力報稱以忘其家而亦常以不易得見爲戒戒也布政公之自東臬遷也以公病久別陳情上請暫歸候起居

上命速赴京師且傳

旨慰問公而季弟賦僑江甯者亦適返老年兄弟病中相聚且喜且悲也比別去而公病遂篤矣內外姻戚之不給者助之如不及常贍其孤寡或延師以訓其子弟京師義學育嬰堂月有施子貧無告者生則衣

之歿則楷八里莊摩訶菴公少從文貞公讀書處歲必一再至於寺僧  
有加禮西山之香山碧雲退谷法海春秋佳日世交舊遊招邀過從  
同歎賞新進寒素亦樂與忘年常同嘉會裁芍藥數百畦於豐臺小築  
其旁花開時任游者往來如無主人示不獨樂也自少天才敏捷又得  
過庭指授然雅不欲以文學炫長所著有寶翰堂集弗輕以示人又有  
未刻者數卷藏于家經書多默識暗記然常遜謝未讀書卽二氏之學  
亦多參悟而絕口不談也公之歿也距其生明崇禎元年戊辰七月八  
日年七十有六元配金夫人知府諱顯名女劉夫人上林院監丞諱可  
敷女俱贈一品夫人董夫人都司諱正義女封一品夫人側室朱氏封  
宜人側室李氏柳氏閻氏劉氏張氏郭氏子六人克善廕生歷任雲南  
驛鹽道僉事母朱宜人卒克勤廕生母劉卒克昌廕生刑部河南司郎  
中加七級母董夫人而乳哺如其出者劉也克宏歲貢生候選主事母  
柳克承母郭克賡母張俱幼女十人一適廕生章維貞三俱未嫁卒一  
適廕生河南按察使胡介祉俱董夫人出一適衍聖公子孔傳鐸母劉  
一適太學生顧甯緯母李一許字監生閻絨璽母閻餘俱幼孫五人景  
曾己卯舉人庚辰進士翰林院庶吉士克善出續會歲貢生候選主事

企曾式會則會俱克昌出克昌等將卜葬公於西城關外異吾村之祖塋而先期屬葵爲狀焚于公爲門下士不敢辭按狀古者以上之太常考功而今則爲

國史之據依尤不敢不謹輒譔次所及見聞者弗敢誣而亦闕其所未知者弗敢溢以待他日史氏之採擇謹狀

又光祿大夫少傅兼太子太傅禮部尙書保和殿大學士諡文靖王公

墓誌銘

張玉書

宛平王公在政府二十年而予告又二年而薨於里第時

車駕方南巡聞訃震悼命賜卹如制及還京

詔皇長子直郡王率大學士馬公偕禁近諸臣臨公喪且奉

諭旨王行三叩禮舉哀奠酌不循常格蓋自四十餘年以來

世祖章皇帝舊臣先後徂謝惟愍遺公之一老

皇帝篤念老成耆德故恩禮獨厚於是玉書偕同官及九卿大僚合詞

陳謝而一時在廷諸臣及闕巷聚觀者無不歆獻感頌至於泣下比閭

中擬諡上請

特予文靖諡法寬樂令終曰靖本朝未有諡者亦可謂象公惟肖矣公



幼穎異成童時卽舉四書孝經疑義質問於塾師年十九舉順治三年丙戌鄉試明年成進士改庶吉士授檢討翰林官兼習滿書者多不能精詣奧窔公天資高踰年而學成

世祖屢試稱最隨陞國子監司業未幾進左春坊中允纂修順治大訓十一年進司經局洗馬召入南苑校譯大學衍義及勸善書十二年進右春坊諭德明年初開

講筵充日講官進左庶子命每日直講賜坐十四年春進宏文院侍講學士充經筵講官七月進學士時文貞公方任國史院學士

世祖諭曰父子同官古今所少以爾誠恪特加此恩明年主武會試調翰林院掌院學士兼禮部侍郎十六年教習戊戌己亥兩科庶吉士十七年考滿加禮部尙書文貞公方長禮部父子同部尙書海內以爲榮十八年元日

世祖不豫公日請安於

御榻前初六日漏三下

召入養心殿諭曰朕勢將不起爾可詳聽朕命撰詔書公匍伏飲泣筆不能下

世祖令抑悲痛卽榻前起草公拭涕書第一條進恐

聖躬過勞奏於乾清門外撰擬凡三次進呈至初七日薄暮繕畢而

世祖卽以是夜上賓公偕顧命諸大臣入哭一痛幾絕至於面奉憑凡

之言有事關國家大計與諸大臣再三密議而後決者公終身不以語

人雖子弟莫得而傳也十二月以尙書管禮部右侍郎事康熙五年擢

都察院左都御史公侃侃舉職知無不言是時一歲賦人半耗於兵饑

而雲貴閩廣三藩所駐之地尤甚公首陳裁兵節饑之議謂滇黔素已

蕩平兵額急宜汰減詔下所司議省額饑一百餘萬又言江楚諸路王

公將軍提鎮自置官商漁奪民利宜嚴飭禁革官吏捐輸名出私橐實

取自民間宜一切報罷招民百家得授縣令不肖奸人往往借賞爲市

宜改給散秩凡所條上皆深得治體會天旱金星晝見公言

先帝御極有年諸曹政務皆經斟酌盡善數年以來變易成憲者多矣

法屢變則弊叢生今

皇上當勵精圖治之始法

祖所以敬  
天請敕各衙門詳察見行事例有因變法而滋弊者悉遵舊制更正於

是酌復數十事中外稱便七年進工部尚書督理宮殿大工屢著勞績  
十二年轉兵部尚書是年夏議撤三藩十二月吳三桂反於雲南日赴  
內廷議用兵機宜十三年三月密疏請誅逆子應熊言逆賊三桂負  
國深恩肆虐滇黔流毒楚蜀散布偽劄煽惑人心今大兵已抵荆南元  
愍旦夕授首獨是逆子應熊素憑勢位黨與眾多擅利散財蓄養亡命  
匪類依附實繁有徒應熊既被羈守而流言繁興說傳不止奸謀百出  
未易周防大寇在外大惡在內若不早斷恐滋後患請速正法傳首湖  
南四川以寒老賊之膽以絕羣奸之望以激厲三軍之心章下議政王  
貝勒大臣九卿科道會議應熊旋伏法方滇黔之初告變也一夕京城  
內外所在火起尋有偽朱三太子之獄捕繫數百人掠治不得主名皆  
應熊及其奸黨爲之三桂自恃鷓鴣張之勢又以其子方向主朝廷必不  
殺以爲之招及應熊誅三桂驚悸發疾竟以是死人皆韙公之能聲大  
義云十七年居文貞公憂二十年服闋是年冬雲南平明年五月卽家  
授保和殿大學士兼禮部尚書於是逆氛初靖民生甫離兵革公與勒  
公明公及李文勤公同在政府務以和平寬大布  
上德意罷權宜之令停加征之額遵奉詔書次第興革有應奏請舉行

者悉陳於

上前無隱時玉書爲學士親奉公教者一年至二十九年公與伊文端  
阿文清及眞定梁公在閣玉書以後進入贊機務朝夕追從復八年有  
餘中間合肥李文定亦共事二載一堂以內事應商確悉心折衷始終  
無一疾言忤色有如昔人所云推車子者故以玉書之謏陋亦幸獲無  
過焉竊覩公立朝本末不沽名不市恩不植黨援不持意見更事熟則  
於四方得失利病無不周知歷諸曹久則於國家典制沿革無不洞悉  
每論事闕廷指畫可否具有經緯聞者咸斂容欽服公博覽強記手點  
二十一史能隨事舉述大義而絕不以該洽自矜撰擬文字屬同官具  
藁點定一二字深中事理詩清麗不事藻縟闡明理學而亦不排擊二  
氏之教其造詣益深且遠矣公素引嫌不欲與試事戊辰會試  
特命爲正考官取范光陽等一百五十人甚愜人望其他大典禮如耕  
藉大閱冊立 東宮陪祀闕里大制作如纂修

玉牒  
實錄  
典訓

方略一統志監修

國史明史公無一不與元日元夕偕滿舊臣進爵

御前侍宴殿內俱出自

特恩至暢春園靜明園賞花泛舟賜游賜食則玉書皆得隨公之後叨

遇盛事者也三十一年公以足疾請告

溫旨報曰卿効力年久自

世祖章皇帝時簡侍禁廷恪恭盡職朕屢加擢用游進綸扉夙夜殫心

勤勞自勵今

先帝舊臣俱已凋謝惟卿獨在班列雖精力就衰而老成練達之臣常

侍左右殊有裨益著勉自調攝照舊供職不必求罷嗣後章三上俱

慰留如初至四十年夏疾大作

上於行在賜寶露禁藥九月又申前請乃許致仕比奏謝

特加少傅是冬遣侍衛賚賜帑幣上珍明年上元節賜燕於家四月遣

侍衛持

手諭一道賜於榻前諭曰卿耆年舊德厯官最久自去歲告病在家朕

無日不注念老臣也邇來九卿皆求扁額字對想卿身雖在告心未嘗

一時不在朝中故特書扁一面對一聯臨米芾書一幅揚卿其勉強  
餐食輔以醫藥以慰朕不忘舊臣至意仍傳諭病少愈朕尙欲一見故  
公謝疏言冀臣病之再甦許瞻天之有日紀

聖恩也前後頒賚

宸翰十餘幅賜堂額三一席寵堂一曲江風度一耆年舊德四十二年  
上元節復賜讌於家公猶強起進一匕箸越四日疾忽劇至二十七日  
遂薨距生天聰二年戊辰七月八日享年七十有六公服官五十餘年  
名成身退善全終始視司馬文正之在洛下韓忠獻之在相州庶幾似  
之而身依天闕恩禮獨隆則前人所未及也公諱熙字子雍一字胥庭  
先世居任邱高祖贈宮保公龍始著宛平籍曾祖鐘祖愛本生祖爵俱  
以文貞公貴贈光祿大夫太子太保禮部尚書公貴加贈曾祖祖如公  
官文貞公諱崇簡歷官光祿大夫太子太保禮部尚書公爲大學士加  
太子太傅亦贈如公官曾祖妣戚氏祖妣張氏本生祖妣張氏焦氏妣  
梁氏俱贈一品夫人公年十二梁夫人病篤禱於天願減算以益母壽  
文貞公捐館公年踰五十矣號泣如孺子顏書屋曰慕齋天性篤孝如  
此兄弟六人友愛無間布政司然金衢守道照皆以公推廕起家者也

元配金氏繼劉氏俱贈一品夫人繼董氏封一品夫人子六人克善雲南驛鹽道僉事側室朱宜人出先公卒次克勤早卒次克昌刑部河南司郎中董夫人出克宏歲貢生候選主事克承克廣俱幼側室出女十人廕生章維貞河南按察使胡介祉衍聖公子孔傳鐸監生願甯緯閻絨璽其壻也餘俱幼孫五人景曾庚辰進士翰林院庶吉士克善出續會歲貢生候選主事企曾式曾則曾俱克昌出克昌等將以十一月十九日葬公於畏吾村之祖塋而屬玉書銘於墓石公與先大夫同舉丁亥進士玉書又夙附門牆之末晚在政地復知公深誼不敢辭乃節錄韓慕廬宗伯所爲狀而敘次之銘曰

巍巍王公惟

帝之弼夾輔兩朝其德克一文章琬琰謀謨耆龜導揚玉几密贊彤帷內表百僚外靖三孽刑清兵偃遠安適悅五十餘年敬慎篤誠相業房杜家聲韋平

帝眷舊勞曰予元老番番黃髮弗祿壽考老成在列蔚爲

國華固請引退養疴於家

手敕慰存中使問疾庶幾霍然扶掖造膝台曜乍掩喪我功宗寵被

異數用章殊庸罷春輟相都人爭誅德盛令終此惟臣軌世濟厥美有  
穀永詒歿而不朽勒此銘辭

附錄一則

癸巳二十六歲春三月朔

御試滿書於內院取列二等五名奉

諭留任學習翌日

召見於宏文院詢問家世履歷

命以滿語奏對仰荷

袁綸諭大學士范文程等曰漢官讀滿書學習滿語須不畏難方有進  
益朕見王熙奏對明爽雖未盡合將來必速通曉文程奏曰誠如

聖諭四月陞國子監司業

上幸內院召見詢問近來學習如何隨

諭大學士等曰王熙既任司業恐其荒於滿書可傳諭祭酒姑兒馬呼  
伊等問答皆以滿語勿令間斷八月轉左春坊左中允兼內翰林國史

院編修甲午二十七歲奉

命譯書經爲滿學士講解本章秋陞司經局洗馬兼內翰林宏文院修



撰冬十月奉

召入南苑譯勸善書及大學衍義

上時幸內院直所一日余在直幄譯書

駕至不及收取蒙

親閱所譯書仍

召至前命如前譯寫甫數行

上大悅論大學士等曰朕向有論王熙必能速通滿文今觀果能曉暢

貫通可嘉蒙賜鹿脯乳餅果餌奉

論不必分班長直南苑遂在直愷度歲乙未二十八歲五月陞右春坊

右諭德兼內翰林國史院修撰丙申二十九歲二月奉

諭開日講命選擇翰林中品行端方文學淹博滿漢官具題

欽點余不在開列中蒙

恩以原銜充日講官三月

御試滿書

欽取第一蒙賜御服貂裘一襲四月

上御講筵直講通鑑一段賜宴行宮墮

駕還京秋陞左春坊左庶子兼內秘書院侍讀

上幸景山臻祿閣

召日講官三人各講經書一篇余准講書經堯典畢賜坐賜膳翌日奉諭王熙曹本榮每日進講餘員候

旨自是每早赴乾清門候

旨宣入弘德殿進講又奉

旨爾等既充講官不必立講俱賜坐進講以爲常丁酉三十歲三月陞內翰林宏文院侍講學士七月十二日奉

諭侍講學士王熙奉職勤慎滿漢學問優通着陞內宏文院學士戊戌

三十一歲十一月奉

諭授爲翰林院掌院學士兼禮部侍郎庚子二十三歲十一月以學士俸三年考滿奉

旨加禮部尚書辛丑三十四歲元旦因不行慶賀禮黎明入內恭請

聖安

召入養心殿賜坐賜茶而退翌日入內請

安晚始出初三日

召入養心殿

上坐御榻命至榻前講論移時是日奉

天語面諭者關係重大並前此屢有面奏及奉

諭詢問密封奏摺俱不敢載惟自念身係漢官一介庸愚荷蒙高厚任  
以腹心雖舉家生生世世竭盡犬馬何以仰答萬一豈敢顧惜身家不  
力持正論以抒誠悃耶吾子吾孫其世世銘心鏤骨以圖報効也初六  
日三鼓奉

召入養心殿

諭朕患痘勢將不起爾可詳聽朕言速撰詔書卽就榻前書寫恭聆

天語五內崩摧淚不能止奏對不成語蒙

諭朕平日待爾如何優渥訓爾如何詳切今事已至此皆有定數君臣  
遇合緣盡則離爾不必如此悲痛此何時尙可遷延從事致悞大事隨  
勉强拭淚吞聲就

御榻前書就

詔書首段隨奏明恐過勞

聖體容臣奉過

面諭詳細擬就進呈遂出至乾清門下西圍屏內撰擬凡三次進覽三蒙

欽定日入時始完至夜

聖駕賓天泣血哀慟初八日同內閣擬上

世祖章皇帝尊諡又同內閣擬

今上皇帝即位年號又為輔政大臣撰誓文四月改內閣仍為內三院

罷翰林院余改為內宏文院學士兼禮部尚書王文靖自

光祿大夫太子太傅禮部尚書武英殿大學士吳文僖公正治墓誌銘

彭定求

康熙三十年閏七月二十五日光祿大夫太子太傅禮部尚書武英殿

大學士漢陽吳公薨於江甯寓舍

上覽遺疏震悼

詔賜祭葬與諡曰文僖其孤宗豐等奉公靈輻歸於漢陽謀卜吉壤未

獲墨食中又遭公繼配張夫人喪以康熙四十一年正月甲申合葬於

某鄉某原而以誌銘未具走使屬諸定求定求開緘惶恐伏惟公之盛

德懿範進退較然榮哀具備載在

國史播在

綸言宜有當代名公卿勒詞碑版垂示不朽若門牆下士僅足供排纘  
事行之役何敢僭書隧石而重違遠命臨窆以待不得已乃按宗豐等  
所述家狀復參以見聞謹爲之誌曰公諱正治字當世號廢菴先世自  
唐侍御少微公由鄱陽徙休甯石舌山傳數十世至團公復徙臨溪又  
數世元振公賈于下雒義聲著江湖間生守華公蚤歿配何孺人守節  
撫二孤長爲公高祖天楚公亦蚤歿曾祖仕齊公諱文仲祖太初公諱  
有成考禹石公諱岳妣余氏太初公負氣節明萬曆時稅使陳奉橫行  
漢口仗義折之以戢其暴鄉人至今稱焉禹石公抱經世志屬時多故  
隱居不出余太夫人有令德善治家生二子公其長次爲平輿君開治  
公生有異表圓頂方口目炯炯有神光而不露雙手垂膝立不倚行不  
佻坐不偃僂甫就傳讀書日記數千言九歲能屬文經史諸子次第淹  
洽儒宿見之輒許爲公輔器年十三應童子試郡邑俱冠軍學使拔置  
博士弟子第一公益自奮勵五經皆手自鈔錄謂書寫一過久乃不忘  
兼得工書法最有裨益也既食廩餼鄉試數弗利居邨落中奉兩尊人  
甘旨畢具兼事大母得其歡心明季四方荒亂楚蜀接壤流寇所至率

皆逃匿山谷一日風雨迷路公獨負余太夫人疾走與賊遇羣挺逼脅公益抱持太夫人不釋賊乃曰此孝子也舍之去

皇清定鼎三楚廓清公遂舉順治戊子鄉試己丑成進士選內翰林國

史院庶吉士授編修

世祖章皇帝雅重詞臣時幸史館親加校試公才調敏贍輒當

上意甲午江南試差公以原籍不署名用便族人進取政府深歎其賢

是年典順天試時例以拜命三日京兆禮聘乃入鎖院交戚關通故易

公獨峻關防榜後多所挾怨然卒諒公無他不得撫拾間一科一甲三

人皆出是榜得人稱盛丁余太夫人艱起補原官遷右春坊右庶子兼

侍講居無何

詔以翰林官教養有年才堪外用者有緊要缺卽補公在選中出為江

西布政司參議分守南昌道或以人情重內輕外為言公奮然曰

上不以臣為不肖得備驅策何內外之有抵任適署藩篆有交代常例

銀若干公卻之悉以貯庫巡按李某素貴倨裁抑監司是日微行廉得

公卻金狀遂相見改容曰清節可敬也歲暮吏既休沐公單騎行部察

訪刑獄至一州囚禁獨多按之皆非法淹繫者公怒斥令放去州官懼

餽金求解公益怒曰我爲搜金來乎爾改過尙可貸若以金污我立揭參矣在任旬月平劇盜出疑獄境內頌聲翕然遷陝西按察使甫視文書得一紙罪款昭著竟未審理意必豪猾賄謀沈閣訪之果然庭鞫卽置重典巡撫張某見公爲政廉明於己弗便輒厲聲色相待公初不爲之動

世祖知公可大用遂內召銓司方循例擬補大理寺少卿

特命爲工部侍郎旋調刑部未幾

世祖升遐公哀慟不自勝輓歌有永懷教義慚無補天語銘心倍可憐之句云康熙改元時方刑獄繁興重案株連日眾

今上尙未親政漢官不得啟奏領西曹者率尙刻覈公志在平反凡于情罪參差比附過當首必據理直爭江南矜士二百餘以通糧逮至盡擬監候公抗言曰若輩賦已完無他罪待勘暑遠解將垂斃忍復令瘐死獄底乎強滿侍郎阿某入白曰第言之若詰責罪當坐我用是竟得釋又議奉行赦款宜速丈量田地宜停狀外指扳宜禁私嫁條例宜酌皆切中時政請假省親起補工部侍郎丁禹石公憂服將除召補督捕侍郎公憂逃人遺害連坐十家奸人安扳里井騷動遂率同

官會疏請除此例且謂禁收月錢則旗丁不至窮而無賴可杜逃之源  
分隸莊頭則旗丁不至散而失業可絕逃之路於是流毒頓息充  
經筵講官擢都察院左都御史掌京察先具疏自陳得

溫旨褒獎公益以風紀自任顧念大臣獻替之義務持大體不得毛舉  
細故用塞言責會直隸多盜諸王大臣議於玉田灤州霸州雄縣四處  
增設駐防官兵議既決公密陳其不必者三不便者三奏可乃中止又  
以江南蘇松等郡自明初削平僭偽加派浮糧賦稅十倍他州催科歲  
不及額有司困於考成近者奏銷處分一案自掛欠毫釐已上悉被放  
廢人才淪置堪惜毅然繕疏籲恩淋漓愷惻爲人所不敢發俄而有  
詔蠲數郡現年錢糧之半公疏不爲無助而公則已焚稿不復示人矣  
遷工部尙書調禮部尙書

上方稽古右文百度釐舉公曰秩宗重任非優游養閒地也凡屬郊廟  
朝會賓貢燕饗行慶告捷諸大禮躬親肅敬考稽古今沿革事宜綱舉  
目備

上必稱善南郊分獻舊屬勛爵至是特以遣公時稱異數總裁丙辰會  
試己未自陳復得



褒旨 在禮部 凡十年一遇

冊立 東宮兩遇

冊立 中宮皆充冊使總裁

玉牒及

仁孝

孝昭 二后賓天酌議喪禮營度

陵寢 勤勞畢著康熙二十一年拜武英殿大學士公入謝

上目送之曰吳某真風儀宰相也總裁

聖訓

方略

典訓 會典諸書監修明史時三逆蕩平海宇清宴公在綸扉參贊機務

主於和平甯壺而操持耿介未嘗稍有依回春秋既高志在恬退枋政

歲餘卽以疾請告

上慰留弗許復起視事一日

上因秋審讞決見一大獄牽引數十人願曰此囚尙可活乎眾以情真

對公獨曰

聖心好生臣等敢不奉行德意宜再勘覆奏退檢原牘果得矜疑狀遂從末減

上乃嘉悅

太祖高皇帝實錄告成加太子太傅康熙二十六年屢疏乞休上覽奏情詞懇切方允原官致任陛辭

召入便殿慰勞款至問卿子幾人曾否任職公具實以對又

問卿今歸何所對曰臣原籍江南有弟今居江甯當就彼以居

賜御書御饌溫語再三而退抵江甯未幾入臨

太皇太后喪會

上南巡公迎駕淮南朝謁時

上見公老病慰諭歸家休息時公已日就湯藥居常偃臥每逢

聖誕令節必北向稽首及聞喀爾喀歸附忽令家人設香案具朝服望

闕遙賀頭目眩暈幾不能起不數月遂薨距生於明萬厯戊午年正月

初五日得年七十有四公少壯時意氣豪邁中歲深自斂飭致身四十

年惟以砥節立品上結

主知當

世祖時有劾閣臣援引親故者

世祖指公以示曰內升官員皆朕親自簡拔如此人豈有親故爲之地

乎晚登政府

恩賚便蕃時有元狐黑貂金鉏良駟綵幣文鏐上尊玉粒諸賜而公性甘儉約衣惟綈繒食惟蔬肉卻餽遺省燕集門庭闐寂賓從稀少退食餘晷獨坐一室整襟屏息靜擁圖書間作詩歌蕭然神遠於人世紛華嗜好泊如也取士薦賢務秉虛公不喜標榜奔競嘗應

詔舉博學宏詞以彭少宰孫通名上得首選而實未嘗素識屢充殿試讀卷公所進呈多列上第亦遜謝不居見者益然如坐春風中遇拂逆尤能容忍前秦撫張某既視公不善旋被逮公方貳秋官懼而求解公曰我豈以私憾撓公法乎卒從輕擬內行篤于孝友仕旣通顯間歸子舍依戀彌深先後奔兩喪痛弗得親視含襲諱日悲感杜門謝事以爲常與平輿君同居其纍委以家秉不復自問生產疾將革猶執平輿君掌誦蘇長公與君世爲兄弟之語公薨未及期平輿君哀傷成疾亦遽卒以先世之居新安也數往祭墓會族兼置祭田義田賙恤親舊恩意浹洽教諸子尤以循循恭謹爲務故諸子力洗貴胄怙侈氣習不踐

公庭不通竿牘恂然一如寒素僮僕盡遵約束居第所在絕不知有元老也殯去江甯自家無餘財不足以充喪具傾城祖奠嘖嘖稱賢幸輔不置云原配傅氏前公卒葬既久繼配張氏爲文學伯兩公女伯兩公蚤識公有李鄴侯風骨又卜夫人當大貴故以歸公禹石公余太夫人在堂夫人克嫻婦道滌髓必親宜于家睦于宗黨拮据婚嫁皆出其奩具以辦不煩公內顧愛女自傅夫人出者子自庶出者撫愛視己子較先故舅姑喜之曰冢婦和而恭貴而能勤天必福之公居禁林及參藩豫章游歷臺閣夫人嘗從之左右必以廉潔仁恕贊襄勸勉旣膺封典諸子治冠服將買珠夫人遽止之曰命服章身何以珠爲公旣任機務夫人諭諸子曰大臣子弟以慎交遊爲第一義如因父兄處津要而締結賓客招搖貽累者不少汝曹慎毋蹈此益與公之教相表裏也平居禮法自持閭閻肅穆無聲官舫經行篷窗不啟蔽以重幔家慶偶置音樂罕一寓目每遇

國恤必縞衣蔬食以處公決計退身家庭尙未明知會舉公七袞鴈夫人語諸子曰仕宦之榮旣極盍弗歸乎公笑取袖中疏稿讀之曰此疏朝奏而夕報可矣復笑曰人言休官不謀于妻子何必然哉因洗盞更

酌盡歡夫人密贊公於出處之際尤迴軼尋常萬萬如此自公薨後絕  
簞食屏綵服街悲弗輟也歿于康熙三十七年十二月二十四日距生  
於明崇禎甲戌年十月十六日得年六十有五子宗邵廕生光祿寺丞  
前卒宗豐庚辰進士翰林院庶吉士宗翰宗勳女六孫男四孫女三當  
上與公諡之日既以公小心敬慎舉朝無閒言禮遇終始優渥厥後七  
年宗豐方捷南宮引見保和殿  
上特追念公舊勞推恩及世拔置中祕則所以宏獎純臣歿存如一尤  
足令聞風者感激興起不獨增耀九京也而夫人猶及身之存得見其  
子之成名勛以祇承家學圖報  
國恩然後從公長往蔑有遺憾今之葬也固宜合詞以銘乃再拜而系

銘曰

江漢儲精哲人挺出誕應昌期爰作良弼昭茲臣道翼翼小心黃裳易  
筮赤鳥詩吟嗣美我公謝彼臚仕不伎不求不茹不吐宅心之謙養氣  
之純容物之恕造士之仁爲漢丙魏爲宋李向邃思遠慮清操雅量我  
皇中孚令名褒崇象賢濟世酬乃匪躬亦有壺儀肅雍其備馬鬣同封  
天家攸賜神輿盤固珍符熾昌鸞旌鶴馭陟降雲閣何以思之淇園棊

竹何以瞻之泰山喬木

光祿大夫太子太傅吏部尚書文華殿大學士加一級宋文恪公德宜

行狀徐乾學

公諱德宜字右之別字夢天江南蘇州府長洲縣人母王太夫人有娠

夢狡狴入室生公有異表面如白玉高顴豐下目炯炯射人幼出嗣伯

父母伯父母早世仍鞠育於本父母八歲能為文十三入籍崇明為學

官弟子歲在己卯公父以監察御史巡按山東濟南城破及於難公年

十七重跼至京師伏闕請卹久之得贈大理寺卿順治五年中江南卿

試凡三試禮部乃中式

賜進士出身第三人改庶吉士以本生母喪歸持齊衰期年服心喪三

年畢乃至京師館中故事庶吉士假滿當補教習

世祖章皇帝特授公翰林院編修仍在館讀書十八年始散館時江南

大吏覈逋賦羅姓名以聞於朝里胥誤竄公名籍中遂挂吏議公具陳

其誣久之得白補原官康熙三年遷國子監司業六年轉翰林院侍讀

八年陞國子監祭酒嚴立條教除積弊召姦猾吏金其至邸笞之百六

館師生人人敬憚際今

天子親政後輒吉月  
車駕詣太學釋奠於

先師

御彝倫堂賜公東向坐講周易乾卦辭宗藩宿衛大小百寮暨太學生  
徒以及耆老園橋門聽講者數千人咸歎服未幾遷翰林院侍讀學士

十年

天子初開講幄

命儒臣以次進講

親簡八人充日講起居注官公與焉尋充

經筵講官明年遷內閣學士兼禮部侍郎

上素器公數顧問卽以質對風度端重進止舒徐每奏事畢

上恆目送焉駕幸口外駐蹕赤城公時扈從

上從容問及江南逋賦之田公言江南多版荒田冊載虛名實無租入

可供國課非盡官吏中飽因極言蘇松賦稅獨重民力弊叻辭甚悉會

詔免蘇松等四郡錢糧之半高陽李文勤公謂公曰君一言之力也十

三年戶部侍郎員缺

上以命公仍兼翰林院學士詞臣佐戶部得兼學士銜自公始既受事  
剔宿弊發私餽親自握算鈎稽文卷值滇黔蜀叛秦楚東西粵軍需孔  
迫大農議盡以江南歲輸充餉公念江鄉歲稔徵求不前又道遠慮貽  
誤力持不可乃就用兵近地酌撥餉以濟而江南得不重困居一年調  
吏部右侍郎明年轉左又明年遷都察院左都御史上疏請弛海禁令  
沿海居民藉佃魚資生計請定鹽法考課罷省筆帖式請禁通販疏黃  
硝決機珍寇又言捐金者得授官非經久制宜請限以月或以年庶幾  
官方以澄所言次第舉行又率同院上言各處統兵大將軍王以下玩  
寇殃民遷延歲月或購取婦女或攘奪民財物荼毒匪細請

旨嚴飭

上是之命集諸王大臣速議申飭嚴禁由是行閒將帥凜凜畏國憲

孝昭皇后上賓

聖心哀悼公上言宵旰憂勞之日尤宜秉禮節哀慎起居出入又載籍  
浩繁博不如約願略方名象數之煩但擇有關政治裨益身心者討論  
講習稍節耳目之勞用保中和之德

上喜溫旨批答山東大帥柯永綦縱兵鼓譟具疏直糾



上卽命逮至京訊治尋遷刑部尙書調兵部時蜀初定大軍糗糧皆運自陝西道出劍閣顛踣者相枕藉陝西民大困公因星變言今大軍趨黔且暮望秦蜀之餉然徵秦則以道里險遠而諉之蜀徵蜀則以近地不足而取之秦惟以川陝各設總督彼此觀望無異越人視秦人之肥瘠也蜀地非不足於粟莫若併川陝總督爲一人則痛癢相關隨地調發庶幾秦民得以少休其力矣

上大悅卽如公議行川陝兵民交稱便值滇黔粵蜀以次削平俘獲賊中婦女並著籍旗下公言脇從者不與倡亂同罪且婦女何辜宜聽收贖於是所釋甚眾二十一年調吏部尙書杜絕請託清釐銓法老吏斂手不爲奸歲在甲子七月以文華殿大學士入閣辦事丙寅晉太子太傅丁卯六月以疾卒於官享年六十有二公之寢疾也

上垂問再三計聞軫悼遣閣臣攜茶酒

賜奠柩前以其年秋八月喪歸某年月日葬某原祖妣朱氏妣丁氏本生妣王氏皆累贈夫人娶王氏封恭人累贈夫人子男四人駿業翰林院待詔敬業國子監生早卒大業翰林院庶吉士建業國子監生女十人一嫁日講官起居注翰林院編修顧藻一嫁日講官起居注翰林院

侍讀王揆一嫁州同知金相戊一嫁壬戌榜進士顧用霖一嫁日講官起居注翰林院編修陳元龍一嫁辛酉科舉人朱之敦一嫁翰林院編修李孚青一許配國子監生錢灝一許配裴岱生一許配繆沅惟公至性孝友母在自食粗糲以甘毳爲養親歿後忌日輒素服避賓客涕泣在都下聞弟喪兼程還經理身後事撫育孤女諭己出惇於宗族貧者輒賙以粟與兄德宸弟德宏早著聞譽一時有三宋之目擇交必慎海內名士見者傾心寫意敦槃之會吳中至今傳爲盛事焉及貴寒賤有文采者雖不相識汲引不倦甲辰充會試同考官丙辰己未兩主會試五充文武殿試讀卷官

詔舉博學鴻詞以汪琬陳維崧薦俱授翰林故人孫鳴吳兆騫徒遼左捐金贖之還兆騫客死爲經營其歸櫬生平寡言笑未嘗見喜愠之色有非意相干者不校遇賓客甚恭窮交造謁者必見縞紵遺贈久而不衰寬以御下無疾言遽色而門以內肅然家人不敢以褻服見也與修通鑑全書充

世祖章皇帝實錄纂修官

太祖高皇帝實錄總裁官兼充

三朝聖訓

平定三逆方略

政治典訓

大清會典

大清一統志等書總裁官明史監修官又奉

命評隲古文淵鑒始終以文字受

主知公剛毅木訥造次不能達其詞至於

國家大事論議侃侃同列意見有異輒為之剖晰是非反覆開導或至

累日往往感悟其或勢不可挽則自為一議

上每善公所陳多報可公遇覃恩賜封者五加級者六黑狐紫貂裘

文鏐采幣天駟上尊玉粒珍果之賜匪一然服官三十年不一問及生

產未仕時有薄田數頃初不增益城西有宅一區門巷蕭然里人忘其

在樞要也公立三不朽同朝公卿所共聞見某于公同鄉曲於學同席

研於仕為公後進知公較詳謹狀公厯官行事乞銘作者俾

國史得以編錄焉謹狀  
資政大夫文華殿大學士戶部尚書掌翰林院事徐公元文行狀

韓奕

公諱元文字公肅別號立齋其先常熟人九世祖諱良始遷崑山再傳諱申舉故明宏治甲子鄉試以壽甯侯事直言子杖由刑部主事謫湖州府推官又三傳而至太僕公初官翰林以文章風義爲後進所宗祖父皆有聲太學舍德弗耀用啟後人公兄弟四人長尙書公乾學次中允公秉義季弟國子生亮采公之生也以明崇禎七年甲戌九月辛巳願夫人夢神人授之玉尺覺而生公自少端重有大志贈公儻闊達既才高不仕願望其子以遠大公自就傳沈潛習誦不假勞年十四爲諸生時吳中盛爲文社公偕兩兄家庭間講聞切究獨倡爲古學汎濫於百家而根柢六經務于明理致用特肆其餘爲舉子家言輒傾其儕可爲度程順治甲午舉於鄉己亥成進士第一人

世祖召見乾清門諭以特簡之意還啟

太皇太后曰今歲得一佳狀元賜冠帶蟒服裘靴視舊典有加公率諸進士謝恩

世祖爲御殿百官陪列鴻臚讀表前此未有也除翰林院修撰數被宣召公詩云空傳放馬金門侍只倚雕蟲侍武皇生平致君之志已見此矣嘗從幸南苑

賜乘御馬命學士折庫納爲執鞭公館師也遜謝不敢乃改命侍衛又嘗晚對便殿夜分賜饌

世祖又問從者得毋飢乎復命侍衛賜之食公又賦詩紀恩在翰林無事益刻厲問學不專務爲辭章而窮探本原曉暢故實折衷裁劑度其不悖於古而於今宜者俟時而措優如也嘗

命進爭齋說一篇

世祖讀書所也覽而稱善爲刻行之讀者皆以爲知要辛丑春

世祖寘天公號慟若私喪公除悲猶未止歲以是日齋居慘戚者終身

會江南奏銷案起姦胥竄公名其中謫鑾儀衛經厯公恬然安之又四

年而事白復官未任間贈公病卽乞假省覲至丹陽而訃至哀毀不欲

生與兩兄執喪盡禮三年處外終喪乃復寢後喪太夫人亦然己酉起

補國史院修撰尋進秘書院侍讀秋主試陝西所錄多單寒苦志力學

之士秦人言士子鼓舞讀書自此榜始明年以廷推選國子監祭酒尋

充

經筵講官公舉止開雅音吐宏暢進講稱

旨自是每遇

經筵必命公講至登政府猶然公以養士莫大於大學疏言自古人才盛衰視學校興替古先哲王於胄子之外妙簡賢俊以入辟雍周制鄉論秀士升之司徒司徒論其秀者而升之學自漢唐以來太學子弟皆由遴選以故橋門之間人材輩出或顯經術或崇理學要皆敦厲實行矜尚氣節非其時人獨賢也取之精而養之厚有以致之也自故明景泰時入馬入粟之途開闢巷小夫皆隸名胄監蘭艾錯雜程課不行而以資進者亦自以所至之有限安於卑陋不思振拔士風之做實由於此我

皇上右文重道振興教化而諸生之在大學自官廕之外止有輸納一途其以歲貢至監者十不得一又多年齒頹暮之人甚非所以廣英才也伏察舊例順治八年十一年曾經各學臣選取生員文行兼優者起送至監今宜遵倣此例於郡邑各庠或間歲或三五歲舉品行端慤文學優長年齒少壯者一人入太學加以歲月漸磨砥礪勉之成材優其進用之路更宜遵照

世祖皇帝舊制每科直省鄉試各取副榜若干名送監肄業如此則辟雍濟濟多經明行修之士而入粟之途亦將有所興起所裨於人才非

少矣得

旨下部議著爲例由是上舍皆海內名俊之湊公復程課有方益激發壯厲旣彬彬矣則疏請廣監生鄉試中式之額以示勸而於輸納之途復疏停止力陳其不可者有四謂養士育才莫重流品至於入資則冗濫實甚不俊不秀之人並得冒俊秀之號不可者一也官貢各生所謂正途期滿考職必歷三科九年之後而援例入資則不計年限隨咨隨考官貢監期多者二期少亦半歲而準貢期止三月則是遇正途轉紕而待禠途轉優沮寒士攻苦之心長富兒驕惰之氣不可者二也流品旣淆氣習亦異往往不能拆節降心自就繩墨雖復年加訓督而素無劣等黜革之例相習恬然不爲恥怪其意以爲惟不曉文義故就此以進本不宜深督也程課難行土風益薄不可者三也竊計歷年以來吏部考授職銜需次州縣掾佐者不下數千人選途積壅補授無期日漸加增必盈萬計其於大體不能無妨而一授職銜輒服其品服輿從翩然招搖閭里銓塗旣濫名器實傷不可者四也卽其中亦不無文采可觀自命不苟者然不使之以文藝自見而亦使之一出於援納臣竊爲惜之停罷爲便章下所司公又疏言

祖宗朝最重官學拔用人才多出其中今部院衙門筆帖式闕出廩生監生用十人裁用官學生二人一年之內得闕甚少而官學生名額甚多勤苦積年終不得以短長自効竊恐向學之意自茲日衰非獨壅滯淹困爲可憫念嗣後應與監廩生作何分用請酌量變通實爲育養人才之助公雅意儲才爲根本久遠計欲俾滿州漢軍子弟興起以効於國家收得人之盛如豐芑之眾多故於官學尤激獎成就之其後公在西臺

上嘗語閣臣徐某爲祭酒規條嚴肅滿洲子弟不率教者必加撻責至今猶畏之後來那得如此蓋公爲祭酒凡四年而學政大飭其教甚具而可法端士習起惰窳嚴考試慎咨送肅禮儀重專師勤講肄飭書役其課文皆崇雅黜浮足爲海內矜式而會尙書公主壬子京兆試鑿裁精審雅與公合由是士子益知嚮方而數科以來文體一歸於正云甲寅五月管內閣學士兼禮部侍郎尋充

太宗實錄副總裁乙卯四月改翰林院學士兼禮部侍郎充日講官起居注五月教習庶吉士時中允公方讀書史館公疏辭  
上特免中允公教習而不允公辭公日與桐城張公進講



弘德殿敷陳凱切惟以質直自將無浮詞曲說

上每稱之一日

上諭公四書屢經講讀熟曉文義每觀通鑑備載前代得失深有裨於治道應與四書相參進講作何摘取撰擬講章公疏言臣等承奉綸言不勝忭慶竊以朱熹因通鑑修成綱目書法謹嚴褒貶盡善得春秋之遺旨臣等擬從綱目中詳加決擇其事之關切君德深裨治理者摘而錄之講義體裁難與四書諸經同例每條之後採取先儒之論參以臆斷之詞演繹宏綱發揮大義

上是之公退而屬諸詞臣分撰講章必手自裁定務舉其要而暢其旨相當務之急以立言未嘗不說之詳而反之約也先是大學士孝感熊公在講筵非堯舜之道不陳非四子五經及宋諸大儒之言不言以仰贊

聖德精熟於大本大源之地公承

上嚮意史學進而開廣發明益卽事以窮理由道以敷治表裏精蘊全體大用通貫如一而先後相成也故事歲終具疏彙呈講義公疏有云籤軸方新簡編具在伏祈

聖聰時留省覽以此啟益睿智以此振厲精神以此對千聖於同堂以此決萬機於一日則得之臣工之講論者淺而得之夙夜之體驗者深得之片言之會悟者微而得之一心之運用者大公之隨事獻納多類此也嘗從容語院中同列謂詞臣之所以異于各衙門者以退讓不求進也先後輩自古已然可無讓乎教習癸丑丙辰兩科庶吉士峻整不可謁以私其有行與材者愛之不啻出諸口以是故咸畏服成就者眾十一月丁太夫人憂歸已未二月

召監修明史時服未禫除而監修例命勳臣閣臣公獨以學士充識者知將大用矣九月赴闕自陳且辭

新命不允疏請購遺書徵遺獻舉故明給事中李清主事黃宗羲及副使曹溶主事汪懋麟布衣黃虞稷諸生姜宸英萬言等部議不許

上特從公言召之清宗義溶以老不至各上所著書時未有學士闕特改內閣學士項景襄於兵部而用公公在內閣遇事敢言不肯唯阿吏部題補給事中

上以科道官一省多者至五六人或有竟無一人者命分省均用各以二人爲率又以大小省不同銓司更議分別多寡公奏曰

聖意重耳目之官欲周知天下利病故命分地均用然諸給事御史多  
自各省有司行取考選不患利害不能周知若必以地爲限才優者以  
數溢見棄而不才者願得承乏恐言路不能盡得人

上深然之命照見行例行九卿會推江西按察使有舉興泉道張仲舉  
者御史唐朝彝力言仲舉在閩無善狀科道欲疏劾朝彝副都御史李  
仙根給事中李宗孔不願署名遂併劾之部議仙根宗孔降五級調用  
朝彝革職

上曰此處分太過公奏曰會推本欲公之廷論使各盡所懷何嫌參差  
而處分若此卽將來所舉非人誰敢駁正且科道公疏必不許一人不  
列名恐一二強有力者妄有抨擊便隨聲附和流毒何窮

上曰然當免處分公曰凡言免者謂有罪而  
聖恩寬之也臣以爲諸臣實未有罪  
聖旨但云不必處分則所全多矣  
上從之御史有言宜遣大臣巡方者公昌言於閣中曰巡方向遣御史  
以有憲長彈壓也若遣大臣或妄作威福適足爲地方之害乃入言於  
上而止公見

上慎重用刑當秋決先語閣臣所宜決宜留者及入奏抱牘具陳始末

上亦事事諮公條對甚悉

上多從焉儀吉謹案時上怒御史蔣伊欲因考試黜之公曰蔣伊文

又欲黜御史呂兆熊論其文呂兆熊又論其人死難尚書呂維祺之

得從汝從汝賜履撰墓志庚申口月特拜都察院左都御史入謝乾清門

近侍傳

上語哀嘉且道講筵之勞賜

御書墨蹟三又傳

充論朕久不作書頃試筆得鳶飛魚躍四大字并以賜卿公頓首謝尋復

經筵講官時滇孽將平公疏陳善後之宜略言逆賊三桂甘心反叛蔑

棄天常同惡之人義宜鋤殛苟能効順業已恩許自新若仍留本土非

永久之規欲移調他方多遷徙之費統之別將則疑情未化終涉危嫌

攝之歸旗則放恣既久粹難檢束臣以為宜明布

恩旨悉與滿雪應補職者量與補換綠旗職銜願補伍者量行撥補綠

旗關伍其他一槩散遣為民分道安插於事體為便至於以前處置兩

藩官兵已有成局臣何敢妄議第恐亦是一時權宜未必實可資折衝固圍之用而耗餉不已臣竊慮之倘先行酌量散遣亦足使西南餘孽聞之革心至定南一旅尤屬無謂宜一體解散既銷遣藩兵減省餉祿然後軍儲充裕益可推行寬大之政薄稅輕斂以副皇上軫念民力之初心矣又疏請除三叛虐政略言滇南閩粵所在橫罹暴虐占奪民利害政干紀宜及初定之辰通行申飭預爲禁止在粵東者五曰鹽埠之害曰渡稅之害曰總店之害曰市舶之害曰魚課之害在閩中者四曰鹽稅之害曰報船之害曰冒擾驛夫之害曰牙行渡稅之害在滇南者亦四曰勳莊之害曰圈田之害曰礦廠之害曰兵多之害

上俱下九卿會議初御史劉安國請察隱占田畝部議凡察出者分別甄錄州縣官利其升敘多捏報累民公力言其弊謂本無主名原非隱占妄造詭戶謬托清釐實則強派分賠取盈敲扑至今累年不堪困苦率多逃亡名爲加糧實耗糧戶名爲清弊實長弊源前者府谷縣捏報隱地接任知縣謝溪英揭部奉旨遣官察審始得開除洪塘所千總徐振業虛報隱田安撫勘察題參

始得分別荒熟臣更訪得山西蒲縣本貧瘠前令捏報隱田派賄通邑  
乃至庠生王命新曹大朋各賣其子女而廩生賈松年竟自鬻于平陽  
軍營夫婦執役又聞山東棲霞縣素稱僻小前令捏報墾田民受賂累  
失業者多竊恐如此二邑者正復不少督撫既共欺妄於前須爲之掩  
覆於後請通行申飭凡從前捏報但行檢舉姑予寬原若始終掩覆壅  
遏下情加等科罪

上命確議以聞時

仁孝  
孝昭皇后梓宮發引

上將親赴山陵公與滿漢同官率諸給事御史奏請無行

上曰山陵事大朕親往欲一展

孝陵公從行追感

先帝恩悲痛不止賦詩云惟將廿載攀弓淚并灑橋陵松柏中禮畢

賜遊湯泉命各賦詩公作序一篇四言十二章

上稱賞命勒石公在臺以身總風紀尤兢兢於振飭紀綱澄肅吏治疏

劾福建總督姚啟聖縱恣譎詐妬功害能狀啟聖皇恐上疏待罪得免

又條列督撫四弊謂臣伏察吏部定例督撫毫無治理者該部察審從重治罪可見功令責成惟在拊循百姓今則令懸而不行督撫聚精會神止求免其註誤之罪至於立何條教開何便利招何流移革何弊俗多漠然度外置之此督撫不職之弊臣謂自今督撫之優劣當以民生愉戚戶口增耗爲斷其撫綏無術之處分依例切實舉行督撫封疆大吏一切皆職分所當爲今乃事事議敘往往給銜尚書增秩一品至於簿書期會之間非有大故又事事不克免於吏議以賞則濫以罰則密此功過無準之弊臣請以後凡有督催捐助察逃墾田等僅許紀錄註冊惟教養有方治效顯著方準加銜增秩而一切小事註誤并量行寬貸察吏之道宜莫嚴於藩臬乃數年來督撫未見有糾彈藩臬者此察吏不嚴之弊臣謂藩臬苟有貪污不職督撫不行糾劾者宜以徇庇論罪督撫有降級留任者有革職戴罪圖功者非係大貪大惡類蒙寬假徒有處分之名不改顯榮之實此心多僥倖之弊臣請嗣後督撫有降調及革職者宜卽令去官不必輒許留任又疏論課吏事伏察康熙十八年定例凡捐納授官到任三年後稱職者具題升轉不稱職者題參處分是凡捐納之人分別具題皆當以三年爲限乃今各督撫具題稱

職者尙不乏人而以不稱職題參者槩未之見至有授任四五年而不  
糾不舉莫能辨其賢不肖者謂非督撫之容徇不可也臣以爲官依限  
分別去留卽行聞奏不得姑留不論不議之人以誤民生而滋姦弊又  
如戶部條例道府以下捐銀者三年後免其具題照常陞轉夫國家大  
體所關惟賢不肖而已今吏途甚雜所以令三年具題者蓋欲使賢者  
勸而不肖者懼若許捐銀是金多者與稱職者同科矣臣以爲稱職非  
可捐納而得且此曹以現任之官營輸入之計勢必剝民脂而長貪冒  
所急宜停止者也歲貢一項所謂正途自開捐納生員之例今日納生  
員他日納歲貢名則清流實則銅臭公然冒濫自許正途臣以爲正途  
非可捐納而得其由捐納歲貢得官者仍須保舉方與正途一體陞轉  
所急宜更正者也至於諸凡捐納事例總屬一時整行

皇上釐敘官方至意固久欲停罷今願於滇南收復之日卽賜  
明旨槩止不行則聖政一行人心大快矣公自爲祭酒時屢以捐納爲  
言至是益切後二年又以捐納官三年具題以清廉才能保舉不無  
緣之弊請停止而於大計另繕冊以大計舉守清才優者率少庶幾無  
濫云滇南旣定告



廟肆赦公疏言

皇上睿謨聖略決勝萬里數年以內諸叛悉平古者聖人作易於泰之方盛卽致艱貞之訓而豫豐旣濟諸卦垂戒尤切臣愚惟願

皇上於景運方新之會倍切堯咨舜做之心日甚一日以成保泰之治并乞

申諭大小臣工乘此治定功成相與洗心滌慮毘贊大業如政體宜講也不妨詳考舊章國用當節也不宜過加綜核行一事必謀久遠勿狃目前之淺圖爲百姓必留有餘務培國家之元氣至於振紀綱以崇大體核名實以課吏功崇清議以定國是厲廉恥以正人心端教化以固治本抑營競以儆官邪敦節儉以厚風俗正名分以絕姦萌並當世急務願存震動恪恭之意力去因循苟且之習天下幸甚疏將上同列有止公以言太直者公不顧也公與同官相接甚和而遇事輒力爭無所避事關八旗者人多不敢言公獨持之彊嘗劾浙江副都統高國相藐法害民得

旨察審將軍馬哈達以民間多匿逃人請自勾攝不移有司公不可曰文武兵民之分久矣今以窩逃爲名展轉傾害何所底止滿大臣曰當

令將軍會同督撫公曰如此仍是將軍爲政必不得已當令督撫會同將軍

上從公言京師姦民多窩販善良官吏預印空契給之屢被發覺公疏言掠誘之術幻變百端始猶誘脇窮民今則并及旗人矣始猶誘賣男婦今則并及幼童矣始猶販售旗下今則遠賣出關矣合加等科罪至地方正印官不取本人口供存案而妄用印信者及非正印官而擅用印者均宜嚴定處分若買人之人不帶本人由正印官當堂驗明卽與空契無異如此則窮民不至終罹陷弃卽旗下買人亦得確有實用滿御史堪泰巡鹽兩淮運使貪黷不糾劾公疏除淮鹽積弊革商綱色目而劾御史罷之八旗家人投水自縊刑部報聞者一歲中及千人公請下部詳議驗其有傷痕及一家中前後積至三人者酌定處分府部院寺筆帖式近三千人求開例捐納典州縣公不可滿大臣以好言勸公公曰諸公旣不以爲然吾當獨爲一議不以相累也卒從公議而罷其以京察大計處分者規欲還職議亦不行旣罷議侍郎項景獻留揖公曰微公則選人無復入仕之望矣二十二年春當大計藩臬例入覲公言舊例入覲俱許條奏地方事宜然僅由通政司投遞引見一次辭朝

卽行於述職之實猶爲未盡臣請

皇上特諭各省藩臬見朝之後卽將所屬地方應行事宜各具本章面  
行條奏仰俟

皇上親加諮訪其才具之優劣議論之得失自難逃於奏對之下校之  
封進銀臺尤加親切臣又伏見

皇上慎重用人遇藩司推巡撫者多蒙馳召與其臨時赴闕何如試之  
入覲之時況今年大計藩臬舉卓異者極多

皇上鑒其才能之高下兼可以知督撫所舉之當否於察吏用人之典  
不爲無補

上是公言親御乾清門科道官侍班通政司引藩臬官以次面奏著爲  
令尋有

旨藩臬勿舉卓異時公掌計典一切餽遺不敢及門嘗語客曰當考察  
時藩臬大吏皆長跪堂下自陳履歷其體統嚴重若此使受其金錢豈  
不內愧於心邪是年舉行軍政公疏請命提鎮次第入覲以重閫寄是  
後提鎮悚息多請陞見蒙召對云公又疏言舊例八旗漢軍文職官員  
任漢闕者丁憂離任守制任旗闕者不得丁憂倫常風化之地不容互

異所當定議畫一又康熙十二年例滿洲督撫藩臬俱守制二十七月而京朝官尚仍舊例三月後卽出供職夫親喪在所自盡爲宜一體丁憂以崇孝道禮臣有三年喪君三年不呼其門律官吏丁憂公罪不勾問蓋不欲奪其喪而忘其哀也今外官丁憂候代治事如平時安有方寸憤亂之時而可責之以政事者聽決而當則爲忘哀哀苟未忘必至廢事請自今丁憂之官但無錢糧之誤卽聽奔喪庶使忘哀罔利之風可以少變又律文凡居喪釋服作樂筵宴嫁娶悉有明禁而比者士大夫鮮克由禮凡衰絰婚娶或喪中聽樂或遲計戀職或吉服游謁此皆薄俗傷化不可容於聖世者宜併嚴行申飭又劾候補御史蕭鳴鳳居喪與妓濫久不回旗坐革職公在都察院三年數條上便宜知無不言不畏強禦

上多採納付所司詳議雖議者或以爲未便格不盡行然

上深知公不以爲忤公常感泣語人非  
聖恩矜全當獲戾久矣是年坐舉湖北按察使去官當廷推時眾人相顧莫敢舉久之某公言今姑準俸推公曰善乃列俸深者副使王垓胡悉簡

上以皆山東人疑之命閣臣問舉者爲誰有以公對者公默不辨遂鐫  
三級公將歸而明年甲子二月有

旨留公專領監修明史史局置已五年而書未成公既不與政專意史  
事考據國史參用諸家之說年經月緯手自編輯客有熟于前朝典故  
者公奉書幣延致賓館遇有疑誤輒通懷商確常至夜分積年成紀傳  
十之六七尋繕呈紀七卷傳十五卷公疏請如唐太宗序晉史例稱制  
論斷并出三朝實錄以便參稽明祚訖於愍皇福唐桂三王大命已傾  
覆亡之蹟不可以不著請從宋史益衛二王遼史邪律大石之例以愍  
帝終本紀之篇三王從附傳之列至明末之臣盡忠所事考之史例均  
當采拾皆

報可秋公長子樹聲與尙書公季子樹屏俱中順天鄉試

上令九卿磨勘有言當黜落者遂具奏將送法司質訊禍且不測

上不聽但革二子舉人而公兄弟任如故二十五年當考選科道掌中  
書科者托胤以舍人王緝植咨送吏部緝植娶于諸公外兄所生女也  
幼常育於公或謂公蓋一言爲之地公拒弗許左都御史董訥不知以  
爲公壻也必右之疏劾公部議革職

上又不聽但鑄四級仍留修史明年以亢旱修省羣臣去官不以罪者許得辨復或勸公自列公曰

上命處分何辨之有二十七年二月尙書公自左都御史遷刑部吏部奏以次應補者

上難其代章久不下七月復起公左都御史自公去後五年孤踪危殆者數矣

上每思公舊勞屢欲用公至是復公故官又兄弟相代受事人咸以爲榮公自以拔擢廢棄

上恩過厚益竭所以報稱入臺一月四上疏一申飭臺綱一停止臺灣興販一論銓補知府一劾兩淮巡鹽御史陶式玉其論臺綱曰科道官交關督撫歷禁未革旣納苞苴安能彈射又朝士選補出外者往往設席招飲曲致款洽交通之弊職此之由臣請嚴行禁止又宋時御史入臺滿十旬無章疏則有辱臺之罰伏察臣衙門舊例漢御史自隨時條奏外設有建言牌以次輪傳牌到或半月或二十日必有建白所以策厲之道甚善今久廢未復臣請還如其例舉行其論興販曰臺灣歲收常賦之外興販白糖鹿皮在當日固權一時之宜補餉額之闕然臣竊

思天朝官吏未有敢出境外者今督撫歲委文武官給發執照興販東洋親與島渚之徒互相貿易較論錙銖褻越殊甚卽使獲利百倍盈載而歸亦有所不可況自康熙二十四年以來三年之中奏報獲息多者不滿三萬兩少則不過千金然經連歲颶風漂沒二十五年之船十亡其六又貨不皆售每至卻還其不足仰佐國用明甚且採買之時官吏奉行不善多有扣剋及至卻還半屬滄壞仍令民間領回追取價值頗爲苦累

皇上軫念黎元曠恩蠲租動數百萬計此區區者曾何足云伏冀聖明立賜停罷其白糖鹿皮聽民間興販照例收租爲便臣又惟海船公行商賈四出雖足爲生民貿遷之利然明世防倭甚嚴濱海築城置衛其後倭眾猶擾東南不過因奸民勾連市易遂爾生釁今遇皇上聲威四訖誠不足慮第恐積久玩生請飭海疆文武大臣於通商之中寓詰姦之意出入稽察慎嚴戍守乃爲制馭之策時知府闕出吏部多不補而式玉在淮有墨聲故疏黜之事多施行公以言路當盡得人御史李時謙袁充美素以抗直稱罷廢久疏薦起之而時謙得復用十二月遷刑部尙書公在都察院時遇三法司會議刑部送稿至有不

當卽據事理駁回必平允乃已至是左都御史馬齊謂之曰公在秋官  
都察院可藉手稟成無煩往復公甫視事以人命至重尤加意矜恤寓  
書中允公曰外間奏常成平反不易督撫檄行所屬動云妥招夫招一  
受卽人命不妥矣司中能擔力者甚少看來此部事頗難辦也方十日  
而改戶部公以戶部天下之利藪政由吏出相緣爲姦几錢穀出納多  
寡遲速之間反覆駁查索賄動千萬計外吏尤畏之偶出外雖督撫亦  
曲意接待科斂部費以供其慾厭足乃已公銳意欲革其弊而正己以  
帥之乃與尙書鄂爾多等約其澄清部事易置司官嚴立條約各衙門  
文到日錢糧應核算者卽與核算應放支者卽與放支一不假手吏胥  
公遇事精敏辭復明辨滿漢司皆懾服胥吏益無所措手又諭十四司  
有事應說堂者須滿漢同時說堂便相商度一日滿司官復欲有所駁  
查以自便者彙已成鄂爾多卻之曰徐公在此爾尙敢相溷邪公知江  
南福建布政司庫皆闕銀四五十萬係侵蝕賂遺疏請令督撫每歲查  
盤并禁有司私派部費斥逐各衙門役滿書吏部中一時肅然尋奉  
命與滿大臣清理刑獄定例死罪減等者安插內地前此大臣慮囚並  
發遣烏龍江道遠多不能存活公欲復舊例語大臣以推廣



上恩因如公言以請其他輕罪者力與開釋

上寬仁多可其奏二十八年五月拜文華殿大學士公聞命即詣乾清門辭曰臣在部振刷方有次第大學士位高責重非臣材力所堪

上不允

上又問大學士掌翰林院古有之否閣臣曰有之即命公兼翰林院事尋充

政治典訓

平定三逆方略

大清一統志總裁官六月考選科道命內閣閱卷公以從子中書舍人樹穀名在選中辭

上曰卿第往既進卷

上命樹穀以御史用公又奏曰臣備位大臣子弟不當復列臺省請遵例迴避

上又不允其冬副都御史許三禮因論尚書公并言公大臣不當使子弟列居要職公疏述前言

上不問也二十九年春

上以畿輔歲不登議賑濟公所薦御史李時謙條奏失旨公自引咎坐降二級留任時謙得不罪三月充

三朝國史總裁官先是

上南巡以江南浮糧太重幸蘇州時有

旨問戶部時公爲尙書卽考宋元以來舊額并察諸書所載官田民田始末及明時厯朝詔書以聞

上命行在諸臣議未定至是公在內閣

上復言江南浮糧公頓首曰

聖明及此三吳萬姓之福也因下九卿博議九卿有力持不可者議遂寢公素強無疾自留任史局殫精竭思卽一字句惟恐有未安必持擇再三疲劬不自休氣數逆微喘及筦機務領翰林晨入閣午入院未四鼓卽趨朝夜分猶不得寐自言我於公家事無他長惟不肯苟且而已然坐是精力益減矣會兩江總督傅臘塔有疏劾公公具疏辨且求罷上置督臣疏不問而允公以原官致仕公辭朝謝恩輕舟南下過臨清權闕者訶止之謂相君歸必有贏餘可構以罪登舟大索至醬甌之屬無不發視而公舟中衣服什器外惟圖書數千卷及光祿饌金三百而

已皆嘖嘖歎好官不置公在途感所遇山川人物詠懷風烈譏述歸賦  
以自廣然性素剛不堪摧辱氣益迎上不可止寢以成疾九月歸里闔  
門約飭惟謹嘗語子弟以

上恩惟勛以讀書立行不自悔而已一切有加者戒勿與校也然疾益  
甚辛未秋七月二十七日竟不起卒之夕家人見大星流至中天光迸  
散而公瞑矣時幾無以斂云公受

兩朝非常之遇誓以身報無毫髮計較趨避禍福利害之私其爲政惟  
在端澄本源風別清濁慎持大體過絕僥倖既恥夫苞苴問遺之風輒  
冰衿齒冷一不以自污而習見諂阿匱促訾嗟伊與夫選懦容頭過  
身者之不與家國事獨自奮以子然之蹤推排杖柱其間如高檝之不  
可動如鋒距之不可干以維挽積習沈溺之人心使之獨當知有  
君父而於其身之去留豈顧問哉古之君子出而任天下之重蹈危機  
長怨府不得久於其位者往往類然或罹於放斥之禍更有甚焉者公  
奉身而退以禮始終

主恩無絕缺之迹孤臣遂乞骸之請不可謂非遭逢之幸而歸田以後  
下之引繩批根者勢猶未已以不訾不疚之身悄悄告瘁天復奪之年

不獲優游化日長沐恩波爲

聖朝之遺老此海內無不摧傷而善類尤爲失氣者也是年冬

上詔諭天下有曰內外各官彼此傾軋伐異黨同私怨交尋牽連報復或意所銜恨而反囑人代糾陰爲主使或意所欲言而不明指其事巧

陷術中大哉

王言讀者咸悚息泣下而公已不及見矣悲夫公學惟爲己以躬行實踐爲務嘗立日省編每日輒記所行事及意念醇雜以自考驗事兩大人存歿以禮事兩兄克恭而撫季弟友愛備至妹適于陸早亡子其子經遠教之卒成名從父官汀州推官卒官公往迎其喪時靖南王耿繼茂慕公願一見奉二千金爲壽公曰我以喪我從父來也而可以貨取乎拒弗往見而歸篤於師友遇座主喪必設位慟哭踰三日乃入署同年編修無錫華亦祥卒京師負債家數千金公悉任之而趣其子以喪歸蒸二十餘年後債家猶時及公門也邑子韓藉琬謁公邸寓問其來故曰吾三世未葬將以醫於京師貴人得二百金吾事辦矣未幾卒於旅公方宴客罷會而哭之爲歸其喪而屬家人貸金付其家如其所欲之數不令齎志地下也公與尙書公俱好賓禮寒素獎誘後學桐城錢

澄之贈公詩曰君家兄弟交情古前輩風流今尙存庭館慣留高士榻  
生徒矜出大賢門然公性方嚴造次進退必以禮法雖燕居無惰容未  
嘗輕言笑三爵之後論古今事疊疊然無有一事謬誤少未愜必更審  
定乃畢其說侍側者竟席無敢歡昨咸謂尙書和易而公嚴毅也產不  
能逾中人而好施嘗與尙書公置倉於鄉如古之義社法以貸予貧民  
或不能償亦不問今負者猶累累也又置廣孝阡以瘞不能葬者蓋公  
恭敬桑梓厝意惟恐不及及家居市井黠者或從而搆扇凌侮一朝羸  
縮人情萬端尤可爲深痛也公無他嗜好獨喜購書皆自整比精好書  
法瘦硬入神見者藏弄所著書若干卷奏疏若干卷又明史藁及雜文  
若干卷嗚呼公之疏傳天下其皆知之矣而所爲詩藹然忠愛有古作  
者之性情焉千載而下可以知公之志也公娶於湯諸生傳楹女封夫  
人子二長卽樹聲次樹本丁卯科舉人孫一德符樹本出尙幼樹聲等  
以葬之不可不時卜於某縣某鄉之原惟墨食而窆以康熙某年某月  
某日衰經哭泣語甚古之撰行狀者將上之考功太常及史館編錄地  
也今先君不幸及于大故卽例不敢有謁于太常考功而史有傳隧有  
誌非狀莫徵以屬吾子葵辱收於公之門亦嘗備官於朝而衰庸無狀

親炙公卓卓立身大節本未退而自攻默有餘愧顧猶幸公謂可教不鄙棄執筆或可不辱公件繫排纒其事如右惟逸漏之是懼而不敢有一言之溢以失之誣以待太史氏與碑若銘所以直公於無窮者或有考于斯焉謹狀

又文華殿大學士戶部尚書掌翰林院事徐公神道碑

張玉書

公以康熙三十年閏七月庚辰終于崑山里第今年癸酉十二月某日卜葬公于某原惟是墓道之碑所以鐫勒功德者公伯兄司寇公以書來屬余謂余實與公遊最習不可以無辭余謝不敏久之乃爲敘曰公諱元文字公肅別號立齋九世祖諱良自常熟遷崑山家焉有諱申者明宏治間官刑部主事因言壽甯侯事杖謫湖州府推官申之曾孫諱應聘萬厯癸丑進士歷官太僕少卿公會祖也祖諱永美萬厯乙卯副貢生父諱開法恩貢生皆以公貴贈資政大夫經筵講官都察院左都御史其後又以伯兄推恩皆贈至刑部尚書公兄弟四人而公行第三與伯兄司寇仲兄中允年相次家塾講論友愛秩如敦尚行誼厭時俗翫敝倡興古學一時海內知名之士莫不傾慕爭相依歸者順治甲午舉鄉試己亥進士第一人傳臚畢

世祖召見乾清門諭以特簡之意還啟

太皇太后曰今歲得一佳狀元賜冠帶蟒服裘靴視舊典有加明日公率諸進士謝恩

世祖爲御殿百官倍列鴻臚讀表前此未有也除官翰林院修撰數被宣召嘗從幸南苑

賜乘御馬命學士折公庫納爲執鞭公辭以館師不敢乃改使侍衛又嘗晚對便殿夜分賜饌

世祖問從者得無飢乎卽使侍衛賜之食公賦詩紀恩一日同諸詞臣入見

命撰孚齋說孚齋

世祖讀書處也公文成

世祖覽之稱善命刻行之一日攜公至僧忞蕉園方丈問以釋氏書公謝不習

世祖亦不强之語曰此人大有見解狀元朕所親拔此朕一門生也忞及左右皆稽首賀及

世祖賓天公哭臨獨哀歲以國諱日齋居蔬食慘戚者終其身

今上嗣位會江南奏銷案起坐罍誤謫鑾儀衛經歷逾四年事白復職  
假歸丁外艱己酉起補國史院修撰陞秘書院侍讀陝西鄉試主考明  
年遷國子監祭酒充

經筵講官公音吐宏亮閒雅方重進講稱

旨自是每遇

經筵必命公講至登政府猶然公之在成均也慨學校廢弛毅然以師  
道自任疏請準順治間例令直省督學臣選拔諸生文行兼優者及復  
鄉試副榜貢生並起送入監以爲如此則辟雍多經明行修之士而入  
粟之士亦將有所興起得旨下部議行復請廣監生中式之額且力陳  
輸納之不可者有四章下所司納例自河工外得一切停止爲祭酒四  
年學政大飭後公在西臺

上語閣臣徐某爲祭酒規條嚴肅滿洲子弟不率教者必加撻責至今  
猶畏之後來那得如此人其爲

上見思如此十三年甲寅進內閣學士兼禮部侍郎充

太宗實錄副總裁乙卯四月改翰林院掌院學士兼官如故尋充日講  
官起居注癸丑教習庶吉士中允方讀書史館公辭不許而



特免中允教習公日與桐城今宗伯張公進講弘德殿敷陳凱切奉命屬諸詞臣分撰綱目講義公手自裁定及進呈疏有云伏祈聖聰時留省覽以此啟益睿知以此振厲精神則得之臣工之講論者淺而得之夙夜之體驗者深得之片言之會悟者微而得之一心之運用者大其隨事獻規發于誠愛多此類也丙辰充孝經衍義總裁武闡正主考是科武闡主考止改用二人值

車駕方出封

旨留閣中曰朕自與一好主考及發視乃公也尋丁內艱歸己未二月服未禫

特召監修明史學士充監修非故事也秋赴闕自陳且辭新命不允因疏請購遺書徵遺獻舉堪纂修者七人部議不允

上特從之時未有學士缺

上特改內閣學士項景襄爲兵部侍郎而用公公在內閣遇事敢言不肯媵嬰隨俗上下九卿會推江西按察使有舉張仲舉者御史唐朝彝力言仲舉在閩無善狀科道公疏劾朝彝副都御史李仙根給事中李宗孔不願署名遂并劾之部議當兩人降級朝彝革職

上曰此處分太過公奏會推本欲公之廷論今科道公疏必不許一人不列名者恐後來妄有抨擊隨聲附和流毒何窮

上曰當免處分公曰凡言免者謂有罪而

聖恩獨寬之也臣以爲三臣實未有罪

聖旨但云不必處分則所全多矣

上然之言官有請遣大臣巡方者公曰巡方向遣御史以有內臺彈壓耳今遣大臣若妄作威福適足爲地方之害

上是其言能不遣公感激

上遇益思自披瀝每隨閣臣於

上前陳奏取進止

上每問必具言本末務達己意乃止尤留意刑獄當秋決抱牘具陳所

宜決宜留者及他所條對甚悉

上多從焉超拜都察院左都御史入謝乾清門近侍傳

上語褒嘉且述講筵之勞賜

御書墨蹟三又傳

論朕久不作書頃試筆得鳶飛魚躍四大字并以賜卿公頓首謝尋復

充

經筵講官值滇南將定公疏陳善後之宜以爲與逆黨同惡者業許自新宜明布

恩旨悉爲湔除應補職者量與換補綠旗職銜願補伍者量行撥補綠旗缺伍其他一概散遣爲民分道安插於事體爲便又言滇南閩越所在橫罹藩虐占奪民利害政干紀宜及初定之辰申飭禁止在粵東者五日鹽準之害曰渡稅之害曰總店之害曰市舶之害曰魚課之害在閩地者四曰鹽稅之害曰報船之害曰冒擾驛夫之害曰牙行渡稅之害在滇南者四曰勦莊之害曰圈田之害曰礦廠之害曰兵多之害俱下九卿會議初御史劉安國請察隱占田畝州縣利其陞敘多捏報累民公力言其弊謂名爲加糧實耗糧戶名爲清弊實長弊源臣訪得山西蒲縣本貧瘠前令捏報派賠乃至庠生王命新曹大朋各賣其子女而廩生賈松竟自鬻于平陽軍營夫婦執役又聞山東棲霞縣民亦因賠累多致失業督撫旣其欺妄于前須爲之掩覆于後請明諭以從前之弊但行檢舉不復苛求若始終掩覆科罰有加上命確議以聞公謂安民在於察吏而察吏當自大吏始故條列督撫

四弊特糾福建督臣姚啟聖諸不法事啟聖故縱恣至是得旨惶恐上疏待罪得免又疏論課吏事定例凡捐納授官復職州縣到任三年後稱職者題陞不稱職者參處是凡捐納之人分別具題皆當以三年爲限今各督撫題參者概未之見至有受任四五年而糾舉不及莫能辨其賢不肖者謂非督撫之容徇不可也臣以爲宜依限分別去留卽行聞奏不得姑留不論不議之人以誤民生而滋奸弊又如戶部條例道府以下捐銀者三年後免其具題照常陞轉臣以爲稱職非可捐納而得也歲貢一項所謂正途自開捐納生員之例今日納生員明日卽納歲貢名則清流實則銅臭猶且自詡正途臣以爲正途非可捐納而得也總之捐納事例皆屬一時權宜臣願于收復滇南之日卽賜明旨概輟不行則聖政一新而人心可以大快矣公自爲祭酒時屢以捐納爲言至是益切云雲南平告

廟肆赦人情歡豫公獨上疏曰

皇上睿謨遠慮決勝萬里數年以來諸叛削平古者聖人作易於泰之方盛卽致艱貞之訓而豐豫旣濟諸卦垂誠尤切臣愚惟願皇上於景運方新之會倍切堯咨舜傲之心日慎一日以成保泰之治

兼

論大小臣工乘此治定功成相與洗心滌慮毗贊大業如政體宜講也  
不妨詳考舊章國用宜節也不宜過加綜核行一事必謀遠久勿狃目  
前之淺圖爲百姓必留有餘務培國家之元氣至於振紀綱以崇大體  
核名實以課吏功崇清議以定國是厲廉恥以正人心端教化以固治  
本抑營競以儆官邪敦節儉以厚風俗正名分以絕奸萌並當今急務  
願存震動恪恭之意力去因循苟且之習天下幸甚疏將上有以太直  
爲言者公不顧也嘗劾浙江副都統高國相藐法害民得

旨察審又劾兩淮巡鹽御史堪泰罷之二十二年春大計時藩臬舉卓  
異者太多公上言舊例藩臬入覲雖許條奏地方事宜然僅由通政司  
投遞引見一次辭朝卽行於述職之實猶有未盡請令面奏

皇上親加諮訪庶可知其才具之優劣并以見督撫所舉當否

上是公言至日親御乾清門科道官侍班通政司引藩臬官以次面奏  
著爲令明年有

詔藩臬勿舉卓異自公掌計典門不通謁常語人曰當考察時直省大  
吏皆長跪堂下自陳履歷其嚴重如此使少有所私豈不內愧於心耶

舊例入旗漢軍文職官員任漢缺者丁憂任旗缺者不得丁憂又滿州任督撫藩臬者俱守制如禮而京朝官三月後卽出供職公謂宜一體丁憂以崇孝道且言外官丁憂候代之非並申士庶居喪釋服從吉之禁皆報可劾候補御史蕭鳴鳳居喪挾妓久不同旗坐革職提問是年冬會推湖北按察使連舉山東人

上疑之問舉者爲誰或以公對公嘿不與辨遂鑄三級解任將歸有詔留公專領史局故事監修官不與編纂公以置史局五年書尙未就乃取各儒臣所著紀傳手自排纂通懷商榷丹黃常至夜分遂繕寫紀傳若干卷進呈

上因問纂修事宜公條對甚悉

上注視公良久旣而開館纂修一統志曰此事須徐家兄弟爲之於是公又爲副總裁二十七年二月尙書公自左都御史遷刑部

上難其代久之不補七月復還公故官兄弟相代受職人咸以爲榮入臺一月四上疏一申救臺綱舊例漢御史設有建言牌以次輪傳牌到逾半月必有建白今請如例舉行一論以白糖鹿皮興販臺灣爲失國體一論吏部知府缺多吏部延挨不補一劾兩淮巡鹽御史陶式玉貪

墨事多施行而式玉竟抵罪十二月遷尙書刑部旋改戶部四月之間  
驟歷三遷人知

上意將大用公矣公以戶部吏胥爲天下奸藪乃嚴立條約各衙門文  
到日錢糧應核算者卽與核算應放支者卽與放支一不假手吏胥公  
蒞事精敏操守清潔滿漢司皆懾服吏奸益無措手又諭十四司有事  
應說堂者須滿漢同時說堂便相商權斥逐各衙門役滿書吏卽召募  
試補部中數十年積弊一時肅清奉

命與滿洲大臣清理刑獄定例死罪減等者安插內地前此輒發遣烏  
龍江多不能存活公請仍照舊例發遣推廣

上恩

上可其奏二十八年五月拜文華殿大學士公以在部振刷方有次第  
卽詣乾清門力辭

上不允尋命兼掌翰林院事充

政治典訓

平定三逆方畧一統志總裁官二十九年春公前所薦用御史李時謙  
條對失

旨自引咎降二級留任時謙得不坐公素無病自留任史局殫精纂輯氣數逆微喘及入閣領翰林機務殷繁未四鼓趨朝退卽入院夜深猶不得寐坐是精力益減性剛不能自挫屈忍辱苟安欲引退者數矣會兩江總督有疏劾公公具疏力辨求去

上允公以原官致仕卽日辭朝輕舟沿河下臨清榷關者隸卒數十人登舟大索雖夫人舟中醬瓿之屬無不發視僅得圖書若干卷及光祿饌金三百兩而已皆嘖嘖歎清官不置是時公方倚舫作述歸賦以自廣然不堪摧辱氣益逆上咯血久不止歸不終歲竟卒年五十八歲公受知

世祖章皇帝始釋褐年少耳便有天下爲己任之意及遭

今上委畀之重誓捐軀命蹇蹇竭忠不爲利害禍福毫髮計兩總內臺凡事關入旗者人多畏避嘖嘖公必持之益力將軍馬哈達以民間多匿逃人請自勾攝不移有司公曰如此則以窩逃爲名輾轉折害民將不堪滿大臣曰當令將軍會同督撫行之公曰如此則仍將軍爲政若令督撫會同將軍猶可

上以公言爲是極言京師奸民窩販民間兒女官吏用印預給空契之



弊乞令官將本人親驗明白然後給契如此則窮民不致終罹陷奔八  
旗家人投水自縊刑部報聞者一歲中及千人公請下部議詳驗其有  
傷痕及一家中前後積至三人者酌定處分府部院寺筆帖式近三千  
人求開例捐納典州縣公不可大臣難之公曰諸公既不以爲然吾當  
獨爲一議不以相累也卒從公議而罷其以京察大計處分者規欲還  
職議亦不行既罷議侍郎項景襄留揖公曰微公則選人無復入仕之  
望矣晚年官逾貴戚戚如有憂者聞一正人進或  
朝廷行一善政則喜形於色人率以是覘之內行修潔苞苴問遺之使  
無及門者遇家人嚴整退食之暇匡坐讀書而已積書萬卷皆手自校  
讐卷帙率精好與後進常若不及與客議論古今終日無狎言侮色而  
門無雜賓晏如也處尙書中允伯仲間雖極盡和愛之道然恆以道義  
相規故其兄弟皆致通顯而海內之推重者以其文章風節不以其門  
閥之貴重也撫季弟某於弱齡陸氏姊亡養其子經遠爲己子俱有成  
名從父官汀州推官公往迎其喪時有願奉二千金求一見者公曰吾  
以叔父喪來而受金可乎卒不往公年纔弱冠魏科起家承  
兩朝知遇可謂盛矣而中間數經憂患或起或仆終預大政退不旋踵

公嘗自言吾在機密未得稍展反不能發舒如戶部時至於謠誅橫構  
齋志長往雖

皇上知公之深飾終之典有所待而同朝士大夫未嘗不歎其賢而惜  
其用之未究也悲夫公所為詩文有漢魏風致集若干卷藏于家元配  
湯封夫人子二樹聲太學生樹本舉人孫一德符銘曰

於維

章皇執道之紀天綱聿張濟濟多士有美徐公翩然其來聲中宮徵鳴  
時雖熙敷歷

兩朝斯文杓柄掌內外制茫寒色正公司成均名流雲集席間函丈教  
條斯立乃長西臺不振於威不顧其私秉德不回暨暨其容諮諮其辨  
糾違斥邪百辟為憲道有屈伸既張而弛史局之監爰自承旨  
皇曰公退無以公歸五年鉛槧闡幽顯微帝紀繕寫臣某恭進

天顏溫霽載承

明問曰朕亞相惟女克諧弟與兄代邦之榮懷浹歲三遷秋官司農口  
口口弊政是叢攘之剔之狐鼠屏迹釐之革之百廢其易  
帝嘉乃績其遂弼子朝士相賀民慶于閭厥猷未展遠自引退

皇朝十一

三

宸眷躊躇久而後遂寔修忍詬自古所歎公遭  
明聖非久考槃天不憖遺而以公殞年不稱德痛甯可忍豈其剛強抑  
有未忘哲人之萎流星煌煌遺愛在人歷時論定篆石于墓恭俟後命

碑傳集卷十三目錄

康熙朝宰輔下

光祿大夫武英殿大學士兼吏部尚書李文定公天馥墓誌銘 韓炎

光祿大夫文淵閣大學士兼吏部尚書諡文貞李公光地墓碣 楊名時


又故光祿大夫文淵閣大學士李文貞公事狀 彭紹升

又安溪李相國逸事 方苞

文淵閣大學士兼禮部尚書王公揆傳 錢大昕

又文淵閣大學士太倉王公傳 袁枚

又王相國傳 王昶



106-694

康熙朝宰輔下

光祿大夫武英殿大學士兼吏部尚書李文定公天馥墓誌銘

韓苑

康熙三十八年十月大學士合肥李公薨於位遺疏聞

上震悼命大臣侍衛至邸第奠茶酒禮臣舉卹典閣臣議諡法翰林院

撰代言之文以祭以疏其生平立朝行己之大者著之碑先是公寢疾

上自塞外聞之曰何不早奏即遣學士問所苦賜禁方上藥

諭御醫用心調理曰視朝畢輒問病勢減已否蓋

上臨御久嘗屢易執政諸大臣深惟政本之地為治化樞恆難慎其人

試公者歷有年所益信其可大任而公入閣未期月即以憂去

上特虛席以遲其來公益慎乃位屬海內又安持大體不求赫赫名惟

清靜和平與師師百僚化紛更異同之迹歸于無事以仰稱

聖天子休息愛養元元含宏廣大之至意中外食隱然之福無窮在位

五年善始善終而羣情猶以年之不長不獲究其始為辭以納諸墓謹敘

行孤子編修爭青以狀泣請於其長門下士韓公為辭以納諸墓謹敘

以銘敘曰公諱天馥字湘北號容齋先世湖廣黃岡人遷於廬者爲始  
祖諱英洪武初以軍功授世襲廬州衛指揮僉事因家焉七傳至公曾  
祖諱應元祖諱長庚父諱萬化皆以公貴贈光祿大夫武英殿大學士  
兼吏部尚書累世雖高勳世胄皆好讀書公父初補諸生尋襲衛職  
本朝初以都司督上江漕務愛寶游重然諧生三子公長也次天爵天  
爵公自少穎異七歲能詩稱神童明季流寇剽掠江淮間合肥被陷公  
隨兩大人倉皇避難手一卷不暫釋未及弱年誦四庫全書殆徧始公  
家有別子占衛籍永城故公卽以其籍登順治丁酉鄉薦明年成進士  
選翰林庶吉士在館益博聞約說縱橫演迤於經史百家蓋經世之學  
基此矣辛丑授檢討冬奉嫡母張夫人諱歸里服除補故官康熙戊辰  
復以父憂去辛亥陞司業迎養生母翟太夫人邸中每陞侍講侍讀充  
日講起居注官歷講讀學士至少詹事丁巳陞內閣學士兼禮部侍郎  
上前每有所見必陳無隱多見從辛酉陞戶部左侍郎部故利藪有以  
苞苴謁者公拒之曰吾一日在部汝曹無望茲事之行也皆動色縮手  
相戒甲子調吏部尤以揚清激濁爲己任公在戶部四年吏部五年而  
一無私焉

上自是器公益深矣未幾陞工部尚書轉刑兵二部尚書辛未遷長吏部曹司吏素不便于公者畏公之復來而選人稔聞公名則喜甚公逐吏之尤黠者以便選人而部復爲之一清云時當補大學士已逾年一

日  
上諭滿漢諸大臣曰機務重任必不可用喜事之人朕觀李天馥老成清慎學行俱佳朕知其決不生事遂以命公壬申十月也次年六月翟

太夫人薨

上諭諸大臣李天馥入閣未久倚毗方殷未及展施遽爾回籍深軫朕

懷遂賜

御書貞松二大字兼賜以手卷云儒者當學探本原行迪醇茂循序進

德守己沖虛一言一動罔有不謹嘉謨嘉猷必以入告斯廣譽翕聞爲

周行之士蓋緣公之所已能益屬望其加勉也行後一日

上曰李天馥侍朕三十餘年未嘗有過三年易過此官不必補人及服

將除卽

召起公公感

上知之深益退然若不自勝措其身於一言一動無過之地如



聖明之詔誠而宰物應機要皆以虛公處之長官百司各安其職一不以己與威福歸之于朝而毀譽不出諸其口同列咸服其和敬而小大共樂其寬雅也

上三征朔漠還兵革甫息公尤以甯民之道可也在簡欲變法不如守法欲救弊未必無弊奉行故事惟謹不敢失尺寸此乃所以報也昔宋李文靖公爲相眞宗問治道何先對曰不用浮薄喜事之人此最爲先文靖又嘗言居重位寔無補惟中外所陳利害一切報罷之朝廷防制纖悉備具或徇所陳請施行一事卽多所傷所謂庸人擾之是已公之深慮遠識蓋絕類

上之器重公以此然文靖在位未久公年亦不甚過之平格之老不壽於天痛矣夫公旣歿

上特賜諡文定按諡法安民大慮曰定公之不喜事所以安民也人咸以受大名爲當云公性至孝先是張夫人之喪毀甚杖而後起及贈公歿亦如之有終身不逮養之悲而程太夫人之喪歸當取道巢湖西口時冬月水涸及舟至水驟湧數尺如送喪者舟過卽落如故旣葬廬於墓側手植松楸晨昏禮謁淚血沾漬墓門忽有白燕雙飛掠水而至呢

喃上下久之不去人咸以為孝感遂名公所居為白燕廬遠近皆歌而和之友愛二弟白首無間尤好為德于鄉自廬募後窮民歸之遂成村落當歲旱苗將槁公為壇墓前三日齋以禱於天方蒲伏雨大作及秋忽飛蝗蔽天皆驚恐公復禱如前未幾蝗盡去鄉民咸德之公歿而哭之者眾久益不忘也公在位尤篤於人物如李翰林因篤趙參政進美秦檢討松齡等公為學士時薦以應博學宏詞科者也陸御史龍其邵參議嗣堯今巡撫彭公鵬公為吏部所汲引以洊至大官為名臣者也下至單門寒俊聞聲相思惟恐其不登用有名章迥句輒流連歎詠不置蓋汲汲于以人事君其心好之誠而非有強也公所活人尤眾為學士時冬月斷囚嘗請生其死者知縣李方廣當死公曰其人素有才名得緩不死尋以赦免又有殺人抵罪者公獨言乃仇人先折其父足為父報仇可赦也遂得減等兵興民多被俘贖而歸之者嘗數百人在刑部有縣令負官錢數萬產盡應赦而吏持之急公至即與寬免以釋其子孫之係累者念囚多瘐死為庀屋材多為之所別罪之輕重以居囚至今德之又有大獄下部議者皆曰應死公察其冤獨議曰不當死上竟從公議也始在翰林名籍甚雅以文章為己任諸號為文家率後

先倡和而尤與葉文敏公及今尚書澤州陳公新城王公倡復古學刊  
落僞體每朝罷讌遊或闔戶吟賞儵然如林下人一篇出好事者爭傳  
諷既居相位雅不以自多不復有狎主宗盟之豪氣而望其容貌習之  
于語默動靜之間其風神局度使人意消皆書卷之所積而然也所傳  
有編年詩容齋千首詩詩餘其古文制誥諸集將次第行世公生於有  
明崇禎十年正月二十四日薨於康熙三十八年十月十五日年六十  
五夫人李氏指揮同知諱兆生女繼張氏贈封皆一品夫人子二長編  
修孚青也康熙己未進士孚蒼己卯舉人女五適字皆名族孫三人昉  
楸貢生昉琳昉琴尙幼孚青等舉公之喪以某年某月某日葬於某鄉  
某原焚事公于國子後數侍後堂之末不敢以不文卻孤之請而公之  
事不勝書深懼概而弗詳然勿敢誣且溢又生平奉公之教甚多皆可  
書之大帶憶公貳吏部時焚以學士與廷議遇事有不平者不禁形於  
辭色公微笑謂焚君何至是凡事平其氣而可也僕初亦爾後漸熟漸  
平也焚退而尋味不已而變化之爲難未嘗不有媿於公言銘曰  
金斗六星其五主廬靈和篤公叶贊斗樞少也稽古經神學府游更常  
伯登爲碩輔薄伐既定簧鼓竿吹不吐不茹公相以詩官刑政典有條

秋如遵道遵路公相以書壯不如罔賁不如白何慮何思公相以易運於無跡宰而不尸一龍一蛇一張一弛

帝深用嘉長倚丞弼竭不愆遺三能坼一有煒玉管紀諸細編載錫絲言揭茲新阡稷契臯陶讀書不息譯如扇如於斯長畢過者下馬痛者回車鶴歸燕來占復其初

光祿大夫文淵閣大學士兼吏部尚書諡文貞李公光地幕碣楊名時

先生諱光地字晉卿號厚菴生安溪之湖頭鄉代有明德考惟念公懋於孝而篤信正學不回於時先生幼而神穎五歲從師授讀未嘗一啟齒發聲試之輒已成誦不失一字善屬對矢口驚人塾師謝弗能教也

十三陷山賊中屢瀕於危百日而脫逮於成童泊然無所嗜好有類意思居若忘行若遺眞靜之極與神明通常寢息危樓午夜而天風震盪四窗洞開欲見日麗景明之象心精所啟靈貺昭焉嗣是發高堅竭才

鑽仰積旬捐寢神勇蹶生以濂洛關閩爲門徑以六經四子爲依歸務造於知性達天不得不止會邁嚴親篤疾憂思徬徨衣不解結每中宵閱寂則默致籲禱一夕夢神庭吏語之曰君父實居陰隲首紀算尚二

十年以籍與觀而寤已果霍然庚戌登第後由庶吉上授編修癸丑充

會試同考乞假歸省踰數月耿孽將爲亂僞以

朝命召至福州及接語頗見憚竟不敢明言他志也先生察其有異因

以親老且病辭歸越日而封公促視疾之手信至持之以懇孽知終不

爲用遂聽之歸旣而山海間羣賊並興姦徒多通賊以相煽脅先生避

居深山畫之所游夜輒易處顧畏周防不遑甯息封公伸大義以敦勉

族人一時家庭間効忠思奮者得數人焉執姦徒尤黠者屏之於遠

志乃定爰遣人自問道上蠟丸書陳破賊策

上動容嘉歎超遷侍讀學士會丁父艱里居白巾賊亂圍安溪城旬餉

募士扼絕糧道賊遂潰散戊午鄭氏圍泉州爰南北分出請師各遣人

爲導率鄉里具牛酒饋勞圍解郡屬之陷者悉平事

聞晉秩學士是時先生於戎事倥傯居喪毀瘠之餘讀書味道極慮通

微習坎而得心亨見幾不俟終日思若啟之行若翼之直有沛乎莫禦

幾非在我者服闋奉母趨朝入直論事

上憫海氛不靖思拯民於塗炭

顧問及之因極陳其可平狀及命帥機宜深見契納尅日底功壬戌送

母歸三年復入改翰林學士掌教習事充

經筵日講官丁卯以母病乞歸省先生之在官也公忠易直論人言事無所依回一不掩其是非之實每論及科場請託之弊以爲植私廢公壞人品傷風化莫此爲尤採虛聲與受賄屬厥罪均爾蓋培人才端士習尤素心所倦倦也時先生屢因省事請歸不無淡於榮祿之跡自戊辰赴

太皇太后之喪而後惴惴滋恭遂不遑陳情將母矣己巳改通政使冬遷兵部侍郎出納獻替朝士奉爲矜式辛未會試充副考官振雅還醇文體於數科爲盛甲戌督學畿輔旋以母艱解任守制京師先生於易夙有神契而觀玩之功於斯爲至丙子服闋以原銜仍視學政手評先民制藝及古文精采者以廣所見而示之的能背誦經古文小學者優拔之期月而士風蒸變卽任補工部侍郎尋改兵部巡撫畿封爲治不立赫赫之名一唯節儉簡易正己率物因時之宜循事之序故法立而人易遵察寮吏飭戎伍俾潔清者勸嫺練者升水利農田食貨諸政靡不綢繆未然規厥經久於折獄尤盡心焉遇大事必請命而後行凡薦人則慎密而不用用無專美居功之咎而忠信獲伸計自爲督學巡撫以來先生之學行政事孚於士民信於寮友

上知之曰深任之曰重

諭言之褒嘉尙方之寵錫稠疊便蕃逾於常格矣癸未就任陞吏部尙書乙酉

召拜文淵閣大學士時海內乂安唯以尊經勸學仰佐休明敷奏因時要在滋培元氣宣導仁風而已平時以淡泊明素志以正直率羣僚朝野胥倚重焉己丑充會試正考官闈中以過勞嬰疾不稍自惜壬辰續修朱子全書癸巳承纂周易折中既成

詔頒行天下天德王道之精蘊畢具折中一書非

聖學妙契象數之宗不能修而明之非先生深通理數之原不能贊而成之也先生以天授明膚之姿覃思經義積六十年精融渾化自漢唐來未有儔匹所著學庸語孟解毛詩所向書洪範諸篇之說及所纂周程邵張朱子等編無非根極性命開關啟鑰之書所論數律算術皆洞徹原本貫穿古今一一可施於實用利賴無窮焉蓋其學誠明並進敬義夾持道器德藝兼資互養凡見於文章著述言行政教者無非潛修默證脍膾乎仁孝忠愛之符詣益崇而心益虛業彌廣而守彌約斯所以年及耄而清明若神一息存而仔肩非懈者歟乙未秋承纂性理精

義竣懇致仕

許假二年懸缺以待陛辭之辰

恩禮優至家居一載

累旨敦速歸朝丁酉秋詣熱河覲請力陳衰老乞休遇

慈聖升遐安奉

山陵具疏未上宿疾驟作以戊戌五月二十八日考終

賜第正寢歿曰吾甯陟相在側魂氣無不之而精爽與古之賢聖爲徒矣先生平生無上人之色無加人之言雖遇事而怒而詞氣雍容不改其常與人交皆契闊終始不念舊惡政府同官以及僚吏聞訃無不愴涕者居恆言可爲訓動可爲型解感授業其應無方不瀆不倦及夫披示本根拔除積痼往往一席之語令人立躋高明是以溘傳捐館及門誠服之士喪先生如喪父焉遺疏至熱河

上覽之震悼

命皇子臨奠工部尚書徐元夢回京治喪事

賜賻銀千兩諡曰文貞夫人林氏子四人孫八人曾孫二人奉

諭旨以某年某月某日葬於某里某原小子不文謹敢誌先生之學行



爵里俾仰止哲人者登斯邱得以覽焉

又故光祿大夫文淵閣大學士李文貞公事狀 彭繼升

公諱光地字晉卿福建安溪人祖諱先春義俠聞鄉里父諱兆慶明諸  
生天秉忠孝以禮法教於其家順治十二年避難山砦中全家十二人  
被賊虜獨己得脫其兄日燦自遠來慷慨詣賊乞釋此十二人賊義之  
具飲食慰遣然故弗釋也明年夏日燦募壯卒合家僮百人夜緣山背  
上路峭險登者才二十八人吹螺劫賊帳會天大霧不辨眾寡賊大驚  
奔竄出其季弟弟子二人餘繫它山不能得賊徵其黨萬餘來日燦用  
百餘人守險日與賊自夏至秋大小百餘合賊散走盡十人者先後歸  
而公與其弟實殿公少好學為文守先輩法度康熙三年試策論舉於  
鄉九年成進士改庶吉士授編修十二年充會試同考官尋乞假歸十  
三年耿精忠反海賊鄭錦亦入踞泉州公奉親逃匿山谷間錦與精忠  
竝遣人招之公以死固拒十四年五月密疏陳破賊機宜言閩疆編小  
糧稅稀薄自二賊割據以來誅求鞭扑民力已盡賊勢亦窮南來大兵  
宜以急攻為主不可假以歲月恐生他變方今耿逆悉力於仙霞杉關  
鄭賊亦并命于漳潮之界惟汀州小路與贛州接壤處賊所置守禦不

過千百疲卒竊聞大兵分道南來皆于賊兵多處盡力鏖戰而不知出奇以擣其虛此計之失也宜因賊防之疏選精兵萬人或五六千人詐爲入廣之兵由贛達汀爲程七八日耳二賊聞急趨救非月餘不至則我兵入閩久矣賊方悉兵外拒內地空虛大軍果從小路橫貫其腹則三路之賊不戰自潰伏乞

密敕領兵官偵諜虛實隨機進取仍恐小路崎嶇更使鄉兵在大軍之前步兵又在馬兵之前庶幾萬全可以必勝置疏蠟丸中遣家僕夏澤問道出杉關赴京因內閣學士富鴻基上之奏入

聖祖諭內閣諸臣嘉公忠下兵部錄其疏令領兵王大臣知之時廣東叛亂大兵防守贛州南安未能入閩會康親王自衢州克仙霞關復建甯延平精忠降康親王駐師福州令都統喇哈達賴塔等進剿海賊竝訪問公十六年正月喇哈達復泉州知公離安溪縣七十里結寨而居遣人往宣

上諭公就見喇哈達于漳州軍營喇哈達白之康親王王疏言光地矢志爲

國顛沛不渝宜予表揚下部議敘授侍讀學士行至福州丁父憂歸十

七年閏三月同安賊蔡寅結眾萬餘掠安溪公募鄉兵百餘人扼險拒守戒諸鄉毋資賊糧賊飢解去六月鄭錦遣偽總統劉國軒等陷海澄漳平同安惠安諸縣犯泉州斷萬安江東二橋南北援絕泉人洵懼公請善泅者從水關入令堅守待援兵時喇哈達駐漳州公遣使告急值江水漲道阻乃導之由漳平安溪小路公叔父日成率鄉兵百餘度石珠嶺闢荆棘架木爲橋以濟公出迎十里外具糧餉牽牲牢以犒軍又使弟光埏光垠以鄉兵千度白鶴嶺迎巡撫吳興祚軍于永春大兵達泉州大破賊賊走入海喇哈達上其功再下部議敘遷翰林學士公上疏推功將帥辭

新命不允十九年八月至京授內閣學士因面對言鄭錦已死子克塽幼弱部下爭權宜急取之又言內大臣施琅習海上形勢知兵可重任聖祖用公言卒平臺灣復具疏言原任編修陳夢雷雖陷賊中託病支吾受臣密約隱圖反正宜賞其從逆之辜已而法司坐夢雷斬詔從寬免死閏八月

聖祖御乾清門命公奏進家居所著文字公彙其讀書筆錄及論學文字爲一卷敘而

進之其言曰臣惟學之繫于天下大矣古之言學者自說命始其所謂多聞學古時敏遜志與夫教學相長始終克念皆後世聰明才智之士所不屑道而彼以天縱之君帝賚之佐孳孳相勉若不及是以君則繼成湯嘉靖于殷國臣則與阿衡媲美于有商學之切于治道如此古今言學者莫不曰帝王之學與儒生異臣以爲不然夫溺于技藝滯于章句以華藻爲美以涉獵相高豈獨帝王哉雖儒生非所向也若夫窮性命之原研精微之歸究六經之指周當世之務則豈特儒者所宜用心帝王之學何以加茲蓋高宗所謂恭默以思者性命之原精微之歸也其所謂學而有獲者經訓之旨也其所謂監而罔愆者當世之務也此古今言學之宗亦古今爲學之準也肆我

我  
皇上天挺其姿神授之識生知乃復好古將聖而又多能其潛思實體朝講夕誦非堯舜之道不陳于前非天人性命之書不游于意臣竊謂皇上非漢唐以後之學唐虞三代之學也臣窮海末儒蔽于聰明局于聞見四十無聞沒身爲耻今太陽之下燭火益微抱卷趨隕越無地然臣之學則仰體

皇上之學也近不敢背于程朱遠不敢違于孔孟誦師說守章句佩服  
儒者屏棄異端則一卷之中或可以見區區之志焉臣又觀道之與治  
古者出于一後世出于二孟子敘堯舜以來至于文王率五百年而統  
一續此道與治之出于一者也自孔子後五百年而至建武建武五百  
年而至貞觀貞觀五百年而至南渡夫東漢風俗一變至道貞觀治效  
幾于成康然律以純王不能無愧孔子之生東遷朱子之生南渡天蓋  
付以斯道而時不逢此道與治之出于二者也自朱子以來至我  
皇上又五百年應王者之期躬聖賢之學天其殆將復啟堯舜之運而  
道與治之統復合乎伏惟

皇上承天之命任斯道之統以升于大猷臣雖無知或者得依附末光  
而聞大道之要臣不勝拳拳二十一年乞假送母回里二十五年至京  
補前官尋授翰林院掌院學士充日講起居注官兼  
經筵講官二十六年

命教習庶吉士復以母病乞歸省

命懸缺以待二十七年四月至京時值

孝莊文皇后喪禮部劾公在途遷延弗及叩謁

梓宮請下吏部議議降五級得

旨勿問初公嘗奏侍讀學士德格勒有學行善占易而德格勒亦稱公兼文武才宜膺封疆重寄會天旱

聖祖命德格勒撰著因面論大學士明珠過失明珠聞而大惡之尋有言德格勒與其同官誹議朝政

聖祖召試諸廷臣德格勒以文劣削五級留任尋又以私抹起居注爲掌院學士庫呼訥所劾下刑部論梟有

旨以前奏詰公公引舉乞處分

聖祖原之九月充武會試正考官二十八年五月改通政使十二月擢兵部右侍郎三十年二月充會試副考官九月偕侍郎博壽徐廷璽原任河道總督靳輔往江南視河工明年正月繪圖還奏三十三年正月

提督順天學政四月聞母喪有

旨令在任守制公請給假九月回籍治喪不允給事中彭鵬劾公忘親貪位請令解任俾在京守制下九卿議如鵬請三十五年服闋仍督順天學政三十六年遷工部左侍郎督學政如故三十七年十月授直隸巡撫公在官以清勤自厲卹民之隱尤盡心于農田水利三十八年二

月

詔以漳水與滹沱合易汎濫其導漳河由運達海以分滹沱之勢公疏  
首漳河見分爲三支自大名經魏元城至山東館陶入衛歸運一支  
名老漳河自山東邱縣經南宮及青縣與完固口合至鮑家嘴歸運一  
支名小漳河自邱縣經廣宗鉅鹿合于滏又經東鹿冀州合于滹沱由  
衡水至完固口復分爲兩支小支與老漳河合流而歸運大支經河間  
大城靜海入于牙河而歸淀今入衛之河與老漳河流淺而弱應量加  
疏濬其完固小支應築壩逼水入河以達之運更于靜海閘留二莊挑  
河築堤束水歸淀俾無汎濫

報可次第訖工因奏霸州永清宛平良鄉固安高陽獻濟新河占民田  
一百三十九頃請豁其賦額從之三十九年

聖祖以子牙河屢汎濫自河間以北靜海以南皆被害遂親臨相視發  
帑金

命公于獻河東西兩岸築長堤西接大城東接靜海互二百餘里又于  
廣福樓之焦家口開新河引水入淀由是下流益暢無水災其年七月  
公以隄工旣成請開諸州縣水田引漳滏漳沱大陸諸水資灌溉薦管

河同知許天馥爲河間知府司其役從之畿屬故有八旂牧地與民田相錯歲久民多占牧爲田方奉部謀按驗公令民自首者按則輸糧而免其隱漏舉其棄地願耕者聽民便之明年修永定河工自郭家務至柳岔口開河築隄四十一年八月飭所屬州縣廣興水利近山者導泉通溝近河者引流醜渠去水遠者鑿井溉田其水道應修濬者俱聽借帑興工四十二年四月下

詔褒美擢吏部尙書巡撫如故是年冬以畿輔被水請發倉賑貸命富人出粟平糶明年三月給事中黃鼎楫湯右曾許志進宋駿業王原等合疏劾公撫綏無術致河間飢民散入京城又以甯津縣被災甚重而去年竟不報災請嚴加處分疏下公回奏公言甯津知縣陳大經報災不時業經劾罷至民有流離臣不敢辭咎再疏乞從重處分

詔竝原之四十四年十一月授文淵閣大學士

召還時

聖祖臨御久日潛心六藝之文河圖象數之學下逮濂洛關閩之書旁及厯算聲音之道反覆研索由原達流公固篤信程朱因以上窺義文之祕所奏進文字發舒心得



聖祖未嘗不稱善凡

御定諸書多委公參定中有滑隴往復陳請不倦故最後

聖祖詔廷臣言知光地者莫若朕知朕者亦莫若光地矣烏呼豈不榮哉然公自初在朝卽中立畏遠權勢其後位益高忌者益眾凡公所稱薦多見排擠因以撼公公恐啟門戶之禍益慎重寡言其有獻納罕見于奏章獨與公共事內廷者時能道之

聖祖嘗召編修沈宗敬至

命作行楷書因傳諭公曰朕初學書宗敬之父荃實侍每下筆卽指其失兼析所由至今每作書未嘗不思荃之勤也公對曰此卽成湯改過不吝之心也苟自是而惡直言則無由自鏡矣進對時

聖祖問近日民情若何公言方三藩播亂民心搖搖未知所歸今

上恩德信于天下矣往歲閩中旱荒羣吏不能宣

上德所在發帑粟多乾沒民飢且死獨歸怨于有司耳時有開礦者大

豪多輦金京師謀首事

聖祖以問公公對言開礦以食飢民無不可請著令許土著貧民人持一銚以往而越境者誅則姦人不致屯聚山澤以釀亂議遂定公于當

世人材賢不肖往往直言無隱江甯知府陳鵬年為總督阿山所劾問重辟公言其冤鵬年遂

召入兩江總督噶禮與巡撫張伯行互糾遣大臣往訊獄久不決而詔罷噶禮復伯行官公有助焉桐城貢土方苞坐戴名世南山集序論

聖祖一日言汪憲死無能古文者公曰唯戴名世案內方苞能已而苞

得釋

召入南書房公之護惜善類啟迪

聖聰多此類也四十八年充會試正考官五十年以疾乞休辭甚切

報曰覽卿奏朕心慘然想當時舊臣如卿等者不過一二人今朕亦老

矣實不忍言也五十四年六月再疏乞休且以母喪未葬為言

詔許假二年

賜詩寵其行明年三月

詔促公以是冬赴京且云南方暑溼善自保荔枝性極熱毋多喫也五

十六年四月至京明年正月內閣議上

孝惠章皇后諡疏中有闕字部議降三級

詔勿問先後三具摺以老病乞休

聖祖以大學士王揆在告俟其還具疏請五月卒子官年七十有七

駕在熱河下

詔憫悼遺恆親王率內大臣侍衛翼茶酒

賜銀一千兩令工部尚書徐元夢護其喪

子祭葬諡曰文貞雍正元年贈太子太傅公平生釋經之書甚具其言

曰蔑訓詰者無師滯章句者無得故學莫先于能擇矣其于程朱之說

時有同異論大學宜還古本而以知本為格物第一義易兼綜象數禮

兼采大戴記論子雲仲淹書有格言節取焉可也康節象山所造高明

慎師焉可也知言者以為然公門下士楊名時陳鵬年冉覲祖蔡世遠

竝以德望重于時它如張昺張瑗惠士奇秦道然王蘭生何焯莊亨陽

之徒類有清節通經能文章故

本朝諸名公稱善育材者必以公為首焉

又安溪李相國逸事

方苞

康熙己亥秋九月余臥疾塞上有客來省言及故相國安溪李公極詆  
之余無言語並侵余嗟乎君子之行身固難而遭遇益有幸有不幸也

憶癸巳夏四月余出獄供奉

南書房一月

上召編修沈宗敬至命作大小行楷日下舖內侍李玉傳

諭安溪公曰朕初學書宗敬之父荃實侍每下筆即指其病兼析所由

至于今每作書未嘗不思荃之勤也公因奏對曰此即成湯改過不吝

之心也苟自是而惡直言則無由自鏡矣時

上臨御天下已五十年英明果斷自內閣九卿臺諫皆受成事未敢特

建一言惟公能因事設辭以移

上意故

上委心焉每內閣奏事畢獨留公

南書房暇則

召入便殿語移時是日公晨入

上諮及民情公對曰方三藩播亂民心搖搖未知所歸今

上恩德顯信于天下矣往歲閩中旱荒郡吏不能體

上意所發帑粟多乾沒民飢且死獨歸怨于所司而鮮不信

上之志在於恤者嗣問礦事對曰今議開礦以甦民困請著令止土著

貧民無產業職事者許人持一銚而越境者有誅則姦民不致聚徒山澤以生事端矣議遂定一時大豪輦金謀首事者皆齧指自悔先是江甯太守陳鵬年爲大府所劾吏議當大辟無何

上問江督公對曰當官勤敏無害其犯清議獨劾陳鵬年一事耳戴名世以南山集下獄

上震怒吏議身磔族夷集中挂名者皆死他日

上言自汪霽死無能占文者公曰惟戴名世案內方苞能叩其次卽以

名世對左右問者無不代公股栗而

上亦不以此罪公江督鳴禮與巡撫張伯行互糾獄辭久不決

上忽罷鳴禮尋孳戮焉公實贊之其語秘世莫能詳以余所聞見如此

公之設心豈猶夫世之容悅者與然自公在位時眾多誚公既歿詆訐

尤甚蓋由三藩播亂時公適家居以蠟丸獻入閩策賊平以編修擢內

閣學士忌者遂謂公始固有貳心公恐爲門戶之禍故不能無所委蛇

及得

君旣專常閉門謝客所往還及顯然薦達者無多人由是眾皆深怨引繩批根播揚于遠邇然公方柄用時朝夕入對

上所識度惟尚書周易及朱子之書而一時海內所號為廉吏無論公所習與否皆得安於其位則其實迹固有可按驗者自公告歸而忌者首攻公所薦舉以為傾公之地因揚言公恃

上恩植黨以要權重微

上信公之深禍且不測矣故公再入專務韜默及踰年身歿

上出前後三章付內閣然後知公始至即出苦言以求退也嗚呼公之

設心如此其於時事無所補救而得諉乃過于恆人此古之君子所以難于用世而深拒夫枉尺直尋之議也夫

謹案原編有飭廣積貯牒請嚴定承審命案處分疏五祀禮略家廟祭享禮略小宗家祭禮略戒子孫文飭興水利牒漳河分流疏

八首已見經世文編今不錄

文淵閣大學士兼禮部尚書王公揆傳錢大昕

公諱揆字藻儒號顓庵太倉州人明建極殿大學士文肅公錫爵之曾孫翰林院編修衡之孫太常寺少卿時敏之第八子也年十七補博士弟子康熙丙午舉于鄉庚戌成進士選庶吉士孝感熊文端公為館師特器重公與歸安孫編修在豐有雙珠之目散館授翰林院編修乞假

歸省丁生母沈太夫人憂服闋還朝主乙卯山東鄉試遷左春坊左贊善乞假歸居太常憂喪葬如禮服闋補右贊善充日講起居注官

上以江浙人文之地提學道不得人改用翰林官令九卿會舉由是吉水李公振裕破

命視學江南而公得浙江取士公明浙人有窮通翁之謠言所取皆寒士宿學而能文者也報滿擢翰林院侍講三轉至侍讀學士庚午主順天鄉試超遷內閣學士甲戌殿試充讀卷官音吐闕朗

上傾聽不倦及館選日

上御保和殿故事惟大學士侍殿上餘皆立階下

特命公與同直學士三人入侍咨詢人才後遂以為例遷戶部侍郎充經筵講官時西安大同開捐例因緣為姦者多公防檢有方胥蠹斂手筦寶泉局不名一錢轉吏部侍郎首禁臨選駁查臨掣買籤之弊某織造之弟以賄得南海令公扣其缺曰法自近始吾不能觀法徇勢要也江南十府糧道缺出有候補監司武國愷者欲得之議官時人多屬意於武公曰此陞缺非選缺也班次一紊後即為例繫一人者小繫銓政者大力持不可抵暮武以千金餽公且訂後效磨而去之故香山令張

令憲父子死賊難

朝廷追卹子蔭承蔭者其長孫進也年滿各部議歷年太久恐有假冒格不行公昌言曰令憲父子以兩命博一蔭今以年久黜之教忠之謂何乃與尙書澤州陳公侍郎崑山徐公別議以上卒從公等議御史鄭惟孜以科場浮議多出太學疏請監生就試本省毋留京師九卿初不然其說惟孜再疏堅執眾無以難公曰太學之設三代以來未之或廢奈何以一時流弊舉與賢育才之地而空之乎鄭議竟寢遷刑部尙書先是各司定讞不錄漢供公言

本朝官制兼設滿漢欲其彼此參酌今供詞俱非漢語是非曲直漢司官何由知之若隨聲畫諾漢官便爲虛設矣令嗣後錄供兼滿漢稿永爲例是時州縣奸民多撫細事赴部控訴公言

朝廷設官有體惟元惡大愆司寇行法其餘皆有司之事非可越俎而代也或虞旗人非州縣能制則現設理事官上之督撫監司亦足彈壓何至千百里外拘繫對簿大者淹斃牢狴小者失業破家而所爭止於薄物細故非欽恤制刑之意也乃請禁止改工部尙書轉兵部又轉禮部公任事日久徧歷六曹每莅官必告同事曰某於公事知無不言言



斷不盡言之而聽固善不聽必愚見之誤也亦不敢固執然此爲事介  
兩可者言也若確見其失萬不可假借者諸公自爲之某不能唯唯聽  
命也同列皆敬重公事有不決俟公一言乃定是時士子以

上六十萬壽請開

恩科事下禮部同列以舊例所無難之公曰以萬年之

聖主當六旬之大慶此豈有成例可援乎若以糜費爲嫌則民間家長  
生日子孫僮僕尙不惜出所有招集賓客矧富有四海而區區計及於  
此遂如所請以上立

命舉行公在翰林已負公輔之望及爲六卿眷注益渥天下皆謂公旦  
暮入相而公回翔喉舌之地垂二十年淡泊恬退夷險一節

上益以賢公康熙五十一年拜文淵閣大學士兼禮部尙書仍兼

經筵講官閣臣例不兼

經筵公在講幄久敷陳得體特有是命

國朝大學士兼

經筵者惟崑山桐城澤州及公而四通州增置倉廩科臣奏請開捐下  
內閣九卿議公與安溪李文貞公皆不畫題而極陳捐納之弊云臣每

見鄉里童騃一旦捐資儼然民上或分一縣之符或擁一道之節朝章國故從未經心官箴民隱何曾注念不惟濫傷名器亦且爲累地方宜禁止以塞僥倖之路杜言利之門

侍諭所奏深合朕心飭九卿再議明年八月主禮部會試其冬以疾請解閣務

御批卿但安心調養朕同事老臣漸少實不忍言明年春病稍愈卽入直得

旨再加調養不必每日到閣五十七年

孝惠皇太后升祔議者以

孝康皇太后升祔已久欲位其次公曰

皇上聖孝格天曩者

太皇太后祔廟時不以躋

孝端之上今肯以

孝康躋

孝惠之上乎議者不從公言

上果以爲非是令改正焉五十八年元旦日食

詔停止朝賀廷臣以交食一定之數不足為災欲固請受賀公言聖人敬天無微不謹仰成

君德正在此等乃止六十年三月以陳請建儲忤

旨率長子奕清伏闕待罪凡五日

詔奕清赴軍前効力而公仍留內閣公自以待罪之身不敢起視事其

冬車駕自熱河回鑾公迎至石槽

上遣內監慰問甚至明年元日諸大臣具摺上壽公亦未敢列名

上還其摺令列公名乃奏翼曰

賜宴太和殿宴畢

召入西煖閣賜坐慰勞尋

詔視事如故公之忠直無它賜至是乃大白及

聖祖升遐公宿閣中朝夕哭臨悲哀逾節病日劇輿歸第

世宗御極之元年正月上疏乞休

詔以原官致仕仍留京備顧問其禮遇如此公嘗言黃霸為丞相勳名減於治郡時論者惜之吾受

恩至深非奉行文書可以塞責故於預建國本陳奏至再至三觸冒九死而不悔又嘗密奏請減蘇松淨賦御史張建策請於浙江開礦公密疏乞禁止皆未嘗告人也及被遣曰

詔出公摺付內閣眾始知之素有人倫之鑿文臣如范時崇陳瓚朱軾李陳常武臣如穆廷杖杜呈泗皆公所薦舉後多知名楊編修繩武者公門下士也其言曰公風度端凝儀觀外朗左目有痣赤如丹砂由詞臣登宰輔皆由

特簡不由援引外溫而內剛正單寒後進以文求謁接之藹如而要人炙手可熱者屏勿與交退食之暇不廢絲竹一面之知或推食解衣予之而脂膏之地未嘗染指世固有色厲內荏言清行濁寒士不能登其堂而不免屈節于貴倖故人不能分其惠而不免受金于暮夜者此公之罪人也世以爲知言公兩子長奕清詹事府詹事次奕鴻河南按察僉事

又文淵閣大學士太倉王公傳袁校

公諱揆字藻儒一字顓菴江南太倉州人曾祖錫爵爲前明宰輔父時敏爲

本朝太常寺卿公生而秀整望之儼然左目有赤痣長洲宋文恪公奇之妻以女以康熙庚戌進士入翰林出主山西乙卯鄉試督學兩浙加經筵講官歷遷內閣學士吏部侍郎當是時廣東南海縣缺歲入巨萬有內務府總管某之弟賄吏胥銓注得焉公斬不與曰法當自貴近始故香山令張令憲父子死難其長孫進例得卹蔭滿州侍郎某嫌年太久有所遲疑公曰張令憲以父子兩性命博一蔭忍以苛文格之耶知府某原籍遼東祖塋在河南巡撫咨部命其奉祠無何有請勒令歸籍者公曰某奉部文守祠已數十年一旦驅之出塞此與無罪而遣戍何異奏上

聖祖是之調戶部侍郎再調刑部侍郎先是刑部定讞無漢字供狀公

爭曰

本朝官制兼設滿漢欲其彼此參詳以免偏任今獄詞不錄漢語則其事之是非曲直漢司官何由知之勢必隨聲畫諾非所以昭公正也請嗣後錄供滿漢稿並具奏上

聖祖又是之遂為定例

聖祖欲懲竊賊詔刑部凡三犯者與強盜同科公奏

皇上嚴竊匪原爲安民起見然穿窬之徒往往有屢偷不值一錢者遂以三犯故擬斬未免太重不如仍用舊律尋遷工部尚書再轉兵禮兩部尚書會澤州陳文貞公薨遂授公爲文淵閣大學士充癸巳會試總裁當是時

聖祖春秋高儲位未定公年亦七十餘自念受恩深當言天下第一事遂于丁酉五月密奏請建

太子懇懇數千言疏留中是年冬御史某亦奏請建儲

聖祖不悅遂并發公疏命內閣議處分忌公者因而齟齬之公止宮門外不敢入

聖祖左右顧問王揆何在首輔馬齊奏揆待罪宮門

聖祖曰王揆言甚是不宜與御史同奏汝等票擬處分太重可速召揆來公聞命趨入免冠謝

聖祖坐乾清宮手招公跪

御榻前耳語良久秘人不能知後五年辛丑正月公復疏前事語加激切三月十三日又有御史十三人柴謙等亦上疏如公言

聖祖震怒召集諸王大臣降

旨責公植黨希恩染明季惡習并令覆奏時舉朝失色無敢與筆硯者  
公就宮門階石上裂生紙以唾濡墨奏臣伏見宋仁宗爲一代賢君而  
晚年立儲猶豫其時名臣如范鎮包拯等皆交章切諫頭鬚爲白臣愚  
信書太篤妄思效法古人實未嘗妄嫉臺臣共爲此奏奏上待罪五日  
詔王掾應謫戍軍臺姑念年老免行着其子奕清隨諸御史代往爲父  
贖罪當待罪時滿漢文武期門宿衛以至京師之秀士耆民爭來窺觀  
稱老相國有愛君之心可敬然無不咋舌爲公危者慮  
上怒之不測也至是乃齊向公拜賀歌呼先是江蘇多浮糧公密奏明  
太祖怒張士誠竊據三吳故困以重額本非平政

世祖章皇帝深知其非未及施行請

皇上于七十萬壽之期降此

特恩勿交部議以免屯膏疏入留中至是忤  
旨方與請建儲劄子一并擲發公門下士陳瓊朱軾額手歎曰吾今而  
知吾師真古大臣也不然倘有他疏不可以見人者今日并發雖我輩  
殆難爲顏乎是年冬迎駕石槽

聖祖望見遣內侍問公起居明年元旦諸大臣上壽無公名

聖祖發還劄子命列公名以進隨

賜宴太和殿畢再

召見西煖閣賜坐命起原官視事如初公論事務持大體康熙戊戌春

升祔

孝惠皇太后議者欲祔于

上生母

孝康皇太后之下公不可曰

孝康皇太后雖母以子貴然

孝惠皇太后

章皇帝嫡配也

皇上聖孝格天當

太皇太后祔廟時不以

孝莊躋

孝端之上今肯以

孝康躋

孝惠之上乎禮部不從

皇朝通志卷十三



聖祖果以爲非改命

孝惠耐

章皇帝之左而奉

孝康居右己亥元旦日食奉

旨停朝賀廷臣以爲日食乃一定之數不足爲災公言

皇上借此儆惕卽孔子迅雷風烈必變之意大臣仰成君德正在此處

御史張建策請浙江開礦公劾其言利滋姦

聖祖六十萬壽開科部臣惜費公言士庶之家主人壽日子孫童僕尙不吝貲財增榮飾觀況以

聖人富有四海而逢非常大慶乎御史鄭惟孜以科場浮議多出太學  
奏監生就試本省毋留京師公曰太學之設自三代迄元明未之或改  
豈可以一二不肖廢千百年興賢育才之典于是朝賀免開採停

恩科開而鄭議亦寢雍正元年正月上疏乞休

世宗許之月餘復降

旨云朕不忍此等老臣之去着仍留京師備朕顧問亡何公薨子奕清  
官詹事府詹事次奕鴻河南僉事道

又王相國傳王昶

王揆字藻如太倉人錫爵曾孫父時敏夢高僧聞谷而生康熙九年進士改庶吉士授編修丁內外艱服除由左贊善補右中允充日講起居注官提學浙江校劉宗周全集刊之表章啟頑忠節立六賢講院修三江口黃尊素祠使教諭以時致祭期滿歷講讀學士累陞內閣學士轉戶部侍郎充

經筵講官三十七年調吏部右侍郎轉左時吏道龐雜姦胥得上下其手揆悉心條列定爲章程銓政一清

命督何工省帑金六十六萬兩四十二年陞刑部尙書尋調工部轉兵部禮部在刑部時往例錄囚止錄清書口供漢司官不能通曉揆請兼錄漢稿著爲令又論刁猾以細事控部之害他如疏爭香山知縣張令憲死事之宜蔭緇御史鄭惟孜散遣太學諸生之非體抑功名之冒濫禁考工之陋規皆總持綱紀務存大體及爲大學士益恪謹凡章奏閉閣獨繕五十六年冬會有御史八人以建儲請

上下其疏并出揆五月間摺外廷始知揆有是請翌日閣臣擬票具奏上諭王揆所奏具見惻誠亦言所當言爾等票擬殊不合揆等所奏著

留閣中時揆以摺本故不敢同諸閣臣入奏事

上召揆入將出獨留揆移時乃出人莫聞其語六十年春復具疏力申前請同時請者又有御史十二人

上疑出揆意乃下

嚴旨切責令揆回奏奏上越五日

命揆子奕清代往軍營効力時揆未解閣務以待罪不視事明年春仍

命入閣任遇如故

世宗卽位揆以衰病請告

溫旨留京備顧問越六年卒年八十四雍正十三年奕清還京爲父請

卹奉

旨于祭葬揆好汲引善類不植私人屢主鄉會試事均稱得士立朝從

容風議不爲崖異及臨大事風節凜然

孝惠皇太后之升祔揆闕眾議請躋於

孝康皇太后之上其合禮稱

旨多類此卒後十餘年其孫懷始克舉葬子奕清奕鴻奕清字幼芬揆

娶長洲宋文恪公女婚夕夢有緋箋署其臥闥曰詹事府掌詹事旣而

生奕清康熙三十年成進士改庶吉士歷官詹事府詹事奕清生長名

闕文采著聞典試視學外凡

朝廷編修校讐之役多以畀之其代揆赴于軍也腰弓躍馬北出萬里

抵大營屯分駐地曰忒斯曰阿達拖羅海窮荒大漠風景寒慘奕清素

齋善病處之六年宴然安之雍正四年再

命在阿爾泰坐臺又十年乾隆元年始

召還都仍以詹事管少詹事明年春陳父建言始末請卹典得

旨俞允且給假營葬不及就道而卒年七十三其終于詹事竟與夢符

奕鴻字樹先康熙四十八年進士授戶部主事歷陞員外郎中五十三

年典四川鄉試出為湖南驛鹽糧儲道六十年奕清代父往北路軍營

奕鴻盡斥其產請送軍前奉

旨與奕清俱詣烏里雅蘇臺効力臺在蒙古外喀爾喀地與俄羅斯壤

接蓋盟長超勇親王建牙之所坐臺十載乾隆元年

命還朝發四川以道用初攝松茂道適小金川土司相仇殺奕鴻曉以

禍福各帖服尋補川東巡道引疾歸又十五年卒於家年八十有二

碑傳集卷十三

貴筑黃彭年編訂

碑傳集卷十四目錄

康熙朝功臣上

相國李文襄公之芳傳 趙士麟

又李相國文襄公傳 杜霖

又誥授光祿大夫吏部尚書文華殿大學士拖沙喇哈番諡文襄李公墓誌銘 張玉書

又李文襄公傳 沈德潛

附錄十則

誥授光祿大夫勇略將軍總督雲貴兵部尚書兼都察院右副都御史

世襲一等精奇尼哈番諡襄忠趙公良棟墓誌銘 張玉書

又特進光祿大夫兵部尚書兼都察院右副都御史勇略將軍趙公神道碑銘 嚴虞惲

誥授光祿大夫少傅兼太子太傅昭武將軍提督江南總兵官三等阿達哈哈番諡敏壯楊公捷墓誌銘 張玉書

又重修漳浦懷德書院碑記 蔡新

靖逆將軍甘肅提督一等侯諡襄壯張公勇傳 陝西通志

碑傳集卷十四目錄

光祿大夫賜一品彝陵鎮總兵官胡公世英傳錢糴城

鎮南大將軍蟒公吉圖傳魯曾煜

又鎮南將軍墓表汪士鑑

漢軍副都統高公必盛家傳查養

許少保貞江石戰功記潘耒

碑傳集卷十四

嘉興錢儀吉纂錄

康熙朝功臣上

相國李文襄公之芳傳 趙士麟

公諱之芳號鄰園曾祖諱鮮以公貴累贈吏部尚書正一品加三級妣  
 康氏繼妣任氏俱累贈一品夫人祖諱登雲號小川累贈吏部尚書正  
 一品加三級妣蕭氏累贈一品夫人父諱才望累贈吏部尚書正一品  
 加三級妣李氏累贈一品夫人生二子公其長也豐頤偉幹幼即岐嶷  
 七歲就外傳偶自齋出途遇羽流請止步熟視曰瞻矚舉止俱見非常  
 公卿之相也居常不輕言笑講學以誠正為主十七歲入泮學使者得  
 卷即閱大書取字示之補濟南府庠生二十一魁鄉薦丁亥成進士己  
 丑授浙江金華府推官審斷虛公謝絕請託事無大小出入平反必得  
 其情罪之至當而後即安常云倘一事顛倒是非一人負冤不白何以  
 施顏面於吏民之上復禁驕將抑買民物婺郡自兵燹後士子絃誦日  
 衰乃進九學諸生而校藝彬彬向風焉辛卯分校得士八人皆名宿壬  
 辰撫按委編纂賦役全書報成條分縷析足垂永久一日撫按偕司道



審事千吳山公適至武林傳令會鞫詞嚴義正剖晰詳明諸公稱曰真推官也癸巳薦舉卓異

欽賜繡蟒袍甲午四月陞刑部廣東司主事乙未

上諭各部院衙門有才優經濟堪任養民者從優擢用滿漢堂議以公應公以俸淺辭丙申三月陞山西司員外郎是歲委修

大清律十一月遷湖廣司郎中題留久任丁酉時裁啟心郎公總理十四司科抄每抄必再三緝閱曰各省刑獄閱實於內部若一錢可生不

爲看出是由我而誤殺之也平反甚多六月遇恩詔加一級送一子入監讀書戊戌蒙

世祖章皇帝御試簡拔由郎中補授廣西道監察御史奏請釐革私餉民解錢糧以剔蠹窟請禁委官察勘以恤民生請嚴查假冒棍徒以清

奸弊各疏庚子代巡山西按部所歷延見士民面詢利弊風行草偃貪墨解綬辛丑撤差回京壬寅恭人吳氏卒於京邸十月乞假旋里越明年

癸卯赴京補湖廣道監察御史請勅部酌議追罰事例過當題爲春日農務方殷踏勘似宜暫緩各疏乙巳四月巡視西城直陳奸棍誣逃杜才風而安民生丙午巡視兩浙鹽

課釐剔積弊疏劾商憲革除陋例節省襍費銀兩甚多商困頓蘇差旋  
戊申掌京畿道事十一月有嚴敷那守職任最重之疏己酉掌河南道  
事奏請甄別督撫以清吏治政本關係甚重票擬理宜嚴速請錢糧覺  
察以杜民累請酌勒限緝賊以安民生請除無益條例以挽弊政密陳  
封疆關係非輕諸疏詞指切直皆

報可庚戌內陞以正四品頂戴食俸仍留掌河南道監察御史疏請嚴  
議禁止委署實病民生雜流不宜濫預以信功令以裨地方奉

旨同大學士六部都察諸臣定滿州漢軍漢官品級考壬子陞都察院  
右副都御史疏議誣良諱盜處分緝賊不宜苦累失主以戒庇盜殃民  
請議參罰繁密太甚外官難於奉行巡鹽考核當有實政不宜專論課  
完以恤商困以培賦源請議覺察奸蠹內外畫一諸疏本籍鄰近州縣  
臨請倉米嚮解本色道里遼遠民甚苦之公議改折附入大糧民無運  
費官免催提公私皆便常豐倉米原解德州民力最勞公議支兌附近  
營兵月米折省無算十月陞吏部右侍郎遵例自陳奉  
旨李之芳簡任佐銓著照舊供職該部院知道癸丑以兵部右侍郎兼  
都察院右副都御史總督浙江等處軍務兼理糧餉陞辭

賜上殿良駟鞍轡抵任甲寅間滇南吳逆叛查有台巡道吳應鵬係三桂姪男卽會同撫提鎮檄行摘印看守密題請

旨定奪飭沿海等處重嚴武備又請增兵馬及試用火器以資勦禦固守三月靖藩耿精忠反報聞人心在在風鶴隨檄各路官兵分守要害

復再疏請

勅江南省滿漢官兵調集兩省交界以備聲援江西省於廣信駐屯重兵以防崇安大關一路或有緊急咨調策應四月三疏請發大兵防勦

並請

勅江西督撫提諸臣亟發重兵謹守鉛山玉山大路以保巖疆又遣本標中軍副將王廷梅及薛受益等率兵防守仙霞關等處會疏請給官兵行糧四月與將軍撫院提督公議於額俸餉銀外賞賚官兵勉以大義咸以奏銷爲慮公不然以朝廷錢糧爲朝廷將士之用俾出死力捍衛封疆情理允協且揆之時勢人情洵未定小有怨望緩急未必能爲用也復會杭州將軍撫院提督議駐兵衢州五月統領本標杭協營並江南提標官兵一千五百人申嚴軍令所至秋毫無犯同平南將軍賴塔自杭赴衢先扼閩要衝賴將軍承

旨一應軍機事務與李總督商酌而行公身膺封疆重任但盡心竭力  
以身先之不過爲危迫告急之詞惟同賴將軍於地方情形兵力多寡  
事機緩急無處不爲籌畫在衛滿兵一千餘綠旗兵二千餘逆賊全力  
屯聚清湖日窺侵犯而副都統喇哈應援之兵馬促未能至所謂孤軍  
危疆無有過於此時者七月初賊犯衛公躬擐甲胄同賴將軍督師進  
攻於坑西大戰轟礮之聲震地流丸如雨左右請少避公曰不可三軍  
司命少移動卽爲賊所乘矣今日之事以兵勝敗爲吾死生耳介胄終  
日整肅軍容侈不用命者以堅士心是役也以不滿四千之兵擊賊數  
萬之眾一可當百軍聲大振時逆賊披猖各路鎮營羽書旁午晝夜不  
下數百通無論是兵一至戟門公必呼至帳前屏人親加撫慰詢賊情  
形示以戰守方畧令其傳語其鎮其將知親加飭勵之意而機警識破  
奸謀卽置於法有規避退縮營將必奏參以肅軍紀三衛當衝扼要兵  
力單寡戰守不能兼應如金華堵禦溫處兩路嚴州接連徽饒二郡並  
屬咽喉之地請照例增設標兵以資勦禦密謀招降偵知九龍山僞將  
軍馬九玉麾下副將韓斌將兵八百人乃移文江南亳州以斌千世晉  
家人苑亮至令持家書并諭札縫履底中使走入斌壘一無所言遺其

履而去斌得諭札遂與僞都司王得功等商同日中奔壓潮營歸降賊勢方張羣情皇惑請用宿將李榮統領調集嘉湖等營官兵俾之援勦金衢等處著績疆場另募兵三千以定經制且使地方強壯有力之徒不致爲賊引誘募兵卽所以弭盜自是處州金嚴台紹各屬相繼報捷生擒賊首汪磐繆國英以歸恢復遂安壽昌淳安義烏東陽分水等邑城丙辰公疏議直搗仙霞關爲一勞永逸之計請調江南松江崇明官兵而部議以海口重防不便移調令於本省酌量遣發並將擊賊進取事宜具奏再疏畧曰本省無可調之兵而江南有可遣之將蓋浙當用兵之際衢州滿漢綠旗兵與賊對壘者二年餘且晝夜不解甲矣至杭嘉湖紹之兵已經調遣略盡惟江南之松江崇明額設兵幾二萬諒此時之賊氛必不遠及江南也至于進取之路不在溫處而在衢州故耿逆勁卒悉萃于此此賊破則諸賊皆無能爲矣雖馬九玉朱懷德等死守河西似難猝破然其南爲江山西則常山皆有間道可襲我兵一進使彼首尾受敵卽河西之賊壘不能獨完所謂不待交鋒而勝敗之機早識於胸中者如此僞將軍馬九玉竊據河西以大溪灘爲糧運咽喉又啟大將軍康親王速師前進直破其屯糧之地八月十五日大溪灘

大捷十七日遂復江山縣城馬九玉既敗遁知歸路已絕冀繞道入仙霞關據守顧諸軍已遵公密諭疾抵關口分路夾擊偽副將金應虎等乞降二十一日師入三關我兵獲有脅從六十餘人將置之法公曰此是戀故土妻子保性命者耳忍殺之耶乃議盡釋之草檄宣布

皇上伐罪救民至意于是王師入閩如摧枯拉朽蕩平反掌大兵所至居民安堵不越兩旬露布捷聞各路獲捷恢復雲和松陽龍泉三縣城也九月疏請亟

勅部議鄰省會師合剿餘寇略曰閩逆犯浙將及三年煽誘勾連廣植黨羽巨逆馬九玉等雖敗潰奔逃浸已瓦解而餘孽多伏匿山谷皆與江南徽州江西饒州廣信等府緊相連接如偽總兵周立等則屯踞廣信祝茂華等則把守玉山縣子午口與常山相距僅數十里目今逋誅之寇散布歧界且係崇山峻嶺使彼稍延喘息勢必滋蔓難圖卽三省接壤之間終無寧謐之時臣身處殘疆竭力整頓移會進兵仰祈勅下江南江西督撫及統兵將軍合力夾剿則軍聲益振逋寇無所逃誅矣遣官兵招撫江西逆寇恢復玉山縣城部議加一級丁巳處州椒洞巖山寇悉平廣信府等處報捷恢復江西鉛山縣城又興安弋陽貴

溪等縣百姓歡欣歸命江右未平餘孽屯聚地方逼近浙省門庭百姓  
久罹湯火且總屬朝廷封疆公不敢歧視題請會勦鄰界漸靖惟偽總  
兵馬鵬數稱梟惡聚眾於開玉交界之陳村及德興之白沙關跳梁怙  
惡公密飭副將武榮蔣懋勳等自白沙關直抵德興搗其老巢連破賊  
寨木城陣斬偽將數十員生擒鵬歸數以大義誅之凡調遣所屬綠旗  
各路將士大小一百四十餘戰舉旗斬馘所向克捷皆仰  
天威遠震蕩平捷于影響克奏膚功恢復鄰疆三藩并叛惟平閩獨先  
則公首扼衢州之力也九月爲欽奉

上諭事部議飛報官兵大捷等事俱係調度有方擒斬逆賊兵一十四  
案酌量議敘奉

旨李之芳著加兵部尚書仍兼都察院右副都御史爲正一品照舊管  
事拜疏謝恩公思平賊之後事之重大而最急者惟有仰遵

恩詔將應行蠲免賑恤事宜亟請大沛

皇仁以救垂死之百萬生靈經三疏迫切籲陳浙東金衢嚴溫處五府  
屬殘黎阡危慘苦情形請將康熙十六年以前一應本折錢糧盡予蠲  
免而部議以江山等縣衛所並未確查分別苦累輕重復具疏四請略

云恤民以固邦本裕賦以資國用兩者原屬並重然必使有可存之民而後有可徵之賦破賊蹂躪之地室家離散田廬蕩然雖哀鴻甫集而饑寒并切若不急沛

恩綸無論舊逋終不能完徒使新逋愈積現徵復虧即日黜一官無益於事每念兵革之餘傷慘已極欲期民皆樂業復還舊觀實非易事惟

蠲此不可復徵之賦而休養生息仍成

國家財賦之地者卽于此屢顧宸聽爲恤民計未嘗不爲籌餉計也當年倉卒用兵之際師行糧從軍楮未辦先有追回已解閩餉一十五萬兩貯衢州府庫得資官兵俸餉士馬賴以飽騰安輯投誠凡捐賞袍帽銀物屢經各疏題明支用餉銀及措墊清冊悉聽部議開銷無敢假借虛冒者較鄰封用兵節省錢糧無算而格於部議卒蒙

恩旨允銷公常云軍中刑賞關係甚重一言不當一事不協大事隳矣奉部文題用文武各官不惟不徇人情亦且不徇己意皆較公量能毫髮無私雖干把微員拔用一人三軍無不服其至公蓋爲各路衝鋒對壘勞苦有功者不乏其人若舍此不用而以未有真功實苦者倖授則



行間將士誰復肯致命宣勞爲國固圉乎故人心競勸性命可捐何敵不破所以各路兵行處處獲捷政亦得力于此耳由偏裨弁目拔擢至提督總兵官如陳世凱李華吳英等二十餘人勇略茂著上徹

天聽舉薦賢良屬官人未嘗知有知者或以牲牢之物稍佐軍需必卻之日凡所犒賞軍中無不知其所由來蓋所爲者極難庶足激勵眾心能得其死力耳嘗面誠屬官曰時雖多事蕩平不難若輩存心行事仍作太平無事時觀朝廷功令無寬假余爲朝廷執法之人亦不敢寬假也然清嚴而不刻每曰仲尼不爲己甚亦未嘗輕劾一官己未三月具疏自陳乞罷奉

旨卿才品優長簡任總督殫心料理效力行間著有勞績著照舊供職該部院知道七月會地震

詔求直言疏陳四事請復給難民子女請免荒絕丁糧請復設各省理刑請復生童舊額具疏彙報招撫浙江江西等處投誠各案文武僞官共六千二百餘員僞兵人等共一十六萬五千五百餘名各給賞分別歸農入伍俱奉有具見悉心籌畫勦撫並用可嘉事平議敘之旨樞部議敘武職軍功共

加二十九等紀錄一十九次銓部議敘加三級以尙書正一品照舊管  
事庚申題請操練戰船襲擊海寇密飭定海鎮一遇警息知會巡海部  
臣點驗出洋掩擊於孝順洋斬獲奏捷以示大創又請

勅部議調福建水師分駕戰船一百號由是閩洋直趨温台浙省水師  
由定關會師夾剿一切島窟更請會勦事竣卽以閩來戰船分泊温台  
配兵守汛在浙可無成造之費在閩可免修船之煩以寬物力而省錢  
糧一舉而數善備矣辛酉會題楓嶺營循照舊制浙閩制省要害之地  
鞏固邊防公從康熙十三年驅師捍禦任艱責鉅外禦方張之寇內顧  
征勦之兵旣圖固此民心又恐有墮士氣千思百慮惟期有濟軍機無  
債事勢多方調度靖寇安民上賴

廟謨制勝下得將士奮勇爭先平定疆圉至避亂難民亦有淪陷日久  
脫走來歸者每加撫慰量給銀米嗣是來者日眾億萬姓扶老攜幼鶉  
衣鳩面無家可依因遣員于龔家埠權爲茅屋二千餘間以居之每名  
捐銀十名以給薯飧飭令分別男女不致襍處然而軍興公帑不可  
輕支乃與撫院陳公量議捐助而身爲之倡有田可耕更給民牛種而  
民之來歸者益多並無失所之歎又於西安之柏陵街及江郎街廿八

都保安橋等處皆入閩通衢設廠煮粥施湯尚委標員管理凡五年賑濟過往來人夫饑民一百二十二萬一千五百名有奇雖兵燹之後民無供役之苦壬戌八月奉

詔班師十一月遷掌中樞癸亥四月赴兵部尚書任辨官論材陟罰臧否一以無我行之爲僚屬所敬服甲子八月陞吏部尚書飭諸吏無得升堂使坐曹聽行文書而已由是吏不得與銓事予奪一秉至公居月餘翕然聲動京師乙丑夏六月間因積勞成疾肩患癰腫蒙皇上遣御醫大夫劉存恕祈嘉到至邸中診視所需藥餌於

尙方御藥房支取調治月餘時復

存問然年逾六旬氣血衰羸具疏懇請解任奉

旨卿才品優長簡任銓衡正資料理著照舊供職不必以老病求請解任該部知道丙寅春查敘軍功浙江總督調官兵有方在温州擊敗水陸逆賊生擒偽副將何賓等五百名賊陣斬僞都督孫可德等賊兵一萬有餘在大溪灘賊二千四百餘名由空銜授爲拖沙喇哈番准襲一次註入山東濟南衛丁卯八月再疏求罷歸田里奉旨卿才品優長簡任銓衡正資料理著照舊供職不必以衰病求罷九

月入閣辦事公深荷

知遇殫心職業辨色趨朝嚮晦而退凡有應對虛公審慎不肯唯諾退而自省曰

奉上聖明萬機畢照閣臣備位愧無以仰贊高深未能免素餐之譏也

奉  
勅充政治典訓

大清會典

大清一統志等書纂修總裁官

賜元狐帽裘戊辰以疾荷恩原品致仕懸軌養病己巳春月

上南巡道由德州公及地方文臣巡撫以下武臣總兵官以下與在籍

諸臣迎

聖駕伏謁道左

皇上勒馬垂問你病好了麼回奏臣病好些了

恩賜上尊玉粒果品慰勞甚厚復詣

行在候起居時遇赦免東省錢糧叩謝

上又問住處離海遠近來路多少尙有筋力能乘馬至此耶卽一一回

奏甲戌十一月病勢瀕危伏枕口授遺疏謝恩越宿而逝疏上聞奉旨李之芳効力年久前在浙省時隨大軍進剿歷有勞績簡任機務勤慎素著忽聞在籍溘逝朕心深切軫惻應得卹典著察例具奏該部知道禮部准吏部咨稱原任文華殿大學士兼吏部尚書正一品又加三級休致回籍李之芳病故應照定例卹典與現任官同按其加級品級給與全葬之價並給一次致祭銀兩

遣官讀文致祭應否與諡伏候  
上裁等因康熙三十四年二月初九日題本月十一日奉

旨依議還與他諡

賜諡文襄公生於前明天啟壬戌年八月十八日卯時卒於康熙甲戌年十一月初二日未時壽七十有三餘詳于行述中不具載

論曰吾觀文襄公生平大節而知儒者有用之學也學匪適用謂之腐儒樸樸沾滯褊瑣拘陋僅僅不敢踰尺寸奚補于世然使而不由于學揮霍震掉出之無本雖鴻猷碩譽鉤耀一時譬之無根之木無源之水扶疏衍溢槁涸可立而待君子弗貴也知此始可以議古人經綸之業矣公少負奇氣英睿倜儻不泥於習及長有志聖學入仕以來務爲建

立翼宜禮樂慨然以斯世斯民爲己任而才足以達之得第筮仕節推  
卽赫赫有聲列臺憲繩糾激揚風裁彌峻擁節麾開幕府中外敷歷不  
阿權貴不避艱險值三逆叛耿情忠窺浙思逞公當半壁長城躬擐甲  
胄馳驅于疆場壁壘之間奮不顧身忠勤以爲國誠信以事君踽踽孤  
踪屢邀

聖眷其始也疏請駐兵衢州請調江南滿漢官兵以備聲援調江西屯  
駐重兵以待策應又請急發大兵防勦請給行糧議給賞賚以示鼓勵  
及賊犯衢州破賊數萬於坑西生擒賊首汪磐繆國英敗賊首馬九玉  
朱懷德於大溪灘分路夾擊偽副將金聲虎等乞降遣副將武榮蔣懋  
勳由白沙關抵德興搗偽總兵馬鵬之穴而生擒之于温州擊敗水陸  
逆賊生擒偽副將何賓等陣斬偽都督孫可德等賊兵一萬有奇於曹  
平關殺賊五千餘名大小一百四十餘戰拏旂斬將同大將軍賴塔所  
向克捷三逆并叛平閩獨先公與將軍扼衢州之力也平賊之後黎赤  
阡危事之最大而急者莫若歷年運賦公數請浙東金衢嚴温處五郡  
自康熙十六年以前錢糧宜豁蒙恩盡予蠲免仍捐俸勸賑施粥以濟  
饑民全活無算班師論功議敘晉中樞歷冢卿入內閣皆密勿要地務

抑僥倖絕徑竇門無私謁邸第肅清及

子歸名完而節亦全焉今夫祿位名壽皆天之所以命于人而人之所以自奉於身者也大德之人必得若執左券以索奇然是非有心於得之也嘗讀易師之九二曰在師中吉王三錫命謙之九三曰勞謙君子有終吉公以師中之吉荷三錫之命則既已承天之寵矣勞而能謙乃克有終固公所以自期以圖報于終身者也夫角與而齒缺翼附而足虧在物且然況于人乎歷觀三代以後大臣善處成功之際而能保有終吉者幾何人祿盛者或晦于名位尊者或劣於繼名高者或嗇于壽而壽永者或儉於祿與之翁張損益雖大化司其柄者要本於生平無欲無欲則無我天地萬物皆吾一體莫非我也公心慈量宏平日以厚自處未嘗有訾物害人之心履信思順鬼神實相之不然權位重而責愈備經費浩而迹愈疑以一人之情擅一方之刑賞而德怨易至於橫生以一人之力副千萬人之祈望而恩澤每病于難溥夫以不平之心加之以求全之意則夫忌疾疑謗之來固宜有所不免然志定而才裕識先而資深培根濬源枝派暢遂性本近道內夷城府外弛邊幅雖處兵革紛冗之中亦未嘗廢學居常油然情雖暢而不輟臨變惕若志雖

鬱而不撓度能容眾似混而辨機能料敵似顯而藏至于忙中批答醉  
中應酬卽倉卒憤擾之餘可以覆覈百十未嘗遺一此不用之用其用  
始神無功之功其功始大非易易也昔夫子導諸子言志於季路則哂  
之於曾皙則與是豈有遠於恆情哉季路得國而治加以師旅困以饑  
饉可使有勇而知方固非託諸空言者也較諸履素樂常浴沂風詠同  
於太虛而無累於外物者以其無欲且無我也富貴不能淫貧賤不能  
移威武不能屈至誠淵淵浩浩無所倚故曰苟不固聰明睿知達天  
德者其孰能知之人尙勉於學哉

又李相國文襄公傳

世宗

公姓李氏名之芳號鄴園其先自棗強徙居濟南之武定州遂世爲州  
人曾祖鮮祖登雲父才望皆以公貴贈吏部尙書公幼而岐嶷七歲就  
外傳遇羽流熟視曰舉止非常公輔器也順治丁亥成進士筮仕金華  
推官時鎮帥馬進寶縱兵擾民公力禁戩民賴之其決讞也虛公而明  
敏直指杜果按部令公攜文牘往公曰不須攜也是日決數十案纖悉  
無遺果大奇之臺司會鞠於吳山公適自婺至上謁留公公立爲剖晰  
羣以眞推官目之居五年郡無滯獄以治最入爲刑部主事應進郎中



會六部裁啟心郎屬公總理十四司覆奏事宜多所平反戊戌遷監察  
御史庚子按山右康熙丙午視兩浙鹽筴庚戌內陞支四品俸仍掌河  
南道事擢都察院左副都御史公在臺前後凡十有三年章數十上如  
糾學臣之溺職司道之徇庇科臣之比匪相臣之市恩甄別督撫嚴覈  
郡守慎重票擬杜絕誣逃文法太密者宜寬捕盜貽累者宜禁皆有關  
治體詞指切直識者偉之他若臨清倉徵本色常豐倉輸德州轉輓勞  
費無限公一議改折附入大糧一擬支兌附近營兵於國計既有裨而  
鄉之人尤頌公之德於不衰未幾晉吏部侍郎癸丑夏以兵部侍郎總  
督浙江軍務浙人聞公至莫不舉手加額以公復來爲厚幸先是公在  
御史臺時念天下承平日久而三藩負固遠疆慮萌異念有密陳封疆  
之疏下車未久是年冬吳逆叛於滇明年春耿逆叛於閩人心在在風  
鶴公曰閩與浙輔車相依浙之門戶在三衢固守衢則全浙無虞矣我  
受封疆重任有進無退若不先據要害其何以濟於是請調江南兵駐  
二省界並發江西兵屯廣信防崇安大關守鉛山玉山以備聲援五月  
公率兵千五百人同平南將軍賴塔自杭趨衢以扼其衝公以家財募  
五百人甘苦與共每夜漏下數刻公短兵戎服雜處行間申嚴警備達

巨不寐率以爲常七月賊犯衢遇於坑西礮聲震地流丸如雨左右請少避公曰三軍司命不可動也動則爲賊所乘今日之事以兵勝敗爲吾死生可稍怯耶於是人人殊死戰以不滿四千之兵擊賊數萬之眾無不一以當百賊大敗公慮金華爲溫處要衝嚴州爲徽饒連境請設兵以資勦禦時九龍山僞將軍馬九玉張甚偵知其麾下副將韓斌擁兵八百人密謀招降之乃檄江南亳州以斌子世晉及其僕苑亮至公以諭札與之縫履底走入斌壘遺其履斌得之遂同僞都司王得功降而九玉失一臂矣然九玉蟻聚河西羣不逞之徒觀望其間公曰此輩爲賊誘則勢益張矣不如因而募之得敢死士三千人軍聲大振而金嚴台紹處亦各相繼報捷生擒賊首汪磐繆國英而遂安壽昌淳安義烏東陽一時恢復公以賊勢少殺宜直搗仙霞關爲一勞永逸計請調江南之松江崇明兵部以海口重防未便移調仍令於本省酌遣且令公條上進取機宜公言本省無可調之兵江南有可遣之將浙之兵與賊對壘晝夜不解甲者二年餘矣各郡之兵調遣畧盡彼松江崇明額設兵二萬諒此時賊氛必不能遠及江南也至進取之路不在溫處而在衢逆賊勁卒悉萃於此此路破則他無能爲矣雖馬九玉朱懷德等

死守河西似難猝破然其南江山其西常山皆有間道可襲我兵進彼首尾受敵卽河西賊壘不能獨完矣蓋公之不待交鋒而勝敗之機蚤決於胸中者如此九玉屯糧大溪灘公搃其餉道八月大戰克之九玉遁走仙霞關公設伏擊之降其僞副將金應虎等師入三關獲脇從數十人將置之法公曰此戀故土迫於賊威耳盡釋之師遂入閩所至獲捷餘孽之伏匿山谷者在江南之徽江西之饒信間公慮散布歧界多崇山峻嶺使稍延喘息勢必滋蔓疏請江南江西會師協勦踰年浙東盡定隣省諸郡亦殲除幾盡惟僞總兵馬鵬猶跋扈於開王德興間公遣將破其寨生擒誅之殘孽悉平公自用兵以來率諸將士大小一百四十餘戰所向克捷而三逆之平八閩獨先則公之身先扼衝力也捷聞加兵部尙書正一品公念賊平後事之大者無如蠲賑請豁浙東金衢嚴溫處五郡十六年以前額賦部議持不允公四請之上言恤民以固邦本裕賦以資國用二者並重然必有可生之民而後有可徵之賦浙東向爲賊所蹂躪田廬蕩然今雖哀鴻甫集而饑寒並切若不急爲蠲豁無論舊逋無償勢且新逋愈積卽日黜一官何益於事惟蠲此不可復徵之賦則休養生息仍成國家財賦之區矣

詔從其請初倉卒用兵軍糈未辦先有追回已解閩餉一十五萬兩存貯衢庫凡一切軍前犒賚公各疏題明支用較隣省節省無算雖格於部議卒蒙

旨允銷貧民陷賊來歸者公親加撫慰建茅屋二千餘間於龔家埠分別男女以居之給以饔飧有田可耕者給以牛種於八閩通衢柏陵街江郎街保安橋等處設糜以賑饑者凡五年濟饑民一百二十二萬一千五百有奇前後招撫偽員六千二百有奇偽兵人一十六萬五千五百有奇皆給賞有差歸農入伍事既平論功中樞敘武職加二十九等銓司敘文職亦如之獨以督臣轄全省不敘奉

諭旨酌加三級久之追論温州之捷大溪灘之捷曹平關之捷授公拖沙喇哈番襲一次或以爲酬庸稍薄公瞿然曰此出自

特恩雖分茅胙土榮莫踰焉且叨冒世職於臣分已過公可謂不伐其功者也公自擊賊入閩旣已翦蕩陸寇而海上游魂猶有出沒者乃請練習戰船以襲之閩省水師由閩洋趨温台浙省水師由定關會師以夾勦諸窟島事竣卽以閩船分泊温台配兵守汛在浙無成造之費在閩無修船之煩兩省便之又請楓嶺營兵舊制浙閩分轄今以援勦之

兵調補則餉不加增而三省要害之地以固矣此又公之斟酌盡善爲守禦計甚周也公駐衢區畫凡八年壬戌秋班師公還杭冬

召入爲兵部尙書甲子秋進吏部尙書飭諸吏聽行文書而已毋得上堂與銓事宿弊一清明年夏患癰

上遣御醫視疾給尙方藥餌公以老疾請

優旨慰留丁卯再疏求罷不允是年秋以吏部尙書入爲文華殿大學士居政府邸第蕭然門無私謁明年春致政歸居平無他嗜好以書史自娛者七年卒公豐頤偉幹美鬚髯性介直以誠正自矢念念可質鬼神其爲司李嘗云有一事顛倒是非一人負冤不白何以施面目於吏民上其在秋官云各省刑獄閱實於內部若一綫可生不求其生是由我誤殺之也其巡視鹽筴也効商蠹革陋習節省雜費商人賴之其在行間云軍中刑賞關係最重一言不當一事不協大事隳矣當羽書旁午或官或兵至鈴閣者必呼至帳前屏人慰勞詢賊情形示以戰守方略推心置腹以飭勵之其薦拔文武諸人量能授職出於至公自偏裨弁日至提鎮者如陳世凱吳英李華等凡二十餘人皆以勇畧著所舉文吏吏未嘗知有知者或以牲牢佐軍需必卻之且戒曰時雖多事蕩

平不難朝廷功名無容寬假余爲朝廷執法亦無容寬假也然清而不刻每曰仲尼不爲己甚其爲人公正而仁恕類如此故人皆樂爲用

上亦稔知其功當家居時

乘輿南巡過德州公迎謁道左

天語詢問曰卿筋力尙健能乘騎至此耶

賜上尊玉粒慰勞倍至卒之日

軫惻也天子猶念其爲浙督時進勦勞績任機務時勤慎素著忽聞溢逝深爲

軫惻也

子祭葬諡曰文襄享年七十有三公嘗言士大夫有名節易全名節難

跡公之生平眞可謂名完而節全也已所著有棘聽草奏疏文移諸藁

若干卷子男四人孫男十五人長子鍾麟以蔭授岳州同知遇楚兵變

攝巴陵亦有戰守功擢知潮州府且將大用君子謂能世其家焉

論曰歷觀古之名臣如唐之裴李宋之韓范才兼文武出入將相者代

無幾人如公之忠誠奮發芟除渠魁身歸臺閣光贊密勿方之前哲何

多讓焉臻浙人也公之功著於浙臻嘗過里中公留以脫粟一飯語子

曰用兵之際任事固難賊平之日善後尤難當日俘獲山野長髮其中

真寇無幾率皆脇從也爲子鞠其冤者悉縱之去至於此離婦女什伯爲羣指以賊婦盡據而有矣乃率先捐俸以贖之俾良民家產復聚金衢嚴溫處五郡居民失業者數年雖荆棘已除而生聚有待爲之力請於朝獨從前逋賦此三事者予之所謂善其後也聆斯言也公之爲德於浙深矣初康親王之入閩也諮公以平閩大計公曰仗天威憑

廟謨以順討逆勢如拉朽王嚴禁軍士不姦淫不搶擄則計日蕩平矣後果如公言此公之爲德於閩而人莫知也語云活千人者封公之活浙人無算子孫之寶蕃且碩也有以夫至今浙之人世世奉祀不絕也又詔授光祿大夫吏部尙書文華殿大學士拖沙喇哈番諡文襄李公墓誌銘 張玉書

康熙三十三年冬十一月文華殿大學士武定李公墓于里第訃聞天子眷念勞臣輟朝軫悼

詔所司議飾終之典賜祭賜葬悉從優渥比易名奏請

上特予文襄本朝文臣自洪南安以後稱文襄者至公而再見一時中外翕然以爲允協云公舉順治四年進士起家浙江金華府推官居五

年郡無滯獄以治最人爲刑部主事歷進郅中會六部裁啟心郎屬公  
總理十四司覆奏事宜聲譽大起十五年擢監察御史明年出按山西  
甫半載墨吏皆解綬去康熙初視兩浙鹽課力甦商困在臺十餘載數  
上封事如愼重票擬甄別督撫嚴覈郡守皆有關於體典內外計屏絕  
私弊丰裁凜然九年八月內陞支四品俸仍掌河南道事十一年超拜  
都察院左副都御史抗疏陳時事謂文法太密等於束濕緝盜無術累  
及失主吏治民生胥受其病識者避之是年冬擢吏部侍郎十二年夏  
命以兵部侍郎總督浙江軍務蒞事甫兩月而滇逆變作十三年春請  
亟增額兵用資勦禦踰月間逆告變公隨檄諸路將士分守要害遣副  
將王廷梅薛受益等力堵仙霞關又請調江南滿漢官兵駐二省交界  
並發江西重兵守鉛山玉山以壯聲援因會疏懇給官兵行糧軍士皆  
感奮是時逆賊盡銳聚湖清日謀窺犯公偕平南將軍賴公塔率滿兵  
千人緣旂兵二千人並所募健勇五百人以五月自杭趨衢州七月賊  
軍數萬攻衢我軍眾寡不敵公同平南將軍以大義激勵將士進擊於  
坑西礮聲震地流丸如雨左右請少避公不可曰今日之事以兵勝敗  
爲吾死生可稍怯耶諸將鼓勇直入一可當百賊遂卻顧賊黨羽方熾



温處金嚴各屬所在煽亂公雖以計招降偽將韓斌王得功生擒賊首汪磐繆國英而兵單勢分難以久持十五年夏公遂建議直搗仙霞關爲摧堅制勝之策部議令公條上進取機宜公言進取之路不在温處而在三衢今逆賊勁卒悉萃于此此賊一破則諸賊必皆駭亂逆散雖僞將馬九玉朱懷德等抗拒河西大溪灘而江山常山之間有間道可襲我軍進擊使賊首尾受敵河西孤壘安能獨完故擊之便時和碩康親王軍駐金華公力請至衢八月合軍克大溪灘復江山縣馬九玉猶冀繞道奪仙霞關而諸軍已受公密檄急據關口夾擊賊將金應虎等窮蹙迎降大師遂入閩閩逆旣平而餘孽竄伏山谷間者尙繁公復請江南江西會師協勦踰年浙東及徽饒廣信諸郡以次底定捷聞進秩兵部尙書加正一品公念賊平之後事之最急者無如蠲免賑卹疏請豁金衢嚴温處五郡十六年以前額賦部議持不允公上言卹民以固邦本裕賦以資國用兩者並重然必使有可生之民而後有可征之賦浙東被賊蹂躪饑寒交迫使非急于蠲免則舊逋旣缺新逋愈積即日黜一官於事無濟且蠲此不可復征之賦俾民得休養生息以供將來之稅正所以爲國家財賦計也

詔從公言貧民陷賊中來歸者公悉爲區畫衣廩又設糜於通衢賑往來饑民一百二十二萬有奇流移之人盡復故土方事之殷也羽檄旁午人情惶懼東南數千里惟恃公一人以爲安危孤軍扼險指挂三載卒使浙水以西無匹馬擾于境上則皆公守三衢力也假若三衢無公吳越之民幾不能一夕安枕而公之功豈不偉且烈哉公以文臣身擐甲冒矢石大小一百四十餘戰所向克捷雖行間宿將皆遜謝不如而部議敘錄僅及十之一二前後招降文武僞員六千二百有奇賊兵一十六萬五千五百有奇中樞敘武職加至二十九等銓曹敘有司亦如之獨以督臣轄全省不敘再奉

諭旨乃酌加三級久之追論温州擒斬逆賊及大溪灘曹平關破賊功授公拖沙喇哈番襲一次或有言公保障著勩酬庸稍薄公瞿然曰凡此敘錄皆出特恩雖胙土之榮無以或過且叨冒世職與洪南安比更何缺望焉公之勞而不伐有古大臣風矣二十一年秋以事平還杭州冬召入爲兵部尙書公久于兵間在部一切措注悉中機要二十三年進吏部劭諸吏坐曹聽行文書無得與銓事宿弊一清明年夏患癘

詔遣御醫診視頽尙方藥物既愈以老疾請

優旨慰留二十五年復請詞益切不允是年秋

命以吏部尙書入爲文華殿大學士辦理機務明年春致政歸二十七

年乘輿南巡過德州公迎謁道左

天語詢問曰卿精力尙健能乘騎至此耶

賜上尊玉粒慰勞倍至里居凡七載泊然無嗜惟以書史自娛臥病數

日遂逝距生前壬戌八月十八日年七十有三公初在言路以謇諤聞

彈劾貴要絕無鯁避既督兩浙則沈毅持大體不輕言笑而批答案牘

能曲盡物情入筦部務獄無所詭隨每

國家有大議片言擘畫確不可易中外敷歷四十年以精勤奉職以誠

恪事

主以天下善人君子得行其志爲愉快嘗言士大夫有名節易全名節

難如公之立身服官始終一節眞可云粹然無疵者矣以擬昔韓范司

馬之倫其奚愧與公諱之芳號鄴園先世自直隸棗強遷武定曾祖諱

鮮祖諱登雲考諱才望皆以公貴累封光祿大夫吏部尙書曾祖妣康

氏任氏祖妣蕭氏妣李氏俱累贈一品夫人元配胡氏封恭人贈一品夫人繼張氏封一品夫人人生四子長鍾麟筮仕岳州府同知夏逢龍之亂以守城功陞廣東潮州府知府次攀麟候選行人司司副早卒胡夫人出次容麟廩膳生次宜麟候選通判側室出娶皆名族女二人長適候選京職王爾梅次適廩膳生馮雲勤胡夫人出孫男十四人鍾麟出者十人壽泓壽澎壽滬壽湜壽濱壽沅壽湘壽演壽潮壽淞攀麟出者四人壽澄壽澗壽溥壽滋曾孫男二人本篤本厚壽泓出公從子牲麟舉丁丑進士館選時

上詢知家世遂擢入庶常

聖心眷公之深歿而不能忘聞者皆為感涕鍾麟將以康熙三十六年九月初五日奉葬東原塋兆以某為年家子屬為銘誼不敢辭謹據狀次第行實而系以銘曰

嶽鍾元氣公生應期持憲於朝正色侃辭咨命制府鎮東南陲三孽相挺註誤烝黎七閩震鄰阻險以窺屹然一身

天子倚毗遮扼要害危疆是措摧厥凶鋒用濟我師掃蕩廓清海邦載釐百戰之勛勒于鼎彝

召還廟廊以式庶司典樞典詮爰秉國維投老崖壑優游自怡出入將相黃髮羽儀韓琦隕星傳說乘箕偉烈不朽銘石永垂

又李文襄公傳沈德潛

公諱之芳字鄴園姓李氏山東濟南府武定縣人中前明崇禎壬午鄉試

國朝順治丁亥成進士除浙江金華府推官六載陞刑部主事旋陞郎中公嘗謂各省刑獄閱實內部若有一綫生路不求其生是由我殺之也審定囚籍多所平反五載授廣西道監察御史旋掌陝西道事代巡山西康熙元年停止巡方補湖廣道御史五載掌京畿道事又一載掌河南道事三載陞都察院左副都御史公在臺中共十有四年凡所建白關朝野大利弊彈劾不避權貴人咸畏之未一載陞吏部右侍郎明年以兵部左侍郎總督浙江軍務時十二年癸丑冬月也明年逆藩耿精忠之亂作先是吳三桂反雲南遠近震動公密疏請增設各路兵馬謂方今滇逆反叛賊氛未靖尤慮聞風蠢動浙為閩中門戶先事之謀唯在厚集兵力以為防守若不先上請臨事張皇顧彼失此雖任重咎無益於事又并請開試用火藥之禁蓋逆知閩藩之相繼叛逆預有以

防其變也至是聞亂卽統標兵竝杭協兵自杭赴衢時撫臣以下謂會城爲控制重地不宜移鎮公曰方今事勢所爭在衢倘上游失守不但全浙動搖江淮以南皆不安席矣遂裹糧倍道行抵衢駐節命副將王廷梅李承恩等禦仙霞關仙霞關者閩浙界扼要地也去江山縣百里關在嶺上級三百六十曲二十八長二十里雄踞眾山高插雲漢旁臨絕壑飛鳥莫度匹馬難旋與蜀之劔閣相埒賊眾鴟張豕突謀出仙霞公旣遣將先據險隘斷其出路次防溫屬平陽處屬龍泉諸要地水路溫屬黃巖台屬象山甯屬定海暨杭紹嘉瀕海要地茲耿逆構連海氛分道入寇公先調遣隣省兵捍衛之離海氛交以疑貳牽制之謀禦旣定徐議戰攻公之戰于阬西也先大閱將士於水亭門宣布朝廷厚恩陳說順逆大義眾感泣願決死戰遂同將軍賴塔薄賊營賊接戰久退入壁公率諸將進攻復大鏖戰賊發礮擊轟聲震天鉛丸如雨及公馬腹左右請少避公曰三軍司命在吾少退卽爲賊乘今日之事有進無退吾不知有身矣麾眾進兵大敗之翼日復進逼公氣益奮士卒益用命陣斬賊帥斂器械無算是役也提兵不滿四千擊賊數萬眾無不一以當百屢戰屢勝賊鋒大挫匿不敢出自是溫台金巖紹諸

戰皆捷或鹹渠將或縛黨逆有投誠者推赤心待之難民流亡失所者  
安插撫慰全活之竊據地方漸次恢復而衢州大溪灘之捷尤得長驅  
破竹之勢前此公數請于朝添兵前進部議責公保守公奏耿逆勁卒  
畢聚於衢今欲搗賊巢穴必由衢一路此處殲其精銳奪其關隘諸路  
不難瓦解雖賊將深溝重壘現守河西然其南則江山西則常山皆可  
間道截其糧運并斷歸路我兵一進使賊首尾受敵便可相機撲勦以  
通入閩之路云云會大將軍和碩康親王奉  
旨進兵王問公曰賊勢張能必勝乎公曰必勝已見奏疏中矣王復遣  
人問所策果萬全乎公曰今大兵已發若復猶豫則士氣沮喪人心疑  
惑何以成功遂詣王曰賊寇情形久在目中明日捷音至矣已而羽書  
報聞王大喜曰岳忠武之策楊么不是過也時賊將馬九玉方逼衢爲  
壘我兵由南門銜枚疾走遠出其後破大溪灘此直取江山一師也賊  
敗奔仙霞復謀屯聚而三關盡爲我有進退無措此直取常山一師也  
公形之條奏者如畫沙聚米俱有成算故動輒有功冬十月自衢入閩  
獲賊將馬鵬鵬素梟黠聚眾於常玉德興窺瞰江西閩浙形勢者磔之  
和碩康親王大兵進壓逆營耿精忠計窮勢極遁逃無路遂乞降檻送

京師公留師中且戰且撫靖海氛安隣境歷二載閩省始平方三藩謀  
逆吳逆橫滇尙逆梗粵耿逆又聲援相倚公以儒生秣貽臨戎阻遏衝  
擊批亢擣虛大小一百四十餘戰卒至殄殲大憝一切跳刀走戟之眾  
解甲離散化爲良民良由公之公誠仁智感格

九重孚信將帥懽服芽蘖綏懷毗庶故能成大功於危迫之餘以紓  
天子南顧憂也公之功故在保全兩浙平定八閩而豫章江南藉以屏  
障且使吳尙二逆失所憑倚魄喪膽落相次翦屠則蕩平滇蜀交廣之  
功公實爲之先聲云歲壬戌奉

詔班師公晉兵部尙書明年赴闕轉吏部尙書裁抑僥倖公正馭下諸  
吏奉行文書而已兩疏老病乞休

上以有功未酬不許丁卯秋拜文華殿大學士充纂修  
大清會典一統志政治典訓總裁公病益劇明年

子告回籍公既歸田杜門埽軌坐無雜賓唯架上理學書及經濟書數  
百卷晨夕繙閱如對故人常談討古今惟以天下善人君子得行其志  
爲快又朝中錄一正人必喜形于色曰天下蒼生福也身雖引退而倦  
倦於用人行政以奠



國家于久安長治類如此甲戌冬以疾薨于里第春秋七十有三是日天鼓鳴大星隕識者謂公騎箕之驗云遺疏上

上遣官致祭

賜全葬立碑諡曰文襄報勳庸也歷四十年

世宗憲皇帝命立賢良祠祀

國朝名臣德之大者以文正湯公斌爲冠功之大者以文襄公爲冠卽成周記功宗作元祀意也有文集若干卷奏疏十卷行間紀略二卷軍旅紀略四卷子鍾麟某官攀麟某官孫某某某官鍾麟出守潮州時公予手書曰唯公足以服人惟明足以祛弊唯廉足以養民惟敏足以集事誠官箴也子孫世守之今李氏仕者並有聲於時

論曰人臣非有功之難有功而不居之難也宋澶淵之役契丹請盟寇準頗自矜其功王欽若短之功名遂以不終文襄公自閩入朝無一言及滅寇事有問之者曰

天子廟謨將帥用命吾何有焉緬其冲懷得諸葛忠武郭尙父之遺風矣

君明臣良始終一德俎豆報功奕世不泯有以也哉

附錄十則

公爲金華府推官總兵馬進寶卽馬逢知駐金華性驕縱所部兵每抑買民物民深以爲患官吏緘口莫敢問惟公繩兵以法逢知泣訴道府欲令地方官監買公拒以無此例但令其照市價無擾民乃得安迨後逢知以不軌伏誅

年光祖

妾城當兵燹後土著流散市鮮寄廡卽有舊家舍宇悉爲隨征將卒占住民多野棲露宿之歎公逐一清查將營弁大廈一十一所兵房一百

五十七所給歸原主民始得聚廬而居焉

同上

巡道以獲盜大案委訊內有李四陳鸞等一案已論強劫坐十一大辟矣公鞫而疑之謂屠法與吳成二家同日被盜居非連地且相距甚遠李四陳鸞等既盜吳成何能又盜屠法審據屠法稱入門止覺二三賊吳成亦供不過三人呼鄰追散因辨初招開列多人之非引強劫論死之誤乃將李四陳鸞詳贓各杖餘犯竟行釋放

同上

公升刑部主事將司理讞稿稟次爲棘聽草自序曰凡所承斷一秉大公使訥者盡言譎者獻詐反覆推勘務得其情而已卽有不得甯爲閉閣勿爲峩簡又云念此三尺誠非武健自快之物鏡其情理以準于法

苛心想心兩無所庸

同上

乙未

上諭各部院衙門有才優經濟堪任養民者咨送吏部從優擢用滿漢堂官僉議舉公公力辭或謂公曰優升他人求之不得君奚辭為公曰余歷俸尚淺未敢先人後堂官乃以他人易之且語公曰失此機會勿

言同

後悔公曰若有後日之悔則無今日之言同  
庚子代巡山西按部所歷延見士民訪問疾苦以圖實政貪墨解綬勢豪屏息幸丑停止巡方公於文到日即將行過案牘槩送撫院掾吏白公須一加檢點公曰凡我所行無不可與人知何檢點為麾使去遂單車就道不移晷

同上

乙卯軍中獲敵營閒謀公漫詰之曰吾營中亦有爾營與相通者乎對曰有之間為誰乃言姓劉者不知其名公默意姓劉者必某也呼至訊之果供有提塘鄭君能現在隨營凡朝報緩急軍情機密皆漏洩與賊因立質得實置君能于法敵聞遂絕

同上

有交遊謂公宜為子孫田舍計公曰受國厚恩即捐糜踵頂猶恐難報何暇念及子孫哉或又謂封置大吏當

地方有事之日一介不取乃是小節公曰此豈小節總督爲一省吏治  
民生攸關敢不自律以正同上

公爲定亂記曰將軍嘗與余商進取之策余曰賊毒流于眾餉匱於中  
又內難交訂其勢自潰爲今日計者不難制勝于未取之先而難得心  
于既取之後假使大軍既入玉石不分肆其誅掠是益之虐也安責其  
背義以助叛乎兵貴威之以武感之以仁況禁掠則民喜離湯火而攜  
箠以迎縱掠則民欲保妻女而堅壁以守得失之驗瞭如也是宜于平  
日曉諭將士則臨時自無屠掠之慘而淪陷之區皆可乘勢而復矣將  
軍曰善余以是告誠鎮將亦莫不頰首奉命同上

公長子鍾麟升廣東潮州知府公手書示曰漢宣帝曰與我共治天下  
惟良二千石今之知府卽漢之二千石也良字最宜體認并手書惟公  
足以服人惟明足以祛弊惟廉足以養民惟敏足以集事四語俾長君  
懸之座右同上

謹案原編有嚴飭諱盜累民疏請禁雜流委署疏覺察奸蠹內外  
畫一疏請除無益條例疏四首已見經世文編今不錄

誥授光祿大夫勇畧將軍總督雲貴兵部尙書兼都察院右副都御史

世襲一等精奇尼哈番謚襄忠趙公良棟墓誌銘

張玉書

康熙三十六年三月四日光祿大夫勇畧將軍趙公以疾薨于甯夏里第時

車駕方西征聞奏震悼比從橫城口濟河下

諭內閣部院諸臣勇畧將軍趙良棟爲國家宣力奮庸厥功甚茂倏以疾逝朕深憫焉茲師抵朔方道經其門欲令皇子臨視奠醊可集議以聞於是臣等書偕諸臣言皇子親臨臣下之喪曠代希有將軍臣良棟膺茲異數豈獨一家之私榮凡百臣工無不感激隕涕明日次甯夏皇子臨喪舉哀賜奠如禮閏月復

頒諭祭文遣大臣致祭其子道臣宏燮中書臣宏煜先後詣行在謝恩

上皆召見撫慰之又數月允禮臣請以例子祭葬

賜謚襄忠嗣總戎宏燦歸自黃巖乃卜冬十二月日葬公于城西二十里某原而乞銘墓石於余余辱交公久素悉公厯官制軍忠勇大節與其生平慷慨質直強毅不撓之氣嘗私竊歎羨以爲古名將所不及而聖天子推心置腹眷倚之重以及自始迄終恩禮之隆尤足以獎勵功

動爲勞臣白首效忠者之勸余雖不敏敢不據所見聞撫拾其梗概而敘次之公字擎之號西華先世自陝西綏德衛遷居安邊逮公官甯夏因家焉故今爲甯夏鎮人曾祖某祖某父某官海州參將皆贈如公官曾祖妣某氏祖妣某氏妣某氏皆贈一品夫人公少工舉子業願侔儻有大志不屑束縛章句遂仗策從戎順治二年隨和碩英親王師入關中受知于制府孟公喬芳署潼關守備從征賀珍武大定等賊又從定甯夏叛兵之變因署其地屯田水利都司四年領兵平河西徇亂又單騎擒肅州僞總兵丁國棟擢補高臺遊擊十三年王師入滇以雲貴督標副將從征隴納諸苗康熙元年積功授都督僉事充雲南廣羅總兵官是時吳三桂專制滇南所補用官吏

詔部臣不得掣肘於是三桂調公貴州比喇鎮令進剿水西公方丁外艱力辭不許四年水西平乃聽終制三桂中藏叵測以牢籠人才爲務惟公先幾之哲不爲所用云八年補大同左都督十一年調天津明年冬滇逆變作四方叛賊蠡起甯夏亂兵劫殺其主帥勢甚猖獗十五年

春  
特命公提督甯夏馳傳往鎮撫之公見

上詞氣激慷請移家口居京師得一意辦賊

命賜第公至鎮集將佐宣布德意捕斬首亂四人餘不問邊境遂安公駐朔方四載念關中粗定而漢南巴蜀猶阻聲教自請率步卒五千獨當一路進取漢興恢復蜀地

詔下軍前諸大臣集議僉言大軍宜分興安棧道入堵山小川子四路並進需兵五萬人公曰兵貴精不貴多也自將五千人指入堵山徑入十月破密樹關取徽州復畧陽分遣裨將趨陽平關岷賊虛實仍條上調兵運餉事宜請兩路收川

報可特授公勇畧將軍十九年正月朔公師臨白水壩與賊夾江而陣江流湍湧無舟楫將士有難色公怒誓于軍曰視我馬策所指敢後者斬攬甲躍馬浮江而渡一軍皆渡賊駭愕奔潰追擊之于青山石硤溝歷舊州明月江屢戰屢捷甫十日遂抵成都先鋒奪門入公下令毋剽掠整軍登陴市肆晏如在城偽官及逆兵數千人疑懼不自安公悉以迎降奏釋眾皆感悅越數日奮威將軍王公進寶亦報保留之捷東西川以次收復事聞

天子降溫旨勞軍以

御書題額及弓矢橐韃名馬之屬先後頒賜甚渥是時湖南粵西方併力進師規取雲南

上念巖疆綏靖制府需人非得謀勇素著操履潔清兼資文武大畧者不克勝任遂授公兵部尙書兼都察院右副都御史總督雲貴將軍如故而以公之子宏燦爲甯夏總兵官隨軍進剿自收蜀以後苞蘖尙繁公經營一載反側者始定二十年三月追勦逆渠胡國柱於觀音巖十丈孔五月破關山象嶺渡瀘江七月復取建昌乘勝渡金沙江九月乃入滇時楚粵之兵已圍滇省城數月顧持久不能拔公周視壁壘謂結營遠賊得番息法當移軍逼之選入川精銳五千親冒矢石取玉皇閣進逼新橋城方據橋扼守復以計從上流濟師晝夜力攻凡八日而城下逆賊踞滇日久私斂充物一時諸將雲集多志在攘掠惟公率所部卒勿以一騎入城既奏凱卽懇請

陛見移師曲靖以待

命嗣後黷貨者纍纍致敗而公獨嶢然無滓其遠識確守卓然有古大臣風烈焉公於時已年踰六十



上念公久勞於外特允入朝二十一年冬授鑾儀衛使踰年請疾歸里  
二十七年以國恤會葬詣闕下三十年厄魯特噶爾丹蠢動邊塞大軍

駐朔方

詔公以在籍老臣預議軍事三十三年禁旅出塞公偕行指畫地勢兼  
以私財佐軍既還復

詔入朝明年追論前功特加一等精奇尼哈番世襲是年秋就醫江南  
賜御舟給驛三十五年復

召入朝時

上決策統師北征諮邊事甚悉公因疾不果從比及師旋遂  
賜歸明年西征

上方欲就詢公于里第而公竟不及待嗚呼是可悲也公結髮事戎行  
五十餘年大小戰數百未嘗敗衄御下嚴而有恩觸法者雖小必罰有  
才畧堪任者抗疏引薦常自偏裨積至大帥軍中甘苦與共一飲食不  
以自私入蜀之役裹糧涉險轉戰七十餘里而士卒咸樂為盡死無一  
怨言其能結士心如此故所向有功性抗直同事多不相下功成以後  
甚間者日眾惟

上知公深嘗格眾議曲賜維護自蕩平三逆以來閱十五年矣復屢  
詔旨鋪陳本末於平蜀嘉倡進之謀於克滇獎廉潔之操于是公之勞  
績久而益明而其行履卓犖無疵亦得皎然備著于

國史是公之得全其身與得全其名皆

上恩也百世而下聞之猶為感奮太息而況於公平而況公之子若孫  
乎是用備書以示來裔公生於明天啟元年十月距薨得年七十有七  
配郭氏繼配李氏白氏贈封俱一品夫人子五人長宏燦以左都督充  
浙江黃巖等處總兵官次宏燮御史宏煜內閣中書宏燁宏禧尚幼女  
三人長適庚子舉人強振猷次適候推副將郁起雋次適一等侯江南  
提督張雲翼孫六人公治家如治軍閨門嚴肅儼若公府諸子屏息侍  
立無敢有跛倚之容以是總戎憲副所至有政聲中書亦明敏練達皆

仰荷

宸眷云銘曰

天翊景運篤生人傑桓桓趙公威武惟烈早歲仗策從王于征手執螯  
弧目無堅城爰制中權爰總戎律嚴明有威卒伍整密三秦叛亂將驕  
卒狂風馳騰驅迅掃檣槍巴蜀如焚滇黔如悞獨提孤軍鼓行而南銜

枚宵濟莫敢齟齬直入蜀郛前歌後舞蠶叢既定揚旌渡瀘環城三匝  
拉朽摧枯賊首朝授降旛夜豎氛禩滌滌復我疆土凡此大功

帝曰爾庸事紀簡冊銘勒鼎鐘大官授膳尙衣賜服彤弓盧矢驍驪  
驟公之來朝

天子燕喜公之既歸

天子拊髀國有大事爰詢爰謀公徐一言等于圖球公之材武如鷲如  
虎公之智畧如風如雨公之精誠如火弗滅公之勁直如鐵靡折恃其

孤忠以報

一人白首不挫厥聲斷斷惟

天子明獎乃勳勞生有殊恩歿有厚褒以勞定國以死勤事

主聖臣忠近古莫二歷觀載籍如公不朽納銘幽宮垂示永久

又特進光祿大夫兵部尙書兼都察院右副都御史勇畧將軍趙公神

道碑銘嚴虞惇代某撰

康熙三十六年三月特進光祿大夫勇畧將軍趙公以疾薨於甯夏之

里第時

天子西巡朔方聞訃震悼特命

皇長子親臨其喪

諭扈從諸大臣赴弔閏三月六日

御製祭文遣大學士張某賜祭如禮其孤子宏燦宏煜等先後赴

行在所謝恩

上復召見慰撫所以褒崇寵錫之甚厚於是宏燦等撰事狀以隧道之

石請銘於余先是十五年春公以甯夏提督奉

命朝京師余時官翰林始識公之爲人後公凡四入朝余待罪政府與

公相周旋悉知公忠勇大節歷官制軍勝敵之畧與其生平慷慨質直

強毅不撓之氣未嘗不景仰歎慕以爲古之名將所不及而

聖天子褒崇寵錫推心置腹眷注之重與夫自初及終卹賚之隆尤足

以獎勵勞臣爲國家宣力效忠者之勸故於燦等之請輒條次其梗概

不敢以不文辭按狀公諱良棟字擎之別字西華先世自陝西綏德衛

遷居安邊及公官甯夏因家焉故今爲甯夏人公少儻有大志讀書

不事章句好觀古人忠孝節俠事嘗慨然曰大丈夫當爲國家出死力

定禍亂安用儒生咕嗶爲遂以順治二年從英王入關受知于制軍孟

公喬芳署潼關守備時賀珍武大定等構亂秦鞏從都督劉芳名討平

之又從定甯夏甯夏屯田水利都司四年帥師征河西克之單騎縛  
偽總兵丁國棟以功補高臺遊擊十三年經畧洪公承疇薦授雲貴制  
府中權從征隴納水西諸苗猓山谷峻險糧運不給諸軍多失律公獨  
號令嚴整所向克捷所得俘獲悉頒諸麾下無私留者積功陞雲南廣  
羅鎮總兵官

今上御極之元年也鎮府初設軍旅草創公振肅綱紀仁威並行伐叛  
柔服動合機要故能建威消萌烽火不警吳三桂尙制滇南調公爲貴  
州總兵官勒令進攻水西時公已丁外艱力辭不允墨綬卽戎水西平  
乃聽終制再丁內艱服除八年補大同總兵官加左都督考核軍政嚴  
而不私積弊爲之盡革十一年調天津總兵官天津素稱盜藪旗丁鹽  
販通行囊橐白晝大都攫人而奪之金吏莫敢訶問公至則申法制立  
程約張設耳目窮治根柢務在鋤強暴以惠孤弱於是奸宄屏跡部告  
無事十五年奉

旨以提督撫安甯夏入朝陛辭當是時三逆煽亂遠近響應甯夏叛兵  
叛殺主帥勢益猖獗公見

上詞語慷慨忠義激發請以家口移居京師使得專意擊賊

上爲之動容

特賜第宅銀米貂裘鞍馬弓矢之屬公卽日就道直抵延綏西路之定邊謀報賊兵由甜水河來劫餉左右請少卻公叱之晨夜兼趨搶入橫城賊不意公卒至遂宵遁公厲兵秣馬修器械屯餼糧訓練士卒以勇以義購倡亂者熊虎劉得圍國賢陳國忠四人請

旨正法軍中肅然無敢譁者在任三載威信大行關中已畧定矣公念漢南巴蜀未入版圖天兵稽誅民權湯火十八年上言臣願以所部練卒五千獨當一面規取漢興恢復川蜀

上下公卿議議者謂由興安棧道入堵山小川子四路前進須滿漢兵五萬人前後接應輜重不與公曰兵貴精不貴多也遂率甯夏本操漢兵五千自齎行糧由八堵山路徑進遂破密樹關取徽州復略陽分遣裨將急趨陽平關覘賊虛實十九年正月兵至白水壩與賊夾江而陣江水暴漲波濤沸天岸無舟楫賊矢如雨將士皆懼公誓於軍曰此臣子報國之日也視我鞭所向敢退者斬於是一軍皆奮呼聲震山谷遂振甲浮江而渡江流爲平賊錯愕奔潰師乘勝逐北過青川大敗之於石夾溝再過青菁山舊州明月江屢捷勢如風雨不十日而抵成都

先鋒奪門無有阻者遂入城城中人不虞我兵之從天而降也先是

上以公老於兵事詔問公收川事宜公條奏兵調發若何糧輸輓若何剿撫大勢若何經畫詳明言極剴切

上是公

詔悉從公議是役也兵雖兩道入而諸將方畧悉公所預定公既入城卽下令禁剽掠市價不變男女不聳赦脅從撫降附開誠示公宣布威德於是東西川及天全諸土司烏斯番族等皆傾心向化民樂更生焉捷聞授公勇畧將軍仍管甯夏提督事會雲貴總督缺人

上曰趙某謀勇茂著操守清廉雖係武員通曉文義其改爲總督遂以勇畧將軍授兵部尙書兼都察院右副都御史總督雲南貴州等處地方兼理糧餉時雲貴尙阻兵也公在蜀聞

命以年老疏辭不許卽自蜀入滇二十年三月追勦胡國柱於觀音崖五月破關山象嶺渡瀘江七月復建昌九月抵雲南時湖廣廣西兵已圍城數月矣公閱視壁壘謂營陣太遠賊得休息故久而不下恐師老糧匱法當移營以逼之乃自帥五千人急攻親冒矢石諸將益用命凡

八日城下蓋公爲將善料敵識地勢勇氣感發不避險難其教士悉用紀律信賞必罰臨陣對敵勸以大義故士卒皆樂爲之盡死所向有功平滇平蜀皆以此也是時公年已六十餘矣海宇蕩平橐弓歸馬

天子念公久勞於外特准入朝

命掌鑾儀衛鑾儀使事優老臣褒舊勲也公結髮從戎四十餘年大小之戰數百功勞奏最莫與爲比

明主深知其忠特加一等精奇尼哈番每寵以殊禮其方定蜀也

御書存誠匾額秋興賦

命公子宏燦馳至軍前賜之其既定蜀也

命宏燦再至軍齋賜弓一張馬六匹及宏燦以甯夏總兵陛辭也復賜

公

御製詩太極圖說刀一撒袋一其平滇而歸也遣使郊勞賜茶其掌鑾儀衛也時天寒賜懸狐裘懸狐帽各一其奉召入見也

天子停驂勞問呼將軍而不名其就醫江南也

命昇至觀德殿

聖躬親視憫惻者久之念其疾也則撤尙方珍物人參鹿尾以賜之念



其老也則擇內城寬大第宅以處之或手書存問或晝日三接大官賜食便殿命坐隆恩殊錫近古未有有大事必就公諮訪或召至京與諸大臣錯議必待公而決而公亦殫心盡瘁不爲依違在

上前知無不言無所隱避三十年師征噶爾丹

命公巡行塞外公相度地形施設營陣日以私財椎牛饗士馳驟沙漠據鞍顧盼英風銳氣老而不衰

大駕親征公又扶病入朝口陳兵事侃侃諤諤皆可見諸施行

上方深倚毗之而公以不起聞矣公學問通達才思警敏每奏兵事皆躬自操牘不假手於幕客曰軍國大事非他人可代也曰教子弟以忠義曰君恩深厚汝曹宜盡力居喪哀毀骨立若不能勝者治家嚴而有法門無雜賓蓋其內行醇備又如此公生於明天啟元年十月卒於康熙三十六年三月年七十有七娶郭氏封一品夫人繼娶李氏贈一品夫人再娶白氏子五人宏燦左都督管浙江黃巖等處總兵官宏燮山東按察司副使管天津道事宏煜內閣中書舍人宏煒宏熿尙幼女三人孫六人銘曰

天翊聖運篤生人傑桓桓趙公威武惟烈早歲杖策從王於征拳旗奪

蝥目無堅城爰制中權爰總戎律嚴明有威卒伍齊密畿輔之地奸宄  
是區挈持維綱以鋤以誅關中叛渙將驕卒狂風馳颺驅迅掃欃槍巴  
蜀梗化滇黔阻兵

主憂臣勞抗章請纓遂率所部練卒五千鼓行而南搗其中堅腹敗支  
披莫敢齟齬整旅入郛前歌後舞市不易肆農不輟耕鳥言卉裳壺漿  
來迎蠶叢既定揚旌渡瀘環城三匝拉朽摧枯賊首朝投降幡夜豎氛  
禳滌滌復我疆土凡此大功

帝曰爾庸告於文人勒鬯銘鐘大言授饒尙衣賜服彤弓盧矢驂駟  
駮公之在朝

天子是毗公之既歸

天子用思國有大事爰詢爰謀公徐一言奉爲圖球公之材武如熊如  
虎公之智畧如風如雨公之精誠如火不滅公之亢直如鐵不折恃其  
孤忠以報

一人至老不悔厥聲斷斷惟

天子明獎其勳勞生有殊恩死有厚褒以勞定國以死勤事臣忠  
主聖古莫與二厯觀載策此爲不朽我作銘詩垂示永久

誥授光祿大夫少傅兼太子太傅昭武將軍提督江南總兵官三等阿

達哈哈番諡敏壯楊公捷墓誌銘

張玉書

昭武將軍少保兼太子太保提督江南楊公以康熙二十九年十月甲申卒于位年七十有四訃聞

天子震悼命所司議卹議諡既上

詔加贈少傅兼太子太傅易名敏壯祭葬如制而碑版之文

特命翰林院掌院事桐城張公撰進榮恩備禮踰于常格何其渥也惟

公自束髮承祖父之烈從軍旅當

世祖章皇帝入關定鼎公年未三十卽以武畧知名於時歷官四十餘

年身經數十戰所向輒克比爲大帥而威望益重以功名終非才與福

并不克有此嗚呼豈偶然之故哉楊之先世居揚州之寶應縣崇儉鄉

勝國時有以軍功授後屯衛指揮使者遂爲義州人公諱捷字元凱曾

祖諱子隆祖諱應元皆襲世職父諱國棟以軍功歷陞義州城守參將

加副總兵母趙氏義州圍急自經死會祖以下皆贈少保如公官妣皆

贈夫人而公之叔父國楨國柱兄振並用邊將立功國柱振又先後死

事稱名臣此公之世次也明末公依洪文襄爲偏將國初以材勇擢山

西撫標遊擊歷宣大督標中軍副將九江總兵官加右都督以平嶺南  
功進左都督提督江西加太子少保調山東江南福建加少保兼太子  
太保昭武將軍授三等阿達哈哈番復調江南此公之官秩也方順治  
五年春公以副將統精銳赴粵會金聲桓叛兩江騷動公留軍討逆與  
固山額真譚公泰會師恢復彭澤湖口九江南康諸郡諸大帥見公驍  
勇大奇之遂題鎮九江明年逆賊授首江西平至十年秋復統九江鎮  
兵入粵克潮州十一年冬征閩駐師漳浦其城爲賊毀修築之十六年  
春奉

命提督江西是夏海寇犯江甯

詔公同江南左路兵相機撲勦事平仍駐瓜州轄廬鳳淮揚諸汛康熙  
元年正月移節山東會于七構亂登萊幾不守公偕禁旅按賊黨又以  
登沂二鎮分轄諸路兵畫地戍防羣盜始戢駐東省凡十二年  
詔移江南甫受事而三逆變作浙温台陷勢張甚有議設蒙古兵于松  
江者公不可曰閩越易與耳不日卽成擒矣至十六年閩逆已殄而海  
氛助虐者尙熾

特命公入閩提督水陸軍務公至簡閱士卒疾救漳泉屬邑之被賊者

察諸鎮中惟黃福甯大來敢戰可任乃親帥鎮兵會禁旅合攻惠安拔其城賊踞洛陽橋北斷橋以拒官軍公陰遣奇兵襲毀賊營出橋南賊腹背受敵遂潰泉州圍解而水師鎮協又先奉公密令于外洋牽賊勢至是犁沉賊舟殲勦甚眾漳州賊請撫眾議持兩端公登赤嶺望賊壘整暇謂此款我師也決計進軍皆敗走公以水陸勢難兼顧屢疏辭水師至十八年始拜昭武將軍

命專提陸師勦逆十九年賊屯漸山立十九寨公以計建七營擊破之遂復海澄自是偽將接踵歸附卽遣爲鄉導用三路攻克廈門雖臺灣未下而賊豎已胆落不復支矣公在行間兩載觸冒瘴霧抗疏乞身而廟堂深悉閩地蒸濕與公病非宜已先有還鎮江表之命公旣至雲間念舟山猶被賊踞爲江浙隱憂咨制府于清端公同浙兵會擣賊巢畧定其地於是設鎮置縣弛海禁焉公之遠謀制勝多在籌海而閩海旣清則吳越千餘里帖然無復烽燧之警故公之功平閩爲尤烈也歲當

甲子

天子修時巡之典自岱宗達於江淮公迎

駕淮北恩禮殊異越五載

乘輿再狩公迎覲如初而慰勞之殷賚予之盛視昔有加時余亦忝扈  
從嘗與公並騎行竊覩公顧盼矍鑠冠劍甚偉及沿江而下公獨乘小  
艇攜兩健卒晏坐于驚風白浪之中一時豐鑄舊勳咸指目歎羨余因  
舉昔人詩所云精神如破貝州時者謂公庶幾似之乃甫閱一載而公  
遽逝是可哀也已公之既疾革也召諸孫侍側口授遺疏惓惓以修海  
塘築寶山城復海邊沙船及派支軍食爲言蓋公所至之地有利必興  
有弊必革兵民無歧視而尤務施德澤于民易簣之頌志存體國語不  
及私以視古大臣之用心甯有媿哉公內行淳備撫孤嫠振貧困事至  
周悉載余前撰柏夫人誌中茲不備書夫人塔山參將諱永培女公元  
配也累封一品夫人子三人皆以廕起家懋緒陝西布政使司參議分  
守潼關道次懋紹雲南武定府知府柏夫人出次懋綸河南按察司僉  
事分巡大名道先公兩月卒側室黃出娶皆右族孫六人長鑄次文鐸  
俱國學生次錡次文孫懋紹出次鉞國學生次鎮俱懋綸出孫女七人  
曾孫女二人懋緒懋紹將奉公喪以康熙三十一年九月辛巳葬六合  
縣某山之麓以余知公深屬爲誌特纂公行事之大者而敘錄之如此  
銘曰

穆如其容大河喬嶽淵然其器金鎔玉琢手提鵠印口畫軍機若艦解  
結如犀燭微繁若東南天戈所指江南百粵觀公遺壘閩嶠焰虐長鯨  
鬚張聿翦羣醜用綏海疆迤還舊履作屏江表貌貅桓桓虎臣矯矯  
南巡迎謁

帝親勞軍蕃錫燕飲式渥且殷吁嗟老成允倚坐鎮將星儵隕

殊恩弗靳

天章崇獎

賜塋歸然貽厥孫子世澤永綿

又重修漳浦懷德書院碑記蔡新

漳浦北關內有懷德書院者自順治之十三年祀故昭武將軍提督楊  
公者也當是時鄭逆披猖海氛方熾公來鎮茲土修城郭禦寇敵綏眾  
靖民厥功甚鉅士民感公之德遂構祠而肖公像以祀之始名楊公祠  
後公提師入漳行部過浦士民喜公之再臨也又重新之更今名百年  
於茲矣歷時既久漸就傾頽今年春邑侯徐君尙忠謀葺治之民樂趨  
事不逾時而廟貌煥然適余請急歸省而匄余誌之余惟公之勳績在  
國史德澤治民心固無俟于余文而余文亦豈足以重公者雖然吾浦

人甘棠之遺愛也其何敢辭公諱捷字元凱先世隸籍維揚遠祖於勝國時仕遼因家焉遂世爲義州人其祖父伯叔皆以門閥技勇起家一時家聲藉甚公年十六卽能挽強命中結納英豪不事家人產維時內外交訌制院洪文襄公循地望擢爲偏裨我

世祖皇帝入關翦逆定鼎以材勇異等除授山西撫標中軍遊擊繼任宣大副將援勦兩廣遂擢九江總戎恢復江西郡縣會師廣東恢復潮城隨征福建江南提督山東凡歷數省皆有勦禦寇賊底定邊疆之功是公之勞績半天下非特一邑一郡之爲烈也而我浦人顧獨有私於公者則何以故蓋公兩次入漳在前甲午之冬以左都督充福建右路總兵官仗鉞以前戰無不克遂底漳浦海逆雖皆奔竄而郡邑名城率多拆毀無險可恃狂狡不難乘機豕突公至卽相舊址計工程課徵楨幹具板築匝月之閒垣墉雉堞言屹屹爲他邑先浦人賴之若防之制水恃以無恐是公之大有造於浦也粵康熙戊午海逆復煽據廈爲巢繼掠漳泉屬邑所至不守斯時也浦民望公若望歲焉日夜以幾公復奉

命督師入閩時制院姚公在漳羽書接踵請援公相緩急機宜以爲非



先安泉而即援漳將

傳十四

有腹背受敵之虞故既復惠安解泉圍而後疾驅

至漳與姚公商破敵策是冬即會兵克復江東橋萬松關己未春賊踞

險立巢以防我公絕其掠食要道勢弱益猖獗公帥師逆擊之遂潰又

遣將焚毀其舟生擒偽將賊勢益蹙庚申二月賊分據扼要立十九寨

以拒我師復聯絡重地以壯聲援公用計出奇破其所恃令首尾牽制

難以四應乃會師攻復海澄賊遂大窘隨乘勝飛咨督撫鎮將訂期三

路進攻廈門擊破賊艘敵淹死無算數十年逋寇逆窟一朝頓清是公

之大有造於漳即更有造於浦者也此浦人之所以沒世不忘也閩逆

既平

天子以公年老有疾仍調還提督江南以便調攝公在江南前後十五

年尤多異績不具詳公少際亂離書知姓名未能竟讀而用兵暗合孫

吳生平馭兵威而有惠于民瘼尤加體卹所以士樂用命而所至謳思

自公去後

國家承平無事文教誕敷公子孫繼繼承承敷歷中外而皆以文事世

其家今年夏公會孫景素適來觀祭是邦因巡屬邑至浦瞻拜祠下徒

徊入之喜浦人之不忘舊勳而能念公之德於不衰也浦民亦焚香載

道樂公之有後將世修其德而重有造於吾浦也是又觀察君與我民維繫無窮之心也夫因并記之

靖逆將軍甘肅提督一等侯諡襄壯張公勇傳陝西通志

張勇字非熊洋縣人初隸陝督孟喬芳以標兵勦賊南北山間有功順治五年從喬芳征臨鞏所向皆捷繼克甘肅河西底定授甘肅總兵十一年調隸經畧洪承疇滇黔平提督雲南康熙二年朝議謂玉門鎖鑰非勇不可復調甘肅諸番以大草灘豐水草覬爲牧地

遣廷臣至邊議可否勇執不可事遂沮又設永固協築八堡防守益嚴十二年吳逆倡亂延及臨蘭勇遣將復臨洮而自率兵圍蘭州晉靖逆將軍尋爲侯復

論兵部秦省重地軍務方殷張勇忠勤懋著謀畧優長凡用兵籌餉一切機務聽便宜從事勇聞

命益奮留西甯鎮兵圍蘭州而自率兵圍鞏昌取漳甯諸縣以絕其援又檄土官楊朝梁兵使勦潘瑀取洮州遂圍岷州久之鞏昌未下勇計賊勢窮必開門突走預設伏待之賊果出斬獲殆盡餘就撫蘭州亦降會盜般甯夏提督陳福邊人洵洵勇率兵赴之至中衛聞蜀賊出秦州

乃飛檄定甯夏而急回兵駐伏羌時西河通渭諸處皆沒於賊勇以麾下數百騎與賊相持者三閱月大軍既集賊始遁自是掃平涼下漢中蕩平之效基於此矣十六年加授少傅兼太子太傅進太子太師一等候世襲二十年以衰病再疏辭任不允明年疏請入覲

宴賜有加還鎮踰年卒

賜祭葬贈少師諡襄壯雍正十年入祀賢良祠子雲翼嗣侯提督江南

全省軍務

光祿大夫賜一品犇陵鎮總兵官胡公世英傳

錢維城

胡公諱世英字汝迪江南歙縣人世有隱德父宗信生二子公其次也生而狀貌奇偉日光如電落落無嗜好獨喜讀書明萬曆天啟之間海內大亂流賊徧天下歎曰民苦盜賊大大丈夫當奠安之安用矻矻效經生事於是窮韜畧攷古今興亡得失之故與天下形勢險阻扼塞挾策遊四方無所遇崇禎初避亂江右以親老不欲用于時既終喪還葬于歙及我

國家既定天下率勇士數十人見福建總督李公率泰于軍門李公一見奇之從人聞所向有功累擢至參將康熙元年徙湖廣總督中軍時

李來亨方據西山自鄖陽至夔州千餘里皆賊巢荆襄歲苦剽掠公奉  
檄隨提督某往征之至輒深入三戰破九女山奪其土城營之師進路  
益危阻澗不得上乃與提督分屯要害爲持久計賊合五營襲提督軍  
軍潰偏裨皆沒失印歸者二十九人賊乘勢衝公軍公斬賊數十騎聞  
大軍潰乃退守土城賊攻益急明日突圍出收其散卒以行提督至當  
陽以潰聞

上乃益發禁兵佐之復進攻與賊對山而陣緣崖攀藤頂踵相接比達  
賊壘礮石發則撤振自傾壓軍士患之公獨率敢死士奪隘而上死者  
過半乘間遂深入與賊夜戰鬱孤臺大破之左右皆降來亨自焚死初  
土城之難公突圍而出與軍士失賊眾追且近公勒馬叱賊賊輒止走  
復追之如是者三入隘口土垣當其前公以刀割所乘馬祝之曰吾他  
日能滅賊者過此馬忽躍起丈餘踰垣斃徒步走河下積屍藉藉躡而  
渡宿漢關神武廟夢神謂己曰吾使河神衛汝矣當復過此也至是獲  
賊將訊之曰爾曹昔追吾吾勒馬爾曹何故止皆曰將軍馬後四長人  
從行將軍止四人亦止則懼不敢前公知向者爲河神之助也祭于廟  
而歸四年禁軍復命陳前喪師始末逮提督以下并公入勘士民聞之

咸哭奔走塞城市爭饋酒食比入都提督諸人皆坐削獨公以前後功  
無恙七年調守均房先是布政使給軍餉每逾期或半給以爲常軍中  
多苦飢時又議裁督標兵故軍士夜譁公捕其魁眾寢定司使者乞救  
于公公曰禍基吝餉昔請多不應然事至此吾獨代其咎甯委罪使君  
議上

留中者久之復職如故均州爲武當之會舊有渡船宮觀諸羨悉謝不  
受禁軍卒無與市利郡多虎災羣虎遊于郭公祭于神輒止士民異之  
爲歌其事十二年冬擢副總兵守階州會吳三桂反滇南郡邑多陷漸  
及楚荊州民紛紛竄山谷當事者鑰城門禁之益亂夜四五驚總督蔡  
公毓榮以中軍不能支檄公代公以甲寅正月至受印告蔡公曰吳逆  
之叛祗雲貴耳酣豢垂老賜脾脆薄焉能持久自始反至今四十餘日  
不出此驚馬戀棧豆不足畏也驛報紛訛徒亂人意且靜勿擾民心亂  
則士氣奪請先開城禁世英且迎家屬入城矣又曰舉事必萬全度吳  
逆必觀望閩廣之釁而中出以乘其利吾先宿兵于江之左右塞浙東  
西路調河南鎮軍爲助按兵俟禁旅加兵糧汰老弱獎壯勇令提督馳  
常德以固門戶彝陵居荊州上游實襄鄧屏蔽亟加將增戍以杜旁衝

擢良將鎮長沙以壯廣西之氣此六者請卽施行餘世英悉任之蔡公  
從焉有婦人爲男子服出城者獲之公召四門父老引之去謂曰爾屬  
聞賊旦暮至乃亡命出城耳何用譎詭爲若不見去冬逃湖中者多以  
風浪死卽不死流離無所歸今大軍十萬且至爾屬居城中無恐吾家  
屬不日到吾且開城恣爾出入逾月家屬果至民驚喜相續入城二月  
提督率南陽卒五千人至時常德將以城叛公議曰若退師則湖南去  
矣當速止之選士二千騎三百渡江擇壯士三人授以計潛入常德營  
夜半縱火砲發賊驚潰叛將自殺人奪一僞幟來軍大振十四年言者  
以師老糜餉趣進兵於時多羅順承郡王率師公以本隊四百人前濟  
爾先鋒軍于太平街告蔡公曰兵貴乘時此來出不意賊援未至急攻  
城可拔也常德卽破岳州以上皆定矣蔡公曰俟王至請命對曰賊三  
日不出戰內虛也過此援且至大敵在前見可而進胡請命爲明旦饗  
士而進凡二日立砲矢下砲過右腋箭旣裂衣紐盡失後卒斃焉公神  
色不動督戰益急郡王至軍畢集遂合圍賊勢困伏壕以守會賊援至  
衝我軍爲二公揮左右張兩翼而上賊敗軍復合或曰賊援銳姑避之  
公曰賊遠來勢未定法宜急攻今三面爲賊一面爲水我陣一動求船

不得賊且掩至非利也若必欲爲退計則請令士卒直前如戰狀立幟而夜渡王軍先濟諸軍次之世英勒眾以當其衝可耳王大悅公乃拔營修塹壘布鹿角砲石分左右翼略陣旋哨多張燈火旗幟左出右入度師已畢濟乃分騎隊逆城十里而陣人持二炬賊驚不敢出夜半乃棄營壘登舟徐徐而行賊兵追之入營火發地砲皆作賊死傷無算十六年常澧諸郡飢米大貴賊將吳應騏合各邑折價免運又自糶其倉糧以爲利公聞之曰是天奪其魄也遂獻策曰賊所恃者糧耳今歲不登而自空其儲吾密令人盡買之而亟馳重兵截其上流糧道賊必飢窘因以大軍駐君山湖口諸汶不時撓之長沙自顧不暇秋冬間縱不拔岳州必可得也從之于是水陸並進公居前鋒權小舟直抵巴陵溯風而戰偪岸且近公呼而登曰得陳陵磯矣軍士皆登磯寨悉平則入湖碎賊巨艦二獲大小戰船三分兵搜勦近湖諸賊賊糧絕十八年正月應騏夜遁民迎入城公曰賊遁雖內怯且防其躉勿遽入賊室乃令毀垣入則溝通四圍皆穿竹藏火入堂則皆伏砲于機眾咸稱服二月師歸自岳州是年正月郡王奏荊州設隨征四鎮公以副將授後路總兵官至是奏四鎮功績有差

上命公以總兵官守荊州四月  
上以蜀楚要害難其人乃移鎮彝陵公遂奏取夔州重慶機宜請自率  
步騎乘便而進留郡王駐荊貝勒駐彝陵爲犄角之勢  
上可其奏先是彝陵鎮升提軍盡率鎮兵爲提標舩朦臆百無一存  
者公乃請調各郡汰兵冗員訓練之造戰船修器械晝夜並作提督徐  
公治都亦奏同征公曰蜀山雖峻險緩急可自由水戰舟行石罅漩窩  
中進退難此行吾實倡之願爲其難者徐公拱手曰服公度久矣遂禡  
師子德龍德麟從次於西壤去賊壘夾門灘百二十里縉舟者蟻綠峭  
壁間江石齒立激流衝其上舟非風順不得過徐公至曰兵貴神速水  
路艱且遲賊以吾糧未至守必疎乘此拔險何如公曰賊久知吾軍至  
豈不伏精銳以守宜結營俟糧緩以伺之十九年正月與撫軍楊公茂  
勳會于西壤議破敵之策公曰賊恃天險守三峽爲持牢計且以吾糧  
運難久駐于此陸防必懈請徐公立幟北山示不疑而暗趨南谷吾先  
以水師挫其鋒巫峽得陸防必走則乘勢亟進不然春水漲水陸皆阻  
嵐瘴侵人矣揚公大悅公出戒軍士佯曰且休三軍夜半令德龍曰魚  
腹河稍平可泊彼必伏此來襲我率眾往搜殺之衣其衣而伏之使人



持幟登香爐峯聞砲聲則應吾餌之出隘也翼日公泊魚腹賊哨果出  
戰未合佯退賊爭逐之砲起伏應前後夾攻之賊死者千餘人遂進攻  
巫山擒賊將王鳳岐斬其子徐公以兵從山後出會于巫山縣禁擄掠  
公令軍士人持米一升抵夔州城下食明日復戰所至披靡連下十二  
城三月初八日抵重慶僞侯譚納款諸城皆降公以久戰之後積勞成  
疾至是益甚奉

命回鎮彝陵公慮賊黨未盡日草利弊條畧不已五月二十有四日病  
篤強起草遺疏明日更服拜疏囑其子以忠貞守清白立身先孝弟無  
一語及他事頃之有聲磳磳然流于空遂卒時六十有三歲疏聞  
贈特進光祿大夫予一品祭葬准一子來京酌用卹典有加焉公生四  
子長德龍善騎射總督蔡公愛之初授千總加守備都司戰常德時招  
歸州山寨三千人稟公命不妄殺戮累官懷慶遊擊居宜昌次德輔延  
川縣知縣次德麟次德輝德麟年十五應

召入對稱

旨爲長沙衛守備五調至參將

誥授驍騎將軍驍騎勇畧過人能詩文愛書史事母王夫人以孝聞喪

親十年哭之哀每伏臘及新食輒流涕慷慨好施與不治家人生產嘗曰久宦之後子孫易爲奢又益之厚資以墮其氣鮮不爲患昔先大夫奮起百戰之餘卒成大功然時爲糲粥食之此以示子孫無居功無敢奢也吾將遺之以清苦使勿忘先人王夫人先世居楚之孝感每言故巨風士隄美驍騎奉遺命卜居且定康熙六十年卒于官子紹鼎紹曾自廣州歸葬于孝感遂家焉紹鼎甲戌進士第一官編修

論曰古稱名將豈特以勇哉蓋必有士君子之風焉張鳳鳴謂子曰吳逆叛時吾楚有胡公者力戰奪陳陵磯人比之常開平至今談者猶津津也吾以告胡子紹鼎鼎曰吾祖也因得悉公事鼎又曰吾祖自幼以孝弟聞兄早卒撫兄子如己子方旋師沔陽秀才童綬世以誣謫戍親老無以養號于途憐之爲脫其罪是年舉於鄉復贈金爲公車費嗚呼可謂君子矣

鎮南大將軍蟒公吉圖傳

魯會選

蟒吉圖滿洲人以任子起家沈毅饒將畧隨征滇黔力戰奪鐵索橋有功康熙十二年冬逆藩吳三桂據雲南反吉圖隨征南將軍尼某援粵東隸將軍舒恕戲下以功擢副都統守肇慶十六年春僞將馬雄圍肇

慶急吉圖潰圍北走江右藉兵賊簡騎三千人躡其後有白馬騎將刃  
及其馬尾吉圖旋馬發大黃殪其將騎不敢追韶州叛將張星耀邀擊  
復破之經七十餘戰踰三月甫達信豐賊將王割耳帥精兵萬人薄城  
吉圖以羸卒五百僞建旗幟鳴鼓挑戰潛遣奇兵出賊軍後賊墮水死  
者無算大亂敗走乃會將軍舒恕於贛且解南康之圍捷聞  
聖祖壯其忠勇志義璽書持節佩鎮南大將軍印且曰咨汝平兩粵之  
地將軍舒恕以下不用命者斬之是時吳逆方張叛者蠡起尙之信耿  
精忠以王爵叛孫延齡以將軍叛鄭蛟麟以總督叛劉秉政羅森曹申  
吉以巡撫叛馬雄李本深王輔臣嚴自明線國安以提督叛吳之茂祖  
澤清譚洪揚來嘉祖宏勳劉進忠阿爾泰郭義張星耀佟國卿苗之秀  
以總兵叛偏裨以下不能指數三桂獨探忌吉圖及傅宏烈宏烈者巡  
撫廣西兼撫蠻滅寇將軍卒諡忠毅者也七月僞將馬寶胡國柱寇韶  
州裹糧坐甲剋旦夕期吉圖自廣州疾馳入視北城衝急築土城賊晝  
夜力攻雲梯容百人蔽以黃牛之革繪以虎文吉圖令持夷矛攢刺之  
立斃賊踞筆鋒山俯瞰城中發礮擊城屋瓦俱震女牆頽壞守陴者不  
能立賴上城固賊終不能入遂築長圍爲坐困計而吉圖先遣一軍駐

白土邨衛廣州轉道軍食不贖賊又乘夜渡江東擊蓮花嶺遏援兵吉圖所檄江甯將軍額楚赴援與賊遇殊死鬪吉圖出城中兵夾擊之總督中軍又帥師西來以肇慶兵橫擊之賊大敗棄車重遁所殺賊將十三人生擒五人獲甲仗糧糗以大萬計韶城獲全吉圖之力也廣東既平遂請與將軍傅宏烈復廣西

聖祖許之八月同宏烈擒偽將軍趙天元復梧州陣斬偽總兵張元復梧州又遣參將周光裕復平樂十七年春吉圖兵少退保梧州

聖祖以廣西未定吉圖不進兵下敕曰蟒吉圖藉口綠旗營壘失陷退至賀縣徑回梧州頃論駐鎮梧州兼策高州今宜以時進討慰粵西百姓之心毋蹈前所爲閏三月吉圖進兵失利上章自謝還鎮南將軍印綬有

詔歸印綬立功贖愆五月擒偽總統饒一龍復鬱林州及北流興業陸川博白諸縣時偽總兵梁子玉賴天錫聞吉圖兵至固守白米嶺峒山勢壁削林箐叢密吉圖於四月十六日蚤乘霧蟻附攻破之斬子玉及賊兵五百二十餘級生擒二十一人天錫僅以身脫吳逆聞兩粵反正遣其孫世琮率僞將軍五人總兵十人練兵十萬由宜章寇廣西軍容

甚整總督金光祖與戰不利兩粵復震江甯將軍額楚赴援戰於藤縣  
又不利十八年正月世琮犯梧州吉圖分滿漢兵爲左右拒舍偏兩之  
一前進後休軍無憊氣兩軍紛拏火器具舉世琮不支大敗棄軍宵遁  
初吉圖疏言藤縣失守梧州勢危當出死力爭之至是鬪無不一當十  
聖祖有詔勞焉遂

命與傅宏烈進取滇黔師行有期而吉圖瘍發於項竟卒民思其功  
祀伏波將軍廟中卒之前三日有巨蟒蛇見於柳州山麓吉圖射之或  
止之吉圖歎曰吾爲民耳矢中其項蛇斃次日吉圖項腫大如斗遂不  
能軍人異焉

論曰以昔所聞將軍產時有蛇祥及死也以射蛇異哉蛇之有神也抑  
晉杜預宋蔡襄類耶要其功業偉矣

又鎮南將軍墓表 江士鏡

吏部郎中布瞻君出爲通州坐糧廳三年漕政無缺余爲文頌之君來  
謝曰余之得至於斯也非余之能皆吾祖舊德之所遺留也吾祖鎮南  
將軍削平兩粵以死勤事  
天子明其功而賞其異柄政者不可卒從吏議賴

天子仁聖始終保全後三十餘年

天子篤念舊勞推恩子孫布瞻得以王府典儀特授護軍參領不逾年

復擢文職爲吏部郎中自顧孱劣末由仰酬

聖天子恩澤惟念吾祖功在疆場獨

天子知之使遂湮沒無聞是上辜

聖天子之恩而重余之不德也今墓道之碑缺而不書先生其爲我表

之死且不朽余曰發潛闡幽史氏之事也其何敢辭

國初諱吳達禪者君之曾祖也以勇力聞從龍入關拔城得三等世職

阿達哈番鎮南將軍其長子也諱蟒吉圖襲職以固山大防禦江甯康

熙十三年吳三桂反滇中分道出討公以副都統率師入粵受將軍舒

恕節制分駐廣東肇慶府時向之信反粵中賊帥馬雄等圍肇甚急外

無救援城中總督金光祖巡撫陳鴻名麾下兵亦叛公提孤軍千餘人

突重圍出九嶺十八洞轉戰二千餘里身經大小七十餘戰時下馬步

行或士卒病以所乘騎與之其勞更甚踰九十月始度梅嶺聞賊將困

信豐公收復殘卒數百人救信豐至贛州與大軍會公自具棄城退保

狀請寘於法

天子不之罪也及實授副都統拜鎮南將軍兼護軍統領密授方畧四品以下官許便宜行事公宣布

天子德意勦撫並至康熙十六年夏四月大軍過梅關降其渠帥五月復南雄韶州時都統穆成格守韶州賊帥馬寶等有眾數萬環攻累月公保蓮花山以通餉道內築土城以拒之城潰者數矣賴土城獲全公遺書馬寶而身自與戰擊走之冬十一月師次蒼梧復桂林保潯州克柳州復南甯廣西悉平是時朝議欲急進兵滇黔公以兩廣初定賊將馬承蔭雖降猶宜為犄角拒守否則恐承蔭之躡我後也力持不可密疏奏聞已而承蔭果復叛公親督戰懸厚賞以巨砲擊之承蔭勢蹙復降遂班師南甯至潯州公疾作猶張目奮身調兵進發遂以卒公之既平廣西非逗遛不進也以貴州四川去滇中尙遠惟廣西密邇交陟可由安南至金沙江直達其境公將假道安南圖之會安南權國事莫王清與安南黎王構兵公撫諭其眾使與和好安南王感動遣使入貢復厚遣公公卻其儀而納其貢

天子嘉公智畧將召見公公辭曰封疆任重不可輕離必欲召臣臣謹圖形以進其後公薨於軍而由安南進滇之謀亦不復行矣公卒之日

煙雲滿室大星殞天鼓鳴其兆尤異者師方行軍士言曰有大蟒當道  
公曰殺之或曰公名蟒殺之不祥公曰我受

天子命勦除逆亂夫何畏軍士一發中其項公遂病喉不起矣年四十  
七喪歸南甯百姓感公德羅拜於道後爲繪像入五公祠以比公之功  
於伏波也公約士最嚴師行之日秋毫無所犯既克韶州賊將張星耀  
鼠竄公籍其家一資軍費不以一錢入私橐獲其妾良家子也有殊色  
公嚴禁軍士無污辱而召其父還之蓋公嘗奉其母夫人之命毋殺降  
毋掠民故謹守不失也初朝議削公世職與其弟博和禮弟曰吾兄平  
粵有勞績

天子常褒之吾不可使吾子孫復襲此職也乃以公之孫撫爲子使以  
次承襲卽布瞻君也後君得王府官復辭不就仍與其子始

天子不知君爲將軍孫也後乃知之故不次用君及爲郎中以公事望  
誤當奪四級亦特留本部皆異數也

史氏曰

天子之報功者厚矣故表而出之以勸天下之忠於君孝於親勤於職  
以無愧其先者曰講官起居注左春坊左中允兼翰林院編修南書房



舊直汪士鉞撰文并書及篆額康熙五十九年三月二十日  
漢軍副都統高公必盛家傳查義

公諱必盛字遜臣號際斯系出齊子高世爲渤海人唐貞元進士充鄆  
節度使判官曰沐者其遠祖也有明中葉徙遼陽爲遼陽高氏王父任  
國初從龍入關分隸鑲紅旗漢軍遂爲奉天鑲紅旗人父象極順治戊  
子科副榜爲廣昌令公自幼儻不羣讀書通大義善屬文時隨任廣  
昌同城守備高公一見奇之妻以女迨後廣昌公以事去官命公奉母  
入閩就季父任閩去京師六千餘里遇賓興不克還就試然學殖且日  
進矣未幾廣昌公歿家無餘貲既終喪喟然曰吾已不逮祿養吾父矣  
有老母在而區區佔畢何爲者由是棄舉子業益精騎射康熙元年有  
旨考較旗員子弟公中選除驍騎校甲寅藩變加提標遊擊從議政王  
南征有功晉秩右都督補江西饒州府參將十五年饒城改設總兵官  
裁缺復補廣信又以功晉左都督邁母喪哀毀骨立僚屬進慰曰公膺  
專城重寄餘寇未甯何至是乃稍進糜粥焉二十一年凱還王入復命  
上詢軍中才畧過人者王以公對尋陞授雲南開化總兵開化故裔地  
新闢處南詔極邊山阻而澗紆民獠雜居風俗獷悍萬里投宦類難悉

其情公彈歷十八年內安外攘寬猛交濟喁喁向化者延頸相望公之猷畧過人如此往建昌之役僞將易都督擁眾據新城矯箭控弦與我軍相持數月不能下公至身先卒伍冒矢石登城手刃數十人城破殲其眾賊遂平逆夥朱茂才乘機煽誘率眾萬餘人圍攻進賢王移師救之兩軍相拒賊方陣意氣驕橫公語同列曰亟擊之兵法在攻其不備同官聞言股栗公自率十八騎繞營右鼓勇殺賊賊蒼黃失措疑神兵從天下果驚潰王領之曰此驍將軍也解乘馬以賜其任饒州也城爲土賊陳鳳柯升王用等蹂躪殘破軍民四竄官吏匿他所空城荒穢公蒞任艤舟江滸時身被創痍困甚猶力疾入山搜捕餘黨招集軍民爲之生聚防護境賴以安迨饒城裁缺公方依江督董公奉檄會剿流賊江拐子楊一豹等次第蕩除又有朱道士者號召土民匿山倡亂標至風起公方蒞廣信不旬日得鄉導悉其虛實一夕率輕銳前往擒賊首於攢峰密箐間餘眾瓦解主軍欲盡誅降者公請分別首從全活者數百人前後著績甚偉

朝廷稔公名內擢副都統軍民僚吏聞報願詣闕留公公撫慰之曰天子聖明我去更有好官汝等第安職業循禮義自然衣食豐足與狂

獄無干眾聞公言歛歔泣下如失慈父母至京視事逾年循例請致仕  
退居安肅之后營村築敬軒軒儲古圖畫課諸孫讀書其中又二年卒  
年六十有九公生平畧地攻城雖以韜畧著然倥偬戎馬之閒恆以鉛  
槩自隨蓋所好然也任滇南日繪其山川要害疆域之遠近風俗之所  
向尙著夷人圖說一卷俾後之宦斯土者知所考鏡云子四人一殤餘

俱登仕籍

許少保貞江右戰功記

潘耒

余自少讀史傳見古名將戰功奇蹟未嘗不慷慨太息想見其爲人至  
如遷史之敘田單韓信班書之傳李陵陳湯范書述光武之戰昆陽耿  
弇之平張步其文精采倍常至今凜凜有生氣是知戰功待文以傳而  
文亦藉戰功以奇也頃在史館嘗恨明代將帥功績載於狀誌碑傳者  
都不詳惟唐荆川爲沈希儀敘廣右戰功曲折明盡如畫據以立傳更  
可比美前史故知當世不乏奇功特載筆者聞見有不及耳若今少保  
許公之鎮江右其戰功可得而述焉公諱貞字蓋臣閩之海澄人初爲  
鄭氏將康熙初年以左都督統所部歸朝  
詔仍其官駐九江已而移屯贛縣居久之滇黔變作湖湘諸郡皆陷而

耿精忠反閩中出兵杉關廣信建昌撫州諸山賊蜂起應之州縣大半  
破沒其所遣驍將賈振魯者規取贛州以通楚寇陷石城圍甯都勢張  
甚虔人震恐公在屯間發憤歎曰鼠輩猖狂乃至是乎大丈夫立功名  
報國家此其時遂以十三年五月二十四日起兵赴援時公閒居久部  
曲多散去衣甲器械不完而公常教人舞籐牌用挑刀人多練習乃椎  
牛釀酒集屯丁諭以忠義大節聞者皆感奮得選卒四百率之行賊眾  
數萬營於黃坊所過無敢撓鋒見公偏師前不爲意公大呼突陣跳盪  
無前籐牌軍一躍數丈人馬辟易搏戰數十合賊眾大潰斬首數千獲  
甲幟礮矢無算於是軍容始可觀乘勝解甯都之圍復石城斬首三千  
八月賊圍興國急公馳救之立解勦零都瑞金盡平天華長樂伍遷白  
奇諸寨招降李婆紅旗石寶諸寨賊眾數萬出難民三萬餘人囑有司  
加意拊循督撫交章上其功加太子少保時公威名日盛閩寇畏之潛  
遣辯士以高爵誘公他寇亦多遣人致書進說公一不啟書械其使以  
聞願遣閩人饒元結偽總兵張存歸朝存据順昌以牽制延汀耿孽大  
患苦之於是

天子知公赤心可大用擢公總兵轄湖東三郡駐節建昌以十四年六

月視事未逾月復宜黃崇仁樂安三城建昌先爲賊据安親王復而守之顧環城數十里皆賊賊營於麻姑山蕭家爐楊華芙蓉諸山寨者無慮三四十萬逼城而軍耽耽下瞰親王以爲憂公徐白王曰賊雖多易與耳請破彼一寨以爲驗王尙未知公之善用兵也姑應曰諾公出賊不意以夜二鼓疾馳勒蕭家坪冒險突上黎明破之王晨召公不至聞其出勦也大驚惟恐失之已而公還獻捷王乃大喜賜食慰勞於是王知公果良將可屬大事遂以建昌委公而身率師自袁州進攻長沙留滿兵五百公部卒僅二千賊聞王軍西行度城守益單以十二月二十八日併力攻城一軍駐城東之沙坪一軍駐城東南從姑山一軍薄南門城東多民居沙坪平坦他將請攻之公不可分遣裨將守南門而自將銳卒衝從姑山高山賊渠屯焉不虞我軍猝至倉皇迎戰大敗遁走而賊之攻南門者方鳴張公白山馳下掩出其後賊大驚表裏夾擊盡殲其眾自是賊膽落不敢復議攻城矣捕得生賊言賊度官軍必攻沙坪則出兵糜我而從姑山之眾下焚民居官軍不得還城卽破矣今驟攻從姑則沙坪之眾弗能救也諸將乃大服麻姑山最高賊眾數萬踞其上環而寨者數十里一急百應公默計方春水發溝澗皆成河諸寨

隔絕乃可破也於是按兵休士顧就麻姑山麓平敞處時時引兵操演  
賊初見兵來以爲將攻已也擐甲執戈以待公操罷徐回久之賊益懈  
不爲備春水暴漲賊爲浮橋相聯絡公密具舟積薪其中十五年十月  
晦公復引兵出操士卒皆不知將攻麻姑也抵山麓忽引而上直突賊  
營賊分眾掠糧于外留寨者不意大軍猝至惶駭不知所爲而別校分  
駕薪舟燒絕浮橋他賊不能相救一日破六十餘寨積屍滿谷煙焰塞  
天於是南山之賊皆盡而城東二聖山閩寇耿二營焉其餘沙坪紅門  
梓木嶺諸賊蜂屯蟻聚不可勝數公計賊眾且有備故爲緩攻以懈之  
五月五日當競渡眾謂賊在近請已之公故縱龍舟往來盱江置酒張  
樂會諸將聚觀賊熟視不敢出聲息公益知賊虛實遂以六月六日進  
勦二聖山直衝中堅賊所持礮火弓弩我軍肉薄而上藤牌蔽身天石  
不能傷長刀一揮甲札皆徹賊大敗耿二踉蹌遁去連破四十營斬馘  
無算餘賊盡走入杉關自王師西行建昌危于累卵公獨守孤城者七  
月以饑疲之兵二千當方張之賊數十萬而胸有成算整暇從容卒能  
以少擊眾以弱摧強盡殲羣寇安簡二親王屢致諭書褒美文武大吏  
倚公如長城焉七月復金谿南豐八月復廣昌九月復瀘溪累功授世

職十月破賊蓮塘十一月援南豐十二月復新城追賊至杉關於是湖  
東三郡無賊而吉安寇韓大任者驍勇有智數號小淮陰與官軍久相  
持不下糧盡出走以十六年五月入樂安簡親王度攻大任非公不可  
檄公提師擊之遇于跌水嶺大任所將多邊關勁卒垂死猶反鬪公與  
之一日八戰彼此疲極坐睡少頃輒起復鬪我兵益奮寇不能支奔甯  
都眾猶二萬屯於都湖立木城畫塹而守公攻圍兩月寇出挑戰輒不  
利乃棄城潛遯公星馳追躡蹙之于永豐又蹙之于黃塘虎峒其眾死  
亡畧盡乃投閩康親王軍前乞降以公窮追力戰故也十七年正月平  
廣昌之籐弔楓樹二寨諭降僞將饒大武等五十餘人兵民五千餘二  
寨舊稱天險四面懸崖攀籐猿掛而上頂寬平可容數千家有池不竭  
粟支數年公乃營于對面永安山多製火器會天大風發礮焚其廬賊  
升屋救火遙縱火筒擲之不得上須臾灰燼賊窮乃乞降先是麻姑二  
聖之賊既滅公忿餘黨不足窮捕遣人四出招撫僞總兵揭斯進等僞  
將軍楊玉太等僞都督余雄等先後受撫者三十餘輩凡將吏千餘人  
士卒數萬其或不聽命亦不遽加兵徐徐曉諭之初過廣昌僞將軍劉  
汝桂等不就撫而潛遣人入營探聽公引令遍行營中曰吾軍虛實恣

汝觀之歸語汝將欲降則降不降善守汝寨吾今未加兵俟軍還仍不降攻汝必矣宜固守某險要不能守而破者玉石俱焚毋悔廣昌民欲難髮公曰徐之吾未能留兵兵去賊復至必僂汝吾歸滅賊汝難髮未晚也民皆感激泣下汝桂等服公威信亦率其眾出降公仁而有度皆此類也諸山寨初或恃險不即降及籐弔楓樹平相願託曰二寨猶破吾等向若不降無噍類矣是年七月

優詔褒獎晉公提督兼轄饒州南昌吉安凡六郡其冬

命提督江西全省軍務所部將領俾自擇補用不拘成例以公熟識其才得收指臂之效也刺賊江機楊一豹者踞江許山爲巢四出剽掠公會師勦之自錢村入賊立木城爲三關深溝堅壁兵不得進寨後有高山公遣人間道攀援至山頂下瞰賊巢第苦乏水饑疲不復能關乃命殺竹爲筒盛斗水人負一筒裹乾飯宵行黎明至山巔恣飲飽餐以待賊望見上山迎鬪我兵乘高擊之賊披靡墜崖谷死乘勢至寨後鳴角聲炮賊守關者聞之謂官軍已入寨皆散走大軍長驅而進盡翠其巢賊首走雞公山猴子嶺封禁山皆絕險人跡不到輒躡其後襲破之又走洪山山有黃巢殿自昔官軍無至者公又破之十八年四月追賊至



江澗山卽賊巢爲營賊謀夜劫營公諷得之令鑿地三尺以其土壘垣三尺城塹立就士露刃植立垣下戒賊至毋得出聲而別遣將伏林中賊果夜至忽見垣塹嶄然大驚發火見垣內白刃如林惶怖反走伏兵出賊狂竄相蹂躪死進破詹源老巢江楊等亡入閩歸款論功復加一世職二十二年二月

命移鎮廣東公自起兵至是首尾九年凡遷官四加銜一加級五予世職三大功奏聞者二十餘次其餘小小戰績不可勝紀惟天子嘉公忠勇召入陛見褒勞再三公叩首言國家洪福

主上天威小臣何功之有  
上問在某處某處殺賊幾何公又叩首言臣逢賊便殺不記多少  
上笑而頷之知公樸誠益重公公爲人廉謹和易謙退不伐平居左圖右書接對士大夫恂恂儒雅不知其爲元功宿將也持軍嚴整禁部下勿掠勿淫勿殺降勿俘良每出軍以都縣僚吏偕行破賊得難民婦女輒帷置別室屬吏謹視之遣還其家破寨得積穀令軍民隨力負取軍敢奪民僂以徇凡收復城邑他將有議攻山寨者公曰方亂民結寨自保不皆賊也止勿攻所全活不可勝計以故江右人深德公家祠戶祝

迄今思慕弗衰云嗟乎自三藩倡亂東西交訐潭岳撫信之賊中相隔  
閩者凌州一綫地耳公崛起屯開扼其喉而不得進使賊連雞之勢不  
成遂乃偏師橫騫擊風驅令麻姑玉笥之間空無賊巢王師得以開  
長沙掃滇孽而粵閩二寇縮爪鉗牙坐困井底同歸殄滅公之功在社  
稷不細矣而

天子重公尤在矢心報國丹誠不渝蓋嘗論將帥如公忠壯者無幾人  
余從左右史之後謹據功狀論而次之俾異日傳功臣者有考焉

1578261

文科教學研究室

碑傳集卷十四

貴筑黃彭年編訂

106-820



21101000158089